
A Directory of leading Indo-Pak Gojri Writers

(A Sublime History of Gojri through Ages)

جدید

بنجارا

تحقیق و ترتیب:

ڈاکٹر رفیق انجم

پیش:

جموں کشمیر انجمن ترقی گوجری ادب

جملہ حقوق محفوظ

	:	نام کتاب
	:	تحقیق
9419422770/9419054203	:	ڈاکٹر رفیق انجم
9419705664	:	کمپوزنگ
	:	سرورق
9419404640	:	جاوید اقبال
	:	اشاعت
	:	2007ء
	:	تعداد
	:	500
	:	قیمت
	:	Rs.500/-
	:	پرپس
	:	جے کے آفسیٹ نئی دہلی

ناشر : جموں کشمیر انجمن ترقی گوجری ادب

- پتہ:
- ۱۔ کتاب گھر، کنال روڈ جموں ۱۸۰۰۰۱
 - ۲۔ کتاب گھر مولانا آزاد روڈ سرینگر۔ ۱
 - ۳۔ ڈریم لینڈ کالج روڈ راجوری ۱۸۵۱۳۱
 - ۴۔ بام شریا چنڈک پونچھ ۱۸۵۱۰۱

اس کتاب کی طباعت کے لئے جموں و کشمیر پبلسنگ ایڈمیٹیو سے مالی امداد حاصل کی گئی ہے۔
کتاب میں ظاہر کی گئی آراء سے پبلسنگ ایڈمیٹیو کا بالواسطہ یا بلاواسطہ کوئی تعلق نہیں
اور نہ اس ضمن میں ایڈمیٹیو پر کوئی ذمہ داری عائد ہوگی۔



سرور اللہی کا پاک نال

ترتیب

11	خواجہ محمد یوسف ٹینگ	پیش گوئی:
19	ڈاکٹر صابر آفاقی	انجم شناسی:
23	ڈاکٹر رفیق انجم	اپنی گل:

الف: قدیم گوجری شاعر

صفحہ	تصنیف	دور	شمار نال
30	ست پنتھی رسائل	م: ۱۰۹۴ء	1 نورالدین محمد (ست گرو)
31	جواہر خسروی	۱۲۵۳ء.....۱۳۲۵ء	2 حضرت امیر خسرو
35	خوش نامہ	م: ۱۳۹۶ء	3 شاہ میراں جی
36	کدم راؤ پدم راؤ	م: ۱۳۲۰ء	4 فخر الدین نظامی
37	خزائن اسرار اللہ	۱۳۸۸ء-۱۵۰۶ء	5 شاہ بہاؤ الدین باجن
40	واحد باری، نوسر ہار	۱۳۵۹.....۱۵۲۸ء	6 سید اشرف بیابانی
41	دیوان محمود دریائی	۱۴۱۹ء.....۱۵۳۴ء	7 قاضی محمود دریائی
42	بیچک	۱۴۴۰ء.....۱۵۱۸ء	8 امیر کبیر (بھگت کبیر)
44	جواہر اسرار اللہ	م: ۱۵۶۵ء	9 شاہ علی حیو گام دھنی
47	مکتوبات میاں مصطفیٰ	م: ۱۵۷۶ء	10 میاں محمد مصطفیٰ
49	ارشاد نامہ، کلمۃ الحقائق	م: ۱۵۸۲ء	11 برہان الدین جاتم
51		م: ۱۶۰۵ء	12 سید اسحاق سرمست
52	خوب ترنگ	۱۵۳۹ء.....۱۶۱۴ء	13 خوب محمد چشتی

53	۱۵۴۷ء.....۱۶۱۳ء	میر ابائی	14
56	۱۵۵۶ء تا ۱۶۱۱ء	محمد قلی قطب شاہ	15
57	۱۵۸۰ء تا ۱۶۱۱ء	عادل شاہ ثانی (جگت گرو)	16
58	م: ۱۶۲۵ء	مولانا محمد افضل پانی پتی	17
59	م: ۱۶۵۷ء	شیخ محمد امین بھارتی	18
62	م: ۱۶۵۹ء	ملا وجیہ الدین دہلی	19
64	م: ۱۶۷۴ء	میاں محمد نصرت نصرتی	20
65	م: ۱۶۸۸ء	میراں جی ہاشمی	21
66	م: ۱۷۲۰ء	ولی دکنی	22

ب: جدید گوجری شاعر، ادیب تر محقق

شمار	ناں	تاریخ پیدائش و وفات و مقام	صفحہ
1	حضرت میاں عبید اللہ لاروی	1863ء سٹوڑہ ہزارہ 1926ء بابا نگری	68
2	عبدل پونچھی	(باباجی صاحب لاروی کا ہم عصر)	70
3	مہر علی نون پونچھی	(باباجی صاحب لاروی کا ہم عصر)	72
4	سائیں قادر بخش	1858 پونچھ 1938 ایتی راجوری	74
5	میاں فتح محمد درہالوی	1875.....1945 پلپارنی راجوری	79
6	چودھری دیوان علی کھٹانہ	1883 دھنور راجوری 1967 راجوری	83
7	چودھری خدا بخش زار	1888.....1982 مڑھوٹ پونچھ	85
8	شمس دین ہجوڑ پونچھی	1892.....1984 سیالاں پونچھ	97
9	میاں نظام الدین لاروی	1897.....1972 وانگت کشمیر	100
10	مولوی علم دین بن باسی	1899 بارہمولہ 1969 کاچھون	106
11	مولانا مہر الدین قمر راجوری	1901 راجوری 1976 ایٹ آباد	109

116	1903 پٹھانہ تیر مہنڈر 1987 نیٹریاں	سائیں نقر دین ترابی	12
119	وفات 1994 پنہنڈ	قاضی جلال دین	13
123	1912 جموں، گوجرانوالہ پاکستان	چودھری احمد دین عنبر	14
125	1913.....1993 بھلیہ ڈوڈہ	چودھری مہر دین ڈوٹی	15
126	1914.....1977 بانڈی چچیاں پونچھ	چودھری وزیر محمد رکلہ	16
127	1914 ڈنڈوت رجوری 1996 نوال شہر	مولانا محمد اسماعیل ذبیح	17
135	1916 ڈنڈوت رجوری 1993 نوال شہر	چودھری محمد اسرار نیل مجبور	18
141	1916 لمبیڑی رجوری	چودھری محمد اسرار نیل اثر	19
152	1916.....1998 ٹڈیاں راجوری	چودھری محمد علی بیتاب	20
155	1916 ہاڑی پونچھ	چودھری حسن دین حسن	21
159	1917 اوموناٹ کشمیر، رام بن	چودھری محمد حسین بیدار کھٹانہ	22
162	1920 سنٹی پونچھ 1985 کھڑک پنچہ	سید حاکم شاہ قمر	23
164	1920.....1997 بانڈی پورہ کشمیر	مولانا غلام قادر راز	24
166	1922 پہلناٹ واگلت کشمیر	میاں بشیر احمد صاحب لاروی	25
168	1923 گوباڑی مظفر آباد	مولانا عبدالرحیم ندیم	26
171	وفات 1982 جموں	چودھری عبدالکریم پرواز	27
174	1925? رام بن، رام بن	چودھری قطب الدین عارف	28
177	1927 سانہ 1987 جموں	چودھری فتح علی سروری کسانہ	29
186	1927 رام بن 2001 رام بن	مولوی غلام رسول ڈوٹی	30
188	1930 بالاکوٹ، ہزارہ	چودھری عبدالقیوم سوز ہزاروی	31
190	1931 پروڑی رجوری	رانا فضل حسین رجوری	32
202	1931 مہنڈر پونچھ	چودھری وزیر محمد عاصی	33
204	1932 دھنور رجوری 1977 میر پور	چودھری غلام احمد رضاء	34
205	1933 بارہمولہ 2003 کالاکوٹ	چودھری نذیر احمد نذیر	35
211	1933 گوباڑی مظفر آباد	ڈاکٹر صابر آفاقی	36

221	1934 کلانی پونچھ 1995 میر پور	چودھری فیض اللہ چوٹی	37
223	1935 کرنال ہریانہ	چودھری ملکھی رام کشان	38
225	1938 گڑگاؤں ہریانہ	چودھری رام پرشاد کھٹانہ	39
227	1939 کلانی پونچھ	چودھری خادم حسین قمر	40
228	1940 بہروٹ راجوری	غلام نبی شاہباز	41
232	1940 وانگت کشمیر	چودھری اقبال عظیم	42
243	1940 کلر کٹل پونچھ	چودھری فضل حسین مہنتا	43
246	(1941.....2004) بالاکوٹ پاکستان	چودھری غلام حسین اظہر بانیا	44
248	1942 گنڈی گجراں (کرناہ)	چودھری قیصر دین قیصر	45
250	1942.....2000 مرگاں راجوری	چودھری سرور حسین طارق	46
255	1942 گورسائی پونچھ	چودھری نسیم پونچھی	47
266	1942 چک کترو، پونچھ	چودھری نور محمد نور	48
272	1943 ساج، راجوری	پروفیسر محمد رفیق بھٹی	49
275	1943 کلانی پونچھ	چودھری محمد امین قمر	50
277	1943 کھنڈیر پونچھ	چودھری لعل حسین گوہر	51
279	1944 گوباڑی مظفر آباد	چودھری مخلص وجدانی	52
285	1944 ہاڑی سرکوٹ پونچھ	مولانا عبدالقیوم راز	53
288	1944 آلن گڈول (امت ناگ)	چودھری مختار الدین نسیم	54
293	1944 مڑہوٹ پونچھ	چودھری محمد حسین سلیم	55
295	1944 چلکانہ، پانی پت	جگدیش چندر شرما	56
297	1944 اندر ڈوٹھ راجوری	چودھری عبدالغنی عارف	57
303	1945 مجالہ جموں	چودھری برکت علی باگڑی	58
305	1945 کلانی، پونچھ	ماسٹر عبدالغنی چچی	59
306	1946 جہلم پاکستان	طرب احمد صدیقی	60
309	1946 پلاگٹڑا راجوری	منشی خان چودھری	61

311	1946 ریکہ جموں	چودھری فیض کسانہ	62
314	1946؟ عباس پور	غلام حسین غلام	63
316	1947 واگلٹ کشمیر	میاں ممتاز احمد	64
317	1947 بہروٹ راجوری	ڈاکٹر صابر مرزا	65
321	1947 پروڑی راجوری	چودھری شاہ محمد شاہ بہاڑ	66
328	1947 ساج راجوری	چودھری نذیر حسین فدا	67
330	1947 گنڈی سرکھوٹ	خوش دیوینی	68
334	1947 کلر پلوامہ	چودھری میر حسین فدا	69
335	1948 رائے پور کھیری، جموں	چودھری غلام حسین ضیاء	70
336	1948 بھٹھیاں راجوری	چودھری لعل حسین پرواز	71
339	1949 کٹھوہ	چودھری عبدالحمید کسانہ	72
340	1949 پچیاں، جموں	چودھری غلام رسول اصغر	73
342	1950 جہلم پاکستان	پروفیسر یوسف حسن	74
346	1950 دچارناگ سرینگر	چودھری اے کے سہراب	75
347	1951 شاہدرہ شریف راجوری	چودھری احمد شناس	76
349	1951 بھگوتہ، ڈوڈہ	ڈاکٹر محمد اسد اللہ وانی	77
350	1951 بانڈی پچیاں پونچھ	سکندر حیات طارق	78
352	1952؟ میرپور	منیر حسین چودھری	79
361	1952 برنیٹ، بونیار اوڑی	چودھری محمد شریف شاہین	80
362	1952 پیرا گواہ کالا کوٹ	چودھری محمد اسحاق بجران	81
363	1952 درنگہ کرناہ کپواڑہ	لعل الدین مظلوم	82
365	1952 اڑگی راجوری	چودھری وزیر بجران	83
366	1953 کٹھوہ	چودھری کرم دین چوڑہ	84
368	1953 بانہال	محمد امین بانہالی	85
370	26.2.1953 گرکوٹ اوڑی	ڈاکٹر نصیر الدین بارو	86

371	1954 کپواڑہ	چودھری غلام رسول آزاد	87
372	1954 کالا بن مہنڈر	چودھری محمود رانا	88
373	1954 جہڑ جینڈالی، مظفر آباد	مولوی فقیر محمد فقیر چشتی	89
374	1955 کالا بن مہنڈر پونچھ	چودھری غلام سرور چوہان	90
377	1955 کپواڑہ	چودھری غلام حیدر عادل	91
378	1955 سنئی پونچھ	چودھری محمد اشرف چوہان	92
379	1955 فتح پور ڈنہ رجوری	چودھری انور حسین انور	93
382	1956 نواں شہر ہزارہ 1998 جموں	چودھری ابرار احمد ظفر	94
390	1956 پروڈی رجوری	رانا غلام سرور صحرائی	95
398	1956 وانگت کشمیر	چودھری اشتیاق احمد شوق	96
403	1956 پلانگڑ رجوری	چودھری منظور حسین گلشن	97
405	1956 ہل جم پتھری شوپیاں	چودھری عبدالرشید ناز	98
406	1957 موگلا کالا کوٹ	چودھری مرزا خان وقار	99
408	1957 مظفر آباد	چودھری سعید بانیا	100
409	1957 کٹیاں آلی، بارہمولہ	چودھری عبدالرشید فدائی	101
411	1958 مظفر آباد	نذیر ذرانی	102
412	1958؟ دداسن بالارا رجوری	چودھری محمد قاسم بجران	103
415	1959 کالا کوٹ	چودھری محمد منشاء خاکی	104
421	1960 کھنڈر پونچھ	مولانا عابد حسین رحمانی	105
422	1960 گریز کشمیر	چودھری گلاب دین جزا	106
424	1960 وانگت	چودھری ارشاد احمد قمر	107
427	1960 بارہمولہ 1993 اوڑی	چودھری محمد لطیف قمر	108
429	1961 ہل پتھری اوڑی	چودھری لعل دین شاگر	109
430	1961 آورہ کپواڑہ	چودھری گلاب دین طاہر	110
432	1961 درابہ، سر نکوٹ	چودھری حسن پرواز	111

433	1961 سرگودھا، پاکستان	چودھری محمد اشرف ایڈووکیٹ	112
435	1962 کلانی، پونچھ	ڈاکٹر محمد رفیق انجم	113
451	1963 کلانی پونچھ	چودھری عبدالرشید شبنم	114
452	1963 کیلی فورنیا امریکہ	ران البرٹ	115
453	1963 سموٹ، سرنکوٹ پونچھ	شیخ ظہور احمد	116
455	1964 کٹیاں آلی، بارہمولہ	چودھری محمد اشرف پردیسی	117
458	1965 دداسن بالاراجوری	مولانا فیض الوحید	118
459	1965 گول گلاب گڑھ	چودھری نور محمد مجروح	119
465	1965 کنگن کشمیر	چودھری محمد ادریس شاد	120
467	1966 نامبلہ، اوڑی، بارہمولہ	چودھری تاج دین تاج	121
471	1967 کولورڈو امریکہ	وائس ای لیوسی	122
472	1967 لمپیڈی، راجوری	چودھری محمد طارق بہیم	123
475	1967 بھلیس ڈوڈہ	چودھری خاقان سجاد	124
477	1970 مڑھوٹ پونچھ	چودھری ریاض احمد صابر	125
480	1970 چندک پونچھ	ڈاکٹر جاوید راہی	126
484	1972 دھر مسال، کالا کوٹ	چودھری خالد وفا	127
485	1972 بھلیس ڈوڈہ	چودھری جان محمد حکیم	128
487	1972 سماج راجوری	چودھری یونس ربانی	129
490	1973 بانہال	مولانا محمد امین مدنی	130
491	1976 حویلی پونچھ	چودھری محمد رفیق شاہد	131
493	1980 نامبلہ اوڑی	چودھری مشتاق خالد	132
494	1984 آہرہ بل کشمیر	چودھری گلزار بہسم	133

496 حرف آخر عرش صہبائی

گوجری زبان تے ادب

(چھوہاتی نظریاں)

۲۰۰۰ق۔م تا ۱۵۰۰ق۔م آریاں کی ہندوستان ماں آمد

۱۵۰۰ق۔م تا ۵۰۰عیسوی گوجراں کی ہندوستان ماں آمد

۶۰۰عیسوی تا ۱۳۰۰ء مختلف ہندوستانی ریاستاں پر گجراں کی حکومت

گوجری زبان کی جم پلن، جوانی۔

قدیم گوجری ادب کو دور

۱۰۰۰ء تا ۷۰۰ء

گجراں کی ہمالیاتی پہاڑاں در

۱۴۰۰ء تا ۷۰۰ء

ہجرت، گوجری سرکاری سرپرستی توں محروم

گوجری اشاعت تیں محروم

۷۰۰ء تا ۱۹۰۰ء

گوجری لوک ادب (گوجری ادب کی واحد شکل)

جموں کشمیر ماں گجراں کی سیاسی بیداری

۱۹۰۰ء تا ۱۹۵۰ء

جدید گوجری ادب کی چڑھت

گوجری نشر و اشاعت کی بحالی

۱۹۵۰ء توں آگے

سجرا گوجری ادب کی تخلیق

گجری کہ تو در حسن و لطافت چوں مہی لے

خواجہ محمد یوسف ٹینگ

اس کتاب کے ترتیب کار ڈاکٹر رفیق انجم نے اسکا نام بڑا برجستہ رکھا ہے: ”بنجارا“
گوجروں کی ساری زندگی کا پھیلا اس بنجارہ پن کی آئینہ داری کرتا ہے۔ صدیوں پہلے سیاسی
اقتدار کی محرومی نے انھیں میدانوں کی راحت سے اکھاڑ کر کوہ و بیاباں کی کلفت کی سزا دی اور
یہ کہیں، ہزار بارہ سو سال کے بعد اب پھر زندگی کے مرکز کی طرف واپس لوٹ رہے ہیں۔
گوجری زبان اس بھولے بھٹکے قافلے کا وہ سفینہ نوح ہے جس نے اس طویل
اندھیارے میں انھیں گمنامی کے کالے پانیوں میں گم ہونے سے بچایا۔ مرمر، پتھر اور ماٹی کے
کے سارے قصر و ایوان تو مٹ گئے لیکن یہ زبان انکی شناخت کے حدود اور بعد اور انکے حلیے کے
خدا و خال کی سہ حرنی اپنے اندر سموئے ہوئے زندہ ہے۔ اور اس پر جانکاری کی چند کرنیں
پڑتے ہی حیدرآباد دکن سے ہمالیہ پر بت تک کا سارا منظر روشن ہو جاتا ہے۔ جہاں گوجر
شناخت ہمالیہ کی چٹانوں کی طرح سخت اور جنگل کے سرو و صنوبر کی طرح سرسبز ہے۔ آج اسی
سرمایہ حیات کے تخم و طراوت سے گوجروں کی نشاۃ الثانیہ کی تجدید اور تنویر کی جا رہی ہے۔
کتاب کے لائق ترتیب کار نے اس میں کوئی ڈیڑھ سو کے قریب گوجرادیوں کا ذکر
ان کے فکرو فن کے حوالے دے کر کیا ہے۔ اگر اس دعویٰ کو صرف اسکے لفظی انجمنچر تک ہی
سمٹایا جائے تب بھی یہ کتاب زمان و مکان کا ایک مرعوب کن اور لمبا چوڑا منظر کھول دیتی ہے۔

۱۔ حضرت امیر خسروؒ (۱۲۵۳ء تا ۱۳۲۵ء) کا مصرعہ، یعنی گجری حسن و لطافت میں چاند کی مانند ہے
لفظ گجری عورت کے علاوہ زبان کے لئے بھی خود امیر خسروؒ کے زمانے سے ہی استعمال میں ہے۔
اور اسکے حسن و لطافت کی کرنیں چمکتے ہوئے چاند کی طرح گوجر تاریخ اور تہذیب کو جگمگاتی ہیں۔

وندھیا چل پہاڑیوں سے قراقرم کے سلسلہ کوہ تک اور گیارھویں صدی کے نور محمد ست گرو (۱۰۹۳ء) اور امیر خسرو (۱۲۵۳ء تا ۱۳۲۵ء) سے خود رفیق انجم (۱۹۶۲ء) اور جاوید راہی (۱۹۷۰ء) تک پہلے تو اس ڈائریکٹری کا یہ نظارہ ہی گوجری زبان کی قدامت اور جسامت کی ہیبت طاری کرتا ہے۔ دوسرے اسکی بدولت گوجری زبان و ادب کا ٹھاٹھیں مارتا ہوا سمندر ہمالیہ پہاڑ کی چوٹیوں پر اچھلنے لگتا ہے۔ اس تذکرے سے گوجری زبان کے متعلق عام خیالات کا بھرم ٹوٹ جاتا ہے اور کچھ یہ نتائج سامنے آتے ہیں۔

۱۔ گوجری زبان صرف جموں و کشمیر یا پاکستانی مقبوضہ کشمیر کے کچھ علاقوں تک ہی محدود نہیں ہے بلکہ اسکا ماجرا علامہ اقبال کے اس مصرعے جیسا ہے۔ ع: نہ حد اسکے پیچھے نہ حد سامنے۔ یہ زبان دکن، مراٹھا لینڈ، گجرات، راجپوتانہ، پنجاب، ہریانہ، ہما چل اور گڑھوال میں تلاپچیں بھرتی ہوئی جموں کشمیر میں داخل ہوتی ہے اور اسکے دشتو دمن کو اپنی لپیٹ میں لے لیتی ہے۔ کٹھوعہ، بنی، جموں گلاب گڑھ، پونچھ راجوری، ڈوڈہ، ڈکسم، کوکرناگ، نارواؤ، شوپیاں، کلر مست پورہ، ترال، وانگت، سونہ مرگ، ژیرنار، بانڈی پورہ سے ہوتی ہوئی، لولاب، کپوارہ، اور پھر ٹنگمرگ، اور اوڑی۔ یہی حال پاکستانی کشمیر، مغربی پنجاب اور سوہ سہرحد کا ہے۔ اس زبان کو کسی ملک، کسی علاقے، کسی کوہستان یا کسی فرقے سے وابستہ کرنا صرف تواریخ، جغرافیہ اور لسانی منظر نامے سے اپنی بے علمی کا ثبوت دینا ہے۔

۲۔ اس زبان کی ابتدا کا ماجرا اگرچہ کشمیری، پنجابی اور دوسری بہت سی اہم زبانوں کی طرح ابھی تاریخی فروگذاشت کی بدلیوں میں چھپا ہوا ہے لیکن پھر بھی پہلے مسیحی ہزارے کے آغاز سے اس کا افق کھلتا ہے۔ نور محمد ست گرو (۱۰۹۳ء) اور امیر خسرو (۱۲۵۳ء تا ۱۳۲۵ء) کے علاوہ دکنی اور گجراتی کے بیسیوں سخن گوئیوں کے یہاں اسکا وجود لہریں مارتا ہوا نظر آتا ہے۔ ان میں شاہ میراں جی، شاہ باجن، محمود دریائی، بھگت کبیر، برہان الدین جانم، خوب محمد چشتی، میر ابائی، قلی قطب شاہ، ملا دجہی، نصرآئی اور ولی دکنی جیسے جلیل القدر نام نظر آتے ہیں۔

انھیں گوجری ک زبان کی کشمیری کی وجہ سے صدیوں تک ہندی، اردو، گجراتی وغیرہ زبانوں کے حوالے کیا جاتا رہا۔ لیکن رفیق انجم صاحب نے ان کے کلام سے گوجری زبان کے قاسمے نھار کر پیش کئے ہیں، جن میں 'گجری' جیسی شناختی ترکیب تک بار بار 'بانگاں' دے کر اپنے آزادانہ وجود کا اعلان کرتی ہے۔ اس مستند اور مسکت ثبوت کے بعد اب گوجری زبان کی قدامت پر حرف لانا ناممکن نہیں رہے گا۔ خاص طور پہ جب جب جدید پنجابی زبان کا پہلا سخن گو، غرنوی عہد کے شاعر 'مسعود سعد سلمان' کو قرار دیا جاتا ہے، جس کے صرف چند مصرعے تلاش ہو سکے ہیں۔ اسی طرح کشمیری ایک ہزار سال پرانے 'چھم پداور ششی کنٹھ' کی سنسکرت آمیز زبان کے چند ابیات کو اپنی زبان کا افق قرار دیتے ہیں۔ یہ استدلال گوجری گوجری کی ابتدا کے سلسلے میں کیوں مکر نہیں کیا جاسکتا؟

۳۔ گوجری زبان میں ادب اور انشائیہ کی ہر صنف کے اعلیٰ نمونے آج برسہا برس سے موجود ہیں۔ شاعری، افسانہ، ناول، تحقیق اور لغت سازی، یہاں تک کہ ڈرامہ بھی۔ (بقول انجم رانا فضل حسین سب سے بڑے ڈرامہ نگار ہیں)۔ غلط فہمی سے آج سے چند سال پہلے تک بے خبر لوگ اسے 'پکی روٹی' جیسی چند دس بارہ ورقی کتابوں تک محدود کرتے رہے۔

۴۔ گوجری کسی قومیت یا فرقے تک محدود نہیں ہے۔ اس میں مہاراشٹر میں رہنے والا لکھتا ہے اور ایبٹ آباد کا باسی بھی۔ اس میں احمد آباد کا رہنے والا بھی قلم کی صریر پیدا کرتا ہے اور پنجاب میں بسنے والا بھی اس کی دھاریں بہاتا ہے۔ اس میں ڈاکٹر صابر آفاقی کا علم و فضل بھی چھلکتا ہے اور ڈاکٹر رام پرشاد کھٹانہ کا گیان دھیان بھی موجیں مارتا ہے۔ اس میں فتح علی سروری کسانہ کی امنگ بھی جوت جگاتی ہے اور ڈاکٹر جگدیش چندر شرما کی نظر بھی ہلکورے پیدا کرتی ہے۔ اس میں اقبال عظیم چوہدری کی خوبصورت آواز بھی نغمہ سرا ہے اور غلام نبی شاہباز راجوروی جیسے بلبل ہفت زبان کی چچا ہٹ بھی دھومیں مچاتی ہے۔

۵۔ اگرچہ مرتب نے ایک سنجیدہ سکالر کی طرح کتاب میں گوجری کو آئین ہند کے آٹھویں

شیڈیول میں شامل کرنے کی رٹ نہیں لگائی ہے لیکن اس کتاب کے متن اور مطالب زور زور سے پکارتے ہیں کہ گوجری کو اس میں نہ شامل کرنا کتنی بے انصافی ہے۔ اس کے بساں کوتاہ عمر، کوتاہ قامت اور ہر لحاظ سے کمتر زبانوں کو اس شیڈیول میں مصلحتوں اور مروّتوں کے تحت شامل کر لینا اس شیڈیول کی وقعت کو گھٹاتا ہے اور اسکی آڑ میں کتنی ہی لسانی زبردستیوں کا جواز پیدا کرتا ہے۔

گوجری ہمارے زمانے تک آتے آتے کس طرح کم علم اور کم ہمت والے حکمرانوں کے بھلکرو پن (Amnesia) کا شکار ہو گئی تھی، اس کا منہ بولتا ہوا ثبوت جموں کشمیر کے آئین سازوں کی وہ کارستانی تھی جب انھوں نے ۱۹۵۷ء میں دستور ساز اسمبلی میں ریاست کا آئین تیار کیا۔ یعنی انھوں نے زبانوں سے متعلق چھٹے شیڈیول میں گوجری زبان کا ذکر ہی نہیں کیا۔ بلکہ پہاڑی کی سرخی قائم کر کے شاید یہ بتانے کی کوشش کی گئی کہ پہاڑوں میں جو کچھ بولا جاتا ہے وہ بس اپنے جغرافیہ کی اصطلاح میں بیان کیا جاسکتا ہے۔ یہ ایسی بات تھی کہ جیسے درختوں پر پھدکنے والے ہر جاندار کو بندر کہہ کے سکہ بند کیا جائے۔ وہ یہ بھول گئے کہ حضرت امیر خسروؒ نے جب ساڑھے سات سو سال قبل ہندوستان میں بولی جانے والی زبانوں کی نام لے کر گلتی کی تو صرف کشمیری، سندھی، بنگالی اور گوجری کے ہی وہ نام گنوائے جو آج بھی بولے جاتے ہیں۔ باقی زبانوں کے نام بہت مبہم طور پر بیان کئے جیسے ڈھور، سمندری اور مہجری یا کبر۔ جن کو قیاس کے تانے بانے پھیلا کر ہی کسی جدید ہندوستانی زبان سے جوڑا جاسکتا ہے۔ حیرت ہے کہ یہ زبردستی اس اسمبلی میں موجود گوجر ممبروں کے سر پر سے بھی پانی کے ریلے کی طرح گزر گئی۔ اسکی ایک وجہ یہ بھی تھی کہ اس اسمبلی کے مشعل بردار اس اسمبلی کے اکثر وقت میں اسکی فہرست پر موجود تھے لیکن آئین سازی کے وقت جیل میں دن گزار رہے تھے۔ جب کچھ دیر کے بعد بے خبری کی دھند چھٹنے لگی اور گوجر ارگہ اشد کے نشہ بے خودی سے باہر آنے لگے تو اس بے خبری کا تدارک کیا گیا اور گوجری اپنے اصل نام سے چھٹے شیڈیول میں شامل ہو گئی، مگر ایسا بھی ۱۹۹۹ء میں ہوا۔

۱۔ کشمیر کے اونچے پہاڑوں پر اگنے والی جڑی بوٹی جو سوگنھنے والے کو مد ہوش کر دیتی ہے۔

مجھے اس وقت ۱۹۷۲ء کا زمانہ یاد آتا ہے جب میں کلچرل اکیڈمی میں اپنے روزگار کی روٹیاں توڑ رہا تھا۔ ابھی گوجری شعبہ قائم نہیں ہوا تھا۔ لیکن اکادمی کے بجٹ میں گوجری کی ترقی و ترویج کے نام سے دس ہزار کا ایک غیر واضح اندراج کئی سال سے موجود تھا۔ میں نے گوجری کی کانفرنس کرنے کی ٹھانی تاکہ گوجری لکھنے والوں کو جمع کر کے اس زبان کے درجہ حرارت کا کچھ ماجرا معلوم کر سکوں۔ سید میر قاسم اکادمی کے صدر تھے۔ انکے لئے صدر ترقی خطبہ تحریر کرنا میرا فرض منصبی تھا۔ شیر کشمیر شیخ محمد عبداللہ ابھی اقتدار سے دور تھے۔ مگر انکار ہنمایانہ قد پیر پنچال کی ٹن کن چوٹی سے بھی نمایاں تھا۔ میں ان سے بھی پیغام حاصل کرنے کی جسارت کر بیٹھا۔ انھوں نے اپنا پیغام بہت خندہ پیشانی سے دیا اور گلاب بھون جموں کی یہ کانفرنس گوجری کی پیش قدمی میں Marathon دوڑ کی پہلی سیٹی ثابت ہوئی۔ پھر شیخ صاحب خود سر اقتدار آ گئے۔ اکادمی کا گوجری شعبہ قائم ہوا۔ گوجر ترقیاتی بورڈ بنا جسکی بااختیار نائب صدر شیخ صاحب کی اہلیہ محترمہ اکبر جہاں بنی۔ انھیں مادر مہربان کہہ کر پکارا جاتا تھا۔ اور انکی رگوں میں گوجر ماں کا خون بھی دوڑتا تھا۔ گوجر ہوٹل قائم کئے گئے اور گوجروں کی ترقی و ترویج کا دولہ انگیز دور شروع ہو گیا۔ گوجری زبان کی پہلی ڈکشنری نصف درجن جلدوں میں شائع کی گئی۔ اکادمی سے گوجری مطبوعات کا ایک گنگناتا ہوا جھرنا بہنا شروع ہوا۔ گوجری لوک گیتوں کی خوبصورت تائیں حروف کی صورت میں موتیوں کی دمک دکھانے لگیں۔ گوجری کا دوسرا ”مطلع الفجر“ تاباں ہونے لگا۔

بہت جلد یہ آبتار اکادمی سے باہر بھی پہننے لگا، اداروں سے نکل کر افراد کی کوششوں کا لباس پہنتا ہوا۔ خود ڈاکٹر رفیق انجم نے گوجری ادب کی سنہری تاریخ سات جلدوں میں تحریر کی۔ گوجری گرائمر، گوجری اقتباسات کی ڈائریکٹری، گوجری انگلش ڈکشنری اور بہت کچھ انکے قلم کی دھار سے باہر آ رہا ہے۔

۱۔ یہ خواجہ نیگ صاحب کی کسرتسی ہے، حالانکہ اکیڈمی میں سب سے زیادہ کام اسی دور میں ہوا جب نیگ صاحب اکیڈمی کے سیکریٹری تھے۔ روٹیوں والا قافلہ تو بہت دیر کے بعد آیا۔ (مرتب)

۲۔ بانہال کے مشرق میں زانکار کے قریب اس سلسلہ کوہ کی بلند ترین چوٹی۔ اسکی بلندی ۲۵ ہزار فٹ ہے۔

اسی طرح جاوید راہی نے گوجری انسائیکلو پیڈیا جیسے قاموس نما کام کا بیڑا اٹھایا اور گوجری فوک لور کی ڈکشنری شائع کی۔ جموں کے گورنمنٹ ٹریننگ کالج نے اپنے رسالے آواز گرج میں گوجری کا حصہ قائم کیا جو آج ڈیڑھ دہائی سے شائع ہو رہا ہے۔ اسی طرح اس نے جارج گرائسن کے گوجری سے متعلق اطلاعات کو الگ سے شائع کر دیا اور بیسوں دوسری کتابوں کے دفتر کھول دئے۔ اب تو جموں اور کشمیر یونیورسٹی سے گوجری میں پی ایچ ڈی کا سلسلہ بھی شروع ہو چکا ہے۔ اس طرح یہ سفینہ گل ولالہ برابر آگے بڑھتا رہا: ق:

یہ جوئے کو ہستاں چلتی ہوئی اچکتی، سرتی، مچلتی ہوئی

چلے جب تو سہل چیر دیتی ہے پہاڑوں کے دل چیر دیتی ہے

ڈاکٹر انجم کی اس کتاب کو ڈائریکٹری یا تذکرے کے بجائے گوجری کی ضابطہ بند تاریخ کہنا غلط نہ ہوگا۔ بالکل اسی طرز پر رام بابو سکسینہ نے اردو کی تاریخ لکھی تھی جو بعد میں مرزا محمد عسکری کے اردو ترجمے کی صورت میں اسکی پہلی باقاعدہ تاریخ قرار پائی۔ کشمیری زبان میں عبدالاحد آزاد کی اس نوع کی کتاب تین جلدوں میں چھپ چکی ہے۔ اور وہ ڈاکٹر انجم کی اس کتاب سے کیفیت میں کچھ کچھ کم ہے۔ ڈاکٹر انجم نے روایتی ڈائریکٹری کی طرح صرف ادیبوں کی سوانحی تفصیل درج نہیں کی ہیں بلکہ ان کی تخلیقی سرگرمیوں کا پورا محاکمہ بھی کیا ہے۔ اور انکی تحریروں کے نمائندہ انتخاب بھی درج کئے ہیں۔ جس سے گوجری کی ایک ہزار سالہ تاریخ کا ایک خاصا تفہیمی باب کھل جاتا ہے۔ انھوں نے کچھ غیر مبہم فیصلے بھی دئے ہیں، مثلاً یہ کہ خدا بخش زار (وفات: ۱۹۸۲ء) بیسویں صدی کا عظیم ترین گوجری شاعر تھا۔ اپنے عندیے کو مضبوط بنانے کے لئے اور ادبی تعظیم جتاتے ہوئے انھوں نے زار کے لئے اپنی کتاب کے سب سے زیادہ صفحات وقف کئے ہیں۔ اسی طرح وہ اقبال عظیم کو جدید گوجری کا ممتاز ترین سخن گو قرار دیتے ہیں اور انکے لئے بھی کئی صفحے وقف کئے ہیں۔ انکی ادبی خصوصیت اور خاصیت کو انجم نے علامتوں کی اس چچی تلی عبارت میں بیان کیا ہے:

”اس نے اپنی شاعری مانھ جو لکھی سچ لکھیو تے سچ تیں سوا کجھ بھی نہیں“

ڈاکٹر صابر آفاقی کا ذکر کرتے ہوئے وہ انکی علمی وسعت کی دھاک بٹھاتے ہیں۔ انجم راوی ہیں کہ آفاقی نے فرانسیسی فاضل لوئی مساکن کی 'The passion of Al Hallaj' کا اردو اور گوجری میں ترجمہ کیا ہے۔ یہ کتاب تیس برس کی تحقیق کے بعد دو جلدوں میں لکھی گئی اور یہ منصور حلاج پر تمام وقت کی سب سے مستند کتاب ہے جس میں اسکے کشمیر آنے کا ذکر پہلی بار کیا گیا ہے۔ اسکا گوجری میں ترجمہ ہونا خود اپنی کہانی بیان کرتا ہے۔ اسکے باوجود سرحد پار کے ڈاکٹر غلام حسین اظہر کی طرح ڈاکٹر انجم بھی یہ اعتراف کرتے ہیں: ”سچی گل تے یاہ ہے جے گوجری واسطے سب توں زیادہ کم کلچرل اکیڈمی نے کیو ہے۔“

گوجری زبان اُردو کے اولین سرچشموں میں شامل تھی اس بارے میں اب اختلاف کی کم گنجائش ہے۔ اس پس منظر میں جب شاہ باجن، شاہ میراں جی، برہان الدین جاتم، ابراہیم عادل شاہ، ملا وجہی، ملا نصرتی، وغیرہ کی تصنیفات پر نظر ڈالی جائے تو اُردو کے متعلق نئی بصیرت پیدا ہوتی ہے۔ ’سب رس‘، ’نورس‘، ’قطب مشتری‘، ’تحفۃ العشاق‘ اور بکت کہانی جیسی کتابیں اس ریختہ کے شاندار نمونے ہیں۔ جس میں گوجری کا عنصر بہت بڑا تھا۔ اسی لئے گوجری سے صرف نظر کر کے ان کتابوں کا رس پوری طرح اُطف نہیں دیتا اور نہ انکی تفسیر آسان بنتی ہے۔ ان تصانیف کے ساتھ ولی دکنی جیسے مقتدر اردو شعراء کی بازگشت اس بات کو یقین آموز بناتی ہے کہ اردو کا ایک ابتدائی نام ’گجری‘ بھی تھا۔ اسکے علاوہ اس سے ڈاکٹر انجم کی عرق ریزی اور نکتہ رسی کا زبردست احساس قاری کو حیرت زدہ کر دیتا ہے۔

گوجروں کی سخت جانی کا ماجرا زبان زد خلائق ہے۔ زمانے کے ظلم و جبر اور پہاڑوں کے طوفانی جھکڑ سہنے کے باوجود وہ زندہ رہے۔ انکی عمریں عام طور دراز ہوتی ہیں، سو سال کے پیٹھے کو چھوتی ہوئی۔ انکے لمبے قد، مضبوط کاٹھی، چکلے ہاڑ، بولتے ہوئے چہروں کے نمایاں خدو خال انکو میلے کچیلے کپڑوں میں بھی شناخت آمیز بناتے ہیں۔ انکی زبان میں بھی یہ سخت جانی

موجود رہی ہے۔ پنجابی اور کشمیری جیسی بڑی اور پرانی زبانیں لسانی سامراجوں سے کم نہیں۔ ان کے 'کنے کنے' گزر بسر کرنے کے باوجود اپنا وجود قائم رکھنا گجری زبان کی تنومندی کا ثبوت ہے۔ اب اسکی رگوں میں نئے خون کا infusion کرنے کی باری آگئی ہے۔ اور ڈاکٹر انجم کی زیر نظر کتاب اسی عمل کا ایک حصہ ہے۔ اس میں صابر آفاقی، جاوید راہی، ڈاکٹر جگدیش شرما، نسیم پونچھی، حسن پرواز، اور بہت سے دوسرے ادیب دن رات لگے ہوئے ہیں۔ لہذا اس میں شک و شبہ کی گنجائش نہیں رہتی کہ یہ بارہ سنگھا بہت جلد اپنی پوری شان سے چاروں طرف کلیلیں کرے گا۔

ع: افراد کے ہاتھوں میں ہے اقوام کی تقدیر

.....'نیلی چھتری' والا اس جوش و جذبے کو دکھاتا ہوا رکھے! (آمین)

محمد یوسف ٹینگ

وزارت روڈ جموں

۲۷ جنوری ۲۰۰۷ء

لعلان کو بنجارو: ڈاکٹر رفیق انجم

دُنیا کیوں دو جیاں زبانوں کی طرحیا گوجری ما بھی پہلاں شاعری تخلیق ہوئی۔ اس شاعری کی تاریخ سو سال کے نیڑے تریڑے ہے۔ گوجری کی جدید شاعری کو آغاز پونچھ تے راجوری تیں ہوؤ۔ ۱۹۶۵ء کے بعد، جموں کشمیر کا دوہاں حصاں ماں کئی گوجری شاعر سامنے آیتے ان کی شاعری کا مجموعہ چھاپے چڑھن لگا۔ مڈا توڑی تحقیق کا میدان ما کوئے بند و نظر نیہہ آئیو۔ تحقیق کی روایت میں ۱۹۸۵ء ما ”گوجری ادب“ لکھ کے شروع کی، جس ماں کشمیر تے پاکستان کا گوجری شاعر اں کو تڈ کرو ملے۔ تاریخ نا سچ اڈیک نیہہ کرنی پئی بلکہ کلائی پونچھ کا اکیں گھبرونے جس کوناں رفیق انجم ہے اس میدان ما جھنڈا اٹھلا دتاتے تحقیق کی روایت نا اگے ٹوریو۔

رفیق انجم کا جُسا ما کوئے درجن بھر آدمی بیٹھا داہیں۔ رفیق انجم گوجری تے اُردو کو شاعر ہے اسکی اُردو شاعری ”خواب جزیرے تے کاش!“ تے گوجری شاعری ”دل دریا تے سوغات“ کا ناں نال شائع ہوئی ہے۔ ان کیوں گوجری کہانیاں کی کتاب ’کورا کاغذ‘ گوجری کا ادبی حلقاں ما مقبول ہو چکی ہے گوجری زبان و ادب کا حوالہ نال بھی ڈاکٹر رفیق انجم کو کم مستند تے قابلِ فخر ہے۔ یوہ نوجوان مورخ بھی ہے تے اس نے گوجری زبان تے ادب کی تاریخ ست چلداں ماں ”سنہری تاریخ“ کا ناں نال لکھی ہے، جس ما قدیم گوجری ادب، جدید گوجری ادب، جدید گوجری شاعری، گوجری غزل، گوجری گیت تے گوجری افسانہ نگاری پر تاریخی تحقیق پیش کی ہے۔ اس سلسلہ ما پہلاں شائع ہون آلی انکی کتاب ’سوچ سمندر تے غزل سلونی بھی ادبی معیار پر پوری اُتریں۔

ڈاکٹر رفیق انجم نے لغت سازی کی حیثیت نال بے مثال کم کیو ہے۔ اس تنہا بندہ نے بیس کے لغت سازی کا ایسا بڑا بڑا کارنامہ کیا ہے جس کو ادارہ بھی نبیہ کر سکے تھو۔ ’گوجری۔ گوجری ڈکشنری، گوجری اردو کشمیری ڈکشنری، تے گوجری ہندی پنجابی ڈکشنری، رفیق انجم جیسا سیانا، مچتی تے عالم بندہ کے بغیر ہو کونے مرتب کرن کی سوچ بھی نہیں سکے تھو پر ’گوجری۔ انگلش ڈکشنری‘ میرے نزدیک ڈاکٹر رفیق انجم کو سب تیں بڑو کارنامو تے لافانی شاہکار ہے۔ ’گوجری گرائمر‘ اسکو ایک ہو رکارنامو ہے۔ اس بڑا لکھاڑی نے سماجیات پر بھی بڑو وسیع کم کیو ہے تے گوجری اکھان تے محاورا جمع کر کے ’گوجری کہاوت کوش‘ کی صورت ماں چھاپ دتا ہیں۔

اپنی طمی تے سرکاری مصروفیات کے نال نال رفیق انجم ایک ہی وقت ما شاعر بھی ہے، افسانہ نویس بھی، ادیب، مورخ تے نقاد بھی ہے تے تذکرہ نگار تے ماہر لسانیات بھی۔ گوجر قوم ما ایسو جامع حیثیات تے جامع کمالات لکھاڑی ہمتا نظر نبیہ آتو۔ ہوں سمجھوں کہ رفیق انجم اعوان ایک بندہ کونناں نبیہ۔ یوہ گوجری زبان وادب کو ’روبوٹ‘ ہے یا فر کونے ’جن‘ ہے جہڑو سب کھلاڑاگا ہتو چلے۔ رفیق انجم ۱۹۶۲ء ما پیدا ہوؤ جد میں تے اسرائیل ہجور نے گوجری شاعری شروع کی تھی۔ اسکی پہلی کتاب ۱۹۹۳ء ما سامنے آئی تے فر چل سوچل۔ گذشتہ ڈیڈھ عشرہ کے دوران رفیق انجم اک بڑا محقق، ماہر لسانیات، شاعر تے لغت سازی کی حیثیت نال سامنے آئیو ہے۔ تے اس ناکتنا ہی ایوارڈ بھی مل چکیا ہیں۔ اجاں تے اسکا کم کو آغاز ہوؤ ہے۔ اجاں مساں ایور کھیو ہے، کوٹھو تے ہن چاڑھے گو۔ ہمتا خوشی ہے کہ جت مھاری ریاست نے تخلیق کا میدان ما گوجری کا نامور شاعر پیدا کیا ہیں، اُت تحقیق کا حوالہ نال بھی یاہ ریاست کسے تیں چکھے نبیہ رہی۔ گوجری شعر وادب کا آسمان ما رفیق انجم اک کو کپ سعادت تے نجم ہدایت ہے۔

بسوس کی گل یاہ جے انکا انکا کا گوجر لکھاڑی چھو یا واہیں تے ان کو آپس ما

کوئے رابلٹونہہ ورنہ ہم کتنا ناگھائیں مار لیتا۔ مہاری آپت مانہ مراسلت ہے نہ فون رابلٹو، نہ کتاب کو تبادلو۔ نہ یاہ خبر کہ اُت کیہ ہو رہی ہے، نہ یوہ پتو کہ ات کے بن رہی ہے۔ ہُن اس رکاوٹ نا دور کرن کی لوڑ ہے۔ میل ملاپ کی ضرورت ہے۔ آن جان کو ویلو آگیو ہے تانجے سینہ چاکان چمن نال سینہ چاک آلیں۔ مہارا گوجر لکھاڑیاں نا سوچنو ہو کو کہ :

ع مابرائے وصل کردن آمدیم!

میں پونچھ جان واسطے فارم دتا تھا پر میر و جموں، پونچھ یا کشمیر ما کوئے سکونہہ اس واسطے مناسکو جواب دے دو۔ یوہ اک بڑوالمیو ہے۔ ہم یا جوج ماجوج کی طرحیا دیوار نا چٹاں لگاوا، کدے تے یاہ دیوار جھڑے گی۔ زندگی ہوئی تے ملاں گا، اسے امید پر جیاں لگاوا!

ہوں ڈاکٹر رفیق انجم نا مبارکباد پیش کروں کہ انھاں نے گوجری کا شاعران کو تذ کرو مرتب کر کے وقت کی ایک بڑی ضرورت پوری کر دتی ہے۔ یوہ تذ کرو گوجری ادب ما اک باحدو ہے تے امید ہے جے شاعری نال دلچسپی رکھن آلا اس نا شائع ہوتاں ہی پڑ چھ لیں گا۔

پروفیسر ڈاکٹر صابر آفاقی

منظف آباد۔ ۱۹ نومبر ۲۰۰۶ء

اپنی گل

گو جری ہندوستان کی قدیم زبانوں میں سے ہے۔ تاریخی حوالا دیکھتے ہیں کہ اسے
 گو جری کا کھڑا نام ۱۵ویں صدی عیسوی کا ادب مانہ صاف صاف دے دیا۔ ہندوستانی ادب مانہ گو جری
 ۱۵ویں صدی سے لیکر ۱۸ویں صدی کا شروع تک نمایاں رہا۔ گو جری کی تاریخ ناٹھ نظر مانہ رکھ
 کے یاہ گل ثابت ہوئے کہ گجرات مانہ گجرات کی حکومت کے نال ہی گو جری کی ترقی ہوئی تے فرج
 یاہ قوم حکومت چھوڑ کے جنگلاں تے پہاڑاں آ لے پائے سن پر مجبور ہو گئی تان گو جری زبان تے
 ادب کو خزانہ نووی کھیروں کھیروں ہو گئے، تے یاہ قومی زبان نکا نکا حلقاں مانہ تقسیم ہو کے رہ گئی۔ بس اتنو
 اشارہ ہی کافی سنی لگے جے اس لہجہ کے دوران ہجرت اس خزانہ کو کچھ حصہ کر یو، وہ علاقہ
 زبان تے کلچر کا حساب نال مال مال ہوتا گیا۔ موجودہ دور کی زبانوں میں اُردو، ہندی، گجراتی،
 راجستھانی، تے پنجابی زبان کی تاریخاں مانہ گو جری کا حوالا نمایاں طور پر درج ہیں۔

قدیم گو جری ادب کا مطالعہ توں معلوم ہوئے کہ یہ سارا کو سارا ادب فارسی رسم الخط
 مانہ ہے تے موضوع کا اعتبار نال اس مانہ اسلامیات تے تصوف نمایاں ہے تے دوجے
 گو جری قواعد توں متعلق کسے کتاب کو حوالہ قدیم ادب مانہ نہیں لکھو۔ عالمی ادب گواہ ہے جے
 نثری ادب سوچ مانہ پہلاں آوے تے تحریر مانہ چکھے۔ گو جری ۱۵ویں صدیاں پرانی زبان ہے
 اس نال وی یا ہی بدلتی۔ قدیم گو جری ادب سارا کو سارا شاعری کی صورت مانہ ہے۔ تے ملا
 وجہی کی سب رس، تیں سواہور کائے نثری تحریر اکھ مانہ گھلن جوگی وی نہیں موثر ہوتی، تبصرہ کرنو
 تے دور کی گل ہے۔

جدید گو جری ادب کی ابتدا ۱۹ویں صدی کے نال ہی ہوئے تے ات وی شاعری کی

حکمرانی سئی لگے۔ اس صدی کا وہی پہلا پانچواں سال مانہ لکھی جان آلی گوجری کو کوئے نثری نمونو نہیں لکھتو۔ تے اس طرح ثابت یاہ ہوئے جے گوجری کو نثری ادب ۱۹۵۰ء میں بعد کی پیداوار ہے۔ صحیح معنوں میں گوجری زبان تے ادب ماں تحقیق تے اسکی شیرازہ بندی کو کم جموں کشمیر کلچرل اکیڈمی ماں گوجری شعبو قائم ہون میں بعد ہی شروع ہو یو۔ اکیڈمی نے مختصر عرصہ ماں گوجری کا لوک ورثہ کی ترتیب تے اشاعت میں علاوہ لغت سازی تے جدید ادب کی شیرازہ بندی ماں وی تسلی بخش کم کیو ہے تے اس سفر ماں غیر سرکاری تنظیم تے شخصیات نے وی پوری نیک نیتی نال اپنوتق ادا کیو ہے۔

جدید گوجری کا نثری ادب کو سب توں زیادہ مواد تحقیقی مقالوں کی صورت مانہ ہے۔ جن کی شروعات ریڈیو کے نال ہی ہوئی تے فرکلچرل اکیڈمی مانہ گوجری شعبو قائم ہوتاں ہی کانفرنس تے مجلساں کو جہو و سلسلو شروع ہو یو اس مانہ تحقیقی مقالوں ناسب توں زیادہ اہمیت ہوئے تھی۔ گوجری ادب کی تاریخ تے گوجری ادب میں متعلق تحقیقی مقالوں لکھن ہون لگا۔ تاریخی پہلو پر لکھن آلاں مانہ سروری کسانہ، رام پرشاد کھٹانہ، غلام حسین ضیاء، کرم دین چو پڑہ، اسد اللہ وانی، سکندر حیات طارق، تے کے ڈی مینی جیہا معتبر لوک شامل تھا۔ ان حضرات نے بڑی محنت تے جہدی نال تحقیق کیں تے تاریخی حوالوں نال اپنا مضمون تیار کیا۔ جہو اراج وی شیرازہ گوجری تے مہاروادب کا شماراں مانہ محفوظ ہیں۔ ان مقالوں نال ترتیب دیکے مستقل تاریخ مرتب کی جاسکے تھی پر پتو نہیں کیوں اس پاسے کسے مہربان نے دھیان نہیں کیو۔ فروی گجراں کا اصلی وطن، ہندوستان مانہ آمد، گوجر حکومتاں تے بیہویں صدی کا گوجر رہنماواں تے روحانی شخصیتاں بارے مچ سؤنی تحقیق ہوئی ہیں۔ گوجری لوک ادب پر تحقیقی مضمون چھاپن میں علاوہ اکیڈمی نے لوک کہانی چھاپن کو سالانہ سلسلو جاری رکھیو و وہی جہو قابل تعریف ہے۔

جوں کشمیر ماں گوجری زبان تے ادب تیں متعلق سب تیں پہلی تحقیق رام پرشاد کھٹانہ ہوراں نے ۱۹۷۲ء ماںہ کی جہڑی ”گوجر گوجری زبان و ادب“ کا ناں نال شائع ہوئی تھی۔ تے اسکا کجھ اک حصا ترجمہ ہو کے شیرازہ گوجری ماںہ شامل ہوتا رہیا ہیں۔ فر ۱۹۷۹ء ماں ڈاکٹر جے سی شرمانے ”گوجری صوتیات“ تے ۱۹۸۲ء ماں ”گوجری گرامر“ لکھ کے سنجیدہ تحقیق کی بنیاد پکی کی۔ اس توں بعد پروفیسر پی این پشپ، ملکھی رام کشان، ڈاکٹر صابر آفاقی، ڈاکٹر غلام حسین اظہر، پروفیسر یوسف حسن، فضل مشتاق، اقبال عظیم، غلام رسول آزاد، نسیم پونچھی، ڈاکٹر رفیق انجم، تے گلاب دین طاہر کا زبان تے ادب تیں متعلق چنگا تحقیقی مضمون شیرازہ ماںہ شائع ہوتا رہیا ہیں پر اس میدان ماںہ وی واہی کی محسوس ہوئے جے یہ مضمون کسے ترتیب نال پڑھن یا تحقیق کرن آلاں نامیسر نہیں ہو سکتا۔

اسو لیے توڑی جدید گوجری ادب ماںہ جن کتاباں کو حوالہ لکھے ان ماںہ ۱۹۶۶ء ماں شائع ہون آلی قمر راجوری کی کتاب ’گوجری ادب‘ کوناں آوے، جس ماںہ گوجری زبان کے متعلق اک مضمون تیں علاوہ انکی اپنی شاعری موجود ہے۔ رام پرشاد کھٹانہ کی ”گوجر گوجری زبان و ادب“ ماںہ زبان کا لسانی پہلو پر گل ہوئی ہے جد کہ گوجری ادب بارے اس ماںہ کجھ نہیں لکھن ہو یو۔ ڈاکٹر صابر آفاقی ہوراں نے گوجری ادب، لسانیات تے قواعد پر سنجیدہ تحقیق کی بنیاد گھلی تے چنگو خاصو کم کیو ہے پر ادب کی تاریخ مرتب نہیں ہو سکی۔ ۱۹۷۵ء ماں شائع ہون آلی انکی کتاب ”گوجری ادب“ ماں گوجری شاعراں کو تذکرہ موجود ہے جہڑو پنجابی زبان ماں ہے۔ ڈاکٹر غلام حسین اظہر ہوراں نا کشمیر کا علاقائی لوک ادب نال گورھی دلچسپی ہے تے کئی تحقیقی تے تنقیدی مضموناں توں علاوہ انھاں نے اک کتاب وی شائع کی ہے ’گوجری پہاڑی لوک گیت‘۔ پروفیسر یوسف حسن ہوراں نے قدیم گوجری ادب پر سروری کسانہ ہوراں کی

طرز پر چنگا مضمون لکھیا ہیں تے قدیم گوجری شاعراں کو تذکرہ اپنی کتاب ”قدیم گوجری ادب“ ماں کیو ہے۔ پر قدیم تے جدید گوجری ادب کے بشکار لوک ادب کے ذریعے اک تسلسل پیدا کر کے گوجری زبان تے ادب کو اک خاکو ڈاکٹر رفیق انجم نے ’گوجری ادب کی سنہری تاریخ‘ کی صورت ماہ ۱۹۹۶ء ماہ پہلی بار کیو تھو جہڑی اپنی نوعیت کی پہلی کوشش تھی۔ کلچرل اکیڈمی نے ہن یاہ کتاب ستاں جلدوں ماں شائع کرن کی ذمے داری قبول کر لئی ہے۔ جن ماں شامل ہیں ’قدیم گوجری ادب‘، ’جدید گوجری ادب‘، ’جدید گوجری شاعری‘، ’جدید گوجری غزل‘، ’گوجری گیت‘، ’گوجری افسانہ نگاری‘۔ اس تاریخ کو خلاصہ تے نوو ایڈیشن وی ’جدید تاریخ‘ کا ناں نال جلدی شائع کرن کی کوشش وی جاری ہیں۔ اس توں علاوہ وی ڈاکٹر انجم نے گوجری زبان کا کئی پہلو لیکے الگ الگ کتاب وی لکھی ہیں مثلاً ’گوجری گرائمر‘، ’گوجری کہادت کوٹھ‘، تے ’گوجری انگلش ڈکشنری‘ وغیرہ تے ’گوجری لکھاڑیاں بارے تبصرہ آلی یاہ کتاب‘ ’لعلوں کا بنجارا‘ جہڑی اپنا اپنا موضوع پر پہلی تے سنجیدہ شعوری کوشش کہی جا سکیں۔ اس طرح کسے خاص موضوع نا لیکے گوجری تیں متعلق تحقیق کرن آلاں ماہ ڈاکٹر غلام حسین اظہر، ڈاکٹر صابر آفاقی تے ڈاکٹر رفیق انجم کے سنگ ڈاکٹر جاوید راہی کوناں ہی آوے جہاں نے لوک ادب تیں متعلق ’لوک ورثو‘ ناں کی کتاب چھاپن تیں علاوہ گوجراں کی ’لوک وراثتی ڈکشنری‘ تے ’گوجرانسائیکلو پیڈیا‘ چھاپ کے گوجری کا تحقیقی میدان ماہ اہم اضافہ کیا ہیں۔

اپنی ڈاکٹریٹ کا موضوع کے طور ڈاکٹر صابر مرزا، ڈاکٹر مرزا خان وقار، تے ڈاکٹر جاوید راہی ہوراں نے وی گوجری زبان تے ادب کا موضوع نال چھیڑ چھاڑ کی ہے پر اس موضوع پر مستقل تے باقاعدہ مقامی پی ایچ ڈی کی شروعات کشمیر یونیورسٹی کا شعبہ اردو کا سربراہ پروفیسر قدوس جاوید ہوراں نے چوہدری پرویز احمد تے چوہدری محمد اسلم ہوراں کا تحقیقی مقالوں

نال کروائی ہے۔ جن کا عنوان ہیں ”جدید گوجری ادب پر اردو کے اثرات“ اور ”گوجری غزل پر اردو غزل کے اثرات“۔ اس حقیقت پسندی تے گوجری ادب ماں سنجیدہ تحقیق کی شروعات واسطے پروفیسر صاحب مبارکباد کا مستحق ہیں تے امید ہے جے گوجری تحقیق کرن آلاں کی ویہہ اسے طرح رہنمائی تے سرپرستی کرتار ہیں گا۔

گوجری زبان کی تاریخ صدیاں پرانی ہے تے اس کا حوالہ ہندوستانی ادب ماں موجود ہیں۔ پر زمانہ کی بٹ مہری نے قوم کا سپوتاں نا اس پاسے دھیان دین کی مہلت نہیں وتی تے اس طرح یوہ اک اہم فرض مدتاں توں قضاء ہو تو آ یو ہے۔ نتیجہ کا طور پر اس قومی زبان نامحض اک علاقائی یا قبائلی زبان کا طور پر اپنی شناخت کرانی پوئے جہڑو سراسر ظلم ہے۔ ذاتی طور پر میری ساری کوشش اسے واسطے ہیں تانجے گوجری کی قومی حیثیت تسلیم کروا کے اس کو وقار بحال کیو جاسکے۔ یاہ بڑی دلچسپ حقیقت ہے جے گوجری غالباً دنیا کی پہلی زبان ہوئے گی جہڑی صدیاں تک رلتی رہن کے باوجود اج وی اپنی اصلی حالت مانھ زندہ ہے تے اج وی یاہ بن بر صغیر کی واحد زبان ہے جہڑی پورا خطہ مانھ بولی تے سمجھی جائے۔ پر گوجری کی بد قسمتی ہے کہ اتنی شاندار تاریخ ہوتاں وی اس زبان کو ذکر ساہتیہ اکیڈمی تے مرکزی آئین مانھ موجود نہیں۔

گوجری شاعراں، ادبیاں تے محقق حضرات کا حالات زندگی تے انکی ادبی خدمات بارے اک الگ تے مستند کتاب لکھن کو میر و خواب چر و کونو تھو پر اس ماں اسقدر وقت، محنت تے مشکلات پیش آویں گی اس کو مناوی اندازو نہیں تھو۔ ”لحلاں کا بخارا“، کاناں نال یاہ کتاب تیار کرتاں منایاں سال لگ گیا پر اللہ جی کے صدقے جس نے میری مدت کی خواب سچ کر دی۔ گوجری شاعراں ناگنماں نال اس دنیا توں رخصت ہوتاں دیکھ کے دل ناڈا ڈھو صد مو ہوئے تھو تے یوہ ارمان جاگے تھو جے اک بار سارا گوجری لکھاڑیاں کو تڈ کر و مرتب کیو جائے

جے اللہ توفیق تے مہلت دئے۔ اج گوجری ادب کی تاریخ، گوجری انگلش ڈکشنری، گوجری ”کہاوت کوش“ تے گوجری گرائمر تیں بعد گوجری لکھاڑیاں کو تندر کومل دیکھ کے مناجدہ تے الحمد للہ تیں بہتر تے مناسب ہو رکھ نہیں سرتو۔

قدیم شاعراں کا باب مانہ تمام شاعراں کو شمار ممکن وی نہیں تھوتے ضروری وی۔ مقصد یوہ تھو جے ۱۰۰۰ء تیں لیکے ۱۰۰۰ء تک کا نمایاں شاعراں کا ذکر تے کلام نال قدیم گوجری کا نمونہ اج کا گوجری طالب علم کے سامنے پیش کیا جائیں۔

جدید شاعراں کو ذکر کرتاں میں مناسب سمجھو کے ادیبیاں نا اس ماں شامل رکھو جائے۔ یاہ اک تاریخی حقیقت ہے جے شاعری نے ہمیشاں نشر کو حق مار یوہ ہے تے یوہ المیو گوجری نال گھ زیادہ ہی ہے۔ گوجری ماں نشر لکھن آلاں کو کال ہی ہے تے انکی اتنی تعداد نہیں جے ان پر جلدی کئے کائے الگ کتاب لکھی جاسکے۔ ترتیب تاریخ پیدائش کا حساب نال رکھی گئی ہے تے کتاب چھاپے چڑھن کا موقع توڑی چھتا لکھاڑیاں کی تفصیل لکھی سکی واہ شامل کی گئی ہے۔ اس کوشش کی کامیابی بارے آپ وقت دسے گو۔ لیکن اس کو یوہ مطلب ہرگز نہیں جے جن شاعراں کا ناں اس مانہ نہیں آیا دیہ غیر اہم ہیں۔ تحقیق کا خواہش مند واسطے کائے آخری حد نہیں ہوتی تے نہ اس میدان پر کسے کی اجارہ داری ہو سکے۔ بس ضرورت ہوئے خلوص تے محنت کی۔

میں دل جان تے ایمانداری نال گوجری لکھاڑیاں تک پوچھن کی کوشش کی تانجے انکا کوائف، تصویر تے کلام حاصل کیا جاسکیں۔ تے اس پر الا مانہ جہڑا سنگی تے مہربان میرے نال تعاون کرتا رہیا ہیں ہوں انھاں کو بے حد شکر گزار ہاں خاص کر ڈاکٹر صابر آفاقی، کرم دین چوہڑا، حاجی رانا فضل حسین راجوروی، حسن پرواز، عبدالغنی عارف، منشاء خاکی، تاج دین تاج، گلاب دین طاہر، عبدالسلام کوثری، محمد رفیع کھاری تے امین قمر ہوراں کو ناں لینو عین اعتراف حق

ہے۔ اس کم مانہ یاراں سال کی طویل مدت میں علاوہ جتنی ذہنی تے مالی تکلیف برداشت کرنی پئیں انہاں کی تفصیل لکھ کے کسے نا احسان جتان کی میری نیت ہر گونہ نہیں۔ پر اس گل کو ابسوس ضرور ہے جے خلوص نال کوشش کے باوجود مولانا عبدالباقی نسیم جیہا کجھ لکھاڑیاں تک رسائی نہ ہو سکی تے کجھ مہربان منا حاکمتمند سمجھ کے ہور اچا ہو بیٹھاتے اس کتاب مانہ شامل نہ ہو سکيا۔ اجھاں وی جہرڈا لکھاڑی اس ماں شامل ہون تیں رہ گیا ہیں اگر ویہ آپ یا کسے ذریعے مناں اپنے بارے تفصیلات پوچھا سکيا تاں اگلا ایڈیشن ماں شامل کرتاں مناں انہاں تیں زیادہ خوشی ہوئے گی۔ منا تجربوتے احساس ہے جے کجھ لوک حوالودین تیں بغیر وی اس کتاب تیں مستفید ہونیں گا پر امید کروں جے گوجری کا قدر دانان نائیک نیقی نال کی وی میری یاہ کوشش پسند آوے گی۔

ڈاکٹر رفیق انجم

حضورى باغ سرينگر کشمير



☆ قدیم لوجری شاعر

پہلو حصو

ابوالکلام
حضرت امیر خسروؒ
کے
نائویں

رہے نہ ایک و غوری کے معر کے باقی
ہمیشہ تازہ و شیریں ہے نغمہ خسروؒ

سید نورالدین عرف ست گرو

وفات: 1094ء

ویہہ یارھویں صدی کا اک بزرگ شاعر تھا جن کو سندھی تے گوجری کلام مشہور ہے۔ اُنکا کلام مانھ وزن تے بحر بلنگل ہندوی ہیں۔ ان کو کلام ست پنتھی رسائل کی صورت مانھ ہے۔ جس مانھ تصوف تے وحدت الوجود کو تصور موجود ہے۔ اُن کی گوجری شاعری مانھ اللہ تے رسول ﷺ کی محبت، لوک پیار تے معرفت کی گل ہیں۔ ویہ غالباً گوجری کا پہلا شاعر تھا جن کا تاریخی حوالا لہیں۔

کلام کا نمونا:

ست گرو کہے رے پو پو کرے
 دن پو پو نہ پاوے کوئے
 مکھ چن تاں جو پو ملے
 تو شر ساٹا نہ ہوئے رے

ست گرو کہے رے، جُوٹھا مرنا تو سب جگ مرے
 انے ساچا نہ مرے کوئے، اگر گنان جے مرے

حضرت امیر خسروؒ

پیدائش: 1253ء مومن آباد وفات: دہلی 1325ء

اُن کو اصل نام، ابوالحسن بھین الدین تھو۔ ویہ مومن آباد (یوپی) مانہ ۱۲۵۳ء مانہ پیدا ہو یا۔ اُنکا والد سیف الدین سلطان اتمش کا دور مانہ بلخ تیں ہندوستان آیا تھا۔ تے ان کو بیاہ ات کا اک راجپوت کی دھی نال ہؤ تھو۔ اس طرح جدا ٹھ سال کی عمر مانہ والد کی وفات ہو گئی تاں امیر خسرو ہوراں کی پال پاس نہال مانہ ہوئی۔ چت شعر تے موسیقی کی محفل اکثر ہوتی رہیں تھیں۔ انھاں ہی محفلاں تیں اثر لیکے انھاں نے لوہکی عمر توں ہی شاعری شروع کر لئی تھی۔ پہلے سلطانی تے فر خسرو تخلص رکھیو۔ بعد مانہ جلال الدین خلجی نے امیر کو خطاب دتو تے تے نوں ویہ اج توڑی امیر خسرو کا ناں تیں جانیا جائیں۔

۱۲۷۳ء مانہ نانا کی وفات تیں بعد ویہ خواجہ نظام الدین اولیا کا مرید بنیا تے نوکری کا سلسلہ مانہ کئی امیراں تے بادشاہاں کا دربار مانہ رہیا۔ کہو جائے کہ انھاں نے دہلی پر یاراں بادشاہی دیکھیں۔ ویہ نوکری کا سلسلہ مانہ دہلی تیں باہروی رہیا تے انکا ملتان تے بنگال تک جان کا حوالا وی موجود ہیں۔ بنگال مانہ ہی اپنا مرشد کی وفات کی خبر سنی تے سب کچھ چھوڑ کے واپس آ گیا۔ آخر چھ مہیناں تیں بعد ۱۳۲۵ء مانہ انھاں کی وی وفات ہو گئی تے اُن کو مقبرہ اپنا مرشد حضرت نظام الدین اولیا کا پہلو مانہ دہلی کی بستی حضرت نظام الدین مانہ اج وی موجود ہے۔

امیر خسروؒ نے دہلی کی بستی اُجڑتی کہانی کے نال نال ہندوستانی زبان تے کلچر کی تبدیلی وی اپنی آکھیں دیکھی۔ انھاں نے دہلی کی زبان نا، دہلوی تے ہندوی وی کہو ہے۔

انہاں کو جہڑ وی کلام ہندوستانی زبانان مانھ ہے اُس نا انھاں نے اپنی زبانی کائے اہمیت نہیں دتی۔ امیر خسرو اک بڑا سچا تے سچا صوفی شاعر تے مورخ ہون کے نال نال موسیقی کا وی باکمال اُستاد تھا۔ انھاں نے فارسی تے گوجری سمیت پنج زبانان مانھ شاعری کی ہے۔ ویہ اک جگہ لکھیں: ع: دھور سمندری تلنگنی وگر

اس مصرع مانھ گجرتیں مراد گوجری زبان ہے۔

امیر خسرو فارسی کا مستند تے مشہور فارسی شاعر تھا۔ ”جوہر خسروی“ قصہ لیلیٰ مجنوں تے ”خسرو نامہ“ سمیت انھاں کی سو کے قریب کتاباں کوخوالوتاریخ توں لکھے۔ فارسی تے ہندوی زبان مانھ منظوم لغت ’خالق باری‘ تے بہت سارا گیت دوہا، بھارت کہ مکرنیں تے دوختا آپ نال منسوب ہیں۔ ان کی منظوم لغت ’خالق باری‘ مانھ گوجری لفظاں کی بہتات ہے جہڑ اراج کی گوجری مانھ وی ہو بہو برتیا جائیں۔ ان کی اسے لغت کی طرز پر بعد مانھ سلیم شاہ سوری کا دور مانھ اچے چند بھٹا گرنے ’مثل خالق باری‘ ۱۵۵۱ء، اشرف بیابانی نے ’واحد باری‘ تے فر عبد الواسع نے ’صد باری‘ وی لکھی ہیں۔

امیر خسرو نے فارسی تے گوجری نارلا کے جہڑا ریختہ لکھیا ہیں انھاں مانھ وی گوجری کوخوب صورت استعمال موجود ہے۔ بے شک یاہ شاعری لوک شاعری کے سچ نیڑے ہے تے نالے بڑی سونہی سچی تے دردیلی ہے۔ امیر خسرو کی شاعری مانھ کئی ایسی مثال ملیں جت آپ نے یا تے گوجری زبان برتی ہے یا اس پر گوجری کوکھ نہ کجھ اثر صاف دے۔

(بشکریہ پروفیسر یوسف حسن)

کلام کا نمونا: دوہا:

کاگا سب تن کھنوی، چن چن کھائیو ماس
دو نیناں مت کھائیو، انھاں پیا ملن کی آس

خسرو رین سہاگ کی جاگی پی کے سنگ
 تن میرو من پو کو، دیہو بھی اک رنگ
 گوری سووے سچ پر مکھ پر ڈارے کیس
 چل خسرو گھر آپنے، رین بھی جیوں دیس

ریختہ

زحال مسکین مکن تغافل، ورانے نیناں بتائے بتیاں
 کہ تابِ بھراں ندرام اے جاں، نہ کاہے لیہو لگائے چھتیاں
 شبانِ بھراں دراز چوں زلف، و روزِ وصلت چوں عمرِ کوتہ
 سکھی پیا کو جو میں نہ دیکھوں تو کیسے کاٹوں اندھیری رتیاں
 یکا یک از دل دو چشمِ جادو، بصد فرہم بگرد تسکین
 کسے پڑی ہے کہ جا سناوے، پیارے پی کو ہماری بتیاں
 چوں شمع سوزاں چوں ذرہ حیراں زہر آں مہ بکشم آخر
 نہ نیند نیناں نہ انگ چیناں نہ آپ آوے نہ بھیجے پتیاں
 بحق روزِ وصال دلبر کہ داد مارا فراق خسرو
 پسیت من کہ درائے راکھوں جو جائے پاؤں پیا کی کھتیاں

ق: گجری کہ تو درخسن ولطافت چوں مہی اے گجری توں حسن مانھ چن ہار ہے، تیرا
 آں دیگِ دیہی بر سر تو چتر شہی سر پر ددھ کی گاگر چتر شاہی ہے۔ جد توں
 از ہر دو لب ت قدو شکر می ریزد کہے دیہی لیہو دیہی تے گویا تیرا ہوٹھاں
 ہر گاہ بگوئی کہ ”دیہی لیہو دیہی“ تیں مشری ٹپکے۔

بجھارت:

ایک نار ترور سے اتری ماسو جنم نہ پایو
 باپ کا ناؤں جو اسے پوچھو آدھو نام بتایو
 آدھو نام بتایو خسرو کون دیس کی بولی،
 واکا نام جو پوچھا میں نے اپنے ناؤں نبولی
 (نیم کی نمبولی)

کہ مکرنی:

اوچی اٹاری پٹنگ بچھایو
 میں سوئی میرے سر پر آیو
 کھل گئی آنکھ بھئی انند
 اے سکھی ساجن نہ سکھی چند

شمس العشاق شاہ میراں جی

وفات: 1496ء

میراں جی بہمنی دور کا مشہور صوفی شاعر ہیں۔ اُن کی پیدائش مکہ مکرمہ مانہ ہوئی۔ بارہاں سال تک مدینہ منورہ مانہ رہیا۔ خواب مانہ ہندوستان آن کو اشارہ ملیو۔ تے ویرات آکے اباد ہو گیا۔ اُنکا دور مانہ دکنی تہذیب ترقی پرتھی۔

شاہ میراں جی کی تخلیقات خوش نامہ، خوش نغز، مغز مرغوب تے شہادت التحقیق جیہی مختلف طویل نظماں کی صورت مانہ ہیں۔ جنہاں وچوں خوش نامہ زیادہ مشہور ہے۔ ویہ اپنا تمام کلام مانہ ہندی روایت کی پیروی کرتا سئی لگیں۔ انہاں کی زبان بارے ڈاکٹر جمیل جالبی وی ایک جگہ لکھیں کہ ”شاہ میراں جی کی زبان گجری زبان ہی کا ارتقاء معلوم ہوتی ہے۔“

میراں جی کی شاعری کو موضوع تصوف، اخلاق تے عوام کی تلکین ہے۔ اُن کی باقی تصنیفات مانہ ”شہادت التحقیق“ تے ”خوش مغز“ شامل ہیں۔

کلام کا نمونہ:

توں رحمان رحیماں میرا مہر محبت بھریا
میں تو باندی بردا تیری، نہیں مجھ ہاتھوں بھریا
میں بھی تیرا لاڈ چلایا، کبھو نہ ہوا اُداس
آپ سندیا ٹور گسائیں، تیری مجھ کو آس
خوش خوش حالوں خوشیاں، خوشی رہے بھر پور
یہ خوش خوشیاں اللہ اکبر، نوراً علی نور

فخر الدین نظامی

وفات: 1420ء

نظامی بہمنی دور کا مشہور نگار تھا۔ اُن کی مشہور مثنوی ”کدم راؤ پدم راؤ“ مانہ گوجری اثر نمایاں ہے۔ اُنہماں نے ایسا لفظ استعمال کیا ہے جہاں آج کی گوجری مانہ وی موجود ہے۔ مثال کے طور پر: چت (دل)، باس (بو)، ویل (وقت)، ہوں (میں)، کجات (کم ذات)، ڈیٹھا (دیکھا) تے دوس (قصور) وغیرہ۔ اُن کی اک مشہور مثنوی ”خوف نامہ“ کو وی تاریخ مانہ ذکر آوے پر یاہ ہُن نایاب ہے۔ اُن کی زبان ناوی مشہور تاریخ دان جمیل جالبی گوجری تسلیم کریں۔

کلام:

بڑے ساچ کہ کر گئے بول اچھک
 ڈرہا دود کا چھاچھ پیوے پھوک
 سُنیا تھا کہ ناری، دھرے بہت چھند
 سو میں آج ڈیٹھا نری چھند پند
 مجھے مارنا مار کے گھال دے
 ولے اج اکھر مار کے نکال دے
 کیہا کدم راؤ، ہوں پھول توں باس
 نہ ہووے پھول پیارا کدے دن باس
 بھلا بھی تہیں منجھ، بُرا بھی تہیں
 ترے پائے ہوں چھوڑ جاسوں کہیں
 جو کج کال کرنا سو توں آج کر
 نہ گھال آج کا کام توں کال پر

شاہ باجن

پیدائش 1388ء

وفات 1506ء

ان کو پوروناں بہاؤ الدین نے تخلص باجن تھو۔ ویہ فارسی تے گوجری کا قادر الکلام شاعر تھا جنہاں ناہندوستانی موسیقی نال وی دلچسپی تھی تے غالباً اسے نسبت نال باجن تخلص رکھیو۔ اُنکا کلام مانھ دو صنف عام ملیں: اک خاص صنف ”چکری“ ہے۔ تے دوجی دوہاں کی صورت مانھ۔ چکری اصل مانھ ذکر ہے تے یاہ اصطلاح ذکر تیں بنی وی سئی لگے۔ ڈاکٹر جمیل جالبی لکھیں شاعری کی یہ صنف گجری کے ساتھ مخصوص ہے اور گجری روایت کے ساتھ ہی ختم ہو جاتی ہے جد کہ حقیقت یاہ ہے جے گوجری لوک ادب مانھ اج وی ذکر کی صنف موجود ہے جہڑو بیہ شادیاں مانھ گایو جائے تے جس مانھ اج وی قدیم چکری کی طرح اللہ تے اسکا رسول ﷺ کو ذکر کیو جائے۔

باجن کی شاعری مانھ مذہبی تبلیغ زیادہ سئی لگے۔ اکثر کلام عشق حقیقی تے تصوف مانھ رنگیو ووسی لگے۔ اُنہاں نے موسیقی کو استعمال وی وجدان واسطے کیو ہے۔ ویہ وحدت الوجود کا قائل سئی لگیں۔ ویہ قاضی محمود دریائی تے جیو گام دھنی کا پیش رو تھا۔ ان کو کلام ”خزائنِ رحمت اللہ“ کی صورت مانھ موجود ہے۔

کلام کا نمونا:

باجن، باجن باجن تیرا تجھ باجھیں نہ جیون میرا

مسجد مسجد بانگاں دیوے ایسا تیرا زور

میخانہ بھیتر رنگ کرے ایسا تیرا شور

یوں باجن باجے رے، اسرار چھاجے رے
سندل من میں دھمکے، رباب رنگ میں جھمکے

صوفی ان پہ ٹھمکے

عشق را چوکڑہ برتن من آگ لگاوے رے
جلوں بلوں ہور بل بل جاؤں
ٹُجھ بن پل نہ ہو جاوے رے
شراب محبت بھر بھر پیالے
آتش عشق نقل نوالے
یہ زوئے رسول مالا مالی
نبی رسول ﷺ کی چُجوں جالی
محمد سرور پریم کا رحمت اللہ بھریا
باجن چیوڑا وار کر بسر آگیں دھریا

دوہا:

بھنورا لیوے پھول رس، رسیا لیوے باس
مالی سینچے آس کر، بھنورا کھڑا اداس
سب رس پانی نیچے، جیوں جانے سب کوئے
جس رس نیچے پانی، وہ رس کیسا ہوئے
گور اندھیاری ڈاہڈا، باجن کھڑا مفلس
ہیڑا کانپے، جیو ڈرے یہ ڈکھ آکھوں کس
اللہ تبتیں جے کوئی ہووے اللہ اور جگ اسکا ہووے
من مراد گھر بیٹھے پاوے اسکو مار نہ سکھے کوئے

باجن نے قرآن پاک کو جزوی ترجمہ وی گو جری زبان مانھ کیو تھو اس بارے بابائے
 اُردو مولوی عبدالحق اپنی کتاب قدیم اُردو مانھ لکھیں:

شیخ بہاؤ الدین الملقب بہ باجن حاجی معز الدین (۱۹۰۷ء تا ۱۹۱۲ء مطابق ۱۳۸۵ء
) برہان پور میں پیدا ہوئے۔ کامل اولیاء اللہ میں سے تھے، اکیس سال حریم شریفین میں
 رہے۔ آپ نے قرآن مجید کی ایک منظوم تفسیر لکھی جو موجودہ تحقیق کے مطابق قدیم ترین جزوی
 ترجمہ و تفسیر گجری زبان میں ہے۔ سورۃ اخلاص کی منظوم تفسیر بطور نمونہ بزبان گو جری:

نہ ان جنیانہ وہ جایا نہ ان مائی باپ کلایا

نہ ان کوئی گود چڑھایا باجن سب ان آپ بتایا

ترجمہ اُردو: ”نہ وہ کسی سے جنا گیا اور نہ اس سے کوئی جنا۔ نہ اسکا کوئی ماں باپ ہے

اور نہ ہی اس نے کسی کو اپنا بیٹا قرار دیا۔ باجن یہ سب کچھ اسی نے خود بتایا ہے۔ وہ اکیلا ہے اور

بے نیاز ہے اسکا کوئی شریک نہیں۔“
 قدیم اُردو (مولوی عبدالحق)

سید اشرف بیابانی

پیدائش: ۱۳۵۹ء

وفات: ۱۵۲۸ء

اشرف بیابانی شاہ میرانچی کا ہم عصر شاعر اور وچوں تھا۔ وہ شاہ سید ضیا الدین رفاعی بیابانی کا فرزند تھے خلیفہ تھا۔ ان کی ترے کتاب، لازم المبتدی، واحد باری تے نوسر ہار مشہور ہیں۔ نوسر ہار مانہ کر بلاء تے شہادت امام حسینؑ کو تفصیلی ذکر ہے۔ لازم المبتدی ان کی اک لمی نظم ہے جس مانہ ہر وقت کم آن آلا اسلامی مسائل بیان ہوا ہیں۔ مثلاً اسلام مانہ غسل کو طریقہ اس طرح منظوم بیان کریں۔

سنت غسل کی بو جھیں پانچ
ہات اور فرج کوں دھونا سانچ
پلیتی دور کر کپڑے سین
وضو کرنا پہل غسل میں
تین بار سر میں پاؤں لگ دھونا
پچھوں نماز پر طیار ہونا

واحد باری امیر خسرو کی خالق باری کی طرز پر لکھی وی ان کی منظوم لغت ہے۔ مثال

بحر ہے دریا آب فراغ	کلام موزوں ہے ڈالی شاخ
نیم بیت کو تبصرہ بول	دو مصرع کی بیت ہے کھول
چند بیت کو قطعہ تو جان	از شعر و غزل سے کاٹ کے آن
ردیف بعد از قافیہ آر	ایک گھوڑے پر دو سوار

قاضی محمود دریائی

پیدائش: ۱۳۶۹ء

وفات: ۱۵۳۳ء

محمود دریائی زبردست صوفی شاعر گذریا ہیں۔ ویہہ گجرات کا علاقہ بیر پور کا رہن آلا تھا۔ اُنکا کلام توں ثابت ہوئے جے ویہ عشق کی لذت تے عذاب تیں بچپن مانہ ہی واقف ہو گیا تھا۔ ان کو سارو کلام عشق تے محبت مانہ رنگیو و ہے۔ موسیقی کو خاص شوق رکھیں تھا، اسے گلوں اُن کی ساری شاعری سُر تال کے مطابق ہے۔ ہندوی روایت پر مبنی ان کو سارو کلام تصوف تے وجدان آلو ہے۔ قاضی محمود دریائی ہوراں نے عشق حقیقی تے مجازی یکجا کیا ہیں۔ اُنکے نزدیک عشق تیں بغیر زندگی بیکار ہے۔ قاضی صاحب گجرات کا اُن بزرگ صوفیاں و چوں ہیں۔ جن کو فیض اج وی جاری ہے۔ اُنھاں نا گجرات کا خواجہ نصروی کہیو جائے۔ اُنھاں نے اپنو کلام مختلف راگ راگنیاں کے مطابق ترتیب و توتے مختلف عنوان وی رکھیا۔

آج سر بجن گھر آیا	کیوں نہ کروں مہمانی
نین رنگیلوں کے قربان	نین چھیلوں کے قربان
نین جنجالوں کے قربان	نین سلونوں کے قربان
جاگ پیاری اب کیا سووے	رین کیسی، تیوں رون کیا کھووے
جس کے شہ کو اونگ نہ آوے	سو دھن کیوں سو رین گنواوے
جاگ جاگ نینا نہ لاوے	سوتے بیٹھے کیوں شاہ پاوے
محمود نہ جاگ نہ شاہ کو راوے	سو کر میت چکھن پچھتاوے

اک ہور جگہ لکھیں:

جن دیکھے سورہ کر دھولے آپس کرے ندھان
دیکھت نیں مرک میں موئی جھیل ہوئی نسوان
پنکھی پنہتی دیکھت موئی کالی کیتی جان

امیر کبیر (بھگت کبیر)

پیدائش: 1419ء

وفات: 1518ء

ویہ بنارس کا رہن آلا تھا، اک غریب جو لاہا خاندان نال تعلق تھو۔ شروع توں ہی ذات پات کے خلاف تھا۔ ویہ بھگتی تحریک کا اہم رکن ہیں۔ توحید، عشق حقیقی تے تصوف نا بھگتی رس مانھ پیش کرن آلا شاعر تھا جھان نے آسان عوامی زبان مانھ شاعری کی جھڑی سنن آلاں کا سینہ مانھ اتر جان آلی تھی۔ آج تک انھاں کا دوہا ہر اک کی زبان پر ہیں۔ انکا کلام کا مجموعہ ”بیچک“ تے ”بانی“ ہیں۔

ان کی زبان اس دور کا عام آدمی کی زبان تھی جھڑی پورا شمالی ہندوستان مانھ بولی جائے تھی۔ انھاں نے اپنی زبان مانھ بھارا سنسکرت یا عربی فارسی لفظاں تیں احترام کیوتے عام لفظ وی لغت کا اعتبار نال نہیں بلکہ عام بول چال کی صورت ہی لکھیا ہیں۔ مثلاً تکھت، کاگت، وجو، گریب نواج انداجا، وغیرہ۔ انھاں نا احساس تھو جے زبان واہی زندہ رہے جھڑی عوام کی ہوئے نہ کہ مشکل ادبی زبان۔ ویہ آپ اس بڑی سچائی کو اعتراف کرتاں کہیں۔

ع: سنسکرت ہے کوپ جل، بھاشا بہتا نیر۔

کلام:

دین گماو دُنی چھے، دُنی نہ آئی ہتھ
پیر کوہاڑو ماریو گا پھل اپنے ہتھ
چلتی چاکی دیکھ کے دیا کبیرا روئے
دوئے پٹ بھیترا آئے کے، ثابت گیا نہ کوئے

مائی کہے کہہار سے توں کیا روندے موئے
 اک دن ایسا ہوئے گا، میں روندوں گی توئے
 پاہن پو جے ہری ملیں تو میں پوجوں پہاڑ
 تانے یہ چاکی بھلی، پیس کھائے سنسار
 جیوں تل ماہیں تیل ہے، جیوں چکمک میں آگ
 تیرا سائیں ٹجھ میں بسے، جاگ سکے تو جاگ
 جو چھڑے ہیں پیارے سے بھٹکتے در بدر پھرتے
 ہمارا یار ہے ہم میں، ہمن کو انتظاری کیا
 صاحب میرا ایک ہے دو جا کہا نہ جائے
 دو جا صاحب جو کہوں صاحب کھرا رسائے
 ست نام کڑوا لگے بیٹھا لاگے دام
 دبدھا میں دونوں گئے مایا ملی نہ رام
 ہاڑ جلی جیوں لاکڑی کیس جلی جیوں گھاس
 سب تن جلتا دیکھ بھیا ہوا کبیر اداس
 مالی آوت دیکھ کے کلیاں کریں پکار
 پھولی پھولی چن لئے کال ہماری بار
 کبیر سریر سرائے ہے، کیا سوئے سکھ چین
 سوانس نگارا باج کا باجت ہے دن رین

شاہ علی جیوگام دہنی

وفات: 1565ء

جیوگام دہنی گجرات مانہ سولہویں صدی کا مشہور صوفی شاعر گندریا ہیں۔ عشق مانہ ویہ اُسے روایت کی پیروی کریں جس کی ابتدا امیر خسرو تے شاہ باجن ہوراں نے کی تھی۔ توحید تے وحدت الوجود اُنکا کلام مانہ جگہ جگہ دسیں۔ جن نا انھاں نے بڑا پیار تے خوب صورتی نال بیان کیو ہے۔ اُن کو سارو کلام ہندوی طرز کو ہے۔ لیکن اُن کا دور مانہ گوجری مانہ وسعت آگئی تھی تے فارسی قصائے اصطلاح استعمال ہون لگ گئی تھیں۔

جواہر اسرار اللہ کا دیباچہ مانہ شیخ الاحمدی تے سید ابراہیم اُنکا کلام نا گوجری تسلیم کریں۔ [جواہر نشار بطریق نظم بہ الفاظ گوجری بزبان حق وگا ہے حق] اور [در بیان توحید و اسرار بالفاظ گوجری بطریق نظم فرمودہ بود دریں مختصر آوردہ و جمع کردہ]

جیوگام دہنی ہور جدید تے قدیم شاعری کے بشکار لڑی کو کم کریں۔ روایتی اعتبار نال ان کو کلام ہندوی ہے مگر اُس مانہ فارسی کا چھاملا موجود ہیں۔ اُن کا دور مانہ گجرات سیاسی انتشار کو شکار تھو۔ فارسی بلیں بلیں زور پکڑتی جائے تھی تے گوجری جہڑی اسویلیے توڑی عوام کی زبان تھی ہن کمزور ہونی شروع ہو گئی تھی۔

ان کو کلام ”جواہر اسرار اللہ“ سارا کو سارو عشق الایمانی مانہ رنگی وی نظماں کو مجموعہ ہے۔ جس مانہ ویہ اپنا محبوب حقیقی نارنگ بدل بدل کے پچھان کی کوشش کرتا سئی لگیں۔

چاؤ ہوا اس میرے ساتھی کی جگ کی بھیس ہو آؤں

کہیں سو راجا کہیں سو پر جا کہیں سو بندا آپ کہاؤں
 کہیں سو عاشق ہو کر روں کہیں عارف ہوئے بچانوں
 کہیں موحد کہیں محقق کہیں سو جانوں کہیں نجانوں
 بھیس بندو کے کروں سو بندگی اور بہا ہوہو نماز گزاروں
 ہوں حاجی ہوں کعبا آہوں آپیں آپس اوپر واروں
 ہو پیدے ہور ہوئے لیتاں ایویں آپیں آپ کہاوں
 فرض کیاں ایہ باتاں تم پر پیار کروں گا کرسی تاسوں
 اتنی بات نہ بوجھی لوگاں آپ نبھاتا کری سو کوئے
 علم قدرت جس تھورا ہووے کی مجبور بچارا ہووے
 دوئی وجود کوں موجود ہونا یہ تو بات محال ہے لوگا
 ایک حقیقت ہے گی آپے جان نمائوں کا ہے بھوگا
 چھوڑو لوکا چہ لڑائی لڑائی کان کروں یہ پر م کہانیں
 تمہوں تمہاری شیریں بھاوے محکوں میری لیلیٰ سہانیں
 جے تم لیلیٰ جو یا لوڑو منجہ مجنوں کی نیسوں دیکھو
 تمہوں تمہاری شیریں جوؤ لیلیٰ کوں کیوں دیکھو
 کلام کا کچھ ہور نمونا:

جیوں پھول کلی رنگ رلی وہی

جیوں نبی ﷺ علی وہی

کہیں سوں مجنوں ہو بر لاوے

کہیں سوں لیلی ہوئے دکھاوے
 کہیں سوں خسرو شاہ کہواوے
 کہیں سوں شیریں ہو کر آوے
 کہیں سوں عاشق ہو کر لاؤں
 کہیں عارف ہوئے پچھانوں

بیاجت گاجت سہیلی گاویں رے تجھ روپ اُجاگل کرے
 آج ہماری عید یہی ہے نین سلونے دیکھے تیرے
 جے تُم لیلی جو یا لوڑو منجہ مجنوں کے نینوں دیکھو
 تمہیں تمہاری شیریں جوؤ لیلی کو کیوں پیکھو
 کھ پر بال بکھیر سوسا تھی جھب کر ہووے رات سنگھاتی
 دل سنبھال سو بکھرے کیسا دن ہو آوے سورج بھیسا
 میرا ناؤں منجھات بھاوے میرا جیو منجھے پر چاوے
 میرا نیہ منجھے سوں مائے رہری اینیں روپ لبھائے

آدم آدمی ہو رجن سارے، نور نبی تھے کہتے
 بھیس بھرا کر آپ دکھایا ہم تم اوپر بول سودیتے
 ڈونگر حیوان ہو رناتات، اے سب نور نبی کا جانوں
 احمد، محمد نانوں احمد کے دوجا من منہ کوئے نہ آنوں
 تورات چلا خدا این کہیا مہتر موسا ہاتھ
 محمد ﷺ رسول حبیب خدا کا ساروں کہ یہ بات

میاں محمد مصطفیٰ

وفات: 1576ء دکن

میاں محمد مصطفیٰ کو تعلق وی گجرات کا اک بوہرہ طبقہ نال تھو۔ ویہہ گجرات کا اُن گوجری شاعراں وچوں ہیں جہڑا اتوں ہجرت کر کے دکن مانھ گیا تھا۔ گوجری توں علاوہ اُنھاں نے فارسی مانھ وی شاعری کی ہے تے نال نال ریختہ مانھ وی جذبات کو اظہار کیو ہے۔ ”بقول جمیل جالبی“ اُن کا وہ ریختہ جب وہ خانِ اعظم کی قید و بند میں تھے، اُن کے جذبات و احساسات کا موثر اظہار ہے۔“

ولے چوکیں جو کہیں بُرا ہوا
 ہور ویوں سوں بھی آئے اڑے
 کیا ہوا جو ہم بہرنگ ہوئے
 کیا ہوا جو بائے بہت بلے
 جو پیو جی ہم سوں نہیں بچا
 ات دھل جو بنوں سیسا ہوا
 ہم اس پنٹھ چالیں کھڑا ہوا
 کوئی تروراں کوئی بھوکھ موئے
 کیا ہوا جو ساتھی چھوڑ چلے
 ولے چوکیں جو کہیں بُرا ہوا

مثنوی ”فیضِ عام“ مانھ وی میاں مصطفیٰ کی زبان نا گجری لکھیو گیو ہے۔

”دیا کھول کر جواب گجری زبان۔“

میاں مصطفیٰ کی لکھتاں مانہ ایسا ریختہ وی لکھیں جہاں مانہ، فارسی تے گوجری رلا کے استعمال ہوئی ہے۔ یاہ روایت امیر خسرو سمیت ہوروی کئی شاعراں نے استعمال کی ہے۔

اس لکھے اُپر واری رے اس غمزے کے بلہاری رے
یا اک دو جی جگہ اس طرح کھیں:

روئے آں مہوش برنا سو کدھیں بھی نہ ہرستا

جان ز بچر ز رخ زیبائش، نس دن ڈھکی بھرتا

جم جم شادیاں روزی سہیلیاں سازواری گاؤ

نت نت خوبیاں اوکیاں، خوشی کے تھال بھراؤ

جمیل جالبی اک ہور جگہ لکھیں: ”گجرات میں سید مہدی اور اُنکے پیروں کی علمی

زبان تو فارسی تھی لیکن اُن کی روزمرہ کی زبان گجری اُردو تھی جس میں وہ اپنے خیالات کا اظہار کرتے تھے، جسے ہندی اور ہندوی بھی لکھا ہے۔ اُن کا مطلب بھی اس زبان میں بیان

کیا جاتا ہے۔“

میاں مصطفیٰ ہی لکھیں:

ہندی پر نہ مارو طعنا سب بتاویں ہندی معنا

یہ جو ہے قرآن خدا کا ہندی کریں بیان سدا کا

لوگوں کوں جب کھول بتادیں ہندی میں کہہ کر سمجھا دیں

میاں مصطفیٰ نے بھی کہا اور کسی کی پھر کیا رہی

شاہ برہان الدین جاتم

وفات: 1582ء

جاتم ہور میرا جی کا فرزند تے خلیفہ تھا۔ اُنھاں نے ہندوی روایت برقرار رکھ کے تصوف کا موضوع پر شاعری کی ہے۔ اُنھاں نے دوہاتے غزل وی لکھی ہیں پر ہر جا اُنھاں نے عشق نا اچو مقام دتو ہے۔ میرا جی کی طرح اُنھاں نے وی دکنی زبان تے ہندوی روایت کی ترقی مانھ بڑو کم کیو ہے۔ ویہ خودوی بار بار اپنی زبان نا ”گجری“ کہتا رہیا ہیں۔

اُن کی نظماں مانھ ”ارشاد نامہ“، ”نحۃ البقاء“، ”کلمۃ الحقائق“، ”بشارت الذکر“، ”سکہ سہیلا“، ”وصیت الہادی“ تے ”منفعت الایمان“ شامل ہیں۔ اُنھاں نے اپنی عمر کو زیادہ حصو بیجا پور مانھ گزار یو تے ۱۵۰۲ء مانھ اُن کی وفات ہوئی۔

ویہ اپنی نظم بارے آپ لکھیں: سبب یوں زبان گجری نام این کتاب ”کلمۃ الحقائق“۔

بن عشق تجھ کو سوچ نہیں
اور بن بدھ عشق کی گونج نہیں
جے آپ کو کھوجیں پیو کو پاویں
پیو کو کھوجیں آپ گنواویں
یہ سب ”گجری“ زبان
گجریہ آئینہ دیا نہان
جے ہوویں گیان بجاری
نہ دیکھیں بھاگا ”گجری“

حجۃ البقاء مانھ ویہ لکھیں:

یوں کہہ کر پکڑیا پانو

مجھ تیری ہونا چاہوں
 اُن چھوڑیا جہل حرام
 اور طہد کیرا کام
 پس جس کوں ایسا پیر
 اس روشن سب زمیر
 اس فہم بھر ادراک
 و راہ حقیقت پاک

چلو ری چال تو میں شہو کیری دھال
 کھیلیاں باتاں بولیں اپنے رے خیال
 بولے جانم نیں کس کا مجال
 شعر چڑیا بات میرے کیوں لے جائیں کہا اتال
 ڈاکٹر جمیل جالبی لکھیں: ”جانم کا سارا کلام دیکھ کر گجرات کے شیخ باجن، محمود دریائی،
 اور جیو گام دھنی یاد آجاتے ہیں۔ روایت کے اعتبار سے جانم کا خمیر گجری کی ادبی روایت و معیار
 سے اُٹھتا ہے جس کا اعتراف جانم نے بار بار اپنی نظم و نثر میں کیا ہے۔“

سید اسحاق سرمست

وفات: 1605ء برہان پور

سرمست ہور، سید محمد مہدی کی نسل وچوں تھا۔ ویہوی اُس دور کا اکثر گوجری لکھاڑیاں ہاروں گجرات تیں ہجرت کر کے برہان پور مانہ آباد ہو گیا تھاتے باقی عمر اُتے گذار کے ۱۶۰۵ء مانہ فوت ہو یا۔

سید اسحاق سرمست کا کلام توں ظاہر ہے جے اُس دور مانہ ہندوی روایت کمزور ہو کے فارسی روایت نے زور پکڑنو شروع کر ليو تھو۔ تے اس طرح قدیم گوجری شاعری بلیں بلیں اُردو کا دائرہ مانہ داخل ہونو شروع ہو گئی تھی۔ اُردو تاریخ دانان نے سرمست ناوی گجری اُردو کا شاعر لکھو ہے۔ نمائندہ کلام:

میرے چو کول پیو باج آرام نہیں
 بجز عشق بازی تجھے کام نہیں
 کلیجہ کے کیوں کھا سکے او کباب
 کہ جے عشق کا لیا جام نہیں
 کرے کیوں محبت کے کعبہ کا حج
 بندھیا جے محبت کا احرام نہیں
 ہوا گھر جدائی کی گلخت سوں گور
 ولے کہیں بھی وصلت کا دسرام نہیں
 پچاروں کو ہے عقل سرمست سوں
 بجز عبد ہی کجھ اوسے کام نہیں

شیخ خوب محمد چشتی

پیدائش: 1539ء

وفات: 1614ء

خوب محمد گجرات کا سیاسی انتشار کا شاعر ہیں۔ انہاں نے گجرات کی تباہی تے اکبر کی فتح اپنی اکھیں دیکھی۔ ویہ وی بھاویں صوفی شاعر تھا، مگر اُنکا کلام مانھ وہ سواد نہیں جھرو چو گام دھنی کی شاعری مانھ لیھے۔ اُن کی شاعری ہنک سئی لگے۔ غالباً ویہ زمانہ کا حالات کی وجہ تیں انکی زبان عربی تے فارسی آمیز ہے جس نا ویہہ بولی گجرات، کہیں لیکن مولوی عبدالحق تے ڈاکٹر جمیل جاہلی خوب ترنگ مانھ استعمال ہون آلی زبان نا گجرات مانھ بولی جان آلی گوجری ہی قرار دیں۔۔ اُن کی مشہور تصنیف ”خوب ترنگ“ اک طویل مثنوی ہے جھڑی چھوٹی ہندی بحر تے وزن مانھ لکھی وی ہے۔ جس مانھ تصوف کو مضمون نمایاں طور پر بیان ہوؤ ہے۔

جتناں طالب کوں بس ہووے میں اس مانہ کہیا ہے سوئے
 جیوں دل عرب عجم کی بات سُن بولے بولی گجرات
 میں مُرشد تھیں سُنیا بیان وے مُرشد صاحب عرفان
 دجھوں منجھے سکھایا دین چہ تھیں منجہ دل آیا یقین

ہیلا تانے کی تھی تب تانبا کھاتے تھے ویہ سب

میرا بانی

پیدائش: 1547ء گڑکی، مارواڑ (راجستھان) وصال: 1614ء

گجراتی، راجستھانی، برج بھاشا تے ہندی مانھ اچو مقام رکھن آلی صوفی شاعرہ میرا بانی کا کلام کو جائز و لیو جائے تاں ثابت ہوئے جے ان کی اس دور کی گھگتی رس مانھ رچی بسی شاعری کسے دوجی زبان توں زیادہ گوجری کے قریب ہے جس کو اس زمانہ مانھ چلن تھو۔ تے اس طرح حق گل یاہ ہے جے ویہ قدیم گوجری کی معتبر شاعرہ ہیں۔ جہاں ناہندی ادب مانھ وی بڑی اہمیت دتی جائے۔

میرا بانی کی پیدائش ۱۵۴۷ء مانھ، مارواڑ راجستھان کا گراں گڑکی مانھ راورتن سنگھ ہوراں کے گھر ہوئی۔ ان کی طبیعت نگی عمر توں ہی باقی بچاں تے کھتھی تے اسکو اندازوان کی مانھ ناچی میرا کی عاداتاں توں ہو گیوتھو۔ اک بار کو اک واقعہ بڑو مشہور ہے جے پنج سال کی میرا نے اپنا محل کی باری بچوں ڈولی لے کے جاتی اک جج دیکھی تے مہراج نا دیکھ کے اپنی ماں کولوں پچھو میرو مہراج کت ہے۔ ماں اس سوال تیں پریشان تے ہوئی پرنگی میرا نا بھلان واسطے بھگوان کرشن کی مورتی دارا اشارو کر چھوڑیو۔ کہیو جائے جے اُسے وقت توں میرا کرشن بھگوان کا عشق مانھ ڈُب گئی تے ساری عمر اسے موضوع پر شاعری کی۔

اُس دور کا رواج کے مطابق نگی عمر مانھ ہی ۱۵۵۵ء مانھ میرا کی شادی پتوڑ کا شہزادہ تے رانا سانگا کا بڑا پوت بھوج راج نال ہوئی پر میرا کی بھگتی چلہ کشی کی وجہ تیں یوہ سنگ زیادہ

خوشحال نہ ثابت ہو سکیو تے اس شادی شدہ زندگی مانھ کئی تلخ واقعات ہو یا جنگی مثال کشمیر کی مشہور شاعرہ ل دیدی کی زندگی نال میل کھائیں۔ ۱۵۶۵ء مانھ بھوج راج کی وفات تیں بعد میرا بانی نے سنیاں شروع کر ليو تے ساری عمر برندا بن تے دوارکا مانھ گزارن تیں بعد ویہ ۱۶۱۳ء مانھ کہیو جائے کی بھگوان کی مورتی مانھ ہی سمیا گئیں۔

میرا بانی کا مشہور بھجن زبانوں کی قید تیں بغیر قدیم ہندوستانی ادب کو اہم سرمایہ ہیں۔ جہڑا موضوع کی نسبت نال صوفی شاعری کو حصہ ہیں۔ ان کی زندگی تے کلام کو مقابلہ بجا طور پر کشمیر کی مشہور شاعرہ ل دیدی نال کیو جاسکے۔ میرا بانی کی اس دور کی ہندوی شاعری مانھ گوجری کو روپ صاف باندے دے۔

کلام:

بسو میرے نین مانھ نند لال
مؤنی مورتی سانولی صورتی نینا ہے بھال
میں تو گردھر کے گھر جاؤں
گردھر مہارو سانچو پریتم، دیکھت روپ رچھاؤں

ق:

مہارو جنم مرن کو ساتھی، تھائے نہیں بسرو دن راتی
تم دیکھیو بن کل نہ پرت ہے جانت میری چھاتی
اُچی چڑھ چڑھ پنتھ نہاروں، روئے روئے اکھیاں لاتی
یو سنسار سکل جگ جھوٹھو، جھوٹھو کلر انیاتی

مائے میں تولیو ہے سانور یومول

نظم:

جا کے سر مور مکھٹ میرو پتی سوئے
جا کے سر مور مکھٹ میرو پتی سوئے

کوئے کہے چھانی، کوئے کہے چھوڑ لے
مائی رے میں تو لیو گوبند مول

کوئے کہہ ہلکو کوئے کہہ بھارو
میں تو لیو ہے ترازو تول

کوئی کہہ سوگو کوئی کہہ بیگو
میں تو لیو ہے امولکھ مول

کائی کہہ کارو کوئی کہہ گورد
میں تو لیو ہے اکھیاں کھول

میرا کے پرہو گردھر ناگر
مہارے پورب جنم کو تول

محمد قلی قطب شاہ

پیدائش 1556ء

وفات: 1611ء

ویہ قطب شاہی دور کا سب سے زیادہ مشہور، علم دوست تے شاعر بادشاہ تھا۔ اسے دور مانہ بیجا پور مانہ عادل شاہ ثانی کی حکومت تھی۔ انہاں نے سلطنت مضبوط بنان کے نال نال محمد نگر تے حیدرآباد چہا شہر آباد کیا۔ مچ سارا ترقیاتی کم کیا تے علم و ادب کی ہمیشاں خدمت کی۔ ویہ اردو کا پہلا صاحب کتاب شاعر منیا جائیں۔ جن کو کلام کلیات قلی قطب شاہ ادب کی دُنیا مانہ بڑوا ہم تے سنگِ میل سمجھو جائے۔ ان کو اسلوب سادہ تے عبارت سلیس ہے۔ اُن کی غزلاں مانہ لطافت تے عاشقانہ عنصر کافی ہے۔ انہاں نے مثنوی، قصیداتے مرثیہ وی لکھیا ہیں۔ قلی قطب شاہ تے عادل شاہ ثانی کی ایک جیسی دلچسپی، امن پسندی تے علم دوستی کی وجہ تیں اُن کا دور حکومت مانہ علم دوست حضرات کی خوب خدمت ہوئی۔

کلام:

تمہارا حسن سو قدرت تھی روشنی پایا
 ہوراں کا حسن تیرے حسن اگے جیسے چراغ
 معانی شکر خدا کر، نہ کرتوں غم ہرگز
 نبی کے نانوں تھیں آتا تو مجھے خوشی مراغ
 پیا باج پیالہ پیا جائے نہ
 پیا باج اک پل جیا جائے نہ

ابراہیم عادل شاہ ثانی عرف جگت گرو

پیدائش: 1580ء

وفات: 1611ء

جگت گرو بیجا پور کا بادشاہ، علم دوست، ہندوستانی روایت کا شیدا تے عشق پرست شاعر تھا۔ اُن کا زمانہ مانہ ہندوستان پر اکبر کی حکومت تے گوکنڈہ مانہ اک ہور شاعر تے عادل بادشاہ قلی قطب شاہ کی حکومت تھی۔ موسیقی مانہ خوب مہارت کی وجہ تیں اُن کو ناں جگت گرو مشہور ہو گیا تھو۔

اُنکا دربار مانہ علم و ادب تے موسیقی کی محفل ہوتی رہیں تھیں جن مانہ عام لوک دوروں دوروں آویں تھا۔ ویہ عشق بغیر زندگی نابیکار جانیں تھا۔ اُن کی شاعری مانہ اکثر گیت شامل ہیں جہواراگ راگنیاں کے مطابق لکھیاوا ہیں۔ اُن کی طرز وی شاہ باجن، چوگام دھنی، محمود دریائی تے جاتم نال رلے صرف اتنوفرک ہے جے باقی شاعراں کو موضوع تصوف تھو جہ کہ جگت گرو کا گیتاں مانہ عشقیہ رنگ غالب سئی لگے۔

جگت گرو کی مشہور کتاب نورس مانہ ایسا ہی گیت شامل ہیں جن مانہ حُسن و جمال، عشق کی رنگینی تے بھر و وصال کی کیفیات کو خوب اظہار ہے۔ اُن کی زبان قدرے مشکل ہے پر سرتال مانہ ہون کی وجہ تیں گیتاں کو یوہ عیب چھپ جائے۔ اُن کو تخیل بے حد خوب صورت ہے تے انھاں کا گیت انھاں کا روح کی ترجمانی کرتا دسیں۔

پیارے چاند آکھوں کنتھ دین و دئی دکھ
من چاہے سونس بھی، ہم تم کہ ہیں اب سکھی
بجھانوں دپک کول ترا سوں دینکر آوے گا
گھر گھر چھپ رہ جاسوں، سب سُدھ پہنچاوے گا

مولانا فضل پانی پتی

وفات: 1625ء

وید عہد اکبری تے عہد جہانگیری کا مشہور شاعر تھا۔ ویہ اُردو ماٹھ بارہ ماہ کی روایت کا مؤجد سمجھیا جائیں۔ ان کی مشہور تصنیف ”بکٹ کہانی“ ہے۔ جس ماٹھ ہندی تے فارسی اسلوب رلیا ملیا واسی لگیں۔ اُن کی شاعری ماٹھ قدیم گوجری کے نال نال برج بھاشا، کھڑی بولی، تے ہندی کورنگ لھے۔ اُن کی زبان اُردو کے قریب تر ہے۔

”بکٹ کہانی“ دراصل ہندوستانی موسماں سیال، برہیا، گرمی، سردی کا باراں مہیناں کی کیفیت کو بیان ہے جہڑواک جُدائی کی ماری وی عورت، اپنا محبوب کا فراق ماٹھ سناوے۔ واہ ہر مہینہ کا حوالہ سنگ اپنا اندرونی جذبات تے احساس نا نہایت درد کے نال بیان کرے۔ غور قابل گل یاہ ہے جے ”بارہ ماہ“ خالص ہندوستانی روایت ہے جس پر فارسی کو کوئے اثر نہیں تے دوجی گل یاہ وی جے باراں مانہ اج کی گوجری زبان ماٹھ وی اُسے روح تے روایت سنگ بڑا خوب صورت انداز ماٹھ لکھیا تے گایا جائیں۔

کلام:

تمن اس اک ماہر گز نہ پڑنا	اری آساں نہ جانو عشق کرنا
محبت خانہ ماسی نہ جانو	ہماری بات کو ہانسی نہ جانو
تھی ہوں عشق کے غم سوں دوانی	سُو سکھیو بکٹ میری کہانی
اری جلتی کے اوپر پھوس لاتا	اندھیرات جگنو جگگاتا
اری کن دپوں نے ٹونے چلائے	چلا ساون مگر سا جن نہ آئی

امین گجراتی

وفات: 1697ء

امین گودھرہ گجرات کارہن آلا، تے مغل بادشاہ اورنگ زیب کا زمانہ کا گوجری شاعر تھا۔ اس دور مانہ دکن کی فتح نال زبان مانہ ہور نکھار، معیار تے وسعت آگئی تھی۔ اُن کی مشہور مثنوی یوسف زلیخا اسکی مثال ہے۔ اس دور مانہ فارسی روانت شروع ہو گئی تھی تے اس کا آثار گوجری مانہ وی شامل ہون لگ پیا تھا۔ امین گجراتی کی زبان، ولی دکنی کارینتہ کے نیڑے تیرے سئی لگے۔ اُن کی مثنوی یوسف زلیخا مانہ چار ہزار شعر ہیں۔ اسے مثنوی ”یوسف زلیخا“ کا آخر ماں امین گجراتی لکھیں:

بیتاں ہیں چار ہزاراں او پر ایک سو دیکر چاروہ بیت گجری سنو

امین نے گوجری کی سو یوں کر
کہ آپیں تیں رہے دنیا کے بھیتر
وجود اے ہے سو ہو جائے گا خاک
نہیں پاوے سو دھونڈا جیو اے پاک
نشانی تب رہے گی اے سخن رے
جو کچھ بولا امین بیٹھے سخن رے

الہی تیں مجھے توفیق جو دی
تو میں بھی فارسی سین گوجری کی

میرا مطلب ہے یوہ سب کوئے جانے
 حقیقت اس کی سب کو پچھانے
 پڑا ہووے جو کوئی فارسی کوں
 وہی جانے حقیقت ای سو دلموں
 انے جو نہ پڑا ہووے بچارا
 سو کیا بوجھے انوں کا عشق سارا
 امین اسواسطے کیتی سو گجری
 حقیقت سب عیاں ہووے انوں کی
 کہ عشق اول انوں نے کیوں نپایا
 انے آخر اسے کیوں کر نبھایا

زمانہ شاہ اورنگ زیب کے میں لکھی یوسف زلیخا امین نے
 تاریخ گیارہ سواو پر جب نو سال گذرے برس ہجرت محمد ﷺ کے
 الہی توں ایسا عادل شہنشاہ رکھیں جب لگ رہے قائم مہرماہ

سؤ مطلب رہے اب یوہ امین کا
 لکھی گجری منے یوسف زلیخا
 ہر ایک جگہ ہے قصہ فارسی میں
 امین اس کی اوتاری گوجری میں
 کہ بوجھے ہر کدماں اس کی حقیقت
 بڑی ہے گوجری جگ پچہ نعت

اک ہور جگہ لکھیں:

ارے ساتی وے شیشہ لے آرے
 کہ جس اگے نجل ہو ویں ستارے
 آنکھوں آگے نجل سارے ہرن تھے، کجل سُر مہ سوں پڑا سکے نین تھے۔
 کہ اے موتی توں کہ کس کان کا ہے، کہ توں بے مثل اور بے شان کا ہے۔
 ع: برہ میں تن جلا یا ہے تیں میرا

اُن کی اک ہور مثنوی 'تولد نامہ، معراج نامہ، وفات نامہ' ہے جس مانہ ڈھائی ہزار شعر ہیں۔ اس مثنوی مانہ امین گجراتی ہوراں نے آنحضرت ﷺ کا حالات زندگی بیان کیا ہیں۔ اس طرح یاہ کتاب سیرت کا موضوع پر گوجری کی پہلی منظوم کتاب ہے۔

اور بھی خُدا نے نُم اور پر بھیجے دروداں سلام،
 نبیوں کے سب سُر دھنی ہو کے محمد نیک نام (ﷺ)

امین گجراتی ہوراں نے قرآن پاک کا گوجری ترجمہ کی کوشش وی کی تھی اس بارے
 مولوی عبدالحق اپنی کتاب 'قدیم اُردو مانہ' لکھیں:
 'سب سے پرانی کتاب جو مجھے ملی ہے وہ امین کی 'یوسف زلیخا' ہے جو کہ گجری
 زبان میں ۱۱۰۹ھ میں گجراتی اُردو میں لکھی گئی، نمونہ: [قال رب السجن احب الی مما
 یدعوننی الیہ] گوجری ترجمہ: 'یوسف نے کہا بار خدا ہوں بھاکسی کو دوس دھرتا ہوں اس کام
 تھیں کہ جسے کام مجھے اے فرماتی ہے' قدیم اُردو (مولوی عبدالحق)

مُلا و جہی (مولانا وجیہ الدین)

وفات: 1659ء

ویہ قطب شاہی دور کا شاعر تھا۔ جہاں نا بچپن توں شاعری کی شوق تھی۔ ویہ محمد قلی قطب شاہ کا درباری شاعر تھا تے انہاں نے اپنا دور کی دکنی گوجری کے نال نال فارسی شاعری تے نثر وی لکھی ہے۔ اُن کی مشہور تصنیف مثنوی قطب مشتری ۱۶۰۹ء نثر کی کتاب ”سب رس ۱۶۳۵“ تے دیوان وجہی ہیں۔ سب رس مانہ انسانی جذبات تے تصوف کا مسائل قصہ کی صورت مانہ بیان کیا گیا ہیں۔ دوسری تصنیف ”قطب مشتری“ مانہ مشتری (بھاگ متی) نال بادشاہ وقت محمد قلی قطب شاہ کا عشق کی داستان بیان کی گئی ہے۔

جداں تیں جو پیدا ہوا ہے یو جگ
 پرت کوئی چھپا نیں سکیا اج لگ
 محبت لکیا ہے جسے پیو کا
 نیں کوچ پروا اسے جیو کا
 یہاں بادشاہی غلامی اہے
 یو بدنامی نیں نیک نامی اہے
 سوہاتی ہے رسوائی یاری منے
 کہ عاشق کون عزت ہے خواری منے

محبت میں ہوتا جہاں جگ اسیر

برابر ہے واں بادشاہ ہور فقیر

اس قصہ مانہ برتیا واگو جری لفظ اج وی اسے طرح استعمال ہوئیں مثال کے طور:

جدتیں، یوجگ، جیو، اہے، ہور، وغیرہ۔ اسے طرح اس قصہ مانہ اگے اک جگہ بادشاہ جد

مشتری کی محفل مانہ مست ہو جائے تے کسے کا لفظ نصیحت کے طور درج ہیں کہ: تیرا مال ہے

توں اتاول نہ کر۔

اسے مثنوی ماوجہی نے مہتاب پری کا حسن کو نقشوان لفظاں ما بنا پو ہے۔

اچھین نین اس کیس کالے منے

کہ مچھلیاں دوسنہڑیاں ہیں جالے منے

اچھلتیاں ہیں بجلیاں ابھالاں تلیں

کہ نیناں جھمکتے ہیں بالاں تلیں

سے لال ڈوریاں سوں پتی کجل

کہ مرخ کے گھر میں آیا زحل

دسے یوں تل اس مکھ میدان میں

کہ حبشی بچے ہے گلستان میں

محمد نصرت نصرتی

وفات: 1674ء

نصرتی عادل شاہی دور کا عظیم شاعر ہو یا ہیں۔ ان کو ابائی پیشو مرزا غالب ہاروں سپہ گری تھو پر بچپن توں علم تے ادب کی تعلیم نے ویہ شاعری آلے پاسے آن لایا تے انھاں نے اس دور کی شاعری ما وہی کمال دسیو جہڑو بعد کا دور ما غالب کی پہچان ہے۔ اُن کی زیادہ مشہور تصنیف ان کی پہلی مثنوی ”گلشن عشق ۱۶۵۷ء“ ہے۔ جس ما نصرت نے منو ہرتے مد مالتی کا عشق کی داستان بیان کی ہے۔ اُنھاں کی دو جیں کتاب ’تاریخ سکندری‘ ۱۶۷۲ء، ’علی نامہ ۱۶۶۶ء تے ’دیوان نصرتی‘ ہیں۔ علی نامہ اک طویل رزمیہ مثنوی ہے جس ما نہ انھاں نے علی عادل شاہ کی حکومت کا پہلا دس سالوں کی کر کردگی بیان کی ہے۔ اک جنگ کا میدان کی منظر کشی کرتاں ویہ لکھیں:-

کھنا کھن تے کھڑکاں کے یوں شورا ٹھے جیوں تن میں پہاڑوں کے لرزا چھوٹیا
بلا نیند میں تھی سو ہشیار ہوئی اجل خواب غفلت تے بیدار ہوئی
سلاحاں میں کھڑکاں جو دھسنے لگے اگن ہور رکت مل برسنے لگے
فرنگاں پہ لہو کے کھلائے دیں ایناں پر تے دھاراں نپالے دیں
اسے جنگ ما نہ اک منافق کو حلیو بیان کرتاں لکھیں:

جو کوئی کار بد کا جو پاپی ہے بد ہوا ناؤں تس لعنتی تا ابد
خدا پاس نہ اس کو بہود ہے خلاق کئے تو وہ مردود ہے
انا بات کوں کاڑ موذی کا نام کہ قائم ہوا فتنہ جس تھی تمام

میراں جی ہاشمی

وفات: 1697ء

سید میراں میاں خان ہاشمی علی عادل شاہ ثانی کا دور کا مشہور شاعر گذریا ہیں۔ ان کی اکھاں کی لوٹکا ہوتا ہی ختم ہو گئی تھی فروری ان کی شاعری معیاری تے فنی پلکیت آلی ہے۔ انھاں نے مثنوی، قصیدہ تے غزل لکھی ہیں۔ ان کی تصنیفات مانھ دیوان غزلیات، معراج نامہ، مثنوی عشقیہ، محسن در مدح جو پوری، مثنوی یوسف زلیخا تے دیوان ہاشمی شامل ہیں۔ اُن کی مشہور مثنوی ”یوسف زلیخا“ ہے۔ جس مانھ انھاں نے سلیم زبانا مانھ عشق کی ابدی خاصیت بیان کی ہے۔ ان کو یقین ہے جے عشق نہ ہوئے تے عرش فرش پریشان ہو کے بکھر جائیں۔ اگر عشق نیں ہے تے شبنم یور وئے، گنگن تے کھرتا پریشان ہوئے۔ اک ہو رگہ لکھیں:

کہ جس عشق کا سب یو بستار ہے
وہی عشق معمور سب ٹھار ہے
نہیں عشق پیدا کیا آج کل
ہوا ہے یو پیدا ازل توں اول
تدھاں عشق تھا جو نہ تھا کچھ منداں
زمیں ہو زماں کا نتھا کچھ نشاں
اوی عشق سوں یو سو آدم حوا
اوی عشق سوں سب یو عالم ہوا
اوی عشق سوں یو ملائک تمام
کھڑے رہے ہیں بندگی میں ہر صبح شام

ولی دکنی

وفات: 1720ء

ولی اورنگ آباد کارہن آلا تھا۔ بچپن دکن مانھ گذار یو۔ احمد آباد تے سُورت کو سفر وی کیو۔ شروع مانھ گجراتی تے ہندی روایت پر قائم رہیا تے فر دہلی کا سفر توں بعد اس نا دکنی اُردو کا معیار تک لے گیا تے اپنوناں وی اُردو کے نال نال ہمیشاں واسطے امر کر گیا۔

گوجری کا حوالہ سنگ دیکھو جائے تاں انھاں کو اُردو کلام گوجری توں زیادہ مختلف وی نہیں تے یاہ حقیقت وی سب جانیں جے اُردو گوجری کی ہی ترقی یافتہ یا بدلی وی صورت ہے۔

ولی دکنی نے غزل توں علاوہ، قصید، مثنوی تے رباعی وی لکھی ہیں۔ ان کو کلام ”گلیات ولی“ اُردو کو اہم سرمایہ سمجھو جائے۔ اُن کی غزلاں مانھ تغزل تیں علاوہ اخلاقی مضمون تے تصوف اس انداز مانھ بیان ہو یا ہیں جے غزل مانھ جان آگئی ہے۔ انھاں نا تشبیہات مانھ خاص مہارت تھی۔ ویہ اک جگہ اپنا محبوب نا ”بانگے پٹھان“ نال تشبیہ دئیں۔

نمونہ کلام:

تُجھ چال کی قیمت سوں نیں دل ہے میرا واقف
 اے ناز بھری چنچل، نک بھاؤ بتاتی جا
 مُجھ دل کے کبوتر کوں پکڑا ہے تیری لٹ نے
 یہ کام دھرم کا ہے، نک اسکو چھڑاتی جا
 تُجھ مکھ کی پرستش میں گئی عمر میری ساری
 اے بُت کی بجن ہاری اس بُت کو بُجاتی جا



دو جو حصو

جدید لوجری شاعر تے ادیب

گوجری ماں کا عظیم سپوت،
دانشور، مفکر، شاعر، ادیب، محقق تے محسن

مولانا مہر الدین قمر راجوری کے نانویں

باباجی صاحب لاروی

پیدائش: سبھوڑا بالا کوٹ 1863ء وفات: بابانگری واگمت 1926ء

تاریخ گواہ ہے جے دُنیا مانہ ہمیشاں اُسے زبان نے ترقی کی ہے جس ناسرکاری پشت پناہی نصیب ہوئی۔ گویا بادشاہ وقت کی زبان ہی سرکاری زبان کا درجہ تک پہنچتی رہی ہے۔ گوجری زبان کا شاندار ماضی کے چمکھے وی، یوہی رازتھو۔ صدیاں تک قائم رہن آلی گجر حکومتاں کی وجہ تیں یاہ زبان عوام کی عام فہم زبان وی بنی تے تے اس مانہ تحریرتے اشاعت کو سلسلو وی قائم ہو یو۔ فرسیسی زوال کے نال ہی، زبان ناوی زوال آ گیو جس تیں اج توڑی وی گوجری پوری طرح نہیں سنبھل سکی۔

بیہویں صدی کا شروع مانہ جموں کشمیر مانہ گوجری کا دو جا جنم کے چمکھے وی اک بادشاہ کو تھ ہے، جس نے اپنی مادری زبان اپنا دربار کی سرکاری زبان بنا کے رکھی۔ اک اسو بادشاہ جس نے زمین کا بے جان ٹوٹاں پر نہیں بلکہ ہزاراں تے لکھاں دلان پراج وی جس کی حکومت قائم ہے۔ اس بادشاہ نا دُنیا باباجی صاحب لاروی کا مبارک ناں نال جانے۔

میاں عبید اللہ لاروی المعروف باباجی صاحب لاروی ۱۸۶۳ء مانہ گراں سبھوڑا تحصیل بالا کوٹ ضلع ہزارہ کا اک بجران خاندان مانہ پیدا ہو یا۔ پیدائش تیں پہلاں ہی کسے بزرگ نے والدین نا بشارت دتی تھی جے تھاری پشت توں اک بڑا روحانی مقام کو مالک پیدا ہوئے گو۔ جی صاحب چار سال کی عمر مانہ ہی یتیم ہو گیا، تے بچپن کا دس پندرہاں سال انتہائی غربی مانہ گزار یا۔ بچپن تیں ہی حضرت کو دھیان عبادت آلے پاسے تھو، ویہ کنیاں شریف کا اک روحانی بزرگ حضرت نظام الدین کیاٹی تیں بیعت ہو یا تے فر عبادت تے چلہ کو سلسلو شروع ہو گیو۔ اپنا مرشد کا حکم نال ہی ویہ کشمیر آیا تے اتے ہی تریٹھ سال کی عمر مانہ ۱۹۲۶ء

مانھ وصال ہوؤ۔ مواحدِ کامل تے شریعت کی پابند اس شخصیت نے پوری زندگی اپنا ملن آلاں نا راہ ہدایت وی دی تے اُن کے دربار شعر و ادب کیں جہڑیں محفل ہوتی رہیں ویہی دراصل جدید گوجری ادب کی بنیاد بنی۔ گوجری کا پہلا دور کا تقریباً! سارا ادیب تے شاعر، روحانیت تے شعر و ادب کا اس غیر سرکاری ادارہ تیں فیض یاب ہو یا ہیں۔

حضرت باباجی صاحب لاروی آپ وی پنجابی کا بڑا شاعر تھا۔ تے اُن کی تصنیفات مانھ اسرار کبیری تے ملفوظات نظامیہ مانھ تصوف کی باریکی، مذہبی معاملات، سوانح حیات تے درود تے وظیفہ شامل ہیں۔ اس توں علاوہ سی حرفی کی صورت مانھ وی ان کو کلام موجود ہے۔ جس مانھ عشقِ حقیقی کو تمثیلی بیان موجود ہے۔ باباجی صاحب کی زندگی پر کئی ضخیم کتاب لکھی جاسکیں۔ ات انھاں کو ذکر گوجری زبان تے ادب کا حوالہ سنگ کیو گیو ہے، جس مانھ اُن کی غیر سرکاری تے بے لوٹ خدمات کو اعتراف نہ کرنو میرے نزدیک کفر کے برابر ہے۔

پنجابی کلام کا نمونہ:

حال یتیمیاں رب نہ دسے جد مصیبت آوے
 جھڑکاں دیون لوک تمامی تن من سب جل جاوے
 وقت غریبی یار نہ کوئی نہ کوئی ساک قبیلے
 وچ گلیاں دے پھرن نمانے، سر ننگے رنگ پیلے

ت:

تار سکی اوہناں ماہلیاں دی، ویکھو ماہلیاں تے بُوٹی لال ہوئی ہے
 پھل کھلیا بگو نما نیاں دا، ویکھو بھادرے دی کیسی چال ہوئی ہے
 اسونکلدے کتک دے جوڑ اندر، دھپ گھٹ تے ٹھنڈ کمال ہوئی ہے
 عبدا گزری عمر تمام میری، روح بت دی اک مثال ہوئی ہے

عبدل پونچھی

بیہویں صدی کا شروع ماں ماں جدید گوجری ادب کا جہز اسب تیں پرانا نمونہ لہیں
ان ماں عبدل پونچھی تے نون پونچھی کوناں نمایاں طور باندے آوے۔ ان حضرات کی زندگی کا
پورا حالات تے معلوم نہیں پر عام خیال یوہی ہے کہ یہ بابا جی صاحب لاروی ہوراں کا ہمعصر
ہو یا ہیں۔ عبداللہ عبدل پونچھی ہور پونچھ کا گراں ڈیننگلہ کا رہن آلا تھا، ذات کو ملیا دسیا
جائیں۔ لاروی دربار نال بڑی عقیدت رکھیں تھاتے شاعری کی شروعات وی اسے تحریک نال
ہوئی۔ زیادہ شاعری اس دور کا رواج کے مطابق پنجابی ماں کرتار ہیا پر بابا نظام الدین لاروی
کی سنگت ماں رہ کے کجھ گوجری شاعری وی کی۔ بابا صاحب جس پاسے وی جائیں تھادب
نواز لوکاں کی مجلس اتے لگتی جائیں تھیں۔ لسانہ پونچھ کا مقام پر بابا صاحب کی اک مجلس کو گوجری
ادب کا حوالہ سنگ اک بڑوا ہم تے دلچسپ قصو بیان ہووے ہے:

لسانہ کی اک مجلس ماں خدا بخش زار سمیت کئی شاعر موجود تھا۔ زار صاحب اسویلے
توڑی صرف پنجابی شاعری کریں تھا۔ اس مجلس ماں عبدل پونچھی ہوراں نے بابا صاحب کا
فراق ماں لکھیا وا اپنا کجھ گوجری بیت پڑھیا جہڑا بابا صاحب ناچ پسند آیا۔
اک گوجری شعر اس طرح تھو:

خ:

خلق دیکھوں سارو ملک دیکھوں نظر نہیں آتو وہ چکار مناں
ہر روز دیکھوں تھارا راہ بیٹھو، اکھ دکھ گئی ہیں گن گن بار مناں
آیا زور اس پونچھ ماں ولی بن کے قسم رب کی نہیں اعتبار مناں
عبدل زور ڈٹھا شکل دار بندا بھٹو نہیں وہ لار کو یار مناں

اس بیت نا دوبارہ پڑھن کی فرمائش ہوئی پر عبدل ہوراں کی بار بار پڑھن تیں انکاری یا اکتاہٹ بابا صاحب ناں نا گوار گزری تے انہاں نے خدا بخش زار ہوراں دارمؤ کے کہو ”خدا بخش توں گوجرا شعر نہیں کہو؟“ دسیو جائے کہ کجھ وقفہ تیں بعد اتے بیٹھاں بیٹھاں زار صاحب نے پہلو گوجری بیت لکھیو تے فریوہ سلسلو حیاتی تک جاری رہیو۔

اس موقعہ پر لکھیو جان آلو زار صاحب کو گوجری سی حرفی کو پہلو بند جس تیں انکی گوجری شاعری کی شروعات ہوئی وہ اس طرح تھو:

ج:

جگ جہان خوشحال بے اکو دور میرو دلدار اڑیو
گھلوں کون دردی جھڑو جا اس نا میرا کہہ سنہیوڑا چار اڑیو
تیرا طول فراق کو سول سینے کھلا بال گل ماں تار تار اڑیو
سُرموں پان تے پان حرام دے سے بھلا زار سب ہار سنگار اڑیو

اس مجلس تیں بعد کا کسے واقعہ ماں عبدل پونجھی ہوراں کو ناں نہیں آتو تے اس طرح انکا باقی حالات زندگی، آخری سفر تے پسماندگان بارے وی صحیح تفصیلات نہیں معلوم ہو سکے البتہ گوجری کا پہل کرن آلا شعراں ماں شامل ہون کے نا طے انکو ذکر مناعین مناسب سئی لگے۔

۱۔ گجھ لوکاں کو خیال ہے جے سائیں قادر بخش ہوراں نے ہی پہلاں ٹون پونجھی کا فرضی نال شاعری کی تھی۔ تے ویہ عبدل پونجھی نا گوجری کو پہلو شاعر سمجھیں

نُون پونچھی لے

نُون پونچھی کو اصلی نُون چوہدری مہر علی تے نُون ذات تھی۔ ویہ ریاست پونچھ کا رہن آلا تھا۔ اُن کی صحیح تاریخ پیدائش تے تاریخ وفات کے نال نال اُنکا گراں یا آخری آرامگاہ بارے وی یقین نال کچھ نہیں کہیو جاسکتو۔ ویہ عام خیال کے مطابق باباجی صاحب لاروی کا منحصر سمجھیا جائیں تے تے نُون اُن کو دور غالباً ۱۸۵۰ء تے ۱۹۲۵ء کے درمیان کو سئی لگے۔ اگر جدید گوجری ادب کی تاریخ ڈھونڈی جائے تاں بیہویں صدی کا شروع مانھ گوجری شاعری کا جہڑا نمونہ لکھیں اُن مانھ سب توں پہلونا نُون پونچھی کو ہی آوے۔

نُون پونچھی اس طرح جدید گوجری کا پہلا شاعر سمجھیا جائیں جہاں نے اس دور مانھ گوجری شاعری کی ہے جد لوک گوجری مانھ گل کرتاں وی شراویں تھا۔ ان کو چنتو وی کلام سنن مانھ آوے وہ سینہ با سینہ ہی پونچھو ہے تے اس توں یاہ گل وی صاف ہو جائے جے اُنکا کلام کو زیادہ حصو وقت کا دریا کے نال ہی رڑھ گیو و ہے۔ اہنگ کئی کوششاں کے باوجود اُنکا کلام کو کونے تحریری نُسخو نہیں تھا یوتے اس سلسلہ مانھ مذید تحقیق کی گنجائش تے ضرورت موجود ہے۔

نُون پونچھی کا کلام کا جہڑا نمونہ لکھیں ویہ سی حرفی کی صورت مانھ ہے جس مانھ محبوب نا مخاطب کر کے عشق تے ہجر و فراق کی کیفیت بڑا خوب صورت انداز مانھ بیان کی گئی ہیں۔ ان کو دستیاب ہون آلو کلام گھٹ سئی پر معیاری تے مثالی ہے۔ تے اس نال اُنکا پہلا شاعر ہون کی اہمیت ہرگز گھٹ نہیں ہوتی۔

کلام: (سی حرفی)

ج:

جان میری تیں کیوں ساڑ سٹی، ساڑ و گھل منا کت جائے گو توں
 رگوں روز تیرا جا کے بیس رہیو، منا دس جائیے کد آئے گو توں
 اتنا دکھاں جوگی نہیں تھی جان میری، کے خبر تھی کالجو کھائے گو توں
 تون نہ غلام ناسٹ جائیے، مر جاؤں گی تے پچھوتائے گو توں

ح:

حکم تیرو گھر بار تیرو میری جان قربان بساریے نہ
 چیتو نہ بساریے جان گھولی، مرتا دم توڑی قولوں ہاریے نہ
 جس کو سنگ کرینے اسکے نال مرینے دغودے پردیس مانھ ماریے نہ
 تون سدے جے تینا غلام تیری، مہیساں نال آئیے بھاویں چاریے نہ

ق:

قید ہوئی غم کا پنجرہ مانھ، کی دکھاں نے جان لاچار ایسوں
 کھان پین بھلو ہو یو جین مشکل، کتے نہیں ملیو دلدار ایسوں
 نہیں تھی خبر پریت مانھ وہیں دھوکھا، نہیں تے چھوڑ جاتی گھر بار ایسوں
 تون زلفاں کی گھل کند گل مانھ منا مار گیو ہر کے بھار ایسوں

سائیں قادر بخش

پیدائش: 1858 پونچھ

وفات: 1938 راجوری

سائیں قادر بخش جدید گوجری ادب کا پہلا تے سب توں بڑا اُستاد صوفی شاعر ہويا ہیں۔ ویہ ریاست پونچھ کارہن آلا تھا۔ پر اُس دور کی تاریخ مرتب نہ ہون کی وجہ تیں اُنھوں بارے کئی اختلاف ہیں۔ عام خیال یوہ ہے جے ویہ کٹاریہ گوجر تھاتے گورسائی مہنڈر کارہن آلا تھا۔ پر کجھ لوک کہیں جے ویہ ذات کا ملیا تھاتے ڈینگلہ پونچھ کارہن آلا تھا۔

سائیں قادر بخش ہوراں کی تعلیم معمولی تھی پر طبیعت مانھ طنز و مذاح بچپن تیں تھو۔ پنجابی زبان بڑی روانی نال بولیں تھا۔ ویہ ہس مکھ، حاضر جواب تے فی البدیہ شعر کہن کی صلاحیت رکھیں تھا۔ ویہ نوجوانی مانھ راجہ پونچھ کا دربار مانھ ملازم ہو گیا تے اتے ہی عشق مجازی کی بھوم ہوئی پر جدر راجہ نا اس معاشقہ کی خبر ہوئی تاں اُس نے سائیں صاحب نوکری تیں کڈھ چھوڑیا۔ اس طرح پونچھ کو یوہ رانجھو شاہی دربار چھوڑ کے ہمیشاں واسطے عشق حقیقی کا سمندر مانھ ڈب گیا۔ سائیں صاحب نے کجھ عرصو شاہدرہ شریف کی زیارت پر گزار یوتے فر ہر سال برہیا مانھ باباجی صاحب لاروی کا دربار مانھ موجود رہیں تھاتے ات کی علمی تے ادبی مجلساں مانھ شامل ہوتا رہیا۔ سائیں صاحب نے بابا نظام الدین لاروی ہوراں سمیت کئی شاعراں کا کلام کی اصلاح وی کی ہے تے اس طرح ویہ گوجری کا پہلا اُستاد شاعر کہیا جاسکین۔ اُن کی وفات فتح پور ایتی (راجوری) مانھ ہوئی تے اتے ہی اُن کی آخری آرام گاہ ہے۔

سائیں قادر بخش ہوراں کو زیادہ کلام پنجابی مانھ ہے تے ویہ ریاست جموں کشمیر مانھ پنجابی زبان کا شیا پڑنیا شاعر ہیں۔ کہو جائے جے چوہدری سر بلند خان گورسی ہوراں کی

فرمائش پر سائیں صاحب نے گوجری شاعری شروع کی تھی۔ گوجری ماٹھ ان کو کلام گھٹ ہے پر پُر مغز تے معیاری ہے۔ یاہ سب شاعری سی حرفی کی صورت ماٹھ ہے۔ اُنکا کلام ماٹھ عشق حقیقی تے مجازی کی کیفیات بڑی خوبصورتی نال اکٹھی کی وی ہیں۔ اُن کی شاعری لوک ڈھوکا بہکاں ماٹھ اکثر گاتا رہیں تے یاہ سینہ بہ سینہ چلن تیں بعد کجھ اک تحریری صورت ماٹھ باندے آئی ہے۔ ان کو کجھ کلام میاں بشیر احمد لاروی ہوراں نے نیر سمندرناں کی کتاب ماٹھ شائع کروا یو ہے۔ پراس موضوع پر مزید تحقیق کرن کی بڑی گنجائش تے ضرورت ہے۔

سائیں قادر بخش ہوراں ناکئی زبانوں پر عبور تھوتے امیر خسرو ہوراں نالوں سائیں صاحب نے وی اس قسم کا شعر کہیا ہیں جن ماٹھ کئی زبان استعمال ہوئی ہیں۔ سائیں صاحب کی فنی صلاحیت نا سمجھن واسطے اُن کی مخلوط تے پنجابی شاعری کا نمونہ کو جائز و ضروری سٹی لگے۔
مخلوط شاعری:

د:

دُکھی ہاں بچناں پہیں پرتیں، تھندے دِکھنے دی، انتظار بیٹھی
پیلے گویا نان نہ تن ہاں میں رُواں تڑندی زارو زار بیٹھی
فارگٹ می ناٹ کم ہیر، بوئی فل درشن دلوں دھار بیٹھی
قادر بخش چرتہ زئی دے خراشہ، وچھ نبض منون، ہوں بیمار بیٹھی

اس شعر ماٹھ انھاں نے ڈوگری، بنگالی، پنجابی، انگریزی، کشمیری تے گوجری ست زبانوں کو استعمال کیو ہے۔ پنجابی سی حرفی کا کجھ بند:

ک

کڈھ بھیجاں انھاں روئدیاں نوں دونویں بچنا دے رو بکار اکھیاں
رورودوالڑے پٹ سٹے، اپر بندنے وچ قندیل اکھیاں

الف:

اسان جیہا سر پوش کھڑا دسو زمیں جیہی کھڑی تھال ہوسی
 بھار گناہاں جیہا بھارا بھار کھڑا، دسو لعنت جیہی کھڑی گال ہوسی
 دولت جیہی مغرور ہے چیز کھڑی، دسو بھکھ جیہا کھڑا کال ہوسی
 قادر بخش محبت جیہی قید کھڑی، بہتر اکھ کولوں کھڑا لعل ہوسی

الف:

اسیں وحشی یا ایہ لوک پاگل جھڑے چھیڑدے اسان دیوانیاں نوں
 عاقل کدوں نادان نوں بھیت دیندے، پاگل دسدے راز بیگانیاں نوں
 اصل دلاں دے راز نوں کون جانے، دسے چور نوں کون خزائیاں نوں
 قادر بخش میں مُفت بدنام ہويا، اسان لایا سی کدوں یار انیاں نوں

خ:

خُلق محبت دے تُسیں گلشن اسیں بلبلاں تے نالے بھور وی ہاں
 تُسیں چن وانگوں دور دسدے ہو، اسیں سہکدے مثل چکور وی ہاں
 تُسیں پیار دے خوب خزائچی ہو، اسیں اس خزانے دے چور وی ہاں
 قادر بخش بھوویں جسم وچ ایٹی، رضا مند میں دلوں دھنور وی ہاں
 (قمر راجوری ہوراں کے ناں منظوم چٹھی کا اس بندمانھ سائیں ہوراں نے اپنی آخری آرام گاہ
 واسطے راجوری کا گراں فتح پور ایٹی کے نال نال دھنور کی جگہ واسطے وی اپنی پسند کو اظہار کیو ہے۔)

د:

درزیا سیڑ کھاں زخم میرے، پُرزے ہوئے نی بے شمار دل دے
 اندر چیر کیتا سینہ لیر کیتا، قینچی ہجر کر گئی لنگار دل دے
 کُتر کتر شالا، ٹانکا لا بھلا، ٹکڑے ہوئے نی بے قرار دل دے
 قادر بخش ترُفاں، ترساں ملاں سینہ، جان اک تے غم ہزار دل دے

(پونچھ مانھ جا گیر دار اندہ نظام کا ظلم کو نشوونما میں صاحب نے نون پیش کیو ہے۔)
ک:

کشم پولیس جنگلات نالے، لٹ کھاہدی ہے پونچھ پٹواریاں نے
خلقت لٹ گئے نمبردار رل مل، لوک تنگ کیئے زیلداریاں نے
سنگی لائی ہے خوب دکانداراں، رت پوس لئی شاہ بیوپاریاں نے
قادر بخش ہن پونچھ دا بچن مشکل، کیئے شروع شکار شکاریاں نے

ی:

یاریاں اپنے دیس لایئے، رج رج کے سدا دیدار کرئیئے
یاری وطن والی، پھل رتن والی، ناہیں نال بیگانیاں پیار کرئیئے
پہلوں ہس خالم دل کھس لیندے، ساری عمر کاہنوں انتظار کرئیئے
قادر بخش کلچرے نال رکھیئے، وار وار چھاتی ٹھنڈی ٹھار کرئیئے

گوجری کلام کا نمونہ:

الف:

اسو بے ترس نہ کوئے ڈٹھو جسو توں ڈھولا میرے نال ہوؤ
سڑ بل گئی سینو ساڑ سٹیو، سارو لوک پچھے یوہ کے حال ہوؤ
بھلا کے دسوں کہڑو روگ بنا اندر بھکھ پھرنو رتو لال ہوؤ
قادر یار اکوار توں گل پھیرو، دیکھ درد میرو کس تال ہوؤ

الف

آ انگا کت بیس رہیو، نوئی ایلکی چھوڑ کے ات منا
تتا دسر گیو چیتو جا انگا، اجکل تاہنگ تیری رہے ات منا
تیرے باج ہو یو میرو جین مشکل، ڈٹھے باج آوے صبر کت منا
قادر یار باجوں کھان پین بھلو، ہوٹھے کت لگے ایسوں چت منا

الف:

اُڈ کا گا میرو یار آوے، بنڈے دُکھ کرے چُچھ بھال میناں
 ڈاہڈی ہوں ڈالی، گولی مر بولی، ڈٹھا باجھ ہے جین مال میناں
 رات سوؤں تے خاب خیال آوے، دینیں دُکھ لاویں چھاتی نال میناں
 قادر یار باجھوں کھان پین بھلو، ایگا آ ڈھولا دے جمال میناں

ب:

بُری سمجھ سارو لوک مینا، تیرا عشق نے کی بدنام ڈھولا
 ٹھٹھا کریں تے ہسین یہ لوک سارا گواہنڈی کہیں تینا سرسام ڈھولا
 چُچھے لوک ہوئی تینا دخل رکتوں رون پیش آ یو صبح شام ڈھولا
 قادر یار کارن میرا نین روئیں آوے صبر نہ مول آرام ڈھولا

ت

تنگ تدا سٹیا سنگ جد کا سٹیو کھوہ اندر سینے لامتا
 ہوئی جان حیران ویران میری لگی ہر اک آن بلا متا
 ڈنگا زخم ہو یا کالجا ماں کاری لگے نہ کائے دوامتا
 قادر دل کھیا میری جان دکھیا درد کا لہ گو گیو کھا متا

ت:

تتی روئے تیرے باجھ انگا، چلیو رکت توں چھوڑ اس جامناں
 بھوک تاپ چڑھیو، دیکھ بانہہ میری، نبض دیکھ تے دے دوامناں
 تیرا سنگ کو ڈاہڈو ارمان جانی، اڑیا نہ جائیے دُکھ لا میناں
 قادر یار ہے نال پریت تیرے، کہوں جھوٹھ تے جانے خدامناں

میاں فتح محمد درہالوی

پیدائش: 1875ء پلارنی راجوری

وفات: 1945ء پلارنی راجوری

میاں فتح محمد درہالوی گوجری کا پہلا دور کا بلند پایہ صوتی شاعر انجمنوں ہیں جہاں نے اپنی قلم کی مہار پنجابی تیں گوجری آلی پا سے موڑی۔ اُن کی پیدائش ڈوڈانج راجوری مانہ چودھری نور عالم گورسی ہوراں کے گھر ہوئی۔ بچپن مانہ کافی غربت دیکھی۔ جس سماجی نابرابری کا قصا سُنناں وی اج مل کم جائے، وہ سب کچھ انہاں نے اپنی اکھیں ڈھٹوتے اپنے تن جھلیو۔ معمولی اسلامی تعلیم توں بغیر زیادہ پڑھ لکھ وی نہیں سکیا تھا۔

فتح محمد ہوراں نے جد ذرائع سمہالی تاں باباجی صاحب لاروی کے ہتھ بیعت ہوا۔ پڑھائی لکھائی تے شاعری کی ترغیب وی اتوں ہی لکھی تے نوں فتح محمد تیں میاں فتح محمد کہوان لگا۔ ویہ بڑا خوش اواز تھاتے اپنی شاعری نوں ترنم مانہ سناویں تھاجس نال کلام کو لطف ڈونو ہو جائے۔ اُن کی ساری شاعری سی حرفی تے بیت کی صورت مانہ ہے جھڑی لوکاں نے زبانی یاد کی وی ہے تے اکثر ڈھوکیں، ہکیں گاتا رہیں۔

اس دور کا باقی شاعر ان ہاروں ویہ وی پہلاں کافی عرصہ پنجابی مانہ لکھتا رہیا ہیں پر بعد مانہ باباجی صاحب کی ترغیب پر گوجری لکھنی شروع کی تے اخیر توڑی گوجری لکھتا رہیا۔ گوجری مانہ اُن کی سی حرفیاں مانہ تصوف تے عشق حقیقی کا مضمون مجازی پردہ مانہ بڑی خوبی نال بیان کیا واہیں۔ گوجری زبان مانہ انہاں نے ہیہ رانجھا کی علامت صوفیانہ خیالاں واسطے اُسے کامیابی نال برتی ہے جس طرح پنجابی مانہ وارث شاہ ہوراں نے برت کے یاہ داستان سدا بہار بنا چھوڑی وی ہے۔

میاں فتح محمد درہالوی ہوراں کو سی حرفی کی صورت مانھ گوجری کلام معیار کا لجا ڈنا ل وی گوجری زبان کو اہم سرمایو ہے۔ تے تصوف جیہو موضوع اسکی اہمیت نا دونی چونی کر چھوڑے۔ ریڈیو کشمیر تیں نشر ہون تیں علاوہ کجھ اک کلام شیرازہ گوجری مانھ وی شائع ہوو ہے تے ان کو کجھ اک کلام میاں بشیر احمد لاروی ہوراں نے اپنی تالیف نیر سمندر مانھ وی چھاپیو ہے پر انھاں کا پورا کلام نا جمع کر کے عام طالب علم توڑی پوچھان کی ضرورت اجھاں وی اپنی جگہ ہے۔

میاں فتح محمد درہالوی آخر ستر سال کی عمر مانھ ۱۹۴۵ء مانھ فوت ہویتے ان کو خاکی جسم اتے پلپارنی راجوری مانھ اپنا ابائی قبرستان مانھ دفن ہے۔ پر ان کا رسیلا تے پرتا شیر بیت اج وی اپنا سنن آلاں نایاہ دوری محسوس نہیں ہون دیتا۔ ان کی سدا بہار شاعری صدیاں تک گوجری پڑھن سنن آلاں نا متاثر کرتی رہے گی۔ کلام:

الف:

اٹھ ہیرے رانجھو ٹر چلیو، تیرا عشق توں فیض کے بیو میں
چا کر ہو کے چاریو مال تیرو، نالے خویش قہیلو و سٹیو میں
آیو تخت ہزارہ توں جھنگ اندر، تیری وچ پریت کے کھٹیو میں
فتح محمد ہو گیو جواب چھیکو، گھر اپنو بستو پیو میں

ب:

بانج تیرے دستو کجھ نہیں کیا سینے جدائی نے سل رانجھا
کیوں آن تے جان ہی چھوڑ دتو، کوئے لکھ کے خط تے گھل رانجھا
منہ دس جائیے اکوار آ کے کراں بیس کے دکھاں کی گل رانجھا
فتح محمد حیران دیدار باجھوں، دیکھے راہ تیرو پل پل رانجھا

ت:

تک جائیے میری نبض مُد کے ہو یو عشق کو سخت بُخار ہیرے
چڑھیو تپ تندور کو سیک ساڑو، سینو پک کے ہو یو انگار ہیرے
کیا بہت علاج نہ صحت ہوئی، ہو یو سدا غمخوار ہیرے
فتح محمد دسوں دل کو بھیت کس نا ڈا ڈھی عشق کی مرض لاچار ہیرے

ج:

جئی ہے جھنگ سیالاں کی توں، کھیڑاں نال کے ہے تیر و ساک ہیرے
جاں گن فیکون کو قول ہوو، میرے نال ہو یا تیرا باک ہیرے
کراما کاتبین دوئے شاہد میرا، ہو یو عقد جد روز بیشاق ہیرے
فتح محمد ہزارہ تیں جھنگ آہو، تاں ہی سد پو ہوں تیر و چاک ہیرے

ح:

حال تیں ہوں بے حال ہوئی، دیکھوں راہ تیر و صبح شام رانجھا
قلب طلب اندر پریشان تڑنے، تیرے باج ہے نیند حرام رانجھا
نت تیری جدائی کا سل سینے، دسے جگ اندھیر تمام رانجھا
فتح محمد اقرار توں ہارسوں نہیں، گولی نت تیری بیدام رانجھا

ر:

رہ جائیے اک رات میرے، روٹی دیوں گی آپ پکا رانجھا
دُدھ کاڑھ کے دئے غلام تیری، نالے پلنگ وی دیوں گی ڈاہ رانجھا
پیر دھو کے کروں گی آپ مالش، نالے بستری دیوں پچھا رانجھا
فتح محمد جے وطن مانھ ٹر چلیو، سنگ چلوں گی بھار اٹھا رانجھا

ت:

نکوں ہمیش ہوں راہ تیرا منہ دس منا اکوار ہیرے
ہور لوک سارو سکھاں نال بے کیو دکھاں نے ہوں لاچار ہیرے
گھولوں باپ مائی نالے بہن بھائی تیرو سب تیں بدھ پیار ہیرے
فتح محمد جدائی وچ جان تڑنے اکوار دے جا دیدار ہیرے

ن:

نکاح میرو رانجھنا نال ہو یو، اجھاں اک خدا تھی ذات مائے
اجھاں زمیں اسمان بنیاد نہ تھی، نہ دینہ تھوتے نہ رات مائے
نہ لوح محفوظ نہ عرش گرسی، نہ صوم تے نہ صلوٰۃ مائے
فتح محمد، تھو آپ خدا پہلے، رانجھو تھو موجود حیات مائے

و:

واعدو میرو ہے نال تیرے سدو رہوگی وچ حضور رانجھا
شریت آب حیات نہ لوڑ منا تیرو دید ہے اک منظور رانجھا
رات وصل کی لیلۃ القدر جیسی موسیٰ وانگ معراج کوہ طور رانجھا
فتح محمد جدائی نے ساڑھی نت سولی ہے وانگ منصور رانجھا
جسکو سنگ کریے اُس کے سنگ مریے وقت نزع توڑی قولوں ہاریے نہ
فتح محمد کو شعر یوہ عشق آلو میرو گوجرو لفظ بساریے نہ
تے آخر مانھ اُنکا پنجابی کلام وچوں اک بیت نمونا کے طور:

ق:

قدر معشوق دا عاشقاں نوں یا قدر قرآن علماً جانے
قدر یوسف دا کچھ یعقوب کولوں، قدر پھل دا صبح دی وا جانے
درد دل دا کچھو جا عاشقاں نوں، چہدی نبض حکیم دنا جانے
فتح محمد مجنوں جانے قدر لیلیٰ قدر عشق دا آپ خدا جانے

D:\Writers
org\diwan.jpg
not found.

چودھری دیوان علی

پیدائش: 1883 دھنور راجوری

وفات: 1967 دھنور راجوری

چوہدری دیوان علی ہور ۱۸۸۳ء ماں راجوری کا گراں دھنور ماں چوہدری فضل داد کھٹانہ ہوراں کے گھر پیدا ہو یا جہڑا بنیادی طور پر اکھنور کا گراں ڈونگا انباراں کارنیں تھا پر بعد ماں راجوری آ بسیا تھا۔ اس دور کا سماجی تے سیاسی حالات کو اثر نو جوان دیوان علی پر اسو ہو یو جے انھاں نے اپنی ساری عمر راجوری کا مظلوم تے محکوم عوام کی خدمت واسطے وقف کر چھوڑی۔ وہ سو دخور مہاجنا، محکمہ مال کارشوت خور ملازماں تے ظالم پولیس اہلکاراں کو دور تھو۔ چوہدری صاحب نے ان تر وہاں کے خلاف ایٹکلاں جہاد شروع کیوتے بے شمار مظلوماں کا حقوق بحال کرایا۔ تے اس دوران انھاں نارنگارنگ مصیبت وی بھوگنی پئیں۔ بعد ماں جد گوجر جاٹ کانفرنس وجود ماں آئی تاں انھاں نے بابا نظام الدین لاروی، چوہدری غلام حسین لسانوی تے مولانا مہر الدین قمر کے سنگ رل کے اس تنظیم ماں جان گھلی۔ ویہ عرصہ توڑی اس تنظیم کا نائب صدر وی رہیا تے پونچھ، راجوری تے جموں ماں ہون آلا اس کانفرنس کا جلسہ کامیاب کروایا۔

چوہدری دیوان علی ہور راجوری کا سیاسی تے سماجی حلقاں ماں اتنا لمان عرصہ توڑی اک گھنیراڑ کھ کی طرح چھایا رہیا ہیں جے گھٹ ہی لوکاں نا انکا شاعر ہون کو علم ہیویہ اک پر جوش رہنما ہون کے نال نال اک درویش صفت انسان، درد مند حکیم تے پر خلوص شاعر وی تھا۔ دراصل شاعری انھاں نے اخیر عمر ماں ہی کی ہے جہڑی منظوم چٹھیاں تے سی حرفی کی صورت ماں انکی وفات تیں بعد ہی باندے آئی۔ جہڑی انھاں نے ذبیح راجوری، قمر راجوری تے رانا فضل ہوراں کے نال لکھی تھیں۔

کلام کا نمونہ: منظوم چٹھی ذبیح راجوروی کے ناں: (اقتباس)

نال ادب دعا سلام لکھاں خیر خوبی ہور اطوار چیتنا
 بال بچو تے اہل عیال سارو بہن بھائی نالے دوست یار جتنا
 کرے خیر خدا تے خیر ہوئے پڑھیں سنیں سگی نالے یار چیتنا
 اللہ فضل کرے جیتاں فیر ملاں حالاں دور دراز لا چار چیتنا
 عالم علم اندر صادق صدق اندر خوش اخلاق تے نیک کردار جتنا
 بسیں مل کے یار احباب سارا رشتے دار ارار تے پار چیتنا
 سب یاد آویں تیری مہربانی، کھول کے دسوں ہوں انبار چیتنا،
 شبا شباب ہیکرے یوہ جگ سارو دشمن بجن نالے دعویدار چیتنا
 حرف پریم کا تے گل گوجری بیج بیس لکھیا نال پیار جتنا
 داستان پوری دل کا دفتران کینالے دسیا کھول اظہار جتنا
 لمی داستاں لکھن کو فاندو کے سخن راستی کا حرف چار چیتنا
 لفظ گوجرو طرز کلام سوئی لکھے دیوان علی پڑھیں یار چیتنا

نظم: تیروگراں: (رانا فضل ہوراں کے ناں)

یاد پروڑی کی گلی تیری بھائی فیض کو چت گراں سوہنو
 اُتے رہیو گلزار بہار لاتو، اتے چمکیو تھو فضل ناں سوہنو
 گجر جٹ کو ہو یو اجلاس پہلو، لگے تیروگراں وی تاں سوہنو
 دیوان علی کی ہوئی دعا پوری، گو جر جا گیا کریں نیاں سوہنو

نظم: دیوان خاص: (رانا فضل ہوراں کے ناں)

تیرا پریم پتر میں پڑھیا لہو لہو اتھروں کیروں
 سا نچھا ڈکھڑا دیکے ہمنان ریس چنگی تیں لائی
 بانہل بانہل پانی تیرا تسبیح رولوں پھیروں
 اک دیوان لکھوں گوہوں دی جے زندگانی پائی

D:\Writers
org\zar.jpg
not found.

چودھری خدا بخش زار

پیدائش 1888ء مڑھوٹ پونچھ وفات 1982ء مڑھوٹ پونچھ
خدا بخش زار بیہویں صدی مانہ گوجری کا عظیم ترین شاعر تھا جن کی شاعری تے
تخیل کو جواب اچ توڑی کوئے دوجو شاعر نہیں دے سکتو۔ ویہ ۱۸۸۸ء مانہ پونچھ کا مڑھوٹ
گراں مانہ حلیم دیدڑھ ہوراں کے گھر پیدا ہويا۔ لوہکی عمر قضیاں بختاں مانہ گذاری تے
معمولی تعلیم حاصل کر کے گھربار کا کاروبار مانہ لگ گیا۔ عام گوجری زندگی بسر کی تے ۱۹۸۲ء
مانہ وفات ہوئی تے اُتے اپنا ابائی قبرستان مانہ دفن ہیں۔

شاعری کی شروعات عشق کی ٹھوکر نال ہوئی جس نابعد مانہ لاروی دربار کی ہوا لگی
تے شاعری کو یوہ ٹوٹھو ٹھوٹھو وہی ہو تو گیو۔ بابا صاحب کی علمی تے ادبی مجلساں مانہ باقاعدگی
نال شریک ہوتا رہیا جت سائیں قادر بخش ہوراں جیہا اُستاد شاعر پہلاں ہی موجود ہونیں
تھا۔ اپنا دور کا اکثر شاعر اں ہاروں زار صاحب کووی زیادہ کلام پنجابی مانہ ہے تے سی حرفی یا
باراں مانہ کی صورت مانہ ہے۔ گوجری شاعری کی شروعات وی بابا صاحب کا کہن پر کی تے
انھاں ہی نے زار تخلص وی تجویز کیو۔

گوجری شاعری کو یوہ سلسلو فر ایسو چلیو جے مجلساں محفلاں مانہ جلساں میٹنگاں
مانہ، چلتاں بھرتاں، ڈھوکیں، بہکیں تے نولکے بیٹھاں بیٹھاں بے شمار شعر کہیا۔ اُنھاں نے
کچھ نظم وی لکھی ہیں پر زار صاحب کو زیادہ کلام سی حرفی تے باراں مانہ کی صورت مانہ ہے تے
معیار کا حساب نال انھاں کا مقام نا کوئے نہیں پونچ سکتو۔ انکا کلام مانہ عشق تے تصوف کا
مضمون بڑی اُستادی تے خوبی نال بیان کیاوا ہیں۔

خدا بخش زار ہوراں کی پنجابی تے گوجری شاعری کو اچھو خاصو مواد موجود ہے جس
کی اچھاں توڑی اشاعت نہیں ہو سکی۔ اُن کی کچھ اک سی حرفیں میاں بشیر احمد لاروی صاحب
نے اپنی تالیف نیر سمندر مانہ شامل کی ہیں پر نواں گوجری لکھاڑیاں کی رہنمائی تے گوجری کا
معیاری سرمایہ نا دُنیا کے باندے پیش کرن واسطے انکا کلام کی کتابی صورت مانہ اشاعت وقت
کی اہم ضرورت ہے۔
کلام:

باراں مانہ:

چڑھیو چیت تیرو بھلیو نہیں چیتو، تیری قسم بساکھ بساریونہ
 جیٹھ ہاڑکی دھپاں مانھ کھلی دیکھوں ساون بھادرے وی بُو ہوماریونہ
 اسواکھ پھر کے کتک کد آوے، کہڑی گھڑی میں کاگ اڈاریونہ
 منگھر پوہ تے مانہ مانھ رات جاگوں پھکن زار آو بُو ہوماریونہ

چڑھیو چیت چروکئی چاہ میری گیا گزر بساکھ تے جیٹھ دوئے
 ہاڑساون تے بھادرورہ ملوں خبر دس جائے راہی آن کوئے
 سوکتک تے منگھر مانھ کروں پھنا ناچھی آجڑی ملے کسان کوئے
 پوہ ماہ پھکن سوتاں زار گزریا تم نے نہیں کیو آن جان کوئے

چڑھیو چیت بساکھ بہار آئی باجھ سجنا کسئی رنگ اڑیو
 جیٹھ ہاڑساون گیو بھادرو وی سو باجھ تیرے دل تنگ اڑیو
 کتک منگھر تے پوہ مانھ یاد تیری بھلا کم تے کاج کا ڈھنگ اڑیو
 پھکن زار روتاں گیو سال پورو پوئے بھٹھ بیدرد کو سنگ اڑیو

چڑھیو چیت چو ہیں پاسیں ڈھونڈ تیری بساکھ بستیاں تے جیٹھ جنگلاں مانھ
 ہاڑساون تے بھادرے محفلاں مانھ، جلساں میٹنگاں تے نالے دنگلاں مانھ
 سوکتک تے منگھر مانھ مرنگی نہیں رہی جان اندام کرنگلاں مانھ
 پوہ، مانہ پھکن آکے زار تک لے پھاتھی جان ہے پھر کی سنگلاں مانھ

باراں ماہ: ۲

چڑھیو چیت تے چت اداس ہوو بستیں تیرے بغیر اجاڑ دسیں
 تیرا پیار نے کی لاچار ڈاہڑی بیابان منا فلک پہاڑ دسیں
 بیٹھی کروں جنون نغان اپنا بیدرداں نا میرا یہ راڑ دسیں
 خدا بخش دسوں دل کو بھیت کس نا، کس نا تیرے باجھوں میرا ساڑ دسیں

چڑھیو ماہ بساکھ تے سنگناں نے لایا رنگ کے زری لباس ڈھولا
 میرے دل حسرت بچوں یاہ کسرت کدے اج ہو تو میرے پاس ڈھولا
 زیور لاویں تے کریں سنگار سو سو منا ہجر کا ٹھنڈا اُساس ڈھولا
 خدا بخش تیرو متھو جھوٹھ ناہیں کہوں جا ملوں بن باس ڈھولا

جیٹھوں جیٹھ دیور دلوں تنگ دسیں، جھلوں طعتا سخت جھٹانیاں کا
 کرے روز ننان گھسان ڈاہڑو صبح شام ہیں حال ویرانیاں کا
 پوچھوں کول تے ڈھول نا کھول دسوں قصا سب سر برتیاں کہانیاں کا
 خدا بخش نماں نماں نم ڈوہلوں ویلا یاد کر کے مہربانیاں کا

چڑھیو ہاڑ تے دکھاں کا چاہڑ ہوا دسے کون لیکے میری ساریتاں
 بسے دُور تے رہے مغرور کا نہ تیں، وہیں گا یاد وہ لگھ قرار تیاں
 ہُن کیوں عیب قصور تک دور نَسے لڑ لگی تھی سمجھ ستار تیاں
 خدا بخش گھولی اتنی کیوں رولی، مدے لوک کہ تھو وفادار تیاں

ساون سسکھیا رکھ نہ رول اتنی توڑے ہور ہیں لکھ ہزار تینا
 بو نہ لایئے وفاداریاں نا، بھاء پئی جے ہوں گنہگار تینا
 لہتا چڑھتا توڑی تیری اج شہرت چنگو کہ سب ذنی سنسار تینا
 خدا بخش اڑیا تیریں لکھ چنگیں، اکا ہوں لہمی بدکار تینا

چڑھیو بھادرو بھس جدائیاں ناتے تہائیاں ناہن چھوڑ ڈھولا
 دلوں چھوڑ روسا بیس کراں گوشا، نالے سچ تے گوڑ نا لوڑ ڈھولا
 میریں سب بے قولیں بھلا دل تیں، قول اپنا چاڑھیئے توڑ ڈھولا
 خدا بخش للہ بخش بھل میری سینہ نال آکے سینو جوڑ ڈھولا

اُسو اس گل مانھ تیرو کے گھاٹو گولی آپنی کدے سنوار چھوڑی
 سگوں سوہنیا کم ثواب کو تھو، میری بھل جے دلوں بسار چھوڑی
 منا کیوں شریک نہیں دین معنا، گئی گاں کے کہڑی میں مار چھوڑی
 خدا بخش بھلی اتنی تاں رُلی، تیرا حلیم نے بے مہار چھوڑی

کنک کہڑی گلوں رُے کئی کئی، کہڑو بھل بغیر انسان ہوو
 منڈوں بھل کے آدم نے کنک کھاہدی، توبہ نال اُسکو کتو شان ہوو
 یوسف نال زلیخا نے کے کی تھی، جھلی سختی تے قید حیران ہوو
 خدا بخش چکھلی تینا خبر ساری، رُستی دیکھ جس دن مہربان ہوو

منگھر موئی نہیں تے باقی رہی نہیں، میرا من مانہ نہیں گجھ شک اڑیا
 تتی رنگ لاوے توں نہ انگ لاوے، کپیں سو شریکین تک اڑیا
 دلوں عیب بسا ر جے یاد ہے تے اک بار سدھی نظروں تک اڑیا
 خدا بخش برائیاں کی کمی نہیں، نیکی توں دیکھے نظر چک اڑیا

پوہ:

پیر تیرا جھی مار پکڑوں جائے کدے نمیکو لہہ منا
 کدے نہ جریئے اُسے وقت مریئے کہیں یا ہی سہیلوی سب منا
 ہوں بھی صُح تے شام دُعا منگوں دئے کدے ہُن لیکو رب منا
 خدا بخش یہ تیریں دلیل گتیں، خبرے توں لاوے کہڑے ڈھب منا

مانہہ:

مرن جیون میرو نال تیرے، اللہ پاک کی قسم ہزار اڑیا
 تیرا در پر اپنو بر دھریو، بھادیں لکھ داری جتیں مار اڑیا
 جھلوں طعنا نت گماہنڈیاں کا، اکوار میرو سینو ٹھار اڑیا
 دستگیر نامن ہوں دلوں تیری، خدا بخش توں شک بسا اڑیا

پھکن:

چڑھیو پھکن تے پھلاں کی رت آئی، بھوراں پللاں نال وصال ہوو
 گھریں جہاں کا کنت بسنت لاویں، نالے وصل تیں دل نہال ہوو
 چنگا لیکھ جن کا بغلگیر ہوویں، میرے بھآ وصال کو کال ہوو
 خدا بخش روتاں دھاتاں کٹ چھوڑی، مندے حال میرو پوروسال ہوو

سی حرفی:

الف

ایتکی یاد ہمیش آوے نالے لگیں کجھ مچ ہسیر اڑیا
 رکھی اگے دی بھادیں تیں دُوریاں مانھ اپر رہوں تھی کجھ دلیر اڑیا
 گل ملن کی آس پر رہی جھلتی بھادیں تیں رکھی میر تیر اڑیا
 بھجیا دند ظاہر ہويا مند سارا لئی زار ہُن غماں نے گھیر اڑیا

الف:

اکھ کہڑی گلوں بکھ رکھے میرو تکیو کے قصور اڑیا،
 ڈیرا تیرا پر پھیرا ہمیش میرا نئے توں نت میرے تیں دور اڑیا
 دل کھس میرے ہر بھس گھلی، پھرنوں ساڑ کے کپو تیر اڑیا
 تیری بے پرواہی نائک کے تے ہوں تے زار ہوئی پُور پُور اڑیا

ب:

بہت باری میری ہوئی زاری تیں تے ہروں وفا بسار چھوڑی
 سڑے یاہ یاری جس مانھ ایڈ خواری، جان سولیاں کے اُپر چاڑھ چھوڑی
 بے پرواہی کی دی کائے حد ہووے، دیکھ سچاں نال تیں ہوں ساڑ چھوڑی
 مُنصف اس نیاں کو زار کوئے نہیں، دھر نچ چوراہاں لتاڑ چھوڑی

ث:

ٹالٹاں مانھ کدے گل لگی تئاں پچھیں گا تیری وفا کت ہے
 انھاں درماں بغیر خریدیاں پر جائز اتنو جور جفا کت ہے
 اتنو ساڑنو کت روا رکھیو، میری عاجز کی ایڈ خطا کت ہے
 مُنہ تیں کرے لارا دلوں پیر بھارا، انھیں گلیں توں زار صفا کت ہے

ج:

جگ جہان خوشحال بے اکو دور میرو دلدار اڑیو
گھلوں کون دردی جھڑو جا اس نامیرا کہہ سنہیوڑا چار اڑیو
تیرا طول فراق کو سول سینے کھلا بال گل ماں تار تار اڑیو
سُرموں پان تے پان حرام دے سے بھلا زار سب ہار سنگار اڑیو

ج:

جر جر کے، صبر کر کر کے، بولی مرمر کے رکت ہے ترس تیرو
کدے ہس کے گل وی کائے کی ہے، ڈرتا رہیا کہتا ہر کم سرس تیرو
دھر دھر ہنڈیاں مانھ تڑکا تیں لایا، لیوناں نہیں کدے بے ترس تیرو
نہیں زار نا خواب مانھ منہ دسیو، ہُن یوہ گڈر گیو تہو برس تیرو

ج:

جگ جہان نے تک لہو تیرا دامن کے نال پلہتی نا
توں ہی سچ کہو ہاں کس نے نہیں ڈھومنا تیرے اگے سدو چختی نا،
تیرو کہ کے پھروں بدو کڑاں مانھ بھاوے کون اس گل ان پختی نا
میرو زار توں آپ ستار ہو کے پردو پائیے بدنام کو چختی نا

ج:

حال ملال کو کہوں کس نا بہتا تک کے عیب بساریے نہ
اپنا نیناں کی قسم ہزار تتا سروں ماریے تے دلوں ماریے نہ
ہُن کو ہجڑی تک کے کیوں تہے پہلاں آپ لائیں ہُن ہاریے نہ
بار بار زاری میری زار ایکا رانجھا آمہیسیں بھاویں چاریے نہ

خ:

خوار بھادیں تاں وی ہاں تیری سارا جھنگ مانھ خبر بدنامتاں کی
 رُٹھا باپ مائی نالے بہن بھائی منا سمجھ کے پنڈ ملامتاں کی
 سنگن کہیں ناموس کو ناس کیو نیلے سنگ جانو گل شامتاں کی
 تیرا بیلوا نا جنت عدن سمجھوں سچی گل نہ زار خوشامتاں کی

خ:

خیریں سکھیں تتا رب رکھے، جھلوں دُکھ ہوں لگوں بلا تیری
 بیسوں سنگناں مانھ تیری گل چھیڑوں مٹھی نچھ کہوں کروں ثنا تیری
 مُڑ پیار کیس گل دہراؤں ساریں، کرتی یاد نہیں کائے جفا تیری
 سر پر زار تیریں منوں ہور ساریں، اکو جُدا رکھن کر بلا تیری

د:

دلوں گلا لاہما ہوں چھوڑوں توں وی چھوڑ دے بے پرواہیاں نا
 ہوں یوہ آپنورون تے تھرن چھوڑوں توں وی چھوڑ دے گنن خطائیاں نا
 تک لے کیڈ بھنڈی ہر ہرنج منڈی ہس ہس کھا کھ پائیں ہمسائیاں نا
 جانے زار توں اسکو ہور کوئے نہیں فر کیوں دور سٹے ٹبر کھائیاں نا

د:

دیکھتی رہوں نت راہ تیرا روزیدار دیکھیں جیویں چن اڑیا
 ہٹی ہوں ناہیں آپو توں ناہیں، سڑ بل گیو میرو من اڑیا
 کدے رات اندھیری مانھ کیڈ آوے اُسے پاس لگیں میرا کن اڑیا
 تیں ہوں تھگ چھوڑی زار سمجھ کوڑی، منا وہی پُرانو ہے ظن اڑیا

ذ:

ذکر تیرو ہر ہر جا منا بیسوں گھڑی جے کدے سہیلیاں مانھ
 رستاں پانیاں پر تیریں گل ہوویں تیری گل تمام حویلیاں مانھ
 موسم خشک مانھ بھلیں نہ گل تیریں قصایا آویں پھل کھیلیاں مانھ
 تیروناں نت زار ہے لبناں اُپر بھلتو مول ناہیں جوہاں بیلیاں مانھ

ز:

زرد ہے رنگ جدائیاں تیں جھلی کہیں کجھ کجھ ہمسائیں منا
 ہوئی دُور ہوں جدکاں بجنا تیں، قسم رب کی کھائیں وہیہ تھائیں منا
 اُسے روز تیں رون نصیب ہو یو، کئی کئی بار آ جائیں اُسائیں منا
 کجھ کجھ زار خفقان کا دئیں معنا، کئی آپنیں کئی پرائیں منا

ص:

صبر سارا ہوں وی گن رکھوں رکھئے یاد توں وی بے پرواہیاں نا
 تیروناں لیکے ساری رات جاگوں، تک لے اپنی لہیف تلائیاں نا
 صبح اتھروں پُچھتی ہوں اٹھوں، تنکے جگ تیری اگڑائیاں نا
 تینا خوشی خیشی مانھ ہور محفل، ہوں زار چھروں اکھاں لائیاں نا

ض:

ضرب دچھوڑا کیں بہت جھلیں، جھلیں چوٹ ہزار جدائیاں گی
 لگا بے دفائی کا تیر سینے، غم کی نزع تکیں تنہائیاں گی
 تیری مگر رُروں توں نہیں مُوتکتو، کپے اندروں پھری قصائیاں گی
 تیں ہوں زار رولی نکھوں ہوئی ہوئی، ٹٹی آس ساری بہنا بھائیاں گی

ط:

طلب اس قلب مانھ ہو رکائے نہیں صرف لوڑیے تیرا دیدارِ منا
اس تیں جائے مت سیک جدائیاں گو، لہجے کد یوہ عرق انارِ منا
کیوں نہ دفع ہوویں میریں مرض ساریں، دِسیں نین تیرا رو بکارِ منا
دھیاری آن جے نہیں پسند تتا، لیلہ خواب مانھ آمل زارِ منا

ظ:

ظلم سہنا پونیں یاریاں مانھ، کد ہیں عشق مانھ خوشیں تے عیش اڑیا
نالے چو پڑیں ویں نالے چار پوریں، آویں کد یہ ہتھ ہمیش اڑیا
کس نایا لہجیں سدا نکلاں مانھ، پچھو آ منا جس کے پیش اڑیا
کاڑھ ساڑ کے زار کئی یار پرکھیں، پچھے کہیں ہُن نیل ہے نیش اڑیا

غ:

غماں کا کٹھا مانھ رُڑھ گئی ہاں، ہتھ مارتے کر لے پارِ منا
میرا روگ نا اج نہ مول تکیے، صدقو سر کو آ کے تارِ منا
نہیں تھی خبر جے گئے گو عیب میرا، تیری کہیں تھا لوک ستارِ منا
تیرو متھو ہوں عمر غلام رہی ہاں، کہڑی گلوں ہُن سٹے توں زارِ منا

ک:

کاگ اڈاؤں نالے فال گھلوں، روٹی چرے بھلاوڑا کھاؤں تیرا
پھر کے اکھ یا کڑی چڑھیں پر پیڑھا ڈا ہوں تے پنگ پچھاؤں تیرا
رات چاننی بیس کے راہ نکوں، تا کی کھول چھوڑوں گیت گاؤں تیرا
کہڑی گل تیں زار بسار چھوڑی وفاداری کا رنگ ازماؤں تیرا

ک:

کے دسوں معنا سنکنا کا میرا کالج ماٹھ ہوا سل ڈھولا،
انگلی ٹھوڈیں رکھ رکھ ٹوک لائیں توں کیوں رول چھوڑی اجکل ڈھولا
دو جی کہ تنا پکو پتو ناہیں، سدھے منہ نہیں کرتو گل ڈھولا
خبرے زار تیر واندر وار کے ہے، ہوں تے مرنگی جھل جھل ڈھولا

ک:

کو جھڑی تے کو چھڑی نا پہلاں کیوں کہ تھو چنگی بھلی ہے توں
سنے عیاں کے لئی تھی مدے تتی، ہُن کیوں چھپے گلی گلی ہے توں
تیرا اپنا منہ کی گل تھی یاہ، بھلو ہوو میری سنگت رلی ہے توں
کدے زار توں وی ٹھنڈی ٹھار ہوئے گی، اج کے ہوو جلی بلی ہے توں

ل:

لگن کی چھ پتنگ کولوں، نکلے وچ طواف کے جان جس کی
زندہ مڑن نا عیب کبیر سمجھے، زندہ مڑن دیتی نہیں آن جس کی
سڑکے خاک ہووے قدماں یار کاں ماٹھ، ہووے سامنے جان قربان جس کی
چھپی زار نہیں گل یاہ جگ وچوں، شاعر سُرخیاں ماٹھ لکھیں شان جس کی

ی:

یاریاں کی گل لکھیں اس ماٹھ قصا عشق کا بھفت کجھ طاق اُپر
زندہ کجھ اسمان پر چاڑھ لیا، سر گجھاں کا تڑفیا خاک اُپر
کجھ رون تے تھرن کا بنے عادی، کجھ خوش ہیں موت بے باک اُپر
زار رب جانے حالت عاشقاں کی، گل آن آما کے کلمہ پاک اُپر

نظم: بڑھیوں

اک دن وقت نماشاں کو تھو شخص اک بھت ٹھکورے
 میں کچھوتوں کتوں آہو، تے دس اتوں کے لوڑے
 کہن لگو ہوں ات آہو، کم تیرے سنگ مینا
 تحفا وی کجھ لیکے آہو جہوا دیوں گو تینا
 میرو ناں بڑھیو ہے جی مساں مساں اج آہو
 آتنا ویہ تحفا دسوں جہوا نال لیاہو
 کھانسی تے سردردی لے لے میری یاہ نشانی
 ہور نشانی وی اک میری سر کو چکر گھرائی
 ہور وی تحفو ہے اک میرو آپے اڑ جا بھائی
 میں ویہ سب اڑا کے دسیا جس گھر بھوری ڈاہی
 دوہرا کر کے کتنا دسیا تھا سرواں کا سنگی
 آکے فر نہیں ہرگز جا تو ریت میری یاہ چنگی
 جنگ میرا مانھ کوئے نہیں جتو، لکھ پیا سر ماریں
 دھھو میرو شیراں آلو، زار جیہا سب ہاریں

D:\Writers
org\SDM
Punchi.jpg
not found.

شمس دین مہجور پونچھی

پیدائش: 1892ء سیالاں سُرکلوٹ

وفات: 1984ء سیالاں سُرکلوٹ

حاجی شمس دین مہجور گوجری کا پہلی صف کا لکھاڑیاں بچوں ہیں۔ اُن کو جنم ۱۸۹۲ء مانہ سُرکلوٹ پونچھ کا گراں سیالاں مانہ ہو یو۔ اُنکا والد عمر دراز گوری بڑا علمی آدمی تھا۔ تے اس طرح مہجور ہوراں نابینا دی تربیت تے عربی فارسی کی تعلیم گھر مانہ ہی میسر آئی۔ اُس دور مانہ مُلک تے قوم ناچہرا مسئلا درپیش تھا ویہ مہجور نے اپنی اکھیں دیکھیا تے بھو گیا۔

مہجور پہلاں پنجابی مانہ شاعری کریں تھاتے اُن کی نعتاں کو اک کتابچہ مگلا اربدینہ کا ناں نال شائع ہوو تھو۔ پر آزادی تیں بعد جدید گوجری کی چڑھت کے نال اُنھاں نے وی گوجری مانہ لکھنو شروع کيو۔ ریڈیو کشمیر تے ریاستی کلچرل اکیڈمی مانہ گوجری شعبا کھلن نال جہڑی گوجری تحریک شروع ہوئی اُس مانہ مہجور وی جوش جذبہ نال شامل ہو یا۔

اُن کی گوجری شاعری ’گوجر ہوش رُبا‘ کا ناں نال چوہدری احمد دین پوسوال نے جوں تیں شائع کروائی تھی۔ اُن کی شاعری مانہ سی حرفی، نظم تے نعت شامل ہیں۔ جن مانہ ہجر فراق تے تصوف توں علاوہ قوم نا دھونگ جگان کا جتن نمایاں ہیں۔ سروری کسانہ مرحوم کا رسالہ ’گوجر دیس تے کلچرل اکیڈمی کا شیرازہ گوجریمانہ اشاعت تیں علاوہ ان کو کلام اجھاں وی گیت، بیت تے نعت کی صورت مانہ ریڈیو کشمیر تیں اکثر نشر ہو تو رہے۔

حاجی شمس دین مہجور گوجری کا سچا ہمدرد تے مخلص لکھاڑی تھا جھاں نے گوجری لکھن پڑھن آلاں کی رہنمائی کے نال نال اُنھاں نا پوروتعاون وی دتو۔ ویہ آخر ۹۲ سال کی عمر مانہ ۲۱ نومبر ۱۹۸۴ء نافوت ہو گیا تے ا تے اپنے گراں سیالاں مانہ دفن ہیں۔

☆ گجھ لکھاڑیاں نے اُن کی پیدائش ۱۹۰۴ء دی ہے۔ پر غلام حسین ضیاء ہوراں کی تحقیق نا معتبر نتاں ات یا ہی لکھی گئی ہے۔

نظم
کلام:

آہل شام نت دیکھتاں شام ہوئے ہوئیں کئی اڈیکتاں شام اڑیا
دتا گھول میں تیرے توں ڈھول میرا کہیں سنگ سوہنا گلفام اڑیا
سد کول نہ رول کر قول پورا دس فیروہ شان اکرام اڑیا
میرا سنگ کیں لنگھ کے کول تیرے سالو سال دیکھیں باغ بام اڑیا
تیرا ملک توں ملک تمام گھولوں ہند سندھ نالے روم شام اڑیا
میرا چن تتاں کئی چن ترسیں چن مصر کو کرے سلام اڑیا
بھلی صوم صلوٰۃ تے نوم نالے تیرے باجھ نہیں رہیو آرام اڑیا
تیرا ملک کی خاک شفا آلی جس توں جائے سرسام جزام اڑیا
تیرے باجھ نہیں چین ارام رہیو بخشو فر وصال کو جام اڑیا
شمس دین مہور مجبور ہو یو بخشو قداماں ہٹھ مقام اڑیا

سی حرفی: الف:

اللہ کے واسطے قاصدا رے اجکل شہر بغداد گیلان جائیے
امر تر کر اچیوں لنگھ کے تے کابل ٹپ قدھار طہران جائیے
غزنی راہ شیراز تے شہر بصرہ فارس لنگھ کے بچ ایران جائیے
اُت آوے گو ملک بغداد اگے شمس دین بچ شہر جیلان جائیے

ت:

بتر چکور تے مور بلبل، بولیں کگو بھی ماہلیاں مہاریاں مانھ
سنگی سنگیاں سنگ نہال ہو یا، چاریں مہیس پنجال پہاڑیاں مانھ
ہوں تے سنگ کے باجھ ہُن تنگ ہو یو، رہوں سچاں کی انتظاریاں مانھ
شمس دین کد دیکھوں فر جاسو ہنو، چڑھ کے ریل جہاز تے لاریاں مانھ

ث:

ٹانی نہیں سری مستان اجکل، جھلے صبح کی باد نسیم دیکھو
 بگیں کسیاں کا ٹھنڈا ٹھار پانی، شرے دیکھ کے آپ نسیم دیکھو
 بولیں بول سوہنا پنچھی جنگلاں کا، خوشبو پھلاں کی مست شمیم دیکھو
 شمس دین ماہی مہیس چار موڑیں، لگیں سوئی یہ سنگ سکیم دیکھو

خ:

خیر سنگ دیس مانھ مڑیں سوہنا، خیراں نال مڑیں مہارامال بہکیں
 خیراں نال دیکھوں فرحظلاں نا ہوئے سنگیاں سنگ نہال بہکیں
 آویں فر وصال کی رات خیریں رونق لگیں راہیں سالوں سال بہکیں
 شمس دین نہ جائے بہار سوئی پھلتا پھل رہیں سبز تے لال بہکیں

ذ:

ذرا اک مار کے نظر اُچی یہ پہاڑ اُچا سبزہ زار دیکھوں
 دیکھوں پونچھ راجور کشمیر ساروتنا گٹی توں چڑھ کے لار دیکھوں
 گلگت لداخ گریس کنگن پہلگام نالے شالامار دیکھوں
 شمس دین جے نیک نصیب ہوئے دیس بھنا کو عرب پار دیکھوں

م:

ماہی جے آن کے ملتو توں چوری گٹ کے تنا کھلا لیتی
 جے توں رُس دی گیو ہے کسے گلوں پیریں پے کے تنا منا لیتی
 کرتی عذر نہ کوئے غلامیاں مانھ تنا دیکھ کے گل سنگ لا لیتی
 شمس دین نہ مڑتی پونچھ اندر قداماں تیراں مانھ جگہ بنا لیتی

میاں نظام الدین لاروی

پیدائش: 25 مارچ، 1896ء انگلت کشمیر وفات: 10 اکتوبر 1972ء انگلت کشمیر

تاریخ گواہ ہے جے دُنیا مانہ ہمیشاں اُسے زبان نے ترقی کی ہے جس ناسرکاری
پُشت پناہی نصیب ہوئے۔ ریاست مانہ بیہویں صدی کے نال ہی جدید گوجری ادب کی
چڑھت کے چکھے دی اک بادشاہ کو ہتھ تھو جس نے اپنی مادری زبان اپنا دربار کی سرکاری زبان
بنا کے رکھی۔ اس شہنشاہ نا دُنیا بابا جی صاحب لاروی کا نال نال جائیں۔ میاں نظام الدین ہور
جی صاحب کا فرزند تے جائیں تھا۔

سلسلہ نقشبندیہ کا روحانی بزرگ ہون کے نال نال ریاستی سیاست تے ادب مانہ
وی میاں نظام الدین لاروی ہوراں کو بڑو اچو مقام ہے۔ گجراں ناکس مپرسی کی حالت توں
کڈھ کے عزت دار قوماں کی صف مانہ لیان مانہ بابا صاحب نے چوہدری غلام حسین لسانوی،
چوہدری محمد اسرائیل کھٹانہ، چوہدری دیوان علی تے مولانا مہر الدین قمر ہوراں نال مل کے
جھدی گوجر جاٹ کانفرنس بنائی تھی اُسکو ریاستی گجراں کی تاریخ مانہ بڑو اہم رول رہیو ہے۔ ویہ
مُلک کی تقسیم تیں بعد قریب دس سال توڑی ریاستی قانون ساز اسمبلی کامبروی رہیا ہیں تے
نوں علم کے نال نال قوم کی سیاسی خدمت وی کرتا رہیا ہیں۔

پہلا دور کا اکثر گوجری لکھاڑیاں ہاروں میاں نظام الدین لاروی ہوراں کو وی زیادہ
کلام پنجابی سی حرفی کی صورت مانہ ہے جہو ”اشعار نظامی“ کا نال نال شائع ہو یو ہے۔
گوجری مانہ اُنھاں نے تھوڑو لکھیو ہے پر معیاری تے مثالی لکھیو ہے۔ اُنکا کلام مانہ روحانی
کیفیات تے تصوف کا پہلو نمایاں ہیں۔ زندگی مانہ اکثر روئیں ہوئیں تھاتے رون نافر نال

اپنی وراثت سمجھیں تھا۔ اُنکا دربار مانہ اکثر ادبی محفل لگیں ہوئیں تھیں جن مانہ سائیں قادر بخش، خدا بخش زار، مولانا اسماعیل ذبیح، مولانا مہر الدین قمر، اسرائیل اثر تے اقبال عظیم جیہا ناں قابل ذکر ہیں۔ بلکہ کچھ شعراں پر سائیں قادر بخش ہوراں کولوں اصلاح لین کا وی ثبوت لمہیں۔ جس توں اُن کی علم کی قدر دانی کو انداز و لایو جا سکے۔

میاں نظام الدین لاروی ہوراں کو انتقال ۱۹۷۲ء مانہ بابا نگری وانگت مانہ ہوؤ تے اتے جی صاحب کا پہلو مانہ مدنون ہیں۔ اُن کی علمی ادبی تے سیاسی وراثت کو حق اُنکا صاحبزادہ میاں بشیر احمد لاروی ہوراں نے خوب نبھایو ہے تے یوہ سلسلو اچھاں وی جاری ہے۔ ان کو سدا بہار کلام نمونہ کے طور پیش ہے:

اتھرواں نا چکھے کوئے.....
 اتھرواں نا چکھے کوئے دسو رکتو آویں تم
 کڈھ کے رت کلیجہ پچوں پانی رکیوں بناویں تم
 موتی دُر کنوں ہیں اصلی، کوڈی مل بکاویں تم
 روئیں آپ شریکاں اگے ادنویں جگ ہساویں تم
 جھولی نا تم آلا بھولا، تر کریں کس کاری
 جان سُکاویں کپڑا بھیجیں، جُڑے کہڑے آویں تم
 وزن تھارو نہیں گھٹ سمندروں، گھٹ کیوں آپ بناویں تم
 جا گجا نہ ڈوبلو موتی، اپنو مل گھٹاویں تم
 ندی وی سک جائیں آخر تم فر کیوں نہیں سکتا
 رکت نظام ہے چشمو تھارو، رکتوں آویں جاویں تم
 اتھرواں نا چکھے کوئے.....

سی حرئی:

الف:

اکھ لائیں لیھے پیار مینا، سگوں غماں نے کیو دگیر دیکھو
 آیا دکھ تے سکھاں نے کنڈ دتی، اکھاں روتیاں گو بکتو نیر دیکھو
 بنھ لیو پیار محبتاں نے قیدی جنڈی بنا زنجیر دیکھو
 ڈاڈی عشق کی آگ نے ساڑ سٹیو، بلتا کالجہ ناسینو چیر دیکھو

ب:

باجھ تیرے مندو حال میرو مدت ہوئی میری رون نال اڑیا
 کدے بھلو کر کے آئیے دیس میرے کیسی پکڑی ہے رے چال اڑیا
 ساریں زمیں بھی میرے تیں رہ گئیں نالے بسر گیو سارو مال اڑیا
 سارو خویش درویش نظام بھلیو، تیرے باجھ ہے درد کمال اڑیا

پ

پہاچی نہ پوچھو خط تیرو جھب آ مڑ کے ہن لوڑ تیری
 بیٹھو چھپ کے کت ہے توں خبرے لیھے کدے لیتو جوڑی جوڑ تیری
 تیری منڈھ قدیم کی واقعی ہے، لا کے دوستی چڑھی نہ توڑ تیری
 گیو حال نظام کو یار اندر، کھلی لوڑ دل ماں سوسو سوڑ تیری

ت:

تتاں کہوں کدے آ ڈھولا، میرو دیس بھی کدے بسا جاییے
 میرو حال مندو تیرے باجھ ہو یو، کدے اپنو درشن دکھا جاییے
 میریں نماز بھلیں تیرے بغیر ساریں، کدے نماز کو سجدو کرا جاییے
 نظام الدین نا علم تمام بھلو، ذری قاعدو عشق پڑھا جاییے

ش:

ثانی نہ کوئے تیرا شان کو جی، میناں بچ زمین کے ہور دے
 جتگا نظر کروں تیرو منہ دے، تیری چاہ کو بھی ڈاڈو زور دے
 ہر چیز بچ توں ہی نظر آوے، سبناں لوکاں نا وی تیرو نور دے
 تیری تھپ نظام نا ہوگی ہے، تیری شکل تیں یو ہی طور دے

ذ:

ذکر تیرو میرا دل اندر، ایسوں تیرو نہ یار خیال اِنگا
 قسم رب کی ہوئی تباہ ڈھولا، تینا واسطو دیکھ آ حال اِنگا
 جے کرا اِنگا جا کے خوش، چنگو!، دلوں رکھتاں وی توں خیال اِنگا
 اِنگا سن نہ سن نظام مرضی، سنتو جا کن دھر خیال اِنگا

ع:

عشق کو لانو روا رکھیو تیر بھیڑ دے میناں بچ اڑیا
 نویں نویں یاری دسیں روز تیریں، پچھے خبرے جائے گونج اڑیا
 میناں یار کو کدے دیدار ہوئے سمجھوں ہوؤ منا اکبر ج اڑیا
 چھوڑی مار ہسیر نظام تیری، بھٹکھی رہی تیناں دیکھوں رج اڑیا۔

ک:

کے بنی تیناں دوستا رے، ذری اپنو حال سنا میناں
 خبرے عشق نے کی ہے تھپ تیناں، تیرا رنگ تیں دے صفا میناں
 رکھے کیوں توں بھیت چھپا کے رے سمجھ اپنو بہن بھرا میناں
 تیرو مٹھو نہ دغو نظام کوئے، حضرت پیرتے ضامن خدا میناں

ک:

کے لکھوں ڈھولا حال غم کو تیرو مُرو ہوئے مُرو کر گیو
 تیناں ذری خیال نہیں عاجزاں کو، ہوں تے صاف جدائی تیں مرگیو
 تھاری خو بھیڑی نت چھپ رہنو، اندروں دل جدائی نے چر لپو
 ہن تھٹھے نہ جان نظام میری زوریں قید ماں پکڑ کے دھر لپو

بیت:

کے ہے بس تے کروں علان کہڑو، چارو کے ہتھوں ڈوراں پھٹیاں کو
 کیا لکھ ترلا بنو لکھ بھی نہ، داروں کے ہے قسمتیاں پھٹیاں کو
 رہ جا کول تے کراں کوئے آپ چارو، روکاں راہ ہی روزیاں اٹھیاں کو
 لایا غماں نے آن نظام ڈیرا، ڈاہڈو چاء ہے خوشیاں رٹھیاں کو

میاں بشیر احمد لاروی

ج:

جا کے پچھوں نجومیاں نا، ویہہ کہیں ات دستو فال گچھ نہیں
 ویہہ کہیں جھلیا کے حیران ہو یو، تیناں اپنی شائد سنبھال کچھ نہیں
 دسیں ویہہ حساب ابجد سارا تیرا ڈھول نا تیرو خیال گچھ نہیں
 اچی اسکی ذات بشیر سچی، توں تے سو بھتو اسکے نال کچھ نہیں

میاں بشیر احمد لاروی

و:

واسط لکھ ہزار گھلوں میری عاجزی کر قبول جانی
 تیرا ہجر کی ڈاہڈی ساڑ سینے پونیں کالے سو سو سول جانی
 دتا سر نا کر قبول ماہیا تیری دید کو تحفو تمول جانی
 تیرے باجھ کت صبر بشیر مناں، رو توں رہوں تے رہوں ملول جانی

غزل:

اس جا مانھ وی لگیں ہوئیں تھا تھا راز ڈیرا کدے کدے
خوشیاں کی کنیں رات گزاریں ہو یا سویرا کدے کدے

کئی کئی روزات رل کے ہسیا کئی کئی روزات رنا وی
وصلان کا کئی دور لنگھایا، غم کا نہیرا کدے کدے

ہون شکاری روزات رل کے باز تے تیرا ڈیں تھا
میل ہوئیں تھا اس چمن مانھ، میرا تیرا کدے کدے

آس ملن کی پاس امانت اج توڑی میں رکھی ہے
پر تم اس مانھ کیوں کر جائیں ہیرا پھیری کدے کدے

بھل کے وی توں اج نظا می ناں نہیں لیتو میرو کیوں
رت ہوویں تھا میرا ملن نا تیرا پھیرا کدے کدے

مولوی علم دین بن باسی

پیدائش: 1899 بارہمولہ

وفات: 1969 کاچھون کشمیر

علم دین بن باسی گوجری کا پہلا باقاعدہ لکھاڑی نیا جائیں جنہاں نے سیاسی، سماجی تے دینی مجلساں مانہ گوجری لکھنی تے بولنی شروع کی۔ ویہ بارہمولہ کے قریب رہن آلا اک کٹاریہ خاندان مانہ پیدا ہويا۔ بنیادی تعلیم اتے لئی تے بعد مانہ پنجاب تیں دینی تعلیم حاصل کر کے مولوی علم دین بن باسی کہوان لگا۔

قوم کا اس قیمتی لعل پر جد حاجی محمد اسرار نیل کھٹانہ ہوراں جیہا پارکھ کی نظر پئی تاں ویہ ہمیشاں ہمیش کی سنگت واسطے رضامند ہو گیا تے باقی ساری عمر ان کے سنگ علم تے ادب کی خدمت مانہ گذاری۔ شادی تیں بعد حاجی ہوراں کے سنگ سیالے پونی بھارکھ تے برہیا کاچھون کشمیر جائیں ہونیں تھاتے آخر ستر سال کی عمر مانہ وفات ہوئی تے اتے کاچھون مانہ مدفون ہیں۔

بن باسی بڑا وطن پرست تھا۔ اُنکا زمانہ مانہ مُلک کے اندر افراتفری، جنگ تے مُلکی تقسیم کا منظر پیش آیا، انہاں نے ساری تباہی اپنی اکھیں ڈھکی، خود وی تکلیف برداشت کیں۔ پر اُن کی شاعری مانہ جگہ جگہ آپسی بھائی بندی، ایکا، پیار محبت، اتفاق تے دھرتی نال پیار کی جھلک لھے۔ اُنہاں نا علامہ اقبال جیہا عظیم مفکر نال ملاقات کو وی شرف حاصل تھوتے انہاں کولوں بباسی ہوراں نے متی سیاسی تے سماجی رہنمائی حاصل کی تھی۔ تے زبان تے ادب تیں علاوہ قوم کی سماجی تے سیاسی جدوجہد مانہ وی ویہ معاصر گوجر رہنماواں کے نال نال رہیا ہیں۔

مولوی علم دین بن باسی ہوراں نا گوجری نال بے حد محبت تھی تے گوجری کی ترقی واسطے اکثر بے تاب تے خواہش مندر ہیں تھا جس کو اظہار انکا کلام مانھ وی نظر آوے۔ قمر راجو وی ہوراں کا کہن موجب بن باسی پہلا شاعر ہیں جنھاں نے نچھ گوجری مانھ شاعری کی ہے ورنہ باقی سارا شاعر پنجابی تیں گوجری مانھ داخل ہو یا۔

بن باسی کو گوجری کلام، سی حرفی تے نظم کی صورت مانھ ہے جہو ریڈیو تیں نشر ہون تیں علاوہ اج وی ڈھوکاں بہکاں مانھ زبانی گا یو جائے۔ غالباً جدید گوجری ادب مانھ قصیدہ تے مرثیہ کی صنف نا شامل کرن آلا وی ویہ پہلا شاعر ہوئیں گا۔ حاضی اسرائیل کھٹانہ ہوراں کی وفات پر لکھیا وا انکا مرثیہ گوجری ادب مانھ اہم اضافہ ہیں۔

ان کو کچھ کلام منزل کونشان کا ناں نال زندگی مانھ ہی شائع ہو گیو تھو پر انکا پورا کلام نا تلاش کر کے کتابی صورت دین کی ضرورت اپنی جگہ ہے تا نچھ گوجری طالب علم نا تحقیق کرن مانھ اسانی ہو سکے۔ کلام:

نظم: گوجری زبان

ہندوستان کا باغ کیس ہم بلیبل، بولی گوجری ہے گلزار مہاری
راکھی کرے وجو دکی نت جہوی، گلشن وچ بیٹھی پہریدار مہاری
کرے مجلساں وچ تقریر جہوی، ہر ہر سبھا اندر لیکچرار مہاری
جین مرن کا سب قانون اس مانھ، شادی غمی کی ہے گفتار مہاری
بلیبل ہند کی ہور زبان بولیں، چکھے گوجری رہی لاچار مہاری
لکھن پڑھن تے علم نہ ہنر آو، بولی دیں مانھ رہی بیکار مہاری
آئی نہ دستور آئین اندر، چھپ آئی نہ کدے اخبار مہاری
رسم الخط نہ حرف ایجاد ہو یا، دتی سب نے قوم بسار مہاری
ہو کے رہی غلام یاہ اج توڑی، دتی ہون نہ کدے مختار مہاری
جیتی کرے بن باسیا گوجری نا، ہستی قوم یاہ ہوئے بیدار مہاری

مرثیہ بیاد حاجی محمد اسرائیل کھٹانہ

الف:

اوہ وی تھو کوئے وقت پہلو جد ہوئی تھی یار اشنائی تیری
 لمی جس کی تھی امید ہم نا اچن چیت قضا کیوں آئی تیری
 واعدو آپ ہوں عرب نا کروں ودعیا الٹی موت کی سنی ڈھائی تیری
 بابل ملے بجا سیا کد ہم نا لمی عمر کی پئی جدائی تیری
 نج: جمعہ کی پڑھی نماز بابل گاندھی نگر کی جامع مسیت مانھ رے
 جانو تھو جس رات یاہ چھوڑ ڈنیا پوری شرع کی کرے پریت ناں رے
 چلتا دم تک پڑھی نماز ساریں خادم ہو یو پابند شریعت مانھ رے
 تابع نبی کو رہیو بن باسیارے پیو کدے نہ شرک پلیت مانھ رے
 تحفو عرب کو پیش حضور ہو یو دھوکے عرب تیں آئی پوشاک تیری
 بنھ کے بیڑب کو سر رومال چلیو چکے جسم نوری صورت پاک تیری
 قاصد بھیج کے رب نے سد لیو رہی چکھے قوم غمناک تیری
 روح گیو بن باسیا جنتاں مانھ خالی گئی کشمیر نا خاک تیری
 اک نج کے سد یو روح تیرو ترے نج کے چلی برات تیری
 داخل ہو یو بن باسیا جنتاں مانھ آئی لیلة القدر کی رات تیری

D:\Writers
org\qamar
.rjpg not
found.

مولانا مہر الدین قمر

پیدائش 1901 ڈھنڈکوٹ رجوری

وفات 1976 ایبٹ آباد

گوجر قوم کا نیا پڑنیا سماجی تے سیاسی رہنما، ادیب تے شاعر، مقرر تے مبلغ، مولانا مہر الدین قمر ۱۹۰۱ء مانہ راجوری کا گراں مرگاں (ڈھنڈکوٹ) مانہ چودھری جعفر علی اوانہ کے گھر پیدا ہويا۔ بنیادی تعلیم پنجاب کا تعلیمی اداراں تیں حاصل کی تے کچھ عرصہ جمعیت علماء ہند کی طرفوں گڑگاؤں پنجاب مانہ مدرس کے طوروی کم کرپو۔

اپنا علاقہ مانہ واپس آ کے اپنی قوم نال ہون آلی سماجی تے سیاسی نا انصافی تے نا برابری برداشت نہ ہوئیں تاں چوہدری غلام حسین لسانوی، میاں نظام الدین لاروی، چوہدری دیوان علی، چوہدری اسرائیل کھٹانہ تے جموں کا چوہدری عبداللہ ہوراں سنگ مل کے گوجر جاٹ کانفرنس جی تنظیم شروع کی۔ وہیہ زبردست مقرر تھاتے عربی، فارسی تے اُردو سمیت کئی زبانوں کا ماہروی۔ اُن کی تقریر تے تحریر بڑی دمدار تے پُر اثر ہوئیں تھیں۔ قوم کی پسماندگی نا دیکھتاں اُنھاں نے ۱۹۳۹ء مانہ پیغام قمرکاناں نال اک کتابچہ شائع کیو۔ تحریر تے تقریر کو پوہ سلسلو ساری عمر جاری رہوتے اُنھاں نے زکا موٹا ستائی (۲۷) یا ہتری کتابچہ لکھیا تے شائع کیا جن مانہ اُردو، پنجابی، تے گوجری زبانوں کا مضمون شامل تھا۔

۱۹۴۷ء مانہ ملکی تقسیم کے نال ہی پاکستان ہجرت کر کے تے ایبٹ آباد ہزارہ مانہ بس گیا۔ اُت وی ذبح، مہجور، غلام احمد رضا تے ڈاکٹر صابر آفاقی جیہا ادیبیاں تے شاعران سنگ رل کے ۱۹۶۵ء مانہ ادبی انجمن بنائی تے ۱۹۶۷ء مانہ نشریاتی اداراں تیں گوجری زبان کی نشریات شروع کروائیں۔ اس عرصہ مانہ اُنھاں کی گوجری تقریر وی ریڈیو تیں نشر ہوتی رہی ہیں تے اُنھاں نے پنجابی کے نال نال گوجری توں متعلق مضمون تے گوجری شاعری وی لکھی۔ اُنکا کلام

مانھ پختگی تے قوم کا درد کے نال نال تصوف کو رنگ وی نمایاں ہے۔ سچ تے یوہ ہیکہ گوجر قوم پر مولانا مہر الدین قمر کا سیاسی، سماجی، علمی تے ادبی احسان گنیا نہیں ملکتا تے چکایاں نہیں چکتا۔ پنجابی منظوم پختھی کا کجھ بند جہڑی انھاں نے گوجر جاٹ کا نفرنس کی مہار پکڑن واسطے میاں نظام الدین لاروی ہوراں نا لکھی تھی:-

نفع سود آرام کی دس سانوں تیتوں ہین شالا سرداریاں جے
سانوں رنج الم تے تے غم سوسو، گونا گون افلاس بیماریاں جے
ظلم ستم دا دور راجو راندر، ساڈے مگر مُنڈھوں ساہوکاریاں جے
جانے توں کی تیری بلا جانے، تنگ دستیاں تے مرضاں بیماریاں جے
اُٹھ قوم بیحال دی ڈھال بن جا، جیکر دل وچ درد بیماریاں جے
اُٹھ قمر دی قوم دا پکڑ بازو، تیرے حال تے رحمتاں بھایاں جے
قمر راجووی ہوراں نے نکا بڑا نفریبا ستائی کتا پچھ لکھیا جن بچوں کجھ اکن کا ناں اس طرح ہیں:

- ۱۔ گوجری زبان (حصہ اول ۱۹۶۶، حصہ دوم: ۱۹۶۷)
- ۲۔ گوجر قوم کے جوانوں سے خطاب ۳۔ گوجر اور راجپوت
- ۴۔ ریڈیو سے گوجری نشریات کا پس منظر ۵۔ چوہدری دیوان علی
- ۶۔ تحریک آزادی کشمیر، ۷۔ کشمیر خون مانگتا ہے۔
- ۸۔ خون مسلم بہ رہا ہے ہر طرف کشمیر میں ۹۔ حُب الوطن (پنجابی)
- ۹۔ راجوری کا سود خوار مہاجن اور زمیندار ۱۰۔ سیف المومنین
- ۱۱۔ راجوری کے مہاجروں کے نام پیغام ۱۲۔ اخوت اور مساوات کا پیغام
- ۱۳۔ جناب باباجی صاحب لاروی ۱۴۔ شجرہ نقشبندیہ
- ۱۵۔ سی حرنی۔ ۱۶۔ پیغام قمر ۱۷۔ راجوری کے مہاجروں کے نام پیغام
- ۱۸۔ محفل دیوان ۱۹۔ چوہدری دیوان علی مرحوم، ۲۰۔ اخوت اور مساوات

گوجری کلام کا نمونہ: سی حرنی:

الف:

آ بجاں تک تک تھکی، تیرا راہاں توں سر قربان ہوو
 کائے گل چھٹی لکھ گل مٹھی میرو دل ڈاڈو پریشان ہوو
 کئی سال ہوا مناں ترستی ناں، انگا نہیں تھارو آن جان ہوو
 تیری انتظاری، میری ہوش ماری، سینو مثل کباب بریان ہوو
 گل دلاں کی دلاں ماں رہی ساری، پورو نہیں دل کو ارمان ہوو
 قمر دیکھ آکے سینو پھاڑ اندروں، کسو دل ماں درد نشان ہوو

ب:

بخت تاں میرا بیدار ہوتا، کدے ہوں اجکل وانگت لار ہوو
 چم چم کے درو دیوار روو، کدے ہوں وچ پاک دربار ہوو
 اچھا بل ہوو، پہلگام ہوو، حضرت بل ہوو، شالیماں ہوو
 ہوتی شاہ نظام کی پاک مجلس، قمر ہوں اُسکو خاکسار ہوو

ث:

عاقبتی نال یقین کامل، دامن پکڑیو تیری جناب گو میں
 کسے غیر کی طرف نہ فیرو ڈٹھو، یوہی سمجھو کم ثواب کو میں
 ہن وقت پیری کر دستگیری، روتاں کئیو عہد شباب کو میں
 قمر گل پھیرو، تک جا حال میرو، چکر کیو ہے غم گرداب کو میں

ج:

جنتر منتر اُت مھریں کتوں اکھاں تیریاں نے لیو ڈنگ جھرو
 عاشق اوہ جس کو صدق صاف سچو، آوے شج پر مثل پتنگ جھرو
 اسکا راہاں توں جان قربان کرے لاکے دوستی تے پالے انگ جھرو
 سارا جگ ما قمر کم ذات اوہی دغے دار کو سنگ کو سنگ جھرو

ح:

حال فر یاد فریاد کر کر لیا یا اثر نہ آہ فغان اپنا
جاگیں اکھ تے دل دماغ ستو، کیسی نیند ستا بھائی جان اپنا
نہیں قوم نا کوئے علاج ملتو، ڈانوڈول سارا کشتی بان اپنا
نہیں فناہ فیالقوم کوئے مرد ایسو، دسوں جس نا زخم نہان اپنا

د:

دُکھ تھارو سدا رہ دل ماں میری جان تھکی انتظار کر کر
تھاری انتظاری رہ رات ساری آیا تم نہ قول قرار کر کر
کیو لک دو تک جدائیاں نے تھکی چیمھ نت زار پکار کر کر
آیو خط پتر سکھ ساں کوئے نہ، قمر تھک گئی ہوں یار یار کر کر

ق:

قوم ساری غفلت وچ سستی، نہیں قوم ماں خودی احساس باقی
مٹو جوش جذبات خودداریاں کو، نہیں خودی احساس کی آس باقی
چھٹی کی زاری اتنی ہوئی خواری، رہو دلاں ماں نہیں اخلاص باقی
نو جوان اٹھیں تازہ دم سارا، قمر بس اتنی التماس باقی

ق:

قوم ساری غفلت وچ سستی بے احساس بالکل نوجوان جس کا
سُدھ بدھ ساری ہوش مت ماری، کنڈ دے بیٹھا ترجمان جس کا
شوق نہیں تعلیم تجارتاں کی، بھلا بھریں درد ر خاندان جس کا
لمی نیند کر پیر پساں لہماں ہو کے مست ستا پاسبان جس کا
آئی نہیں بہار دوبار مُز کے، خزاں دیکھ بیٹھا بوستان جس کا
جھون جھون تھکو قمر عمر ساری نہیں جاگتا بخت نادان جس کا

ک:

کون محرم کس نا راز دسوں کون سُنے گو درد بیان اپنا
سُتی قوم نے اچے نہ لئی کروٹ، نہیں جا گیا نوجوان اپنا
لمی نیند تے پیر بسا سُنّا، بچ غفلتاں کے پاسبان اپنا
بریاں غفلتاں تے خوشامداں نے ملیا میٹ کیا خاندان اپنا

ک:

کے دسوں کہڑو حال ہووُ برو حال کیو انتظاریاں نے
بڑ بل سینو رتو لال ہووُ کھاہدی جان میری بیقراریاں نے
گجھو روگ اندر سَنک ہوئی تیلو، خون چوسيو، ہجر بیماریاں نے
قمرنیں کوئے درمان ملتو گھیری جان میری مرضاں بھاریاں نے

و:

وطن جا کے سکھ ساں کہیے میرا روز میثاق کا سکتیاں نا
جھب جھب آوے ڈھولا یار اپنو، لاوے رب مراداں منگیاں نا
بے قدراں نا قدر نہ یاریاں گو لگتا نہیں انار بٹگیاں نا
اپنو آپ بھلو پانی سروں ڈلو، قمر چھوڑ دو گلاں چکلیاں نا

ل:

لوک آباد تے شاد بسیں، بھلا کیوں ہیں دل دگیر تھارا
خستہ حال پامال بے حال تم ہیں، سُنّا مست است امیر تھارا
رہیا نہیں نشانچی، تم پہلا، لگتا نہیں نشان پر تیر تھارا
خستہ حال تے خاک درخاک ہوا، نُسخہ رہیا نہ قمر اکسیر تھارا

نعت:

اُس ذات پر ہوویں سلام لکھ لکھ، رب نے کیا اچا اختیار جس کا
شافع امتاں کو، حامی عاصیاں کو، احسان ہیں بے شمار جس کا
جس کا باغ رضوان تے حوض کوثر، جنت باغ تحت الانهار جس کا
جس ناقاب تو سین کو شرف حاصل، درجہ عرش عظیم تیں پار جس کا
وطن کی یاد

نظم:

سوہنا وطن کا باغ بہار سوہنا، پیارا وطن کی شان وی یاد مینا
سارا کوہ جنگل بیابان بیلا، سارا باغ بستان وی یاد مینا
ڈنی دھار، دھنور، پنہڈ سوکڑ، چنی تاڑ، ریحان وی یاد مینا
سالدھار، ترالو، دے بی، تمبل بھونڈو نلو جھڑان وی یاد مینا
لڑگتی سمیان، دراج موہڑو، بدھل گھر، بھتان وی یاد مینا
لتھی درمن، سموت تے کاندرو بھی پھلنی، کنڈھ ردھان وی یاد مینا
چچی گوری منج پھوال جیدڑھ، دہڈ نون کھٹان وی یاد مینا
ڈھینڈا چاڑ، بجاڑ، بھروال لادی، کولی کالس، چوہان وی یاد مینا
پر بہار، کٹاریہ، طور ساگو، دھکڑ، تاگ، بڈھان وی یاد مینا
ہسکلہ پھامڑہ، چھاوڑی پوڑ، کھاری، مونن پال، کلگان وی یاد مینا

نظم ۱:

ہم گوجر گجراتوں آیا، گذر کراں شاہانی
شاہی چتر چوہان کھشتری، مہاری بڑی نشانی
متھرو تے اجمیر، بدایوں میرٹھ تے ریواڑی
ان تھاہیاں کا بڑا بڈیرا، تھا سارا دریانی
تاج تخت کا مالک تھا کل، جہڑا راج دلارا
اج نحوست ان کو حصو، رسوائی عریانی

میاں نظام الدین لاروی ہوراں کے ناں منظوم چٹھی کا کچھ بند:

کدے گھل پھیر و تک حال میرو، ہوئی جان لا چار امیر صاحب
تیری انتظاری میری ہوش ماری، رہوں نت بیمار امیر صاحب
خستہ حال بے حال نہ حال کوئے، رنگ زرد اکھ زار امیر صاحب
ہوں ات مجبور معذور بیٹھو، تم ندیوں پار امیر صاحب

خوش رہو سرکار نظام غازی جھنڈا تیرا اقبال کا تھلتا رہیں
دل مانھ اگ وچھوڑا کی سلگتی رہیہ نت اتھروں غماں کا ڈلتا رہیں
سڑ سڑ سینو رتو لال ہو یو میرا جگر کا ہوا لنگار کتنا
قینچی ہجر فراق کی کترتی رہیہ سینے زخم فراق کا کھلتا رہیں
تیرا وصل وصال ناہت سہکوں نہیں ملن کو کوئے سبب بنو
گجھ مست الست منصور نالوں اُپر سولیاں کے سدا تھلتا رہیں
بھلا ہوں دسوں سینو پاڑکس نا برو حال کیوتاہنگاں تیریاں نے
دور دیس کیاں گھممن گھیریاں مانھ پھانڈا قہر ڈنڈول کا تھلتا رہیں

سائیں فقر دین ترابی

پیدائش: 1903ء پٹھانہ تیر مہنڈر

وفات: 1987ء نیڑیاں پونچھ

پونچھ کا مشہور صوفی بزرگ تے شاعر سائیں فقر دین پٹھانہ تیر مہنڈ ہرکار رہن آلا تھا۔ ویہ ماہہ اک گوجر بڈھانہ خاندان مانہ پیدا ہویا۔ بچپن تے جوانی اتے گزاری۔ مہنڈر مانہ اُن کی دوشادیاں کو شہوت وی لھے۔ دوجی بیوی کی وفات تیں بعد ہی اُنکا فقیری سلسلہ کی شروعات ہوئی۔ تے ویہ گھریار چھوڑ کے پنجاب آ لے پاسے چلے گیا۔

1952ء مانہ واپس آ کے اُنھاں نے تحصیل حویلی کا دگوار گراں مانہ تیجی شادی کی جس تیں واحد اولاد سیکنہ بی پیدا ہوئی جہڑی اجمال باحیات ہے۔ سائیں ہوراں کی چوتھی شادی تحصیل سُرکلوٹ کا نیڑیاں گراں مانہ ہوئی تے آخری عمر تک دگوار تے نیڑیاں دوہاں گراواں مانہ رہتا رہیا ہیں۔ اُن کی وفات وی 24 مارچ 1987ء مانہ نیڑیاں گراں مانہ ہی ہوئی۔

سائیں فقر دین ہور پنجابی زبان کا مستند شاعر ہویا ہیں۔ ریاست جموں کشمیر کا پنجابی شاعر اُنھاں کو بڑا اچھا مقام ہے۔ تے ریاستی کلچرل اکیڈمی کا پنجابی شعبہ نے اُنھاں کی زندگی تے ادبی کارناماں پر کتاب وی شائع کی ہے۔ اُن کی اپنی کئی کتاباں کا حوالا آویں پر عام لوک اُن کی دوہی کتاباں ”ضیا القمر“ تے ”مدح رموز الکنج“ تیں واقف ہیں۔ یہ دوئے کتاب پہلی بار لاہور تیں شائع ہوئی تھیں تے عوام مانہ بڑی مقبول وی ہوئیں۔

گوجری مانہ سائیں فقر دین ہوراں نے گوجری مانہ بہت گھٹ شاعری کی ہے۔ اسکی اک وجہ یاہ ہے جے اُنکا دور مانہ گوجری شاعری کو زیادہ رواج نہیں تھو۔ تے تقریباً سارا گوجر شاعر پنجابی مانہ شاعری کریں تھا۔ 1965ء تیں بعد جد جدید گوجری کی تحریک چلی تاں

اُنہاں نے وی اک دو نظم گو جری مانہ لکھیں جن بچوں اک نظم پنجابی کتاب مدح رموز ایلج کا
آخر مانہ شائع ہوئی تھی۔ جس مانہ اُس دور کا تقاضا کے مطابق مذہبی رواداری تے آپسی مہر
مُحبت کو پیغام لھے۔
نمونہ کلام:

الف:

اللہ جیہو بادشاہ کوئے نہیں، چن کوئے نہیں چودھویں رات جیہو
نبی کوئے نہیں پاک رسول جیہو، جلو کوئے نہیں پہاڑ کوہ طور جیہو
دلی کون ہو پو دستگیر جیہو، کوئے عاشق نہیں شاہ منصور جیہو
گنہگار نہیں ہے فقر دین جیہو، بخشہا نہیں رب غفور جیہو

نظم:

ہم گل عجب یاہ کانہ تم نا
تم غیر پچھاؤ نہ ہم نا
اللہ واحد مالک ساراں گو ہندو مسلم رب سرداراں گو
ہم رب کہاں پاک خدا ہم نا تم کہیں بھگوان روا تم نا
ہم گل عجب یاہ کانہ تم نا
تم غیر پچھاؤ نہ ہم نا
اک باپ مائی انساناں گو اکو ہندو مسلماناں گو
تم رام پڑھو، لا الہ ہم نا مہاری قبر تے دس جلا تم نا
ہم گل عجب یاہ کانہ تم نا
تم غیر پچھاؤ نہ ہم نا
تم پو تھی گرنہہ کا عالم رے ہم درس قران نا شامل رے
مہارو مکو حج روا ہم نا تھارو اصلی گنگو جل جمننا
ہم گل عجب یاہ کانہ تم نا
تم غیر پچھاؤ نہ ہم نا

کیوں پاک بھارت نے جنگ لایو سارو ہندو مسلم تنگ آئیو
 چنگی امن پسند صلاح ہم نا کرے نیکی طرف خدا تم نا
 ہم گل عجب یاہ کانہ تم نا
 تم غیر پچھاؤ نہ ہم نا
 یاہ قوم گوجر کی سادی رے تانہی پیش آئی بربادی رے
 کیوں تم کریں بدناں ہم نا کم کار نا ہم لگاں تم نا
 ہم گل عجب یاہ کانہ تم نا
 تم غیر پچھاؤ نہ ہم نا
 بھید بکری تاں ہم پالاں رے سارا دکھ سکھ دی ہم جالاں رے
 تم کم لائیں ہر تھاں ہم نا ہم یوہ احسان جتاں تم نا
 ہم گل عجب یاہ کانہ تم نا
 تم غیر پچھاؤ نہ ہم نا
 زمیں سخت ڈاہڈی ہم باہواں رے مک کنک جوار کماواں رے
 راکھی کرنی بڑی سزا ہم نا آلو، کنک تے میتھی مانھ تم نا
 ہم گل عجب یاہ کانہ تم نا
 تم غیر پچھاؤ نہ ہم نا
 راکھی گوشت کی ہم نت کراں نہ رچھ شیراں تیں ہم ڈراں
 نہ کھائے شیر بلا ہم نا دیاں گوشت کھل چلا تم نا
 ہم گل عجب یاہ کانہ تم نا
 تم غیر پچھاؤ نہ ہم نا
 مہارا نیک انسان جوان دیکھو دلوں سچا صاف ایمان دیکھو
 ددھ مکھن بے بہا ہم نا دیاں بچھو ددھ جما تم نا
 ہم گل عجب یاہ کانہ تم نا
 تم غیر پچھاؤ نہ ہم نا

قاضی جلال الدین جلال

وفات: اکتوبر 1994ء پنہڈ راجوری

قاضی جلال دین مرحوم بیہویں صدی کا مشہور شاعر ہیں۔ جہاں نے گوجری تے پنجابی مانہ شاعری کی ہے۔ ویہ راجوری کا گراں پنہڈ کارہن آلا تھاتے چوہدری فیض حسین انقلاب کا ہم عصر تھا پر ان کی تاریخ پیدائش کو صحیح حوالہ دے نہیں دستیاب ہو سکیو۔ انہاں نے بنیادی تعلیم مکتب مانہ حاصل کی تے بعد مانہ کچھ عرصہ پنجاب تیں وی تعلیم حاصل کی جہڑو اُسویلے علم کو مرکز ہونے تھو۔ قاضی ہور بچپن مانہ انقلاب کا والد میاں حبیب اللہ دیدڑھ ہوراں تیں مستفید ہویا، مولانا مہر الدین قمر تیں شاعری مانہ رہنمائی حاصل کی تے کچھ عرصہ توڑی میاں فتح محمد درہالوی کی سنگت وی کی پر زیادہ مدت چوہدری فیض حسین انقلاب جیہا قوم کا ہمدرد کے سنگ عمر گزاری۔

اُس زمانہ کا حالات تے رواج کے مطابق قاضی صاحب نے وی زیادہ شاعری پنجابی مانہ کی تے بعد مانہ گوجری آلے پاسے مڑیا۔ پراک خاص گل جہڑی ان کا کلام مانہ لکھے جے ان کی شاعری کو موضوع دوہاں زباناں مانہ اک ہی رہیو یعنی سماجی نا انصافیاں تے غلط رسم و رواج کے خلاف او از بلند کرنی۔ اُس دور مانہ گوجر قوم جن عذاباں مانہ پھسی وی تھی ویہ تھا، جاگیر داری، شاہوکاری، جھوٹی پیر پرستی تے لاعلمی۔ قاضی صاحب نے ہم عصر حضرات نال بل کے ان تمام بیماریاں تے بُرائیاں کے خلاف جدوجہد کی تے زبان تے قلم کے سنگ لوکاں نادھونگ کے خبردار کرن تے تعلیم آلے پاسے لان کی کوشش کی۔

قاضی صاحب دینی طور پر وی چنگا پڑھیا لکھیا تھاتے اس طرح انہاں نے بے دینی

کارسم رواج پروی چنگی موثر قلمی چوٹ کی ہیں۔ قاضی ہوراں نے ۱۹۳۶ء مانہ حالات زمانہ کا ناں نال اک کتاب (مفتاح المصائب) گجرات (پاکستان) تیں شائع کروائی تھی جہڑی پنجابی زبان مانہ تھی تے اک کتاب مفتاح المصائب کا ناں نال وی وی چھاپی تھی۔ مُلک کی ازادی تیں بعد ویہ گوجری آلے پاسے مُڑیا پراؤنکا گوجری کلام کو کوئے مجموعہ شائع نہیں ہو سکیو۔

قاضی جلال دین ہورا کتوبر ۱۹۹۳ء مانہ اپنے گراں پنہڈ مانہ فوت ہویا تے اتے اپنا ورثتی قبرستان مانہ دُنن ہیں۔ کجھ ہور بزرگ شاعراں کی طرح اُنکا گوجری کلام ناوی تلاش کرن تے سمہالن کی سخت ضرورت ہے۔

نعتیہ کلام:

ربا کد مدینے جاؤں گو جالی پاک سینہ سنگ لاؤں گو
فر رو رو حال سناؤں گو فر یاد سنو گنہگار کی

منا تیرو اک دیلو ہے کول عمل نہ ذرو تیلو ہے
دہشت حشر کولوں رنگ پیلو ہے صرف آس رکھوں دربار کی

منا عربستان پیاری ہے ہوئی جمع جت خلقت ساری ہے
اُت نہ کوئے روگ پیاری ہے سوئی زمیں میرا دلدار کی

روضہ پاک نبی تیں جد قربان سب خلقت تیں اُچی شان
سب کائنات کو رب رحمان شفاعت ہوئے میری بدکار کی

گیت:

چن لے آئیے گرگابی
لا کے ٹروں گی چال شرابی

چن لے آئیے گرگابی
میرو حُسن مارے چکارو
نالے لونگ مارے لشکارو

میری رگ رگ ماں بے تابا
چن لے آئیے گرگابی

میری مست جوانی ڈلے
نت پیار اکھاں تیں چھلکے

دند چٹا ہوٹھ گلابی
چن لے آئیے گرگابی

ٹروں ٹور ہوں سہنی جیسی
میری شکل ہے ہرنی جیسی

بناں بھاگن کہیں حسابی
چن لے آئیے گرگابی

ہیں میلا نا دن تھوڑا
میرا سب پرانا جوڑا

ہور اپروں اک خرابی
چن لے آئیے گرگابی

سی حرنی:

ر:

روتاں روتاں ساری عمر گزری، دسوں کالجوں اندروں پاڑ کس نا
 سولی غماں کی پئی نصیب میرے، دیوں اپنی جگہ ہن چاہڑ کس نا
 رورو کے اکھ یہ لال ہونیں، میرا رون اُپر آوے ساڑ کس نا
 خالی ہتھ تے کنڈ جلال دینا، قدم ہلایا پکڑوں آڑ کس نا

ق:

قوم گوجر بلا شک سادی ہر اک قوم کی یاہ خدمتگار رہی ہے
 نہ ہی پڑھی تعلیم نہ گیا کالج نالے درس اسلام بسار گئی ہے
 نہیں وسیع عقل گمانڈھیاں نے اک حسد کی جھماں نامار گئی ہے
 جلال دین جے کوئے پچھے کے ہوو کہیں ہائے مہاری قسمت ہار گئی ہے

ی:

یاد گاری میں وی لکھی ساری دکھ سکھ کچھ غم بیماریاں گا
 ربط ضبط کو نہیں خیال رکھیو پردہ ڈھک دتا غلطی ساریاں گا
 نہ ہوں شاعری گو کچھ دم رکھوں نہ میں پڑھیا سبق ہوشیاریاں گا
 لکھی دل کی گل جلال دینا نت کروں ہاڑا قسمت بیماریاں گا

احمد دین عنبر

پیدائش دسمبر 1912ء جموں

گوجری ادب کا بزرگ شاعر چوہدری احمد دین عنبر دسمبر ۱۹۱۲ء مانہ جموں مانہ پیدا ہويا۔ بنیادی تعلیم کتب مانہ حاصل کی۔ کچھ عرصہ محکمہ ریلوے مانہ ملازمت میں بعد تعلیم آ لے پاسے مُڑ آیا تے ۱۹۳۵ء مانہ منشی فاضل کو امتحان پاس کیو۔ ملکی تقسیم نال ہجرت کر کے پاکستان کا ضلع گوجرانوالہ کا گراں تبولی مانہ اباد ہو گیا تے ات کئی سکولاں مانہ فارسی کا اُستاد کے طور فرض نبھاتا رہیا ہیں۔

۱۹۶۰ء توں بعد شروع ہون آلی جدید گوجری ادب کی تحریک نال شامل ہو گیا تے شاعری کے ذریعے تعلیم کو سلسلو جاری رکھیو۔ ویہ پاکستان مانہ گوجری ادب کی ترقی واسطے قائم ہون آلا پہلا گوجری ادبی بورڈ کا صدر وی رہیا ہیں تے انہاں نے مولانا اسماعیل ذبیح، مولانا مہر الدین قمر، ڈاکٹر صاحب آفاقی، تے اسرائیل مجور ہوراں نال رل کے پاکستان کارڈیوسٹیشناں تیں گوجری پروگرام شروع کروان مانہ بڑا ہم کم کیو ہے۔

گوجری شاعری مانہ انہاں نے سی حرفی، نظم، غزل تے گیت سب کچھ لکھیو ہے۔ انہاں کی شاعری کی دو کتاب (گوجری گیان عنبر کو دیوان) تے (رموز و اسرار، گوجری شاہکار) شائع ہوئی ہیں۔

نمونہ کلام:

غزل ۱:

ورد تیرا ناں کو کروں گُفتی گُفتی
خدا جانے کد تک ملاقات ہونی
میرا کر ختم دن جدائی کا یا رب
مصیبت کا دن میرا تک جانا اک دن
غلطی میری کوئی دسو نا کہدی
عبرنا کیوں تنگ کروں گُفتی گُفتی
محبت مانہ تیری گُفتی گُفتی
خبر خیر پچھو رہوں گُفتی گُفتی
دُعا دل ہی دل مانہ کروں گُفتی گُفتی
وصل کی اڈیک ہوں کروں گُفتی گُفتی
عبرنا کیوں تنگ کروں گُفتی گُفتی

غزل ۲:

نہ دل دیتو تیاں نہ ناکام ہو تو
محبت نہ کرتو کدے نال تیرے
دل میراں مانہ گھر نہ ہے آجے تیرو
گیوسڑ ہے عنبر جدائی مانہ تیری
نہ لوکاں کی نظراں مانہ بدنام ہو تو
جے معلم محبت کو انجام ہو تو
دُظیفو نہ تیرو صبح شام ہو تو
عمر ساری نوکر وہ بیدام ہو تو

ق:

تیری زلف ہوتاں عطرنا کے کرنو
مرجانو مٹی مانہ رُل جانو آخر
تتاں تک کے حج کا سفرنا کے کرنو
تیرو ذکر عنبر نہ اذکار کرنو

چوہدری مہر دین ڈوئی

پیدائش: 1913ء بھلیسہ ڈوہہ وفات: اپریل 1993ء بھلیسہ ڈوہہ

چوہدری مہر دین ہور بھلیسہ ڈوہہ ماہ ۱۹۱۳ء کے ال پل اک ڈوئی گھر انہ ماہ پیدا ہوئے بنیادی تعلیم میں بعد گھر کا ہی کم کاج ماہ مصروف ہو گیا۔ تھوڑے ہی شوق پہلاں توں وی رہو ہوئے گو پرائنٹنگ کو شماران بزرگ شاعران ماہ رہو ہے جہاں نے کلچرل اکیڈمی ماہ گوجری شعبہ کے نال جوش جذبہ نال گوجری شاعری شروع کی تے گوجری مجلساں ماہ باقاعدگی نال شامل ہوتا رہیا۔ گوجری زبان تے ادب کی ترویض واسطے ڈوہہ ماہ جہڑی انجمن بنی اس ماہ وی ویہہ خلوص نال شامل رہیا۔ مہر دین ڈوئی ہوراں نے تے فر اپنا کلام ناکتابی شکل دین ماہ ڈھل نہیں کی اپنی زندگی ماہ ہی ”نگار مہر“ کا نال نال کتاب شائع کروائی۔ آخر اپریل ۱۹۹۳ء ماہ ۸۰ سال کی عمر ماہ ویہہ فوت ہوئے تے اُتے بھلیسہ ماہ ڈن ہیں۔

کلام کا نمونہ:

گولی بن کے رب کا در گی، شہر مدینے جاؤں گی
نبی محمد ﷺ سرور اگے اپنی گل سناؤں گی
علم تے عقل نہ ہر گز پلے، نہ رہی نظر جوانی
سر پر موت اڈیکے ہر دم، ہونو اک دن فانی

الف: اللہ توں میری مدد کریئے میرا سفر نا توڑ پوچھائیے توں
جن کا ملن کی رکھی میں تاجھ دل ماہ، انکے سنگ ملاقات کرائیے توں
میری دل کی گل توں کریئے پوری نال خیر کے میناں ہٹائیے توں
کریئے دعا مہر دین کی قبول ربا، دین دنیا کی آس پوچھائیے توں

چودھری وزیر محمد ہکلمہ

پیدائش ۱۹۱۴ء وفات ۱۹۷۷ء بانڈی چچیاں پونچھ

جموں کشمیر کا سیاسی، سماجی تے ادبی حلقا چودھری وزیر محمد ہکلمہ کا ناں توں چنگی طرح واقف ہیں۔ دیہہ ۱۹۱۴ء مانھ پونچھ کا بانڈی چچیاں گراں مانھ پیدا ہویا۔ اس دور مانھ گوجر لوک جاگیر داری، شاہوکاری تے غلامی کی زنجیراں مانھ جکڑیاواتھا۔ لوک گوجر کہوان یا گوجری بولن تیں شرمادیں تھا۔ ان حالات مانھ گجراں نا اپنی تاریخ تے زبان کی شناخت کران کی سخت ضرورت تھی۔ اس سلسلہ مانھ چودھری غلام حسین لسانوی، چودھری دیوان علی تے مولانا مہر الدین قمر کی طرفوں میاں نظام الدین لاروی کی سربراہی مانھ کی جان آلی جدوجہد مانھ ہکلمہ صاحب نے بڑا خلوص تے جذبہ نال حصولیو۔ اک اہم کم جہڑوانھاں نے کیو وہ تھو ریاست کا گجراں نا ہندوستان کا باقی گجراں نال تے اپنی تاریخ تے کلچر نال جانکاری۔

ہکلمہ صاحب نے کئی سماجی تنظیمیں نال رل کے قوم کی تاریخ تے زبان تیں متعلق کجھ بنیادی کماں کی بنیاد رکھی جن کو پھل ارج کسے حد تک دیکھو جا سکے۔ دیہ گل ہند گوجر سماج سدھار کا صدر رہیا، گوجر جاٹ کانفرنس پونچھ کا سیکریٹری کے طور کم کیو تے ۱۹۴۷ء تیں بعد کجھ عرصو پونچھ مانھ کانگریس کا صدر وی رہیا۔ لیکن ان تمام مصروفیات کے باوجود گوجری زبان کو جنون ہمیشاں انکا ذہن مانھ رہیو۔ انھاں نے اپنے گھر اس دور کی بہترین لائبریری قائم کی جس مانھ قوم تے زبان تیں متعلق کتاب موجود تھیں۔ تاریخ تے زبان تیں متعلق انکا تحقیقی مضمون گوجر وی، نوائے قوم، تے گوجر دیس مانھ شائع ہون تیں علاوہ ریڈیو تیں وی نشر ہوتا رہیا ہیں۔ ریڈیو کشمیر تے کلچرل اکیڈمی مانھ گوجری شعبہ قائم کروان آلی جدوجہد مانھ دیہ سروری کسانہ مرحوم کے سنگ ہمیشاں موہرے رہیا۔ افسوس کی گل ہے جے ۱۵ اگست ۱۹۷۷ء نا انکی اچانک موت نال، انکا شروع کیاوا گوجری ڈکشنری تے لوک ادب کی شیرازہ کا کم ادھورارہ گیا۔ تے یاہ کی ارج کسے حد تک جاوید راہی ہو راں نے پوری کی ہے۔

D:\Writers
org\zabih.jpg
not found.

مولانا محمد اسماعیل ذبیح

پیدائش: ۱۹۱۴ء ڈنڈوت راجوری وفات: ۱۹۹۶ء نواں شہر پاکستان
قوم تے زبان واسطے مولانا محمد اسماعیل ذبیح ہوراں کی سیاسی، سماجی تے علمی خدمات کو اعتراف نہ کرنو کفر کے مترادف ہے۔ ویہ راجوری کی بدھل تحصیل کا ڈنڈوت گراں مانھ ۱۹۱۴ء مانھ پیدا ہويا۔ ان کا والد مولانا محمد عبداللہ چچی اپنا دور کا اک جید عالم تھاتے نوں ذبیح صاحب نا علم وراثت مانھ ملیو۔ انھاں نے تے انکا نکا بھائی اسرائیل مجھور ہوراں نے عربی فارسی کی بنیادی تعلیم اپنا والد صاحب تیں ہی حاصل کی۔ تے کجھ عرصہ مدرسہ نعمانیہ امرتسر مانھ وی پڑھیا۔ عربی تے فارسی مانھ فاضل تک کی تعلیم پنجاب یونیورسٹی تیں حاصل کی تے ۱۹۳۸ء مانھ معلم کے طور ملازمت شروع کی پر یوہ سلسلو زیادہ دیر تک نہ چل سکیو تے ویہ سرکاری نوکری چھوڑ کے ۱۹۴۸ء مانھ پاکستان چلا گیا۔ اُت ویہ نواں شہر ایبٹ آباد کا بسڈیک ہو گیا۔ ذبیح صاحب نا اللہ نے علم، دولت، شہرت تے اولاد سب کجھ نصیب کیو۔ تے آخر نواں شہر مانھ ہی اُن کی وفات وی ہوئی۔

گوجری کا ویہ پہلی صف کا لکھاڑیاں مانھ شامل ہیں جھماں نے اپنی تخلیقی صلاحیت کے نال نال قوم تے زبان کی ترقی واسطے مخلص سیاسی تے سماجی کوشش وی کیں۔ پاکستان مانھ گوجری زبان نا نشریات تے اشاعت کو ادبی لباس لو ان آلاں مانھ وی ذبیح صاحب موہرے رہیا ہیں۔ اپنا ہم عصر لکھاڑیاں نال مل کے کی جان آلی سنجھی کوشش نال ہی پاکستان کا ریڈیو سٹیٹیاں تیں گوجری پروگرام وی شروع ہويا تے ادارہ ادبیات تے گوجری ادبی بورڈ قائم ہويا جن کے ذریعے پاکستان مانھ مقیم گوجری لکھاڑیاں کی کتاب شائع ہوتی رہی ہیں۔ یوہ سلسلو

جسوں کشمیر کلچرل اکیڈمی مانہ گوجری شعبہ میں مَج پہلاں شروع ہو گیو تھو۔ اس شروعات مانہ جن لکھاڑیاں نے فارسی، اُردو تے پنجابی تیں ہٹ کے اپنی ماں بولی گوجری مانہ شعوری طور پر طبع آزمائی کی ان مانہ ذبیح راجوروی کو ناں سب توں نمایاں ہے۔

۱۹۴۷ء کی پاکستان ہجرت تیں بعد انھاں نے گوجری مانہ لکھنو شروع کیو تے خوب لکھیو۔ ۱۹۶۵ء مانہ اُن کی سی حرفی ’نالہ دل‘ کا نال شائع ہوئی۔ ۱۹۶۶ء مانہ ’یاد وطن‘ تے ۱۹۷۲ء مانہ ’آثار‘ کا ناں نال کتابچہ شائع ہوا۔ جہڑا بعد مانہ ”گلدستہ ذبیح تے انتظار“ کا ناں نال ۱۹۸۷ء مانہ شائع ہوا ہیں۔ ذبیح راجوروی کی گوجری شاعری مانہ، سی حرفی، باراں مانہ، نظم، دوہا، گیت تے غزل سب کجھ شامل ہے۔ موضوع کا اعتبار نال ان کی شاعری مانہ ہجر فراق، تے بے وطنی کا جذبات توں علاوہ، اخلاقیات تے انقلابی مضمون وی شامل ہیں۔ ویہ بنیادی طور اک عالم ہون کے ناطے شاعری مانہ مقصدیت کا قائل ہیں تے ان کی ہر صنف کی شاعری مانہ سوز مانہ ڈھلیا وا عالمی دلچسپی کا مضمون موجود ہیں۔ نوں انھاں نے ہر حال انسانی قدر اں نازندہ رکھن کا جتن کیا ہیں۔

گوجری شاعری تیں علاوہ ویہ اُردو، فارسی عربی تے اسلامیات کا وی ماہر منیا جائیں۔ اُن کی تصنیف یتیم پوتا کی وراثت تے قتل مرتد، اپنا موضوع کا اعتبار نال مثالی کتاب ہیں جہڑی پاکستانی عدالتاں مانہ حوالہ کے طور پیش کی جائیں۔ اک عظیم عالم دین ہون کے نال نال گوجری ادب مانہ جہڑو مقام ذبیح راجوروی نا حاصل ہے وہ اپنی زندگی مانہ ہی ہر کسے نا نصیب نہیں ہوتو۔ مناصبر آفاقی ہوراں کا اس بیان نال پورا اتفاق ہے کہ:

”ذبیح راجوروی پیر چنچال کے دیودار کی طرح تنہا اور گھمبیر بھی ہے، بلند و پُرسکون بھی اور پُرقار اور سد بہار بھی“

کلام کا نمونہ:

سی حرفی:

الف:

اللہ کو واسطو جا قاصد میرا یار نا میرو پیغام دے آ
 میری روح تے جان دِگِیر طرفوں بنھ کے ہتھ سلام کلام دے آ
 کہنو رکھنو یاد پردیسیاں نا قسم واسطو رب کے نام دے آ
 ذبح یار نا اک حقیر تحفو، میری زندگی عمر تمام دے آ

ب

بسا رہی بیٹھا تم پردیسیاں نا، مھارا دل ماں نقش ہے یاد تھاری
 بھاریں اُجڑیا ہم بے وطن ہو یا، بستی دیس ماں ہے آباد تھاری
 مدت ہوئی آ یو تھارو خط کوئے میہ، نہ کوئے خبر پتو روئیداد تھاری
 انتظار اڈیک ماں عمر گزری، بھلی ذبح ناکدے نہ یاد تھاری

ب:

بساریئے نہ نہ میری جان منا میری زندگی تے میری جان توں ہے
 میرا دل کو چین سکون سب کجھ، میرو مان تے روح روان توں ہے
 توں ہی اک میری کائنات ساری، دُنیا آخرت دوئے جہان توں ہے
 میرو نہیں کوئے جگ مانھ باج تیرے سب کجھ ذبح کو دین ایمان توں ہے

ج

جسم میرو پاکستان بے روح وطن کی ماہلیاں ماہلیاں ماں
 پھرے جان رنجان حیران میری شنگراں اُچیاں خالیاں خالیاں ماں
 مھل مھل بوٹے بوٹے دل بے پتر پتر تے ڈالیاں ڈالیاں ماں
 ذبح رہے خیال ہر حال میرو اپنا دیس کی نالیاں نالیاں ماں

و:

دل مانھ رہے خیال تیرو، رہیں لباں پر تیری گفتار وطن
تیرے بانج آرام حرام میرو، آتو دل نا نہیں قرار وطن
تیری یاد مانھ طبع ناشاد ڈاڈی، ہوئی جان رنجان ڈکھیار وطن
بھاویں ہے آرام تے عیش سب کجھ، تیرے بانج ہے سب حرام وطن

ذ:

ذرا خیال نہیں انھاں مھارو، جن کو رہ ہمیش خیال ہم نا
کیا یاد نہ جھاں نے بھل کے بھی، بھلنو انھاں کو ہوو محال ہم نا،
نیہ تھی گھڑی منظور جدائی جن کی، ان تیں پچھڑیاں ہوا کئی سال ہم نا
اللہ سنے ذبح دعا مھاری، ملیں یار سوہنا خیراں نال ہم نا

ع:

عمر گذری تکتاں راہ تھارا، رہی سدا تھاری انتظار ہم نا
ہم رہیا اڈیکتا یاد کرتا، تم دلوں ہی گیا بسار ہم نا
مہارو حال بے حال ہے بانج تھارے، آتو کدے نہیں صبر قرار ہم نا
تھارا ملن کو ذبح ارمان ڈاڈو، دسو وہیں گا کد دیدار ہم نا

ل:

لوک بھی ہیں بے درد کتنا، سمجھیں جرم محبت جیہی چیز نا بھی
زخصت ہوئی جہان تیں مہر الفت، دُنیا بھل گئی ادب تمیز نا بھی
خود غرض ہو گیو جہان سارو، تکتو نہیں کوئے کسے عزیز نا بھی
لکھ شکر محبت جیہی چیز مٹھی، دتی رب نے ذبح نا چیز نا بھی

باراں ماہ:

بساکھ:

آیو فیر بساکھ تے رت بدلی، آئی جیتاں نافر بہار مُرد کے
 کھلیا پھل ہرڈل پھلواریاں کا، لایو بناں نے ہار سنگار مُرد کے
 بن ٹھن کے بنی زمین بوہٹی، بیٹھی زلف بنا سنوار مُرد کے
 انتظار ماہ ذبح بہار گدرے، سوئی رت ہے آاکوار مُرد کے

دوہا:

- ۱- ذاتاں پاتاں ماہ کے رکھیواک مُٹاکیں ڈالیں
- عربی، عجمی، رومی، شامی، گوریں، چٹی، کالیں
- ۲- آدمیاں کو چڑو لاہوے چوٹڈے ان کو ماس
- فر وی توں جنت کو وارس، واہ واہ تیرو قیاس
- ۳- چنس اپنی کو ماس نہیں کھا تو کدے کوئے درندو
- توں لوکاں کیں ہڈیں، رڑکے، فر بندہ کو بندو

نظم: دیس کی واء

(اختر شیرانی کی نظم: اودیش سے آنے والے بتا ذہن ماہ رکھ کے فر پڑھن جوگی)
 کس رنگ تے ڈھنگ ماہ وطن سوہنو، بسیں وطن کالوک کس حال وائے
 کدے مہاری وی کسے نایا دآوے، کرے مہارو بھی کوئے خیال وائے
 دس اسی ہی ہے کشمیر اج بھی، جموں پونچھ راجور درہال وائے
 بدھل گنڈ ردھان جملان دیول، تھرو ساہڑ اکھنور سلال وائے
 اج وی وطن ماہ آوے بہار پہلی، برہیا آوے تے شر دیال آوے
 اج بھی بخلی مارتا پھریں مانجھی، پھریں چارتا مہیس مہینوال وائے
 اج بھی سیف ملوک نالوک گائیں، گائیں جا جا سوئی مہینوال وائے
 مرزا صاحبان قصص تے سسی پونوں، گائیں رانجھاتے ہیر سیال وائے

مناد سوکرت انسان بسیں

نظم:

مناں دسو کرت انسان بسیں اک دوجا کا دل جان بسیں
 چت آدمی آدمی بن کے رہیں چت سارا بھائی جان بسیں
 مناد سوکرت انسان بسیں

چت بندہ کو پیری بندو نہیں کوئے کسے کا حق مانھ مندو نہیں
 چت ٹھگی کوڑ کو دھندو نہیں چت نیک تے پاک انسان بسیں
 مناد سوکرت انسان بسیں

یاہ بستی چھری مہاری ہے یاہ حسد کی ساڑی ماری ہے
 یاہ بستی سچ نکاری ہے اس بستی مانھ نادان بسیں
 مناد سوکرت انسان بسیں

یاہ بستی ہے بھگیاڑاں کی یاہ نگری ہے خونخواراں کی
 یاہ جاء مدام آزاراں کی ات وحشی تے حیوان بسیں
 مناد سوکرت انسان بسیں

انسان کا بُت مانھ سُروی ہیں بھگیاڑ وی ہیں لنگور وی ہیں
 گجھ آدمیت تیں دُور وی ہیں بچ کھیں فرعون ہامان بسیں
 مناد سوکرت انسان بسیں

ہائے ڈھونڈو کرت انسان گیو اوہ گیو تے امن امان گیو
 ذبیح جگ کو اطمنان گیو اس نال زمیں اسمان بسیں
 مناد سوکرت انسان بسیں

گیت ا:

آجاؤ موڑ مہار کدے

کت مہر گئیں کت پیار گیا

کیوں بیجا دلوں بسا گیا

آجاؤ موڑ مہار کدے

بھل اپنا قول اقرار گیا

فریاد سخن کی آئی ہے

فرجھڑی اکھاں نے لائی ہے

آجاؤ موڑ مہار کدے

کیوں یاداں نے دکھیا کدے

فر دل ہو گیو سودائی ہے

ہم اُرار تے سخن پار بیسیں

ویہ جموں پوچھتے لار بیسیں

آجاؤ موڑ مہار کدے

کیوں ہمنا گیا بسا کدے

کشمیر تے بدھل دھار بیسیں

ہوں کس نا اپنو حال دسوں

دکھ درد تے رنج ملال دسوں

آجاؤ موڑ مہار کدے

نہیں دستو کوئے غمخوار کدے

اس دل کو جوش ابال دسوں

یاہ دُنیا آخر فانی ہے

دو دن کی یاہ زندگانی ہے

آجاؤ موڑ مہار کدے

نہیں اسکو ذبیح اعتبار کدے

ہر کو ہے اس جا سیلانی ہے

گیت ۲:

ان لمیاں ہجر جدائیاں نے
 ان راتاں کی تنہائیاں نے
 مناں ڈاہڈو بے قرار کیو
 میرو ساڑ کے دل انگار کیو
 ان چمکن آلاں تاراں نے
 ان چاننیاں کا نظاراں نے
 مناں ڈاہڈو بے قرار کیو
 میری جان نا مچ ڈکھیار کیو
 ان ڈھوکاں مرگاں ماہلیاں نے
 ان شنگراں خالیاں خالیاں نے
 مناں ڈاہڈو بے قرار کیو
 میرو دل لنگار لنگار کیو
 ان ٹھنڈا ٹھنڈا پائیاں نے
 ان چٹیاں چٹیاں مانیاں نے
 مناں مار کے ٹھنڈو ٹھار کیو
 ان بچھلی کی آوازاں نے
 ان بلبلاں کا سازاں نے
 مناں شاعر گلوکار کیو
 مناں ڈاہڈو بے قرار کیو

D:\Writers
org\mahjoor
1.jpg not
found.

چودھری محمد اسرار نیل مہجور

پیدائش 1916ء ڈنڈوت راجوری وفات: 1995ء نواں شہر ایبٹ آباد
گوجری کا پہلی صف کا ترقی پسند تے انقلابی شاعر مہجور راجوری مشہور عالم دین تے
شاعر اسماعیل ذبیح ہوراں کا نیکا بھائی تھا۔ اُنکا والد مولانا عبداللہ چچی ڈنڈوت راجوری کارہن
آلاتھاتے اپنا وقتاں کا بڑا دینی عالم تھا۔

مہجور ہوراں نے وی عربی فارسی کی بنیادی تعلیم اپنا والد کولوں حاصل کی تے بعد
مانہ پنجاب توں منشی فاضل کی سند لئی۔ ۱۹۴۷ء توں بعد ویہ وی ہجرت کر کے نواں شہر ایبٹ
آباد مانہ مقیم ہو گیا۔ اُت منشی فاضل کرن تیں بعد فارسی کا استاد مقرر ہواتے تے محکمہ تعلیم مانہ
مدت تک مدرس کے طور فرض نبھاتا رہیا۔ پہلاں فارسی تے اُردو مانہ شاعری کرتا رہیا پر آخر
۱۹۶۲ء کے نیڑے تیرے ذبیح صاحب تے صابر آفاقی ہوراں کی سنگت انھاں ناماں بولی
آلے پاسے موڑ لیا ئی۔ انھاں نے گوجری مانہ زبردست معیاری تے انقلابی شاعری کی تے
طویل عرصہ تک گوجری کی خدمت تیں بعد ۱۹۹۵ء مانہ اُن کی وفات ہوئی تے ویہ اُتے نواں شہر
ایبٹ آباد مانہ دفن ہیں۔

۱۹۴۷ء مانہ وطنوں بے وطن ہو جان کو حادثہ، مہجور جیسا حساس ذہن واسطے انقلابی
ثابت ہو یو۔ قوم نال سماجی ظلماں تے پردیسی ہو جان کا غم نے مہجور صاحب کے ہتھیں نوں قلم
تھمائی جے ویہ ہر دکھ تے اوکھت کی داستان اپنا شعراں مانہ چترتا گیا۔ پاکستان مانہ ہجرت
تیں بعد ویہ وی ذبیح، قمر تے صابر آفاقی ہوراں نال رل کے گوجری ادب کی ترقی مانہ لگ گیا۔

ریڈیو پاکستان میں گوجری پروگرام شروع کران میں علاوہ کئی ادبی تنظیم تے گوجری اشاعت کا ادارہ وی قائم کروایا۔

مہجور راجوروی ہوراں نے پہلاں فارسی تے اُردو شاعری کا کتابچہ، ”سازِ درد“ ”افکارِ مجور“ تے ”پیغامِ آزادی“ شائع کیا تھا۔ پر جلدی ہی انہاں نا اپنی ماں بولی واپس بلا لیائی تے ۱۹۶۲ء میں اُراں ویہ خالص گوجری شاعری کرتا رہیا ہیں۔

اُن کی گوجری شاعری کی پہلی کتاب نغمہ کہسار ۱۹۶۸ء مانہ ادارہ ادبیات کراچی نے چھاپی تھی تے فرجموں کشمیر کچلر اکیڈمی نے یاہ کتاب ۱۹۸۰ء مانہ دوبارہ چھاپ کے گوجری پڑھن لکھن آلاں کی رہنمائی واسطے مفت تقسیم کروائی۔

گوجری شاعری مانہ مہجور ہوراں نے سی حرفی، باراں مانہ، نظم، غزل، گیت ہر صنف مانہ لکھن کی کوشش کی ہے۔ پر نظم تے سی حرفی مانہ اپنے واسطے گوجری ادب مانہ اُچو مقام پیدا کیو ہے۔ انکا شعری کلام مانہ ہر قسم کا مضمون لکھیں پر اُن کی نظماں کا انقلابی، طنزیہ تے ترقی پسند قسم کا مضمون ان کو خاص وصف ہیں۔ اس توں علاوہ اُن کی شاعری مانہ ہجر فراق تے بے وطنی کا جذباں کے نال نال سماجی تے اخلاقی مضمون وی شامل ہیں۔

کلام: سی حرفی:

الف:

اللہ کی حمد تعریف پہلے جس کو ہور شریک ہماز کوئی نہ
قائم ازل تیں ابد تک شان اُسکی جس کو ملے انجام آغاز کوئی نہ
خالق اوہی تے گل مخلوق اُسکی جسکی قدرتاں کو ملے راز کوئی نہ
جیا جون مہجور محتاج اُسکی، اُسکے جیہو بھی بے نیاز کوئی نہ

ب:

بعد تعریف خدا کی تیں لکھاں لکھ تعریف حضور کی ہے
 آئی صفت سراج منیر جن کی جگ مانھ روشنی انھاں کا نور کی ہے
 جھاں دلاں مانھ آئی ہے حُب اُن کی حُب انھاں مانھ رب غفور کی ہے
 طاعت انھاں کی ہوئے نصیب میرے خواہش دل مانھ یاہی مجبور کی ہے

ح:

حال اپنو دساں کھول کس نا، تھارے باجھ دے محرم راز کوئی نہ
 رنگا رنگ مخلوق موجود بھانویں، کسے نال پر راز نیاز کوئی نہ
 کرتا یاد جے کدے پر دیسیاں نا، اس جیہو تھو ہور اعزاز کوئی نہ
 تم ہو دیسیں مجبور پر دیسیں ہم ہاں، پوچھے دیسیں ماں مھاری آواز کوئی نہ

ز:

رُس کے میرے تیں کیوں تم نے کیو کدے وی خط ارسال کوئی نہ
 تھارے نال تھی دوستی مدتاں گی رکھیو فر وی دلوں خیال کوئی نہ
 دعو ہوئے زبان تیں دوستی گو چاڑھے توڑ پر کسے کے نال کوئی نہ
 سکھ چین کا یار مجبور سارا دکھ درد کو ہوئے بھیال کوئی نہ

س:

سخت ہے دل اُداس میرو دے جموں کشمیر راجور کوئی نہ
 تھنو، لاه، بھروٹ، درہال نڈیاں، ڈنی دھار، پنہنڈ دھنور کوئی نہ
 نحی کنڈی دراج سموٹ پھلنی پدھل کنڈ ردهان سنگور کوئی نہ
 طولی بنہ ڈنڈوت سرسوت باگن دیول سر جملان مہور کوئی نہ

ش:

شام تیں لیکے صبح توڑی سو یوتج نہ رون ہے کم میرو
 رہیو چھڑو کلبوت ہے ہڈیان کو، سَنکو جسم کو ماس تے چم میرو
 دیکے واسطو رب کو کہوں تینا، دیکھ آ کے دم مانھ دم میرو
 تینا نہیں مہجور پرواہ میری، دس ہوئے گو کہڑا نا غم میرو

ط:

طرف تھاری لکھیا خط کتنا تم دتو پر کدے جواب کوئی نہ
 انتظار مانھ دن تے رات گذریں، اس کے جیہو بھی ہو ر عذاب کوئی نہ
 تم نا سَنکھ آرام ہزار بھاریں، میرا دکھاں کو حد حساب کوئی نہ
 لطف نہیں مہجور کوئے زندگی کو، ہوویں نال جے یار احباب کوئی نہ

چیت

باراں مانہ:

چڑھیو چیت تے مہلیو سب چیتو، رہی سروں نہ کوئے حواس منا
 وطن یار احباب تیں دُور رہ کے، آوے چیت بہار کد راس منا
 صبح شام پردیس کی زندگی مانھ، کرے ہو بہار اُداس منا
 آو چیت مہجور تے سچاں کو ہو یو دل مانھ سخت احساس منا

پہلا لوک تے زبان

نظم:

بولی گو جری ہند کا گجراں کی، رہی نہیں ہن جہاں کی شان پہلی
 انھاں گلاں نا کد ویہ لوک سمجھیں نہیں جہاں کی جان پچھان پہلی
 پتو کسے وی گل کو لگے تاں ہی، دیکھے جد تاریخ انسان پہلی
 رہیا جگ تیں اج مہجور چکھے پہلا لوک تے نال زبان پہلی

دسوں حال احوال ہن گوجری کو، مرکز منڈھ اس کو راجستھان مانھ ہے
 نام اس کو اک برج بھاشا، گنگا جمنا کا درمیان مانھ ہے
 راجستھان برج تیں پھیل کے ہن، ہماچل کشمیر کاغان مانھ ہے
 اباسین تیں پارمہور ہو کے، اگے سوات تیں یاغستان مانھ ہے
 سید ہووے یا سید کو بال ہووے

نظم:

دوہتاں پوتاں کی لگے نہ تھوڑ منا کسے چیز کو کدے نہ کال ہووے
 لگے کنڈ نہ عمر مانھ کدے میری، تیری مدد امداد جے نال ہووے
 میری مہیس تے گاں تے گھر گلو، دھی پوت وی تیر وہی مال ہووے
 تیری داڑھی تیں جاؤں تیر بان پیرا، اٹھتاں بیستاں تیر وخیال ہووے

ہتھیں بدھیں رہوں کھلو ہوں پیرا گے، برہیا ہووے تے بھاویں سیال ہووے
 شیرنی پیراں گی دیوں ہوں گھر لے کے، تنگی ہووے یا دقت خوشحال ہووے
 رکھوں جمعہ کو ددھ ہمیش سچو، انھاں گلاں کو ڈاہڈو خیال ہووے
 دیوں یار ہوں، چن تیں چن مانھ ہوں سید ہووے یا سید کو بال ہووے
 پیرا تیریں گل پتھر پر لیک:

ہنڈ و پالیو تیرے ہی واسطے میں، دن رات ہے تیری اڈیک پیرا
 تیرا گٹاں تعویزاں تے باتیاں تیں، میرا کم تے کاج ہیں ٹھیک پیرا
 شرنی واسطے کر نہ فکر کائے، مال دیوں گو کھد تے ٹیک پیرا
 لگیں تیریں دُعا، بد دُعا ڈاڈھیں تیریں گل ہیں پتھر پر لیک پیرا

مہجور راجوروی

گیت:

اج نہیں ہے قرارِ مِنا
 دُکھ گیا ہیں مارِ مِنا
 کیوں گیو ہے بسا مِنا
 نہیں کوئے غمِ خوارِ میرو
 نہیں کوئے بھی یارِ میرو
 گیو صبرِ قرارِ میرو
 اج سَکھ کو ساہ کوئے نہیں
 اس ساہ کو بساہ کوئے نہیں
 تِنا کیوں پرواہ کوئے نہیں
 مِنا کوئے دی ارام نہیں
 سَکھ صبح تے شام نہیں
 تیرو پتو پیغام نہیں
 پردیسا مِل جائیے !
 پردیسا مِل جائیے !
 پردیسا مِل جائیے !
 پردیسا مِل جائیے !

D:\Writers
org\asar.jpg
not found.

چودھری محمد اسرائیل اثر

پیدائش 1916ء لمبیدی راجوری

اسرائیل اثر اس دور مانہ گوجری ادب کی سب توں گھومٹھری شخصیت ہیں۔ ویہ لمبیدی راجوری کارہن آلا ہیں۔ ہر سال برہیا ڈھوکیں، بھکیں آن کو معمول بچپن توں لیکے اج توڑی جاری ہے۔ شروع مانہ سی تک تعلیم حاصل کی تے عرصہ توڑی حکمہ تعلیم مانہ اُستاد کی ذمیداری نبھان تیں بعد اچکل ذاتی تے ادبی مصروفیات مانہ لگاوا ہیں۔

شاعری کی شروعات بابا جی صاحب کا دربار مانہ لگن آلی مجلساں تیں ہو یو، پت اُنھاں ناسائیں قادر بخش تے خدا بخش زار جیہا شاعراں کی صحبت نصیب ہوئی۔ پہلاں اُردو تے پنجابی مانہ وی لکھتا رہیا پر جد قلم کی مہار گوجری آلے پاسے موڑی تاں ادب کا میدان مانہ چچھاں مُڑ کے نہیں دیکھو۔ گوجری تخلیق کاراں مانہ ویہ خاص کر لکیر کے ارار لے پاسے کا سب توں بزرگ لکھاڑی ہیں بلکہ ٹوں کہو چاہیے جے اسرائیل اثر ہوراں کا ناں توں بغیر گوجری شاعری یا کسے وی مشاعرہ کو تصور نہیں کیو جاسکتو، جس طرح اسرائیل اثر تے گوجری شاعری اک ہی کیفیت کا دونوں ہونیں۔

اسرائیل اثر نے گوجری شاعری کی ہر صنف مانہ لکھن کی کامیاب کوشش کی ہیں تے غالباً جدید گوجری غزل، گیت تے دوہا کی شروعات انھاں نے ہی کی ہے۔ انکا پورا کلام کو تجزیو کیو جائے یا اُن کی کائے وی تحریر کسے وی زبان کا بڑا توں بڑا شاعر کے مقابلے رکھی جائے تاں اُڑتی نہ ہوئی تے برابر ضرور ہونے گی۔ غزل تے سی حرفی تیں علاوہ اُنکا معیاری، رسیلا تے درد یلا گیتاں کی مثال کسے دوجا گوجری شاعر تیں نہیں سرتی۔

اسرائیل اثر کی شاعری کی پہلی کتاب ”دھکھتیں آس“ انہاں نے ۱۹۸۰ء کے قریب شائع کیو تھو جس پر انہاں ناریاستی کلچرل اکیڈمی نے بہترین کتاب کو ایوارڈ ڈیو تھو۔ تے دو سال پہلاں کلچرل اکیڈمی نے انہاں کی ساری شاعری ”کلام اثر“ کا ناں نال شائع کی ہے۔ گوجری ماٹھ مثالی خدمات واسطے انہاں نامرکزی ساہتیہ اکیڈمی نے Life time Achievement اعزاز ڈیو ہے جس کا ویہ بجا طور پر مستحق ہیں۔

کلام کا نمونا:

نعت ا:

رحمت جھلے رحمت ڈلھے رحمت کی بڈیاں
 رحمت تیں کونیں ماٹھ رحمت واہ رحمت کا ساں
 عرش منور فرش منور تیرو نور دلاں ماٹھ
 جے بخشے تاں لال بھی بخشے نیلی سرب سلاں نا
 رازاں کی واہ رات سلکھنی شب معراج کہواوے
 دھن محبوب الہی جس نا مالک آپ نکلاوے
 آپ ہرنی کی پھاہی پھس کے ددھ پیانن آلا
 انگلیاں تیں پانی کڈھ کے فوج رجاون آلا
 پاپ میرا بے انت ہو یا ہیں، رحم کا انت ناسوروں
 جے گجھ ڈٹھو دینے نے اتنی نذر درود ہوں ٹوروں

الہی مدینہ کی گلیاں نا دیکھوں ہوں رحمت دو عالم کی بلیاں نا دیکھو

فرشتہ بھی جس بارگاہ کا سوالی گئی کائے جھولی نہیں اس درتیں خالی
مراداں شہنشاہ کی کھلیاں نا دیکھوں الہی مدینہ کی گلیاں نا دیکھوں

کدے عرش اعظم کا کنگراں مانہ پھیرو اُحد مانہ بدر مانہ بھی ماہی کو ڈیرو
ہوں اُن سوئی ڈھیریں تے گلیاں نا دیکھوں الہی مدینہ کی گلیاں نا دیکھوں

تیرا درتیں بد لے گیا پارسائی فقیراں نا تھائی جتوں بادشاہی
ہوں اس نور کی رنگ رلیاں نا دیکھوں الہی مدینہ کی گلیاں نا دیکھوں

چت اُمت کا والی نے بکریں بھی چاریں تے پڑیاں مانہ گجھ رات رور و گزاریں
ہوں اس پاک مٹی کی تھلیاں نا دیکھوں الہی مدینہ کی گلیاں نا دیکھوں

خطا لے کے آیو گدا تیرا در پر نظر ایک رحمت کی مولا اثر پر
جے فضلاں کا پھلاں تے پھلیاں نا دیکھوں الہی مدینہ کی گلیاں نا دیکھوں

سی حرفی:

الف:

اُجڑ کے ہوئیں آباد بستیں، کیا دل ویران آباد کس نے
 ج ہڑیا رنے منوں بسا رچھڑ دیا، رکھی انھاں کی دلاں مانھ یاد کس نے
 مچھے کون نصیب کی ماریاں نا، سنی انھاں کی گوک فریاد کس نے
 درد مند کوئے اثر کا درد جانے، دکھیا دل ات کیا بھر شاد کس نے

س:

سارنہ دلاں کی میت جانے کتنا پریت کا روگ وی رو گیا میں
 ڈبٹی خوشی کیس بار ہا دجوک جھلیں، اُجڑی رت کا سوگ وی سو گیا میں
 غم نم بھکم جدائیاں کا درد سوگ کا بھوگ وی بھو گیا میں
 اثر بس وصال کی چس خالی، پنا رس کے پھوگ وی پھو گیا میں

ج:

چانی شب برات کی توں، میرو اُس دربار پیغام لے جا
 میرا پیار کی کسک مچھا رکھنی، غم دکھ بھاویں سر عام لے جا
 لے جا حُسن کی گل سعادتاں نا، میری آہ کو سوز سلام لے جا
 میری سہکتی آس کی جھولیاں نا، لگی پریت کو شوق انجام لے جا
 لے جا میریاں گل پیتا بیاں نا، چنا لے جا صبر نا کام لے جا
 ہستی صبح اُس در پر کھیں پوچھیں، یہ کجھ میریں اُداس جیہی شام لیجا
 اُسکا راہاں نا جا ترونک آئیے، اثر اتھرواں کا بھر بھر جام لے جا

د:

دل اداس تے روح ڈولے شاید درد کو کوئے مقام آہو
 شنگرو اُچھو سُچھو خیر تھاری، دسیو کس کو اج سلام آہو
 زخم ہجر کا کیوں فر ہو یا تازہ، تھاری خاک لے کے پیغام آہو
 کس کی یاد نے کیو ناشاد منا کس کا پیار کو اثر انجام آہو

س:

ساویئے مست المست رتے میرو دیئے سلام اُن پانیاں نا
 ناگا پہاڑ کا چھاڑ مانھ کھیڈ کھیڈیں، پتر پھل جانے میرا ہانیاں نا
 چونیں اج بھی اتھروں شنگراں کا کر کر یاد دلشاد جوانیاں نا
 کہینے باورا اثر کی آس چھڑکیں، دے جا کائے امید نمائیاں نا
 کسک سوز تے درد ہوں لے چلیو، لیئے دیکھ پھلور نشانیاں نا
 دسیئے کد تک سام سمہال رکھوں تیرا غماں کی چادراں تانیاں نا
 قول پالیئے بول تیں ہاریئے نہ، لگے داغ مت پریت پرانیاں نا
 یاری لان تے اثر اسان بھادیں، جانے کوئے کوئے توڑ نہانیاں نا
 رکھیئے یاد ان راہاں کا پند سارا، کریئے فاش نہ رمزاں جانیاں نا
 لایئے داغ نہ بے وفائیاں کا میری اُلقتاں چھٹیاں چھانیاں نا
 بھلن آلیا کر منظور جائیئے، کھری چاہت کی نچھ قربانیاں نا
 قدر پیار کو پیر کنعان سمجھے، اثر چھ بھا مصر کی رانیاں نا

غزل ۱:

بیتی عمر توں دل میرا ماں درد کا دیا بان گئی
جت تک غم کی لو لگے تھی، تاہنگ اک میرے نال گئی

پت جھڑ کی بے رحمی اُڑتا پنچھی روئیں تھا
پتر مٹھل نہ چھوڑیو کوئے جت یاہ ظالم بال گئی

دل کا جانی ٹر گیا ہائی، جا ملاپ کی خالی ہیں
خبرے ٹھنڈیاں مرگاں تیں کیوں اجھاں نہیں میری بھال گئی

دل کی دھڑکن پر اج شاید نظر کسے کا پہرا ہیں
حسن کی شوخی طلب میری نا ہستاں ہستاں نال گئی

چیر سمندر دھرتی بندو چن مرغ اُلاہنگ گیو
اثر دماغاں کی یاہ قیمت دل نا کر کنگال گئی

غزل ۲:

کچھ راز چھپا کے رکھیا تھا ویہ اکھاں نے سمجھا چھڑیا
کچھ درد تھا دل کیاں گٹھاں ماں ویہ گیت بنا کے گا چھڑیا

ویہ لکیاں تیں نامحرم تھاتے مناں جھلیو کہیں وہیں تھا
میں سیک محبت اپنی کا ان لوکاں مانھ برتا چھڑیا

دکھ اپنا بھور پیہا نا تیں ہوئیں ہوئیں دسنا تھا
اوہ پنچھی یوہ کے ظلم کیو راہ جاتاوی تڑفا چھڑیا

تاثير دعا كى هوگى كسے چنگے پيلے منگی تھی
میں اس كا آون تیں پہلاں ارمان اپنا بدلا چھڑیا

وہ بچیو ہر شکاری تیں ہر وار پراں كا زوراں پر
اُت اڑنے ہستاں ہستاں اج بھر پور نشانا لا چھڑیا

غزل ۳:

ترف كے كریا نیناں بچوں موتی تھا بے تارا دو
عشق كو سیک انوھو یارو اكو سوز اشارا دو

زندگی اك بھارت اس نا برتیں سارا مجھے كون
اتوں لیکے اس جا توڑی پیہنگ ہے اك اُلا را دو

درد میرا ناسن كے ات كی پڑی بھی رُٹھی میرے نال
میری اك فریاد تھی لوكو، بچتا رہیا نقارا دو

ٹبر تیر سمہال ات سارو اُت كی چھٹ بھی بھر بھر بدھ
لكھیا لیکھ نا چکھے كہڑو، ایكن سر پر آرا دو

پیار كو گارہك تے تنان شاید ڈھونڈن نال بھی تھاسیں نہیں
اڑ نا چھپے لے گیو كہڑو، دل تے جگر ادھارا دو

غزل ۴:

گرا چھاں کی رت ہے سہانی سہانی
توں کچھ نیے نوں بن کیاں ڈالیاں نا،
پئی ہوتی رہیں جہڑی ہونی ہیں باندے
میری زندگی ماں بڑا پھیر آیا
ہوں ڈھونڈوں ویہ سنگت پرانی پرانی
تھیں اس جا کسے کی نشانی نشانی
واہ اک رمزمن کی چھپانی چھپانی
یہ کس موڑ کی ہیں گھرائی گھرائی
پیاراں کی بکھری کہانی کہانی

غزل ۵:

تیرا غم ماں آکے میں دنیا بساری
میرا نقد اتھروں تھا لھلاں کا مل کا
ہوں دیکھوں تھو دل کیاں ویرانیاں نا
ادتی بدلتی وی دنیا کا مالک
میرا ماہی کد تک کروں انتظاری
تیری اک ملاقات اج تک ادھاری
تیرا پیار کا غم نے فرسوک ماری
میرا دکھ کا بدن کی دس کد ہے باری
نبھی جس قدر نبھ سکی تے گذاری۔

ق

آیا بھور پھلاں نا چن گھگی اڈ اڈ شاد گئیں
چُچھ پیپھا میت میرا نا، میریں کت فریاد گئیں
پتر جھڑ کے فر نہیں جڑوتا پت جھڑ کو دستور سہی
جن چل گیا توں دس کاگا، کیوں نہیں اُن کی یاد گئیں

کس نے دل کی دولت سامی کس نے سامی دُنیا کی ے
 کون مسافر جتو رہا بول خسارا کس کا تھا ے
 اُن گلیاں ماں آثر دیوانو یاہ گل کہو جائے تھو ے
 سانوریا رے تیرا سر پر تیرا عہد پیمان کی پے ے
 ساون کی دھند اُسو کو چن کے کے موسم بیت گیا ے
 آثر کا دل کیوں دل مانھ رہیں قسمت نال نہیں چلو زور ے
 غم کی بولیں مٹھیں مٹھیں اِس کا شعر سلونا ے
 بے درداں کیوں گل وی لکھیں سخن کلام الونا ے
 ویہ پتھر وی دھویئے تے بیلا وی چمپے ے
 تنا تھائیں بجاں کی جت جت نشائیں ے
 خوشیاں نا لیکے نہیں غم اپو دتو ے
 یاہ تن کی کہانی وہ من کو فسانو ے

باراں مانہ:

چیت مُردن کا چیتا بھلیا آيو بساکھ تے نہیں گل ملیا
 گوک رہی سووار نہیں آیا ڈیکوں پئی دلدار نہیں آیا
 جیٹھ سیاپا ہو گیا دونا ہاڑ مانھ ہاڑا اُس تیں چونا
 سک رہی غم خوار نہیں آیا ڈیکوں پئی دلدار نہیں آیا

گیت ۱:

چناں تیری چاننی مانھ پیا نا بُلاؤں گی
سدھراں سلونیاں کا گھنگرو بجاؤں گی

..... چناں تیری چاننی مانھ.....

ساویا کبوتر توں اڈ اڈ بولینے
رہجھ کیاں چھٹیاں نات جا کے کھولینے
ڈھول کیاں گلیاں مانھ بنگ چھنکاؤں گی

..... چناں تیری چاننی مانھ.....

پھلاں کی ہے بستی تے دل مجبور ہے
کلیاں نا بھور چھمیں ماہی میرو دور ہے
اُس کی نشانیاں نا سینہ سنگ لادوں گی

..... چناں تیری چاننی مانھ.....

اڈ اڈ کاگا رے گھلینے توں پھیرو
گھنگراں کے کول ہوئے سجناں کو ڈیرو
سن سن بھجلی ہوں دل پرچاؤں گی

..... چناں تیری چاننی مانھ.....

ڈبتا وا تاراں کا دیکھوں نظارا
کالی کالی راتاں کا ڈکھڑا ہیں بھارا
لکیاں کی پتا ہوں کس نا سناؤں گی

..... چناں تیری چاننی مانھ.....

گیت ۲:

اڈ رے کبوترا توں چن میرو لوڑیئے
 کہیئے میرا بالما نانھ لگی نہ ترڈیئے
 اڈ رے کبوترا توں چن میرو لوڑیئے
 ہجر مانھ کھان آویں کالی کالی رات رے
 پل بھی نہیں سون دیتی غم کی آفات رے
 پیار کیا ضامنا توں راہ مانھ نہ چھوڑیئے
 اڈ رے کبوترا توں چن میرو لوڑیئے
 اتھروں تے سوز کو توں لے جا پیغام رے
 زنگی گھمائی میری مٹی بھی غلام رے
 آس کیاں جھولیاں نا سکھنی نہ موڑیئے
 اڈ رے کبوترا توں چن میرو لوڑیئے
 مدتاں تیں چھو نہیں دور جاون آلیا
 چنگی بھلی زندگی نا روگ لاون آلیا
 پریت آلی ریت گھولی فیر آ کے جوڑیئے
 اڈ رے کبوترا توں چن میرو لوڑیئے
 نویں نویں بھاند آئی پھلیا رتل رے
 پتتاں کی گل جاییے واسطو نہ بھل رے
 غم کیاں بھجیاں نا آ کے نچوڑیئے
 اڈ رے کبوترا توں چن میرو لوڑیئے

چودھری محمد علی بیتاب

پیدائش: ۱۵ اپریل 1916ء وفات: ۱۱ جولائی 1998ء (نڈیاں راجوری)
 چودھری محمد علی بیتاب ہورد رہال (راجوری) کا گراں نڈیاں ماں ۱۹۱۶ء ماں پیدا
 ہويا۔ بنیادی تعلیم راجوری ماں حاصل کی تے اسے دوران ملکی تقسیم کی ہلچل وی دیکھنی تے
 بھوگنی پئی۔ امن قائم ہون تیں بعد وہ یہ ریاستی حکمہ سماجی بہبود ماں ملازم ہو گیا۔ سماجی خدمت
 کے نال نال ۱۹۷۷ء کے قریب شروع ہوں آلی گوجری زبان تے ادب کی تحریک ماں وی
 شامل ہويا تے گوجری شاعری شروع کی جھڑی شیرازہ گوجری ماں شائع ہوتی رہی ہے۔ وہ
 محکمہ سوشل ویلفیئر تیں ریٹائر ہوں تیں بعد اپنا گراں نڈیاں ماں ہی مقیم رہیا تے اتے ہی
 ۱۱ جولائی ۱۹۹۸ء ماں وفات ہوئی۔

کلام: نظم:

گتی رن تے چور کو سنگ مندو، جتی تنگ نالے چڈو مرد مندو
 دھی پچھل بھیڑی لوفر پوت بھیڑو، کانی اکھ تے دند کو درد مندو
 ٹھیل گھوڑو تے لڈی مھیس مندی، کو نکل گاں نالے بہکل داند مندو
 ہلکیو کتو تے جھوٹو مارن آلو، خونی ہاتھی تے سب کو ڈنگ مندو
 سود کھتری کو گھاٹو کھیتری کو، دھکو یار کو تیل دیار مندو
 گھٹ تولنو تے وعدو جھوٹھ کرنو، دینو ہٹی کو باہر ادھار مندو

سہک کوٹھاناتے سہی زمیں بھیڑی، فصل ہوئے نہ محنت کو ساڑ مندو
 ٹرنو رات اندھیری کو بہت مشکل، کھڈاں بچ لگے پٹکار مندو
 قرض اک پیسو مرض کاے ہوئے، ہر ویلا کو رہنو بیمار مندو
 دھی رحمت ہے رب کی سچ کہیں تم، خود غرض ایپر رشتے دار مندو
 لارو موچی کو تے جھوٹھ کا سب کو، آکڑ خان ہووے کسب دار مندو
 چھوٹا منہ بچوں گل بڑی بھیڑی، کرنو بچ کے نال بیمار، مندو
 بڑھی خور حاکم، چوکیدار چاتر، کمزور ہوئے نمبردار مندو
 بڑھا جناں کی عورت جوان بھیڑی، بسو داند تے جب کو سہاڑ مندو
 اڑو ڈوگی ماں تے گڑو فصل اُپر، نالے زمین کو ہے لتاڑ مندو
 گھرائی چور تے چوہا کو مور بھیڑو، گھاٹو دانا کو ہو یا آخر کار مندو
 اللہ پاک نے بچ قران کہیو، لینو دھی کو مال حرام مندو
 دینی دھی تے لینو مل اس کو، برو فعل تے نالے بدنام مندو
 بے نماز تے رکھے نہ کدے روزہ، بے دین تے وہ نادان مندو
 دولت ہوئے دئے زکوٰۃ ناہیں، کرے حج نہ وہ مسلمان مندو
 خفا ہوئے نہ کوئے میری گل اُپر، بندہ بدلتا کو ہوئے طور مندو
 دُنیا سب چنگی، سارو لوک چنگو، محمد علی جیہو نہ کوئے ہور مندو

نظم:

غریبی

خدایا نہ دے توں غریبی کسے نا غریبی نہ دے بد نصیبی کسے نا
 غریبی ہے دنیا ماں ذلت خواری درد رکادھ کا مصیبت ہے بھاری
 غریبی کی زندگی توں بہتر ہے مرنو
 غریباں کو جینو وی ہے کوئے جینو

محنت مشقت کریں رات دن یہ دیکھیں نہ گرمی نہ سردی تھکن یہ
 بھریں دم امیری کا ظالم یہ جہڑا کمائی غریباں کی کھا گیا لیرا
 غریباں نا رہ گیو پیو ہی پیو
 غریباں کو جینو وی ہے کوئے جینو

گورا گیا ہن کالا ہیں آیا غریبی ہٹاؤ کا پرچم چڑھایا
 زبانی زبانی غریبی ہٹاؤ اندروں غریباں کا کالجادی کھاؤ
 کیسو یوہ آہیو ہے یارو زمانو
 غریباں کو جینو وی ہے کوئے جینو

غریبی ماں ہم تم غرقاب سارا ظالم کا چنگل ماں پیتاب سارا
 ظالم تے مظلوم کی جنگ ہوگی دیکھے گی دنیا تے دنگ ہوئے گی
 میسر نہ کپڑو نہ کھانو نہ پیو
 غریباں کو جینو وی ہے کوئے جینو

D:\Writers
org\hasan.jpg
not found.

چودھری حسن دین حسن

پیدائش 1915ء ہاڑی پونچھ

چودھری حسن دین حسن پہلا پورا گوجری لکھاڑیاں وچوں ہیں جنہاں نے قلم کی
مُہار پنجابی تیں گوجری آلے پاسے موڑی۔ ویہ ۱۹۱۵ء مانہ پونچھ کا ہاڑی گراں مانہ چوہدری بلند
خان گورسی ہوراں کا خاندان مانہ پیدا ہوا یاجن کو لے مُدتاں تیں گراں کی نمبرداری ہوئے تھی۔
اُس دور کا دستور کے مطابق اُنہاں نے وی بُیادی عربی فارسی کی تعلیم مکتب مانہ ہی حاصل کی تے
فر جوانی تیں لیکے مدت توڑی اپنا گراں کی نمبرداری کی ذمے داری وی نبھائی۔

چوہدری حسن دین اُن خوش قسمت لوکاں وچوں ہیں جنہاں نانہ صرف چوہدری
غلام حسین لسانوی مرحوم کی صحبت نصیب ہوئی بلکہ تاحیات دستِ راست بن کے اُن کے سنگ
رہیا۔ ۱۹۴۷ء کی افراتفری مانہ مانہ جد لسانوی صاحب پاکستان گیا تاں یہ وی اُنکے سنگ تھا
تے ردوئے بل ۱۹۵۴ء مانہ وطن کی محبت نے واپس چھک آئی۔ اس طرح قوم کی بھلائی بہتری
واسے لسانوی صاحب نے جہڑا منصوبہ بنایا اُن مانہ چوہدری حسن دین ہوراں کی ان تھک کوشش
وی شامل تھیں۔

پاکستان مانہ مختصر قیام کے دوران ویہ مولانا اسماعیل ذبیح، قمر راجوروی تے مہجور
ہوراں کے سنگ رہیا تے غالباً اسے دور مانہ اُنہاں نا گوجری مانہ لکھن کی تحریک وی ملی۔
جہڑی انہاں نے خوب نبھائی۔ اس سنگت کی پاسداری تے لُج نبھان کوشیوت انہاں کی ویہ

منظوم چٹھی ہیں جہڑی اُن کی کتاب پیامِ حسن مانھ پنجابی تے گوجری زبانان مانھ شامل ہیں۔ اُن کی یاہ تصنیف ۹۲-۱۹۹۱ء مانھ شائع ہوئی تھی تے اس پر انھاں ناریاستی کلچرل اکیڈمی کی طرفوں ۹۳-۱۹۹۳ء کو بہترین کتاب کو ایوارڈ وی ملیو۔

چوہدری حسن دین ہوراں نے ساری عمر جس اعتماد تے مضبوطی نال سوئی تھم کے رکھی ہے اُسی گرفتِ قلم پر وی رکھی تے یاہ خاصیت شاید ہی کسے دوجا لکھاڑی نال نصیب ہوئی ہوئے۔ ان کو رعب اُن کی تحریراں مانھ وی محسوس کیو جاسکے۔ حسن دین حسن کی تمام تحریر شاعری کی صورت مانھ ہیں جن مانھ سی حرفی، بیت، نعت تے ہمعصر لکھاڑیاں کے ناں منظوم چٹھی شامل ہیں۔ ویہ ذاتی طور پر زبردست مواحد ہیں تے ان کو یوہ نظر یو شاعری مانھ وی باندے باچھ نظر آوے۔ کسے نمبردار یا مقدم کی زبانی توحید کی گل کتنی موثر ہو سکے اسکو اندازو اُنکا کلام تیں کوئے وی لاسکے۔ بھاویں اج گوجری کالج لکھاڑی تھک کے بیس گیا ہیں پر چوہدری حسن دین حسن اج (۲۰۰۶ء) کا نوے سال کی عمر مانھ وی ہر ویلے ادب کی تخلیق مانھ رُجھیا والہیں۔ کلام:

نعت:

جمیو نہیں نہ جئے گو کدے جگ ماں نبی پاک جیہود ہور انسان کوئے
 ہوئی نہیں نہ ہوئے گی ایڈ ہستی اتنی محترم ایڈی شان کوئے
 اتنا بڑا اخلاق کو ہور دوجو جمیون کون ہے بچ جہان کوئے
 اتنا ظرف کو کون بے دشمنان پر کرے ایڈ عظیم احسان کوئے
 حسن دین حسن

سی حرفی

الف:

اللہ ملاوے تے فر ملیے، کرے فضل جے رب رحمان بچنا
 رچ رچ ملیے گل لگ تم ناں کرے دلاں گا دور ارمان بچنا
 تھارے باجھ نہ دیس ماہہ دل لگے، ڈانواں ڈول تے پھراں حیران بچنا
 حسن رب جانے کد ملاں گا ہم، ہوویں دور کد ہجر طوفان بچنا

س:

سکتاں سکتاں عمر گزری راہ سکتاں سکتاں سال ہويا
 گھڑی گنتاں گنتاں تھک مکا سال گذریا نہیں وصال ہويا
 گزری عمر اڈیک جدائیاں ماہہ، دن ہجر کا سال مثال ہويا
 حسن بدن تیں جان حیران چلی، انتظاریاں ماہہ بھیڑا حال ہويا

غ:

غلطی ہو گئی مچ بھاری، تھارے نال محبت میں لائی کیوں تھی
 دتی تم نے یاد بساں مہاری، اتنی بچنا بے پرواہی کیوں تھی
 نہیں تھی خبر تھاری بے وفائیاں کی، میں پیاریاں جان پھسائی کیوں تھی
 ہم نا دس تمام قصور مہارو، ہوئی حسن سنگ بے وفائی کیوں تھی

ہ:

ہر گھڑی ہم نا یاد تھاری، تھاری تاہنگ نے جان ستائی وی ہے،
 ملن جلن کو نہیں کوئے ڈھنگ بنو، اس گل توں جان گھرائی وی ہے
 پیانگ ہاں سخت جدائیاں ماہہ، حالت نزع کا وقت کی آئی وی ہے
 حسن دل کی گل ہوں دسوں تمنا، ہم نے ملن کی آس مکائی وی ہے

بیت

بیت ۱:

بھل نال تیرے ہم نے لائی سجا غلطی ہوئی رتوں گیا بھل خاصا
 دشمن لوک نہیں لین آرام دیتا تھارے باج پرناں گیا بھل خاصا
 صبح شام بے چین دو نین روویں گیا اکھا تیں اتھروں ڈل خاصا
 حسن قدر تھاری ہم نارج آئی گلاں تھاریاں کا پے گیا بھل خاصا

بیت ۲:

سنگ کا یار تیرا گیا چڑھ ڈھوکیں مرگاں ٹھنڈیاں سرد پنجالیاں مانھ
 اجکل پونچھ کا لوک سب ڈھوک چڑھ گیا، گیا اچیاں اچیاں ماہلیاں مانھ
 توں بھی آہم وی چلاں رل ڈھوکیں چھوڑ گرمیاں سرٹیاں منہ کالیاں مانھ
 حسن سجاں باجھ ویران دسیں کروں کے ڈھوکاں بہکاں خالیاں مانھ

بیت ۳: (منظوم چٹھی کو بند)

چڑھ کے اچیاں اچیاں ماہلیاں توں، دیکھوں روز اُنکا تھارے دارا جکل
 گھمن گھیر دریاواں کا پھیر دسیں، نالے دھند اندھیر غبارا جکل
 پھر تو رہوں پنجالاں تے ماہلیاں پر، کر تو رہوں نت سوچ پچارا جکل
 خبرے کچر توڑی دن زندگی کا، ملیں کد ویہ یار غمخوارا جکل

D:\Writers
org\baidar.jpg
not found.

چودھری محمد حسین بیدار کھٹانہ

پیدائش: ۱۵ مئی ۱۹۱۷ء اوموناڑ (کشمیر)

حاجی محمد حسین بیدار کھٹانہ پہلی پورکا ان گوجری لکھاڑیاں ماں شمار ہوئیں
جہاں نے خالص اپنی مادری زبان گوجری ماں پڑھن لکھن کی ریت شروع کی۔
انکو تعلق پونی، ریاسی کا مشہور کھٹانہ خاندان تے بابا جمال دین کی نسل نال تھو۔ انکا
خاندان کالوک سیال ماں گاندری رام بن کا علاقہ ماں رہیں تھاتے برہیا اپنا مال
سمیت کشمیر کا علاقہ حالن شاہ آباد ڈورو ماں آ بسیں تھاتے۔ اسے سفر کے دوران
ویہہ مئی ۱۹۱۷ء ماں جواہر نٹل کے قریب کاکا گراں اوموناڑ ماں پیدا ہو یا۔ ان
کا والد کوناں ملاں حبیب اللہ کھٹانہ تے ماں کوناں زینب بی بی تھو۔

بیدار ہوراں نے ابتدائی تعلیم اپنا والد تیں حاصل کی جہڑا اپنا قبیلہ کا بچاں نا
قران پاک کی تعلیم دئیں ہو یں تھاتے۔ بیہہ سال کی عمر ماں سیالکوٹ چلا گیا تے
جت انھاں نے پیر جماعت علی ہوراں تیں بیعت دی حاصل کی تے فارسی کی تعلیم
دی حاصل کی۔ واپسی پر مشہور قومی رہنما حاجی محمد اسرائیل کھٹانہ ہوراں کی صحبت
ماں سیاسی تے سماجی زندگی کی بھوم دی حاصل کی تے شعر و شاعری دی شروع
کی۔ ویہہ مدت توڑی گجر اصلاحی کمیٹی کا ممبر وی رہیا۔ تے انکی اصلاحی سوچ نظم

تے سی حرفیاں کی صورت ماں عوام کے باندے وی آئی۔ انھاں کی پہلی سی
 حرنی دُگھو اریکری، ۱۹۵۴ء ماں چھپی تھی۔، دو جی روحانی سی حرنی، تہی ۱۹۶۰ء ماں
 حاجی اسرائیل کھٹانہ ہوراں کی وفات پر لکھی وی ضرب جگر تے چوتھی پیغام حجاز
 تھی جہڑی ۱۹۶۳ء ماں شائع ہوئی۔ ویہہ مولوی علم الدین بن باسی ہوراں کا
 ہمعصر وی تھاتے حاجی اسرائیل صاحب کی نسبت نال انکی محفل ماں اکٹھا وی
 رہیا ہیں لہذا ان دوہاں شاعراں کا کلام ماں سانجھا مضمون تے معیار وی پڑھن
 آلاں نا بھلیکھا ماں پاچھوڑیں۔ انھاں نے سروری کسانہ ہوراں کے سنگ رہ
 کے گجر اصلاحی کمیٹی کے ذریعے کئی سماجی کماں ماں وی شمولیت کی تے گوجر قوم
 تے زبان واسطے جدوجہد کرتا رہیا۔ انھاں کو گوجری کلام سروری مرحوم کا نوائے
 قوم اخبار تے رسالہ دُگو جردیس، ماں وی شائع ہو تو رہیو ہے۔ تے فر ریاستی
 کلچرل اکیڈمی ماں گتو جری شعبہ کھٹن تیں بعد شیرازہ گوجری، ماں وی انکی نظم
 شائع ہوتی رہی ہیں۔ ۸۳-۱۹۸۲ء ماں انکو کلام ”جلوونور کو“ کلچرل اکیڈمی کا
 تعاون نال شائع ہو یو جس نا بعد ماں اکیڈمی تیں انعام وی ملیو۔ انھاں نا اللہ
 پاک نے جوانی ماں ہی (۱۹۵۴) ماں حج کی سعادت وی نصیب کی۔ تے آخر
 رام بن ماں ہی انکو انتقال ہو یو۔

کلام کا نمونا:

باراں ماہ:

بسا کھ بس رس گیا بسا کھ ماں سنگی، رُت بسنت بہار سنیو
 رنگا برنگا پھل چمن ماں بنیا گل کا ہار سنیو
 چن نہ آیو من ستا یو، تھکی کر انتظار سنیو
 یاد ہزار بیدار ہیں تیری، ملیو نہ دلدار سنیو
 جیٹھ آیو جیٹھانی ہسین، پہنے ہار سنگاراں نا
 سبز پری بن چکے دھرتی، رس چڑھے گلزاراں نا
 صحت جوانی رُت مستانی، پُچھے کون بیماراں نا
 چنگا عمل بیدار نہ تیرا، دیکھے بیگانیاں ناراں نا
 آسو آسو خدا کی رکھی، کم سولا سارا
 بانڈیاں ماں بن باسی مڈیا، لگا رہ گیا ڈھارا
 دھائیں مکی پکی ساری، لپیں ہر جا کھلیاڑا
 خوش بیدار زمیندار ہیں سارا، بھریں کٹھارتے کھارا
 کتک کتک سوانی کتیں چرکھا، گیت پریم کا گائیں
 سُر مو کجلو، بٹنو مہندی، زُلف سیاہ چکائیں
 حُسن بے ترس ہمیشاں رہیو، عاشقاں نا ترسائیں
 گُجھا راز بیدار سخن کا پڑدا فاش ہو جائیں

سید حاکم شاہ قمر

پیدائش 1920ء سنٹی پونچھ وفاق 1985ء کھڑک پنجابہ رجوری
سید حاکم شاہ قمر گوجری تے پنجابی کاریاستی سطح کا شاعر تھا۔ ویہ ۱۹۲۰ء مانہ سُرکوت
پونچھ کا سنٹی گراں انہ سید نور شاہ ہوراں کے گھر پیدا ہويا۔ عربی فارسی کی تعلیم گھر مانہ ہی
حاصل کی۔ گھر آلاں کی خواہش انہاں ناخاندانی روایت پر چلاں کی تھی پر اُن کی طبیعت شاعری
تے ہاسی مخول آ لے پاسے زیادہ لگے تھی۔ ویہ بڑا خوش اخلاق تے حوصلہ آلا تھا۔ ہستاں ناروانو
تے روتاں ناہسانو انہاں ناخوب آوے تھو۔

۱۹۴۷ء کے قریب کچھ عرصہ جیل مانہ وی رہیا جت انہاں کی تلگ بندی شاعری مانہ
بدل گئی۔ ویہ دُنیا کا ڈکھ درد مانہ آ پے شامل ہو جائیں تھا۔ اور قضیاں بختاں کا قصا شاعری مانہ
بڑی خوبصورتی نال کر لیں تھا۔ اُن کا ہتھ کی لکھے وی شعری داستان اجاں وی کئی گھراں مانہ
موجود ہیں۔ جنہاں نا تلاش کرن تے چھاپن کی ضرورت ہے۔ اُس دور کا رواج کے مطابق
انہاں نے وی زیادا شاعری پنجابی مانہ کی ہے۔

۱۹۷۰ء میں بعد جدید گوجری کی تحریک کے نال انہاں نے وی جوش جذبہ نال گوجری
لکھنی شروع کی۔ ریڈیو کشمیر تے کلچرل اکیڈمی کی طرفوں کیا جان آلا مشاعرے تے مجلساں
مانہ شامل ہوتا رہیا۔ ان کو کلام گوجری رسالاں مانہ وی شائع ہو تو رہیو ہے پر زیادا شاعری
اجھاں چھاپے نہیں چڑھ سکی۔ اُن کی شاعری مانہ سی حرفی تے باراں مانہ کاروائی مضمون تیں
علاوہ عام آدمی کا ڈکھ درد تے بدلتی انسانی قدراں کو ڈکھروی ہے کیونجے عام شاعر اں ہاروں ویہ
وی دکھی تے تنگ دست رہیا ہیں۔

سید حاکم شاہ قمر اپنی زندگی کا آخری سالوں مانہ پونچھ تیس ہجرت کر کے رجوری کا
گراں کھڑک پنجاہ مانہ اباد ہو گیا تھا۔ تے اتے مئی ۱۹۸۵ء مانہ اُنھاں کی وفات ہوئی۔ (اللہ
بخشے) کلام:

باراں مانہ:

چڑھیو جیٹھ مہینو ہوں سڑوں تتی بھکھیں دھپ وچھوڑو دلدار کو ہے
موسم گرم فراق کی آگ دوزخ منا دکھ اُس وچھڑیا یار کو ہے
پہلاں لا پریت فر کیوں بسری ڈٹھو چنگو طریقو پوہ پیار کو ہے
سید حاکم شاہ قمر ہوں سڑوں ہر دم شوق نت تیرا دیدار کو ہے

سی حرفی:

ج:

جان میری تیرے باجھ چلی سجنا لائی پریت نا توڑیئے نہ
منا دیکھ کوچھی نا تھچئے نہ لارو دے ادھ راہوں منہ موڑیئے نہ
کر کے رحم تے لے سمہال مناں اللہ واسطے رد کے چھوڑیئے نہ
تیرا پیراں کی خاک غلام ہاں ہوں میری تاہنگ امید نا توڑیئے نہ

مولانا غلام قادر راز

پیدائش: 1920ء چک ارن بانڈی پورہ وفات: 1997ء بانڈی پورہ

مولانا غلام قادر راز گوجر برادری ماں ریاست کی اک منی پڑمنی علمی، ادبی، سیاسی تے سماجی شخصیت کوناں ہے۔ اُنکی پیدائش ۱۹۲۰ء ماں بانڈی پور کشمیر کا گراں چک ارن ماں مولانا امام دین جھارا ہوراں کے گھر ہوئی جت اُنکے بڑا بڈیرا مہاراجہ گلاب سنگھ کا دور ماں دینی تبلیغ کا مقصد نال آکے اباد ہو گیا تھا۔ یوہ دور غربت تیں علاوہ سیاسی تے سماجی بدحالی کو دور تھو جس کو حصو گجراں ناکجھ حدوں بدھ ہی نصیب ہو یو۔ راز صاحب کی تعلیم، تربیت تے طبیعت پر بھی اس کو اثر ہو یو۔ انھاں نے عربی فارسی کی بنیادی تعلیم اپنا والد صاحب مرحوم تیں حاصل کی تے فر کجھ عرصو بانڈی پور سکول تے سرینگر کا اور پینٹنل کالج تیں وی روایتی تعلیم حاصل کی پر یوہ سلسلو توڑ نہ چڑھ سکیو تے وی اپنی قوم کی خدمت واسطے اپنا علاقہ بانڈی پورہ ماں واپس چلے گیا۔ ات انھاں نے اپنی قوم کی نویں نسل واسطے دینی تعلیم تے تبلیغ کو سلسلو شروع کیو جہڑو آخر عمر تک جاری رہیو۔ اپنا علاقہ کا مسائل حل کران واسطے ۱۹۷۴ء تیں اراں گوجر ایڈوائزری بورڈ کا ممبر وی رہیا تے وقتی ضرورت کے مطابق انھاں نے سماجی تے سیاسی خدمات ماں وی اپنو حصو گھلیو۔ اپنی دینی، دنیاوی، سیاسی سماجی، تے علمی ادبی خدمات تیں بعد ویہ سال ۱۹۹۷ء ماں بانڈی پورہ ماں ہی فوت ہو یا تے اتے اپنا گراں ماں دفن ہیں۔

علمی روایت تے اُنکا خاندان ماں پہلاں تیں تھی پر جد ۱۹۷۵ء ماں ریاستی کلچرل

اکیڈمی ماں گوجری شعبہ کھلو تاں انہاں نے گوجری ماں شاعری کو سلسلووی شروع کیو۔ انکی شاعری شیرازہ گوجری تیں علاوہ ریڈیو کشمیر تیں وی نشر ہوتی رہی ہے۔ شاعری ماں انہاں نے بیت، نظم، غزل سب کچھ لکھیو ہے پر ہجر وصال، دکھ ملال تے ظرافت جیہاں روایتی مضموناں تیں علاوہ دین، سماج سدھار تے اخلاقیات کا مضمون انکی شاعری ماں جا جانظر آویں۔ انکی ساری شاعری انکی وفات تیں بعد انکا صاحبزادہ محمد شفیع ہوراں نے اکٹھی کر کے کتابی شکل دتی ہے جسکا جلدی ہی شائع ہو جان کی امید ہے۔

نمونہ کلام:

ر:

روکے کچھو اس ماہی نا میں دس سجناں تیرو پیار کیسو
 بے پرواہی کو تیرو اصول کیوں ہے ایسویار پھریار دلدار کیسو
 آوے ترس نا حالت یاہ دیکھ میری واہ واہ یارتوں ہے غمخوار کیسو
 رکھوں وصل کی تاہنگ ہوں کچر توڑی ملاقات کو راز ادھار کیسو

ہ:

ہس کے دو جواب اس نے دعویدار ہیں جھوٹا اقرار تیرا
 مثل بھوراں کے مٹھلاں پر پھرے ہر جا دوست اک نہ مچ ہیں یار تیرا
 شمع واہ پر وہ پتنگ توں نہ پکا دل کا نہیں تکرار تیرا
 سستا ہوئیں نہ راز دیدار ایسا، وعدہ ٹٹیا کئی ہزار تیرا

میاں بشیر احمد صاحب لاروی

پیدائش: ۲۱ اکتوبر ۱۹۲۲ء پھلناڑ واگت

حضرت باباجی صاحب لاروی کا پوتا تے حضرت میاں نظام الدین لاروی ہوراں کا صاحبزادہ، میاں بشیر احمد صاحب لاروی ہور ریاست جموں کشمیر کا سیاسی، سماجی تے علمی ادبی حلقاں ماں کسے تعارف کا محتاج نہیں۔ کچھلی اک صدی تیں زیادہ عرصہ تک اس خاندان نے قوم کی علمی تے سیاسی رہنمائی تیں علاوہ ادبی میدان ماں نمایاں رول ادا کیو ہے تے صحیح معنوں ماں لاروی دربار کی ادبی خدمات پر اک مکمل تحقیق کی گنجائش تے ضرورت ہے۔

میاں بشیر احمد ہوراں کی پیدائش علاقہ واگت کا پھلناڑ گراں ماں جی صاحب کا وصال تیں چار سال قبل ۲۱ اکتوبر ۱۹۲۲ء ناہ ہوئی۔ تے انھاں کو بچپن جی صاحب کی روحانی شفقت مانہ گزریو۔ بنیادی تعلیم واگت ماں ہی حاصل کی تے فر در بار ماں موجود استادان تیں علاوہ گھر کا علمی ادبی ماحول تیں کچھ سکھو۔ نوجوانی کا دور تیں ہی اپنا قبیلہ تے علاقہ کا سماجی معاملان مانہ دلچسپی شروع کر لئی۔ ۱۹۲۵ء ماں حج کا فریضہ تیں بعد جد بابا نظام الدین لاروی ہوراں نے سیاست تیں کنارہ کشی کر لئی تاں سیاسی ذمہ داری وی میاں بشیر صاحب نا قبول کرنی پئی تے ویہ ۱۹۶۷ء تیں ۱۹۸۶ء تک برابر ریاستی سیاست مانہ اسمبلی کارکن وی رہیا تے عرصہ تک ریاستی وزیر کے طور وی ذمہ داری نبھائی۔ ۱۹۷۲ء مانہ بابا نظام الدین ہوراں کا وصال تیں بعد روحانی گدی وی سنبھالی پئی تے یاہ ذمہ داری ویہہ اچھاں تک بخوبی نبھایں لگاوا۔ اس نسبت نال ان کا مریداں تے محبتیاں کی اک بڑی تعداد ریاست تے ملک تیں باہر تک وی ہے۔ ۱۹۸۶ء تیں بعد سیاسی ذمہ داری اپنا سپوت تے ریاستی وزیر میاں الطاف احمد ہوراں نا سونپ کے پوری طرح روحانی علمی تے ادبی کماں مانہ مصروف ہو گیا۔

لاروی دربار ماں ہون آلی علمی تے ادبی مجلساں کی تاثیر بچپن تیں ہی ان کا دل پر تھی۔ چت کئی بلند پایہ پنجابی تے گوجری شاعران کو آن جان برابر لگور ہے ہوئے تھو۔ اس طرح

انہاں ناچپن تیں ہی کئی شاعراں کا شعر زبانی یاد ہو گیا تھا جہڑا ویہہ اکثر مجلساں ماں سناتا رہیں۔ آپ گھٹ شاعری کی ہے پر جی صاحب کی سی حرفی، ملفوظات نظامیہ، تے ”اسرار کبیری“ تیں علاوہ بابا صاحب کو کلام انہاں نے ”اشعار نظامی“ کا ناں نال ترتیب دیکے شائع کروایو ہے۔ اجکل ویہہ دربار نال متعلق شاعراں کو کلام جمع کر کے ”نیر سمندر“ کا سلسلہ کے تحت شائع کرن ماں مصروف ہیں تے اج تک اس کی پنج جلد سامنے آگئی ہیں۔ یوہ اک شخص نہیں بلکہ برابر اک ادارہ کو کم ہے۔ انہاں نے اپنی ذاتی زندگی کی سخاوت ادب ماں وی کھل کے برتی ہے تے ادبیاں تے شاعراں کی سرپرستی تے رہنمائی کی روایت قائم رکھی ہے۔ مھاری یاہی دعا ہے کہ اللہ اس سلسلہ نا تادیر قائم رکھے۔

گو جری کلام کا نمونا:

ج:

جا کے چٹھوں نجومیاں نا، ویہہ کہیں ات دستو فال گجھ نہیں
ویہہ کہیں جھلیا کے حیران ہو یو، بتاں اپنی شائد سنہال کجھ نہیں
دیں ویہہ حساب ابجد سارا تیرا ڈھول نا تیرو خیال گجھ نہیں
اچی اسکی ذات بشیر تھی، توں تے سوہتو اسکے نال کجھ نہیں

د:

دکھاں کا دسوں حال کس نا، محرم دلاں کا کرتا خیال گجھ نہیں
دسوں ہجر کا کھول کے ماجرا کے، جانی سنٹا میرا سوال گجھ نہیں
کہوں معاف کر میرا عیب سارا، ایپر سنٹا دلوں ملال کجھ نہیں
دھوکھا ہجر کا لگا بشیر منا، آتا یار میرا چکھن حال گجھ نہیں

و:

واسط لکھ ہزار گھلوں میری عاجزی کر قبول جانی
تیرا ہجر کی ڈاہڑی ساڑ سینے پونیں کالجے سو سو سول جانی
دتا سر نا کر قبول ماہیا تیری دید کو تحفو تمول جانی
تیرے باجھ کت صبر بشیر مناں، رو توں رہوں تے رہوں ملول جانی

D:\Writers
org\nadeem
2.jpg not
found.

مولانا عبدالرحیم ندیم

پیدائش: 14 نومبر 1923ء گواہاڑی مظفر آباد

گوجری کا شاعر، ادیب، محقق تے محسن ڈاکٹر صاحب آفاقی کا بڑا بھائی مولانا عبدالرحیم ندیم مظفر آباد کا رہن آلا ہیں۔ ویہ ۱۹۲۳ء ماٹھ مولانا محمد علی پھامڑہ کے گھر پیدا ہويا، بنیادی تعلیم اسلامی مدرساں ماٹھ حاصل کی۔ ملازمت تیں گھر بار کو کم بہتر سمجھو تے تمام عمر خالص گوجرا ماحول ماٹھ رہیا۔

ندیم صاحب ۱۹۶۵ء توں بعد شروع ہون آلی گوجری تحریک نال شامل ہويا تے نظم، غزل، گیت، سی حرفی تے مرثیہ کی صورت ماٹھ شاعری کی۔ جہڑی ریڈیو توں نشر ہون تیں علاوہ گوجری ادبی بورڈ مظفر آباد نے ”سدو بہار“ کا نال نال کتابی صورت ماٹھ وی شائع کی ہے۔
مولانا عبدالرحیم ندیم ہوراں نے گوجری شاعری تیں علاوہ جہڑو زیادہ اہم کم کیو وہ
قرآن پاک کا گوجری ترجمہ کو ہے، جس کا حوالہ سنگ ان کوناں انشاء اللہ صدیاں تک زندہ رہے
گو۔ گوجری ماٹھ یوہ بڑو فریضو انجام دین آلا غالباً پہلا عالم ہیں، جد کہ اس سلسلہ ماٹھ ابو العطا
فقیر محمد سعید چشتی، مولانا عابد صاحب، مولانا فیض الوحید تے مولانا محمد امین مدنی ہوراں کا نال
انھاں تیں بعد آویں۔ دُعا ہیکہ اس نیک کم ماٹھ پہل کرن واسطے اللہ انھاں نا اجر عظیم دے۔

(آئین)

کلام:

حمد:

نبلی سل بچ پٹا تارا قدرت تیری ربا پاک
تیں چکایا جنگل جنگل تیں لشکایا ڈھیریں ڈھا کا

غزل ۱:

تیرا غم کو کنڈو اڑ کے کہڑو ہیرے اندر بڑھ کے
 دُنیا سوئی نالوں بناں مٹھا غم کی اگ مانھ تڑ کے
 چھپ کے بیٹھاں گجھ نہیں بنو حق تھاوے میدان مانھ لڑ کے
 مرد میدان کے اندر نکلیں بُو دل پیسیں گھر مانھ دڑ کے
 خامی کھاسیں نہیں توں کدے گل ندیم کی رکھینے مڑھ کے

غزل ۲:

زُلف کو قیدی چھٹے نہ دل پو جکڑے نہ
 گوڑی یاری توڑ نہ پوچے یاری سچی لٹے نہ
 عشق بھی ہے بیماری لیکن یوہ پیار نکھٹے نہ
 جاگ کے راہی دل کی کریئے کوئے خزانو لٹے نہ

ق:

پانی پیئیں جد اوہ رنکے چنگا شعراں مانھ دل بنکے
 منہ چھپا تو چلے گوڑو سچو چلے چھاتی تن کے

ق:

کیوں کسے کی ماڑی نکوں ہوں اپنی جھگی جاڑی نکوں
 سوکڑ کسی اکھ کو دھوکھو گھر کی بگتی ناڑی نکوں

ق:

ہے چنگو کاج جوانی کو مُل کے ہے لیر پرانی کو
 نیٹاں باجھ اجر نہیں کوئے یوہ ہے گھوٹکار مدھانی کو

گیت:

کدے آکے مُنہ تے دس جزا
 ہُن آکے گھر مانھ بس جزا
 میرے بہڑے آکے ہس جزا
 کدے آکے مُنہ تے دس جزا

پھل کھلیا دیکھ بہاراں مانھ
 بلبیل بولیں گلزاراں مانھ
 پئی ڈالی ڈالی رس جزا
 کدے آکے مُنہ تے دس جزا

چن چڑھیو خوشیاں ہاساں کو
 ہُن ویلو نہیں یوہ ساساں کو
 مت میرے کولوں نس جزا
 کدے آکے مُنہ تے دس جزا

مت سمجھ سچ روائی ہے
 نوں رورو جان سُکائی ہے
 لو اکھاں کی نہ کھس جزا
 کدے آکے مُنہ تے دس جزا

مولوی عبدالکریم پرواز

وفات: 1982ء جموں

عبدالکریم پرواز پہلا پورا گوجری لکھاڑیاں مانھ کنیا جائیں۔ اُن کا بزرگ کاغان توں بھرت کر گے پہلاں راجوری آیتے فرجنندراہ جموں مانھ بس گیا۔ اُن کو تعلق بکروال قبیلہ کا اک بوکن خاندان نال تھو جہڑا سیال مانھ جنندراہ تے برہیا اپنا مال چوکھرنالے کے چندن واڑی پہلگام آلے پاسے جائیں ہونیں تھا۔ پرواز ہوراں کی پیدائش وی جموں کے قریب ایسا ہی سفر کے دوران 1925ء کے ال پل ہوئی۔

عبدالکریم بوکن ہوراں نے پنجی تک کی سکولی تعلیم تیں بعد کچھ عربی فارسی کی دینی تعلیم وی حاصل کی تے اس طرح مولوی کہوان لگ گیا۔ اُنھاں کو بابا نظام الدین لاروی ہوراں کی روحانی تے ادبی مجلساں مانھ بڑوآن جان تھوتے اے اُنھاں نا پنجابی شاعران کی صحبت مانھ شعر کی بھوم ہوئی۔ تے نوں ویہ عبدالکریم بوکن تیں مولوی عبدالکریم پرواز بن گیا۔

مولوی عبدالکریم پرواز ہوراں نے وی اپنا دور کا باقی لکھاڑیاں ہاروں زیادا شاعری پنجابی مانھ کی ہے جس مانھ پیر مرشد تے تصوف کو موضوع نمایاں ہے۔ فرجد و جاسنگی گوجری آلے پاسے مڑیا تاں پرواز ہوراں نے وی قلم کی مہار گوجری دار موڑتاں کچھ مچ ہی سوئی تے دردیلی سی حرنی گوجری ادب کے حوالے کی ہیں۔ گوجری مانھ اُنھاں نے نظم، غزل تے گیت وی لکھیا ہیں پر رُحمان تے معیار کے مطابق ویہی حرنی کا ہی شاعر سئی لگیں۔

کلچرل اکیڈمی کا شیرازہ گوجری تیں علاوہ ریڈیو کشمیر تیں وی اُنھاں کو کلام اکثر نشر ہو تو رہے۔ مختصر بیماری تیں بعد 1982ء مانھ مولوی عبدالکریم پرواز ہوراں کی وفات ہو گئی۔ اُن

کارشتے داراں کا کہن موجب اسویلیے اُن کی عمر ۵۵ تے سٹھ سال کے درمیان تھی۔ پہلا دور کا باقی گوجری شاعراں ہاروں انھاں کا کلام ناوی تلاش کے کتابی صورت مانھ چھاپن کو کم اجھاں کسے مہربان کو اڈیکوان ہے۔

کلام:

نعت:

صلے علیٰ کو ورد کماؤں

پڑھ صلوة درود پچھاؤں

جان اپنی نا گھول گھماؤں

اللہ کو حبیب پیارو

عربی مدنی تاج ڈلارو ملیو

مرحبا مرحبا اُچی شان آلیا

نظم: وطن

گلشن وطن جموں کشمیر مہارو

ہندوستان سارو گلستان بے

بسیں پیر فقیر ابدال کتنا

اجمیر خواجہ عالیشان بے

سی حرفی:

اللہ کو آسرو اک منا ہور کسے کی نہیں امداد کوئے

گھٹمن گھیر اندر چو فیہ غم کو سُنے مول نہ میری فریاد کوئے

گھیرو دکھاں کی فوج نے آن پایو بنیو آن سالار جلا د کوئے

کراں چل پرواز اپیل دا نگت جتوں طے پیغام دلشاد کوئے

ج:

جگ مانھ تاں مشہور ڈٹھو جام وصل کو وہ بیمار دل نا
 ہر پاسے تیں طعن مخول آویں، ماریں ہٹ کے پھٹ ڈکھیار دل نا
 قسمت خواب تیں آن جگا میری، بیدار کردے بیزار دل نا
 بگڑی کون پرواز کی توڑ چاڑھے، ملتو نہیں دردی غمخوار دل نا

ق:

قسمتاں کا ہوویں سب لیکھا آئی بہار تے پکڑ مہار بیٹھی
 پھرے ڈبتا دینہ کو رنگ پیلو، جاتی خوشی وی رنگ بسار بیٹھی
 جسم روح تیں بنا بے آس ہو یو، گئی عیش تے چند ڈکھیار بیٹھی
 اوہلے خوشی کو چن پرواز ہو یو، رات ہجر کی پیر بسار بیٹھی

باراں مانہ

چڑھیو چیت تے باد صباء جھلے پئی ہر بیجان مانھ جان دیکھو
 کریں آلنا تیار ہن پیا پکھنو ہوئیں بسن کا سب سامان دیکھو

گیت ۱:

ہس ہس کے چناں آیا کر آون مانھ چرنہ لایا کر
 مدتاں تک نہ تر فایا کر ہس ہس کے چناں آیا کر

گیت ۲:

بن کے پکھنواں سامنے آکے بول
 گیو کت بول کے کد آوے میرے کول
 لنگھ گیو چلے کلاں جیتاں نا آوے گونوروز
 بن کے پکھنواں سامنے آکے بول

حاجی قطب الدین عارف

پیدائش: ۱۹۲۵ء نوتن، دھندراٹ رام بن

حاجی قطب الدین عارف ہو، حاجی محمد حسین بیدار کھٹانہ تے مولوی غلام رسول ڈوئی ہوراں کا معصرتے ہم وطن شاعر ہو یا ہیں جن کو شمار گوجری لکھاڑیاں کا پہلا قافلہ ماں ہوئے۔ انھاں نے ۱۹۷۵ء میں بعد شروع ہون آلی گوجری تحریک ماں بڑھ چڑھ کے حصولیو تے اپنی گوجری شاعری نال اپنی سستی قوم نا دھونگ جگان کی کوشش کی۔

عارف ہوراں کو تعلق رام بن کا علاقہ دھندراٹ نوتن نال ہے جت ویہہ ۱۹۲۵ء کے ال پل پیدا ہو یا۔ انکا بچپن تے زندگی کا حالات کی تفصیل کوشش کے باوجود نہیں لہ سکی۔ البتہ انھاں کی ۸۰-۱۹۷۹ء ماں شائع ہون آلی کتاب ”کلام عارف“ میں معلوم ہوئے جے ویہہ نوتن، دھندراٹ رام بن کارہن آلا تھاتے شیخ محمد عبداللہ ہوراں کا دور حکومت ماں ہون آلی گوجری تحریک کے سنگ انھاں نے شاعری شروع کی۔ ویہہ ذاتی طور پر مادر مہربان بیگم اکبر جہان بیگم میں کافی متاثر سئی لگیں تے انھاں نے اپنی کتاب کو انتساب وی انھاں کے ناں ہی کیو ہے۔ انکا کلام ماں نظم، غزل، گیت سی حرفی تے حمد نعت سب کچھ شامل ہے۔ کلام ماں بے وزنی جا جاسی لگے جہڑی گوجری کا ابتدائی دور کی گواہ ہے۔ اپنی کتاب ”کلام عارف“ کا شروع ماں اپنو تعارف ویہہ آپ اس طرح کراویں:

دسوں حال احوال کچھ آپنو، جہڑی یاد کچھ گل دو چار اپنی
حلقو ہے دھندراٹ میرو، نوتن جگہ ہے خاص اپنی
ریاست جموں کشمیر میری، ضلع ڈوڈہ تے رام بن تحصیل اپنی
حاجی نور دین میرو مرحوم والد، ملیو ان میں فیض ہزار عارف
قطب الدین ہے اصلی ناں میرو، لودھا ذات، عارف تخلص میرو
رام بن میں چھ میل مشرق، آوے راہ ماں ندی چناب میرو
دیہہ دھار کا پہاڑ ہے سر اُپر، ویری ناگ کو چشمو سیر گاہ میرو
وفاداری ملک کی خدمت قوم کرنی، یوہ پیشو ہے آبا اجداد میرو۔

کلام کا نمونہ: سی حرنی

الف:

اس پریم کا نگر اندر، ڈٹھا بستہ اس جہان آلا
چو فیروزے عشق کے بیس کے کریں پوجا، ڈٹھا ہم نے خاص قران آلا
سولی چڑھ کے سر پر پہاڑ چلیں ڈٹھا یار کو بھیت چھپان آلا
گجھ خوک چاریں عارف عشق چکھے، ڈٹھا ولی کمال کہان آلا

ج:

جا ڈٹھو سوہنو بُت خانے، متھے تلک تے بغل قران ڈٹھو
کیو یار کو مذہب قبول میں بھی، اسے مانہ اسلام ایمان ڈٹھو
ایک تھہ مالا ایک تھہ تسبیح، نہ اوہ کافر تے نہ مسلمان ڈٹھو
چمکیو عارفہ وہ ہر پاسے، جس نے یار ڈٹھو سب جہان ڈٹھو

س:

سوہنا یار تیں ہوں قربان جاؤں، کالی اکھ سوہنی سارا جہان تیں نی
جلوو لیلۃ القدر کا نور آلو، کالی زلف مثال مثال کی نی
بیٹھو دور توں نیڑے آ جانی، راہِ دل اپروں لنگھ جا جانی
شاہ رگ تیں عارفہ ہے نیڑے، ڈھونڈے کیوں جنگل جاڑ مانی

ہ:

ہر پاسے دسے ماہی میناں کنڈ پھیروں تے گناہگار ہوؤں
حاصل ہوئے مراد دل کی، جے ہوں یار کی خدمت گار ہوؤں
کرے کرم نگاہ جے اک واری، سکا کلروں پھر گلزار ہوؤں
موئی عارفہ یار کی خاک اُپر، لکھ وار قربان نثار ہوؤں

غزل:

میرا دل کا بہڑہ ماں اج خوشیاں نوں پلن ديو
شام چروکئی ہوئی دی ہن دیوانوں پلن ديو

سرد سرد موسم ماں ہن دل نہیں لکتو
دھپ نکلن ديو، برف گلن ديو

پھل ہسین گا کھلیں گی کلی سب
شام نون آون ديو دھپ نون ڈھلن ديو

پھل توڑن ديو ہمنوں امیداں کا
وقت نکو بچو ہے حسن اس نوں پلن ديو

دل کی تِس بجاویں گا یہ جفاکش
ہن بدلاں کا موٹھاں پر پانی نوں چلن ديو

گیت ہم بھی گاداں گا، آمد بہار پر
موسم کی رنگت نوں ہور کچھ بدلن ديو

ہم ہی کم آواں گا اندھیر صحرا ماں
ہم نوں بھی قافلہ آلیو نال چلن ديو

D:\Writers
org\sarwari
2.jpg not
found.

چودھری فتح علی سروری کسانہ

پیدائش: موالی سانہ جموں 25 مارچ 1927ء وفات: جموں 12 مارچ 1987ء

سروری صاحب کو ناں لیتا ہی اک پیداک صحافی، اک مخلص سیاسی تے سماجی کارکن، تے اک معتبر شاعر تے ادیب کو خلیو اکھاں اگے آجائے۔ انھاں کو پوروناں چودھری فتح علی تھوتے اُن کی پیدائش سانہ جموں کا گراں موالی مانہ چوہدری شکر دین ہوراں کے گھر ۱۹۲۷ء مانہ ہوئی۔ اُس دور کی سیاسی تے سماجی اوکھتاں کی وجہ تیں صرف ہائی سکول تک کی تعلیم حاصل کر سکیا۔ کجھ عرصہ اوقاف مانہ ملازمت وی کی۔ پر قوم کا درد نے ویہ زیادہ عرصہ سیاسی تے سماجی خدمت مانہ مصروف رکھیا۔

سروری کسانہ ہور گجراں کی تاریخ تے گوجری کی تاریخ پر گہری نظر رکھیں تھ۔ گجراں کی بہبود واسطے پورا خلوص نال کوشش کرن آلاں مانہ چوہدری غلام حسین لسانوی، قمر راجوری تے سروری کسانہ کو ناں ہمیشہ امرہ گو۔ سروری صاحب نے پوری زندگی قوم تے زبان کی بے لوث خدمت کی۔ سماجی خدمات کا سلسلہ مانہ ویہ گوجر جاٹ کانفرنس کا رکن رہیا تے ۱۹۵۱ء مانہ گوجر اصلاحی کمیٹی جموں کی بنیاد رکھی۔ جموں کشمیر کا گوجراں مانہ صحافت کی بنیاد رکھن آلاوی سروری کسانہ تھ جنھاں نے قوم تے زبان کا مسائل اپنی تحریراں مانہ باندے آئیا۔ اک مدت توڑی ماہیا مہور گڑھیا کا قلمی ناں نال مضمون لکھتا رہیا۔ فر دسمبر ۱۹۵۵ء مانہ اپنی اخبار ’نوائے قوم‘ شروع کی تے پہلو گوجری رسالو گوجر دیس، ۱۹۶۳ء مانہ شروع کیو۔ ویہ اپنی تحریراں کے ذریعے ہمیشاں گوجر نوجوان کے ہتھیں سوئی کی جگہ قلم تھان کی کوشش کرتا رہیا ہیں۔ جموں کا گجراں واسطے سروری کسانہ کی خدمات بے مثال ہیں۔ گوجر نکر کو ناں تے جموں

مانہ گوجراں کی موجودگی سروری صاحب کی کوششاں کو تہجہ ہے۔ انہاں نے قوم نامتو گجھ و تو پر قوم انہاں نا گجھ وی خاطر خواہ نہ دے سکی۔

سروری صاحب نے گوجری زبان کی ترقی واسطے انتھک کوشش کیں۔ انہاں کا زبان تے تاریخ پر کئی مضمون آج وی گوجری ادبیاں کی رہنمائی کریں۔ گوجری زبان ناسب تیں پہلاں نوائے قوم تے گوجردلیں کے ذریعے اشاعت کو سہر و سروری صاحب نے اپنے ہتھیں لوا یوتھو۔ اگست ۱۹۷۸ء مانہ ریاستی کلچرل اکیڈمی مانہ گوجری شعبہ کا کھلن نال سروری صاحب وی گوجری ایڈیٹر کی حیثیت نال اس شعبہ مانہ شامل ہو یا تے کئی سال یاہ ذمے داری وی نبھائی پر زندگی کا آخری سالان مانہ صحت خراب رہن داروں وی اکیڈمی تیں الگ ہو گیا تھا۔

سروری صاحب کا ادیب تے شاعر ہون کو ثبوت رانا فضل حسین ہوراں نال انہاں کی دس پندرہ سال کی سنگت ہے جہڑی ۱۹۶۵ء مانہ پچھڑ جان تیں بعد وی چھٹیاں پتراں کی صورت قائم رہی۔ سروری صاحب نے گھٹ شاعری کی ہے پر معیاری شاعری کی تے ان کا کلام مانہ جموں کی گوجری کو خاص لہجہ گوجری کا خزانہ مانہ گجھ بادیو کرے۔ اُنکا گیت، غزل، نعت تے منظوم چھتیں گوجری ادب کو قیمتی سرمایہ ہیں۔ صحافت مانہ ماہیا مہور گڑھیا کا قلمی ناں کی طرح شاعری مانہ کافی عرصہ کڑک گوجر نگر یو تخلص رکھ کے لکھتا رہیا ہیں۔

بے مثال خلوص رکھن آلا اس اس گوجر صحافی، ادیب تے شاعر کو انتقال گوجر نگر جموں مانہ مارچ ۱۹۸۷ء مانہ ہو یوتے ویہ آج وی توی کے کنڈے دفن ہیں۔ واہی توی جہڑی سروری کسانہ کی پچھان ہے، جس طرح پیر پنجال رانا فضل کی پچھان ہے۔ قوم بھاریں سروری صاحب مرحوم نا بھلا چھوڑے پر توی انہاں نا صدئیں یاد رکھے گی۔

ع: توی کنڈے آن کے مناں کدے لوڑیئے

رانا فضل سرورسی بارے لکھیں:

اوکھ پسند طبیعت تیری سوکھ نہ تا بھاوے
لیکلدی تے لایھ کی گوگی تا راس نہ آوے
فتح علی منصور سماں گو بن کے جیتاں رہنو
سرورسی تاں ہی سو بھے یارا ہر پچتا نا سہنو

نعت ۱:

میں دکھیو لاچار نبی	نبیاں کا سردار نبی
لاؤ بیڑو پار نبی	میں گردا ہیں ڈُبن لگو
بُٹھو توی کنار نبی	تھارو گولو زلیو زلیو
یا سوہنا دلدار نبی	مُجھ کا چیتا رکھنا تم
غم بندو غم خوار نبی	میں دکھیو وو دکھڑا بھوگوں
جے اپڑوں اک بار نبی	اُتے آکے عرض کروں
سد کرو دربار نبی	سرورسی کا تم داتا او

نعت ۲:

تم سچا تم پاک محمد م	تم صاحب لولاک محمد م
لگے ڈاڈی جھاک محمد م	پاپی لکین چپوں ناں
میں رحمت کو گاہک محمد م	تم رحمت کا بنڈن ہارا
میں بندو غمناک محمد م	اوکھ سے فریادو ہوپو
اوکھ نا چھوڑو ٹھاک محمد م	چھتا اوکھ مدال نہ چھوڑے
تاں ایڈو بیباک محمد م	تھارو ناں سر میرے چھاں
تھارا در کی خاک محمد م	سرورسی لہھی فتح علی نا

غزل ۱

رات کلکھنی بال رکھوں میں
 رت نا رنگن دین کی خاطر
 ٹوڑاگے میں جھک نہیں سکتو
 سکھ اپرادھ کو نہ مجھ بھاوے
 من کو دینو جال رکھوں میں
 رت کو چھل اُچھال رکھوں میں
 سچ کو پلے مال رکھوں میں
 دُکھ نا واقف حال رکھوں میں
 کانو قلم کو نال رکھوں میں
 فضل کو دیس پنجال رکھوں میں
 اُس کی یاد سہال رکھوں میں
 فتح علی کد ملے پریمی

غزل ۲:

لمدا راہ ادھ مانے قد میں
 انھیاں اوپریاں گلیاں بچ
 سب سنسار تلاش ٹریے
 میری گور سرہانے آئیے
 ٹرنو پے نما نے قد میں
 جھلیو پھرے اُباہنے قد میں
 زنجی چال اباہنے قد میں
 بان کی ٹور پچھانے قد میں
 لوڑ نشان پرانے قد میں
 کڑک وفا کے اوکھے پینڈے

غزل ۳:

دل کی جھگی انجھ آيو
 دُکھ پرایا جے سہنا تھا
 مریاں نون تیں مار مکایو
 میں مریو تے قبر سرہانے
 میں سوچوں جے کجھ آيو
 میں دنیا پر نچ آيو
 رحم نہ اڑیا تجھ آيو
 سنجھن کڈھتو سنجھ آيو
 کڑک کلیجو پنج آيو۔
 دھنکی ڈاھڑی یاد کی تندی

(رانا فضل راجوروی کے ناولیں)

غزل ۴

منجھو سنگوں دور تجھو کون لے گیو منجھو تیرا دکھڑا کون دے گیو
 لیکھاں نے پچھڑیا ہم دوئے سنکیا منجھو رے شریک پچھیں تجھو کے گیو
 دوئے کدے کول ہوتا رول بھول لگتی آپو تھو خیال تیرو لا تو ڈھے گیو
 ساہ کو بساہ نہیں ہونی ہو کے رہے کون میرو پچھے گو کنگا رہے گیو
 میں تجھو بھل جاؤں منجھو نہ بھلینے یاداں بچ رکھینے ہوں پہلاں بے گیو

آزاد نظم: ”توی“

کھنڈ یا بٹا گول توی کا،
 تلوں رُڑھتی ریت نمائی
 پانی کی لہراں کا ہلا،
 اکھیں تلوں
 تک تک سوچوں
 سُنوں اکھاں ”پتھرا پنی تھا نہیں بھارا“
 کھسک نہ ٹھہریں، لہریں لہریں
 جا پڑیں پردیس
 مر یا گل یا گیا گوا چا پہن فقیری بھیس
 کس نے تکیا، مُڑ کے آتا دیں !!!

منظوم چٹھی (رانا فضل کے ناں)

نال پیار پڑھی رانا جی	تیری بھنک اپڑی رانا جی
نہ دے ایڈ تڑی رانا جی	مڑھی مانی چندڑی میری
منے کون اڑی رانا جی	دردی تجھ بنا دس کہڑو
تیری گل اکڑی رانا جی	گھی شکروں دی مٹھی لگے
تیری قدر بڑی رانا جی	تیری مت نہ موڑن جوگی
موت قریب کھڑی رانا جی	توبہ توب ہن ضد نہیں کرسوں
جھگے آن بڑی رانا جی	تیرے بن ہر ادھت میرے
ہتھیں گھوٹ نڑی رانا جی	جے میں تیری گل نہ منوں
رت کی توی چڑھی رانا جی	تاں تکن آ تو اگے
ہر اک اکھ ڈڑھی رانا جی	گجر نگر اڈیکن ہاری
خدمت کرنگڑی رانا جی	بابا گوجریا لکھتو رہو
اکھے ماں امڑی رانا جی	ماں بولی تجھ مہا بے پنگری
مولی جیہھ سڑی رانا جی	ہر گجرانی بولن لگی
بھاری پیڑ ہڑی رانا جی	کڑک حیاتی کو تھکیا مو

گیت ا:

سگی میرو مُدتاں کو رہا تیں وچھوڑیو سگنوں ہوں وچھوڑیو تے توی کنڈھے چھوڑیو
 رہا توں مسافراں ناموڑ کے بے آنتو سگی پردیسیاں نوں ہوں کدے جانئو
 نُجو ہو یو سگ چنڈے لھے کت لوڑیو
 سگی میرو مُدتاں کو رہا تیں وچھوڑیو
 چناں اورا جوریا چاننی رے موڑیئے توی کنڈے آن کے مناں کدے لوڑیئے
 جوڑ کے پروڈیا تیں ساتھ کچھ توڑیو
 سگی میرو مُدتاں کو رہا تیں وچھوڑیو
 کون دگیریاں مانھ پچھے منجھو آ کے مان رے ترڈیو تیں دور دور جا کے
 توی کنڈے آ تک رب کدے موڑیو
 سگی میرو مُدتاں کو رہا تیں وچھوڑیو
 دُکھڑا بنڈان میرا آئے کدے چھپ کے دور کدے جا بیٹھو کالجا ناکپ کے
 نُجو ہو یو پیار کو تندو نہ تیں جوڑیو
 سگی میرو مُدتاں کو رہا تیں وچھوڑیو
 ریزہ ریزہ مان میرا آتھروں نہ سمیاں سچنا کے پاس چل دلا رے نکسیا
 ریت ہار میں تاں توی لہریں روڑھیو
 سگی میرو مُدتاں کو رہا تیں وچھوڑیو

گیت ۲:

رائگو پیڑھو ڈاہ رکھیو رے
 میں مریوتے ذے تجھ کے
 جیتو صدقے تیری سنجھ کے
 ایویں کُود میت کو مانو
 تجھ سنگ اوکھو پریت کو لانو
 جموں توی میریں اکھ روئیں
 کجھ دکھڑاں کی کالکھ دھوئیں
 پیار پیڑی پالوں پوسوں
 میں ہن بے وفا نہیں ہوسوں
 منگلے میاں محمد جی کے
 پیڑ پنجال کو پانی پی کے
 یاد کرے تے یاد وی آوے
 دور بے رے مان بدھاوے
 کڑک غریب سراہ رکھیو رے
 رائگو پیڑھو ڈاہ رکھیو رے
 تجھ کو ڈاڈھو چاء رکھیو رے
 نک بچ روکیو ساہ رکھیو رے
 اپنے گاٹے پھاہ رکھیو رے
 منجھ دل منجھ کو راہ رکھیو رے
 ضامن جیون شاہ رکھیو رے
 میرو ساہ بساہ رکھیو رے

گیت ۳:

اتر پہاڑو آئیے توئیے
 منوں درد سناپے توئیے
 باہو باغ قلعه نوں تکے
 توں توئیے نہ بکنو تھکے
 کون تیری لہراں نوں ڈکے
 کنڈھے تجھ کے ڈیرو لایو
 جھگو تجھ کے کول بسایو
 جموں گجر نگر بنایو
 باوا جیون شاہ کی ندیے
 ستواری کا راہ کی ندیے
 ابراہیم باوا کی ندیے
 تیرے کنڈھے میری ڈھاری
 کنوں تیری ٹھاٹھ نیاری
 فتح علی نوں جندوی پیاری
 روئیے پیڑ پرانیے توئیے
 اتر پہاڑوں آئیے توئیے

مولوی غلام رسول ڈوئی

D:\Writers
org\g.
rasool.jpg
not found.

پیدائش: 1927ء سومبرام بن وفات: مارچ 2001ء

مولوی غلام رسول ڈوئی ہوراں کو شمار گوجری لکھاڑیاں کا پہلا قافلہ ماں ہوئے۔ جہاں نے ۱۹۷۵ء میں بعد شروع ہون آلی گوجری تحریک ماں بڑھ چڑھ کے حصولیو تے اپنی گوجری شاعری نال اپنی سستی قوم نادرہونگ جگان کی کوشش کی۔ انکا بڑا بڈیرا لورن پونچھ تیں ہجرت کر کے سومبرام بن ماں آ بسیا تھا جت ۱۹۲۷ء ماں مولوی غلام رسول ہور پیدا ہویا۔ بچپن ماں معمولی تعلیم گھر ماں ہی حاصل کی تے زمینداری تے سماجی کماں ماں لگ گیا۔ ویہ دیر توڑی اپنا گراں کا سر بیچ وی رہیا تے فریہ ۱۹۸۷ء تیں بعد گرجر قیاتی مشاورتی بورڈ کا ممبر وی رہیا۔ آخر ۷۷ سال کی عمر ماں ۷ مارچ ۲۰۰۱ء نا انگی وفات ہوئی تے اُتے اپنا علاقہ سونبرماں مدفون ہیں۔

گوجری شاعری انھاں نے سروری کسانہ مرحوم کا مشورہ پر ۱۹۷۵ء تیں بعد شروع ہون آلی گوجری تحریک کے نال ہی شروع کی۔ ریڈیو کشمیر تیں نشر ہون تیں علاوہ انھاں کو گوجری کلام شیرازہ گوجری ماں وی شائع ہو تو رہیو ہے ”آس کی باس“ انگی شاعری کی پہلی کتاب تھی جہڑی ۱۹۸۰ء ماں شائع ہوئی جس ماں سی حرفی باراں مانہہ تے نظم شامل ہیں۔ اس تیں بعد ان کا دو کتابچہ ”انقلابی سوچ ۱۹۸۷ء“ تے ”شنگراں کی لو ۲۰۰۰ء“ کا ناں نال شائع ہویا تھا۔ اپنی کتاب ”آس کی باس“ کا پیش لفظ ماں ”ثبوت نامو“ کا عنوان نال اپنو تعارف ویہہ آپ اس طرح کراویں:

”گوجری میری ماں بولی ہے تے شاعری کو میر وچسکو پرانو ہے۔ منا یوہ فخر بھی ہے کہ میر و تعلق گوجر ڈوئی کا ایک علمی گھرانہ سنگ ہے۔ میر و پڑا داد میوں سلطان ڈوئی لورن پونچھ توں سومبرام بن آ بسیو تھو جہڑا اپنا بیلا کو بڑو دینی عالم تھو۔ داد میوں تاج، ولی اللہ ہو یو ہے تے باپ میوں عبدالکریم عالم فاضل خدا پرست تھو تے میر و اک بھائی مولوی سراج الدین

ڈوئی اپنا بزرگاں کاراہ پر چلن آلو اک دیندار تے مینو پڑ مینو چو ہدہری تھو (خدا اس نا بخشے)۔ میں زیادہ نہ پڑھ لکھ سکیو مگر اپنا بزرگاں کا تھاں کی پچھان جگو ضرور ہوں۔ زمینداری کروں، مھیس پالوں تے آپناں حلقہ کو سر پنچ بھی ہوں۔ پر بے سچ پچھو تاں پڑھن لکھن، کتاباں کا مطالعہ کا شوق تے گوجری شاعری کا شوق نے مناشاعری جگو ہی کر چھوڑ یو ہے۔“ کلام:

یاہ دنیا نہیں میت کسے گی، دیکھ لئی ازما کے
سمجھ اس کی چر کیری آوے کافی دھکا کھا کے

ع

عشق کی نہیں دُکان کائے، بھائیں لوڑ لیو سب جہان ماں رے
تارا بسیں نہ اس زمین اپر، قبر بنی نے کدے آسمان ماں رے
بڈی لہتی نہیں زبان اندر، جھوٹھ لہتی نہیں قران ماں رے
شاہ رگ ماں جگہ غلام اُس کی، لوڑے اللہ نا کیوں آستان ماں رے

ل

لاج رکھیے رب پاک میری، زیادہ میرے توں ہے گناہگار کہڑو
تو بہ کروں بے کرے قبول میری، زیادہ تیرے توں ہے بخشہار کہڑو
گزری عمر تے سب بیکار میری، وقت آخری دے اُدھار کہڑو
منگیے خیر غلام اس ذات کولوں، باجھ رب تیں ہو رشاہر بکار کہڑو

م

مار گئی اک گل مناں، جھڑی گزر گئی عمر بیکار میری
چیتو آ یو ہن وقت کھڑا مناں، کدے بخشے آ مناں سرکار میری
ہوئے کون دردی محرم راز میرو، جھڑو موڑ دے غمی ہار میری
آوے رمز کی سمجھ غلام اُس نا، جس نا دے سچی سرکار میری

عبدالقیوم سوز ہزاروی

پیدائش 15 جون 1930ء بالاکوٹ

عبدالقیوم سوز گوجری کا پرانا، سوہناتے قد آور شاعر ہیں۔ ویسے ۱۹۳۰ء مانھ ضلع ہزارہ کی تحصیل بالاکوٹ مانھ جناب حمید اللہ ٹھیکریہ کے گھر پیدا ہويا۔ بنیادی تعلیم عربی فارسی مانھ حاصل کی تے فرمیٹرک توں بعد ۱۹۵۵ء ماں محکمہ تعلیم مانھ اُستاد کے طور ملازمت شروع کر لئی۔ سرکاری ملازمت کے دوران ہی انھاں نے اپنی تعلیم وی جاری رکھی تے پنجاب یونیورسٹی تیں بی اے تے فر ایم اے اسلامیات تے ایم اے ایجوکیشن کی ڈگری وی حاصل کرن مانھ کامیاب ہويا۔

جدید گوجری کی شروعات مانھ سوز ہزاروی ہوراں نے وی لکھنوشروع کیوتے ان کی تحریر سروری کسانہ مرحوم کارسالہ گوجردیس تے اخبار نوائے قوم مانھ وی شائع ہوتی رہی ہیں۔ ۱۹۷۸ توں بعد ریاستی کلچرل اکیڈمی کا شیرازہ گوجری کا ابتدائی شماراں مانھ وی ان کو کلام نظم تے سی حرفی کی صورت مانھ شائع ہو تو رہیو ہے۔ پر کتابی صورت مانھ انکا کلام کی اشاعت بارے کوئے خبر نہیں لگ سکی۔ ان کی شاعری مانھ گوجری دکھ درد تے اخلاقیات کا مضمون بڑا فنی پکیبت کے نال بیان ہويا ہیں۔

کلام کا نمونا:

گیت (ماہیو):

چنا لکڑی ناچیر آ کے

سجناں کی یاد آویں..... لگیں سینہ مانھ تیر آ کے۔ (سوز ہزاروی)

سی حرفی:

ح:

حال تیں ہوئی بے حال ایسوں، سبنا عشق تیرو منا مار گیو
 منو یار کو ہن کوئے کال دسے، جہڑو لنگھ سمندروں پار گیو
 کیا اپنا سکھ قربان اُس تیں، جہڑو بھل کے قول قرار گیو
 سکھیا جگ پر سوز نصیب میرو، اس جگ مانھ جتیو ہار گیو

ف:

فکر کر کجھ سفر اپنا گوڑ چلیا یار سامان لیکے
 منزل وار تے راہ اجاڑ تیرا مشکل دسے یاہ جان پہچان لیکے
 چھوڑ مُڑیں گا یار اشنا تیرا، رہنو اُت ہے ایکی جان لیکے
 سوز جہڑاوی درد تیں دل خالی، نہیں جائیں گا کدے ایمان لیکے

بیت ۱:

دُکھ درد مانھ ہووے شریک جہڑو، سکا بھائیاں تیں وہ انسان چنگو
 اُچی کوٹھیاں محل تے منزلاں تیں، لگے اپنو بُرو مکان چنگو
 پیرس قاہرہ تے ہانگ کانگ کولوں، منا اپنو شہر ویران چنگو
 ترکستان ایران تے روم تیں بھی، لگے سوز نا دیس کاغان چنگو

بیت ۲:

کسے مُلک کا شاہ سلطان کولوں، بھنگی وطن کو اتے چمیار چنگو
 کسے دیس کا امب انگور کولوں، اپنا دیس کو ترش انار چنگو
 کسے مُلک کا باغ گلزار کولوں، اپنا دیس کا بن کو ہار چنگو
 دجلہ نیل فرات تے سندھ تیں بھی، لگے سوز کنہار لکھ وار چنگو

رانا فضل حسین راجوری

پیدائش: 3 اگست 1931ء پروڈی گجراں راجوری

رانا فضل حسین راجوری کی پیدائش راجوری کا گراں پروڈی گجراں مانہ مقدم فیض محمد ٹنچ ہوراں کے گھر ۱۳ اگست ۱۹۳۱ء مانہ ہوئی۔ میٹرک تک کی تعلیم راجوری ہائی سکول تیں مکمل کر کے اپنا ہی علاقہ مانہ تجارت کو پیشو شروع کیو پر قدرت ناشاید کجھ ہور ہی منظور تھو۔ ۱۹۴۷ء کی ملکی تقسیم کے نال ہی خاندان وی تقسیم ہواتے رانا ہور وی کئی رشتے داراں سمیت پاکستان چلے گیا پر جلدی ہی وطن کی محبت واپس چھک لیا۔ گو جرقوم کی سیاسی تے سماجی بد حالی کو احساس کرتاں نویں سراپنی تجارت تے سماجی سیاسی سرگرمی شروع کی تھیں جے ۱۹۶۵ء کو حادثہ ہووے تے رانا ہور وطنوں بے وطن ہو گیا۔ خاندان کا کئی آدمی شہید ہو گیا۔ ان گوسارو کجھ بے دردی نال کھسے گیو۔ پر گوجری زبان کو دامن ان کے ہتھوں نہ چھٹو۔ سگوں اپناں کا وچھوڑا تے بے وطنی کا غم نے اُن کی تحریراں مانہ سوز تے درد بھر چھوڑیو۔ جہڑو باقی لکھاڑیاں نالوں انھاں نامتناز کرے۔

پاکستان جاتاں ہی انھاں ناذنچ، قمر، مچور، تے صابر آفاقی جیہا گوجری لکھاڑیاں کی سنگت نصیب ہوئی تے ویہ گوجری ادب واسطے کی جان آلی شعوری کوششاں مانہ شامل ہو گیا۔ دن بدن انکا جوہر کھلتا ہی گیا۔ پاکستان مانہ گوجری ادب کی نشر و اشاعت مانہ رانا فضل ہوراں کو اہم رول ہے۔ ویہ ۱۹۶۷ء تیں ۱۹۹۰ء تک بدستور ریڈیو تراڈکھل کے ذریعے گوجری کی خدمت کرتا رہیا تے اجکل سبکدوش ہو کے گوجری کی خدمت مانہ مصروف ہیں۔

اقبال عظیم چوہدری تے رانا فضل حسین بلاشبہ بیہویں صدی کا سب توں زیادہ

کامیاب گوجری تخلیق کار ہیں۔ جہاں نے گوجری ادب کی ہر صنف مانہ خوبصورت اضافہ کیا ہیں۔ رانا نے گوجری مانہ ڈراما، آزاد نظم، غنائیاتے غزل کی جاگ اپنے ہتھیں لائی ہے۔ رانا ہوراں نے گوجری ادب مانہ نواں نواں سلاکا کڈھیا ہیں۔ جہاں نال نواں مسافراں ناخاص طور پر سوکھل ہوئے گی۔ رانا ہوراں کو کمال یوہ ہے جے انھاں نے اپنی دھرتی پر پیر رکھ کے تاراں ناہتھ لان کی کوشش کی ہے۔ تے گوجری لکھاڑیاں مانہ قلم پر چھتی مضبوط گرفت انھاں کی ہے اتنی ہو رکسے کی نہیں۔

گوجری ادب کی کائے دی صنف ہوئے گیت غزل، نظم یا نثر، رانا فضل نے ذاتی تے سماجی، دل کاتے دنیا کا درداں مانہ اچھو یا تے ٹھٹھ گوجری لفظ خوبصورتی نال پرویا ہیں۔ اُن کی منظوم تحریر تے دُنیا کے باندے ہیں پرنثر خاص کر اُن کی چھٹھیں پڑھتاں نوں لگے جس طرح انسان پوری کھا تو ہوئے۔ ہجر و چھوڑاتے دیس کی گلیاں کا نم نے نے ہی رانا کی شاعری مانہ سوز بھر یوہ۔ تے مُردُ کے پیر پنجال کا ہاڑاں نے رانا فضل نا دی گوجری ادب مانہ واہی بلندی تے عظمت بخشی ہے جہدی کشمیر مانہ پیر پنجال نا حاصل ہے۔

رانا فضل ہوراں نے بے شمار گوجری ڈراما لکھیا ہیں تے اُنکا مشہور ڈرامہ ”روشنی“ نا قومی ایوارڈ ویلیو ہے۔ اُن کی شاعری کی کتاب ”بانہمل بانہمل پانی“ اک بار ادارہ ادبیات تے دوجی بار جموں کشمیر کلچرل اکیڈمی نے شائع کی ہے۔ یاہ کتاب صنف تے مضمون کی وسعت کے نال نال معیار کا اعتبار نال دی گوجری زبان کی اک مثالی تے بہترین کتاب ہے۔ اُن کی منظوم چھٹیاں آلی کتاب ”سانجھا ڈکھڑا“ کا ناں نال چھلے ہی سال ریاستی کلچرل اکیڈمی نے شائع کی ہے۔ تے اُنکا گیتاں کی کتاب ”ماہل“ شنگراں کا گیت کے تحت شائع ہوئی ہے۔

کچھ جانکاراں نا کھوج تیں بعد اُنکی تخلیقات کی ترتیب کچھ اس طرح سامنے آئی ہے:

۱۔ نعت ۱۹۶۸ء ۲۔ رت کا نشان ۱۹۶۹ء (نثر کی پہلی کتاب)

۳۔ ہانہل ہانہل پانی (شاعری) ۴۔ لہو پھوار (شاعری)

۵۔ ساجھا ڈکھڑا (منظوم خط) ۶۔ ماہل (گیت) ۷۔ دتھ گگن پاتال کی (کہانیاں)

۸۔ پریم پتر (نثری خط) ۹۔ گوجری لوک ادب ۱۰۔ گھڑی کوچ اڈار (شاعری)

۱۱۔ مثنوی پیر پنچال ۱۲۔ گوجری ڈرامہ۔

افسوس کی گل ہے جے وقتی حالات کی مجھو ریاں تیں انھاں کی تازہ تخلیقات ہم نامیہ سر
نہیں ہو سکیں۔ اللہ جی نے ان حشر برور پاڑاں ناکدے ملن کی ٹاکی لائی تاں انھاں بارے
ہو روی متو کجھ لکھو جا سکے گو۔

اُنکا کلام کا کجھ نمونا:

نعت:

چڑھتل چناں چانن چانن، چانن لایا سارے
لاٹ سچی لو روشن روشن، روشن عرش منارے

چناں عرش کی چوٹی چڑھ کے تم نے نور کھنڈایا
چن اسمانی ٹٹ جُوے ہوئے، انگلی نال اشارے

کفر کی بند مٹھی ماں گئییں، کلمو پڑھتی بولیں
لاج غریباں کی رکھ چھوڑی رب نے صدقے تھارے

تم سنگ پارس ہوں اک پتر، گئی گئی بھریو
کرم کی نظر کرو بن سونو، لاٹ سچی لشکارے

چڑھتل چڑھتل آس کا چناں، چانن چانن کرنا
کرم کرو تم بھرم رکھو فر، فضل فقیر نہ ہارے

نظم: گجرانی:

رانگلیے دُدھ رڑک مدھانی مکھن سجر و منگے ہانی
جانتک سُنے جھلنگے لوری مغری چائی دھوئے گوری
نیلی پیڑ سواری آنی حسن چٹو کھنا کو پیڑو
بھر کے نظر تکے گو کہڑو

سچو روپ تیرو گجرانی رب نے آپے شکل بنائی
سیرت تیرے ہتھ پکڑائی رکھے رے بے داغ جوانی
نظم: لہوہو عید:

بول پیاریا عید کا چنا اوہ دکھیاریا عید کا چنا
تیں کت میر و میت چھپایو موتاں ماریا عید کا چنا
لہوہو عید خوشی تیں کر کے درد ابھاریا عید کا چنا
نظم: پیر پنجال کو چن:

یوہ چن عید شوال کو چن رے مُو آوے ہر سال کو چن رے
آکے میرا مان تروڑے درداں کا ماہنجال کو چن رے
انگلی کی اک سینی توڑے نیل گگن کا تھال کو چن رے
سب کو چن اک گلناں کو چن میر و پیر پنجال کو چن رے
فضل نہ بنیو رب ہتھوں کوئے میرا چن کے نال کو چن رے

غزل:

پیر پنجال راجوری کا پھل چن چن پوپو ہار غزل کو
خائیں آوے گو بت سوہنو گائے گھلوں ہار غزل کو

نال ادا رسیلی گاؤں، چھیڑوں گو سرتال رسیلی
مٹھرا مٹھرا بال سناؤں، جے لھے کوئے یار غزل کو

آتھرواں نے پغلی کھاہدی، عشق تے مٹھک چھپان نہ ہویا
ہومڑ ہومڑ کے سدھراہو، چارے کونٹ ہبرکار غزل کو

مہر محبت پیار کے اکھریں اک سوغات بنائی میں
ہوں جانو تھو ہاڑا ہتہ دکا یار کرے بڈیار غزل کو

عرش کا باسی کہتا سڈیا شعر فضل کا سُن سُن کے
سندر سوہنا رُوپ کو سائیں، ہو گیو تابعدار غزل کو

غزل ۲:

اوہ خبرے کس حال بسے رے اس بن ہوں رنجور اتیراں
یاد کچے برچھی مارے دل میرے ناسور اتیراں

توڑ دتو رے بے پرواہ نے پاج نہ لگے جوڑ نہ پوئے
جس شیشا مانھ دیکھ سکوں تھو، ہو گیو چکنا چور اتیراں

درد نے ترکھی کھنمر چوہی دردی اکھ پرت نہ دیکھے
دل کا زخم دکھاوے چھلے لُون برور برور اتیراں

آپ ہنڈاوے جرگا جرگا منا رکھے پرے پریڑے
ہے کس کاری سانجھ سنجھیالی ہوں ترسوں اکلور اتیراں

بے پرداہ نا بھلی ببری میری بیٹی درد کہانی
دل تیرا تیں ہو گیو اڑیا فضل نمانو دور اتیراں

غزل ۳:

پھلاں کی رت فر مڑ آئی مڑیو اپنوں یار نہ ایسوں
خوشبو چٹی چوسی دکھ نے پھلاں مانھ ہبرکار نہ ایسوں

رکھ رکھ ڈالی ڈالی دکھ دکھ مچ مچ سوگ بہاراں نا
آس کا بوٹا چھانگ کے چھوڑی چھاں کائے ٹھنڈی ٹھار نہ ایسوں
بے پروائیاں کی دنیا مانھ کون کسے کو کرے خیال
پے گیو کال وفا کو سارے ان کے نگر پیار نہ ایسوں

ہجراں کا سنگھیٹ نہ لانا سوہنیا میری ہے درخاس
مہارے پاسے آپے آئیے زندگی کو اعتبار نہ ایسوں

عشق ہوراں کے مہا بے چھے فضل ہمیش اڈیکاں مانھ
یاد کا بھانبر سرتا بلتا لگیں تترتا تار نہ ایسوں

غزل ۴:

پیر پنجال کی ٹھنڈی مٹھری چانن رات بسار نہ چھوڑوں
روح نت حاضر ناظر اُتے ہوں سوہنو سنسار نہ چھوڑوں

سندر سوہنا روپ رتاں گا حسن کا مہل گواچ گیا
پت جھڑسموں کلکھنو فر وی آس اڈیک بہار نہ چھوڑوں

جندڑی کو نذرانو دے کے لاج وفا کی رکھتو رہوں
کل جگ بھادیں چھوڑ دیوں پر اپنو سوہنو یار نہ چھوڑوں

یاد اچھی آوے مترا مرتاں جین سکھاوے
توں وی رکھیے میرو چیتو ہوں زندگانی ہار نہ چھوڑوں

گل مانھ باہ غماں کو پھندو ریت پریت نبھانی پئی
نگری نگری پھروں تپوشوں لوڑوں فضل پیار نہ چھوڑوں

غزل ۵:

غزل سلونی چھیڑ رکھی میں پیڑ پرانی سہیڑ رکھی میں
ساخھو درد خمیر کے پیڑے مٹی آپ اکھیڑ رکھی میں
صبر کا تندو توڑ تروپا دل کی سیڑ ادھیڑ رکھی میں
پھرنے مٹھوا لاڈ پھلیں گا دور ہوتاں مچ نیڑ رکھی میں
آس فضل پگرے گی اوڑک اکھت آپ ہمیر رکھی میں

غزل ۶:

نوروز کی سہمی جھڑیاں جئی دو نیناں کی بدلا روی ہے
فرگیت سنایا بلبل نے پھل اتھروں کری بہاروی ہے

جے درد کا منتر پھو کے گو دلگیر نا جھانبا دے دے کے
تاں تیری پیڑ پچھانوں گو توں بن میرے لاچاروی ہے

کیوں چیتا میرا آتا نہیں کے ہو گئی شوخی بھنا رے
کیوں پیار کا لارا لارا ماں توں آپے یار بساروی ہے

تھی کھری کھری بڈیار کی گل یا ہاں کہو یا نہ کہو
دل توڑ کدے دلدار بنے اقراروی ہے انکاروی ہے

نامید نہ ہوئے عشقا رے ہن فضل کی باری آوے گی
بے مہر بجن بٹ مہرا کے دل بسو میرو پیاروی ہے۔

گوجرا شعر:

ق بے پرواہی کا دھواں ماں
ساڑے نیلا لکھاں ہاروں
ہوں ترسوں کدے ہال نہ چکھے
دل مانھ رہ کے بکھاں ہاروں

لاج رکھی میں عشقِ ہوراں کی پالِ رواجِ وفا کا
ہوں یہ رسم نہیں مٹنِ دیسوں بھاویں میت نہ جانیں

گوریا چٹیا چاندی چنا، ڈاہڈیا باٹیا پتھرا
رٹھیاں چاننیاں کے بٹے پیس منا کے تھا یو

گٹھو پچر کو خبرے کانہ ناموت سرہانے زندو ہاں
اوہ بچنا اس موت کے ہتھوں مچ ڈاہڈو شر مندو ہاں

آپ ہنڈاوے جرگا جرگا منا رکھے پرے پرے پرے
ہے کس کاری سانجھ سنجھیا لی ہوں ترسوں اکلورا تیراں

مٹھلاں کی رت مہر مُڑ آئی، مُڑ یو اپنو یار نہ ایسوں
خوشبو چٹی چوسی دُکھ نے مٹھلاں مانھ ہرکار نہ ایسوں

لاج رکھی میں عشقِ ہوراں کی پالِ رواجِ وفا کا
ہوں یہ رسم نہیں مٹنِ دیسوں بھاویں میت نہ جانیں

گوریا چٹیا چاندی چنا، ڈاہڈیا باٹیا پتھرا
رٹھیاں چاننیاں کے بٹے پیس منا کے تھا یو

گٹھو پچر کو خبرے کانہ ناموت سرہانے زندو ہاں
اوہ بچنا اس موت کے ہتھوں مچ ڈاہڈو شر مندو ہاں

گیت ا:

میرا محرم محرم گھڑیا رے
 کدے ڈھاک کدے سرچڑھیارے
 تینا مانجوں گُوچوں دھوؤں
 خورے رکن یاداں مانھ روؤں
 بے نیند ہمیش ہوں سوؤں

کوئے یاد آوے نت اڑیارے
 میرا محرم محرم گھڑیا

تینا مار کلاوا رجوں نہ
 سر مُونڈھے چاؤں تہوں نہ
 کوئے راز تیرے تیں کجوں نہ
 کسے یاد کے آوے سڑیارے
 میرا محرم محرم گھڑیا رے

اک مٹی توں اک مٹی ہوں
 چند سانجھی اگ سڑے لوں لوں
 میری جیھ تے دل مانھ توں ہی توں
 اک عشق مدر سے پڑھیارے
 میرا محرم محرم گھڑیا رے

توں ساتھی گھڑیا تنگیاں کو
 توں میل کراوے سنگیاں کو
 توں سنگی چنگیاں چنگیاں کو
 کوئے راز تیرے من وڑیارے
 میرا محرم محرم گھڑیا رے

کائے گل امڑی کی دس گھڑیا فر پانی بھرتاں ہس گھڑیا

اُت ٹھنڈی ٹھنڈی چھاں ہوئے تھی
اُت پانی کی اک باں ہوئے تھی
اُت میری پیاری ماں ہوئے تھی
تھی نال اُسے کے چس گھڑیا
کائے گل امڑی کی دس گھڑیا

اُت بابل کی ہر چھاں چھتری
اُت لاڈ کرے تھی ماں تتری
ہوں اُتوں دور گراں اپڑی
رہی دیس پرانے بس گھڑیا،
کائے گل امڑی کی دس گھڑیا

اُت نکئی ہوتی کھیڈوں تھی
سنگ بہناں چرخو کتوں تھی
تند یار کی اڑیا سٹوں تھی
گئی عمر نکئی جئی نس گھڑیا
کائے گل امڑی کی دس گھڑیا

دو کنگن پے گیا بانہیاں مانھ
ہُن بسو پیو پرایاں مانھ
گُجھ لوکاں بے ازمایاں مانھ
مُج کھوہری بولے سس گھڑیا
کائے گل امڑی کی دس گھڑیا

اوہ سوہنا کشمیر کی مکھیے

پھلیں پھرے مکھیر کی مکھیے
اوہ سوہنا کشمیر کی مکھیے

تڑفے روح دلگیر کی مکھیے
اوہ سوہنا کشمیر کی مکھیے

بھوگے روگ سریر کی مکھیے
اوہ سوہنا کشمیر کی مکھیے

بے دوسی تفسیر کی مکھیے
اوہ سوہنا کشمیر کی مکھیے

کے پھرتی پردیسن لوڑے
پھلاں کی ہر دوڑی توڑے
سدھراں کی باساں نا سونگھے

سوہنی گدری پھل چنے کائے
خبرے تیرا گیت سنے کائے
دکھڑا درد پھلورے جھورے

مٹھا پھل پیار تپوشے
اپنو سوہنو یار تپوشے
کس بن زہر کرے زندگانی

کدے راجوری پھرے ہوئے تھی
سیل سفا سچ کرے ہوئے تھی
لمیاں قیداں ماں راہ تیرا

وزیر محمد عاصی

پیدائش 1931ء پھامڑہ ناڑ مہنڈر

وزیر محمد عاصی گوجری کا بزرگ شاعر ہیں۔ ویسے ۱۹۳۱ء مانھ پونچھ کا گراں پھامڑہ ناڑ مہنڈر مانھ اک جاگل خاندان مانھ پیدا ہويا۔ اُس زمانہ کا دستور مطابق بچیا دی تعلیم گھر مانھ ہی حاصل کی تے گھربار کو کم سمہال لیو۔ وقتی حالات تے ضرورت کے مطابق سیاسی تے سماجی خدمت وی شروع کی تے یوہ سلسلو اچھاں وی جاری ہے۔

۱۹۷۵ء کی گوجری تحریک کے نال ہی گوجری شاعری شروع کی تے گوجری مجلساں مانھ شامل ہون لگا۔ ان کو کلام ریڈیو کشمیر تیں نشر ہون تیں علاوہ شیرازہ گوجری مانھ وی شائع ہو تورا ہو ہے۔ کلام کا نمونا:

گیت:

رب میرے سنگو سنگ بچنا	تک دنیا کا یہ رنگ بچنا
اج ہو گئی مچ بے شرمی رے	گئی بھٹ دلاں کی نرمی رے
گیا ٹٹ زخماں کا انگ بچنا	تک دنیا کا یہ رنگ بچنا
کچھ تنگہیں دن گذاریں رے	کچھ خوشیاں نالت ماریں رے
کچھ گُرسی کا ہیں جنگ بچنا	تک دنیا کا یہ رنگ بچنا
کچھ جج کی خوشی منادیں رے	کچھ مویاں نادفادیں رے
پھٹیں عاصی مٹھا سنگ بچنا	تک دنیا کا یہ رنگ بچنا

باراں ماہ مسافر:

پھکن

آیو پھکن گیو سیالو، نالے ٹھنڈا تے پالو
چٹھی برہیا لے کے آیو سوہنو کرماں آلو
ہر اک بوٹو چچی کڈھے، لگیں پھل رگیلا
ہر ہر پاسے رونق لگی، نیلا پھل تے پیلا
عاصی قاصد برہیا آلو اج آیو اج آیو
دھرتی سستی جاگ اٹھی تے، بوٹاں نے رنگ لایو

چیت

آیو چیت تے چیتو آیو ہل تھو ہم نے باہنو
کمیں کاجییں خلقت لگی، کما کے دانو کھانو
لگی امید نویں کھیتی کی، موٹڈر بنوں چاپو
اپنی اپنی ڈوگیں ملیں، ہر کونے کھیت ماں آیو
عاصی بھائی ہالی بیچارو جان سکا کے ساری
اس راہ چنگا عمل کماناں، آخر آئیں کاری

بساکھ

آیو بساکھ بہار خوشی کی، جیتاں کا ہیں میلا
سوہنی رت بساکھی آئی، تلا ہويا نیلا
کگو بولیں پکھنو بولیں، سوہنا اواز رسیلا
بلبل باغ ماں بولیں سوہنی، بھور بھیرین رگیلا
گوچر سارا ڈھوکیں چلیا، خالی چھوڑ کے بہڑو
پانی پیئیں ٹھنڈا عاصی گھر ماں رہ ہن کہڑو

چودھری غلام احمد رضا

پیدائش 1932ء دھنور راجوری

وفات: 1977ء میرپور

غلام احمد رضا (مرحوم) ناڈنیا پاکستانی مقبوضہ کشمیر کا سابقہ وزیر تعلیم کے طور پر جانیے۔ چوہدری سر بلند خان (اکھنور) تھے چوہدری دیوان علی (راجوری) کا خاندان کو یوہ سپٹ 1932ء مانہ دھنور راجوری مانہ پیدا ہوؤ۔ تعلیم کے دوران ہی ملک تے قوم کی تقسیم مانہ سارا خاندان سمیت رضا صاحب وی میرپور (پاکستان) چلا گیا تے چوہدری محمد شریف طارق کی سنگت نال سیاست مانہ شامل ہو گیا۔ کافی عرصہ وزیر تعلیم کے طور پر عوام تے قوم کی خدمت توں بعد 1977ء مانہ اُن کی وفات ہو گئی۔

غلام احمد رضا صاحب مانہ قوم تے زبان کو جذبہ وحدہ درجہ تھو۔ ملک کی تقسیم تیں بعد گوجری زبان کی ترقی واسطے کی جان آلی ہر کوشش مانہ ویہ ہمیشاں موہرے رہیا ہیں۔ جس کو اعتراف ذبح راجوری، قمر راجوری تے صابر آفاقی ہو راں نے اپنی اپنی تحریراں مانہ کھل کے کیو ہے۔ خاص طور پر تراڑ کھل تے مظفر آباد کا ریڈیو سٹیشناں تیں گوجری نشریات شروع کروان تے گوجری ادبی بورڈ جیہا ادارا قائم کروان مانہ ان کو اہم تے بنیادی رول رہیو ہے۔ پاکستان مانہ گوجری ادب کی تاریخ مانہ ان اداراں کو کم کسے تیں او بلے نہیں۔

ان قربانیاں کے باوجود گوجری ادب مانہ رضا مرحوم کی اصل پچھان پہلانتر نگار کی حیثیت نال ہے۔ اُنھاں نے 1962ء کے قریب گوجری ڈرامو ”مہاروپہر“ لکھ کے اُس ویلے کا گوجرا سماج کی عکاسی تے اصلاح کی چہڑی کوشش کی تھی واہ گوجری ادب مانہ پہلی نشری تحریر کے طور ہمیشاں واسطے محفوظ ہو گئی۔ اس ڈراما کا کجھ اکھلا 1965ء مانہ گوجر دیس مانہ شائع ہو یا تھا۔ پورو ڈرامو پاکستان کا ریڈیو سٹیشناں تیں نشر ہون تیں علاوہ کئی جگہ سٹیج پروڈی فنکاراں نے پیش کیو تھو جہو عوام نے سچ پسند کیو۔ اس ڈراما کا مزاجیہ مکالمہ جدید گوجری ادب مانہ طنز و مزاح کی وی بنیاد مینا جائیں۔

D:\Writers
org\nazir.jpg
not found.

چودھری نذیر احمد نذیر

پیدائش 1933ء بندش گریز (کشمیر) وفات 2003ء دھرمسال کالا کوٹ

گوجری کا منیا پڑنیا مذاحیہ شاعر چودھری نذیر احمد نذیر کالا کوٹ راجوری کا رہن آلا تھا۔ ان کو تعلق گوجراں کا خانہ بدوش بکروالاں کا سوا تھی سرخیلی قبیلہ نال تھو۔ پر بعد مانھ اپنوا بانی پیشو چھوڑ کے بسنیک ہو گیا تھا۔ ان کو جنم قبیلہ کارواستی سفر کے دوران تسلیل گریز کا علاقہ بندش ماں ۱۹۳۳ء مانھ چودھری شمس دین کے گھر ہوؤ۔ ماں باپ کی ایکی اولاد ہون کی وجہ تیں بچپن لاڑ پیار مانھ گذار یوتے پنجنی تک کی تعلیم وی حاصل کی۔ خانہ بدوش زندگی کا سارا پہلو انھان نے بڑائیڑے تیں اکھیں دیکھیا، جن کا چھاملاتے جنکی اصلاح کا جتن ان کلام مانھ وی نظر آویں۔

نذیر احمد نذیر جوانی مانھ بابا نظام الدین لاروی ہوراں کی علمی تے ادبی مجلساں تیں مستفید ہو یا حجت سائیں قادر بخش، خدا بخش زار، اسرائیل اثر تے اقبال عظیم جیہا گوجری شاعر موجود ہوئیں تھا۔ شاعری کو زحمان شروع تیں تھو۔ پہلاں پنجابی مانھ گھسی حرنی وغیرہ لکھیں تے فر جدید گوجری کی تحریک نال جو کے گوجری لکھنی شروع کی۔ کجھ عرصہ اخلص کرتا رہیا تے فر نذیر ہی شاعری مانھ وی لکھن گیا۔ کلچرل اکیڈمی کا اکثر مشاعران مانھ شال رہیں تھا۔ ان کی شاعری گوجر دیس تے شیرازہ گوجری تیں علاوہ ریڈیو تیں وی نشر ہوتی رہی ہے۔ بڑی جاندار تے معیاری شاعری ہے۔

نذیر کالا کوٹی ہوراں نے گوجری مانھ چنگی سوئی غزل تے سنجیدہ نظم وی لکھی ہیں لیکن گوجری ادب مانھ ان کی اصل پہچان ان کی مذاحیہ شاعری ہے۔ ویہ جدید دور کا سب توں کامیاب مذاحیہ شاعر ہیں۔ بلکن سادالفظان مانھ جھی گل کہن کا اعتبار نال ویہ جدید گوجری کا اکبر الہ آبادی کہیا جاسکیں۔ اپنا مذاحیہ کلام نال انھان نے سماج مانھ ظلم زیادتی کرن آلاں پر گُوڑھو طنز وی کیوتے نال ہی لاعلمی تے سماجی بُرائیاں نا جڑوں کڈھن واسطے اثر دار پیغام وی

دُتو۔ اُن کی اصلاحی تے مذاہبہ شاعری عوام مانھ اتنی مقبول ہوئی جے لوک شہر گرائیں تے ڈھوکیں، بھکیں آپ مہارا اُن کی شاعری کو لطف لیتا رہیں۔ بھادیں وہبہ مذاہبہ تے عوامی شاعر سمجھیا جائیں پر سی حرفی کی صورت مانھ انھان کی سنجیدہ شاعری کسے تیں گھٹ نہیں۔ انھان کا کلام کو مجموعاً سے سال کلچرل اکیڈمی تیں شائع ہو جان کی امید ہے۔ جسکی تحقیق، تالیف تے ترتیب تے کتابت کی ذمیداری مشہور گوجری لکھاڑی حسن پرواز ہوراں نے خوب نبھائی ہے۔

نذیر احمد نذیر ملی بیماری تیں بعد ۱۱ اگست ۲۰۰۳ء نا اس دُنیا توں رخصت ہو گیا لیکن گوجری لکھن پڑھن تے جان آلاں واسطے مذاہبہ شاعری کو جہڑو تحفو چھوڑ گیا ہیں اُس مانھ صدیاں تک زندہ رہن کی صلاحیت ہے۔ کلام کا نمونہ:

نعت شریف:

نبی کا روزہ کی جالی کو صدقو	سؤنی شان نزالی کو صدقو
محبیٰ ﷺ کی کملی کالی کو صدقو	ہوں وی فیض پاتو آ
جے پاک مدینے جا تو آ	رو رو حال سنا تو آ
ہوں جاؤں مکہ مدینہ نا	میرا روشن کر دے سینہ نا
جے پاک مدینے جا تو آ	با مقصد کر دے جینا نا
اس جند دُکھاں کی ماری نا	تے کل گناہ بخشا تو آ
اس پاک دیدار کی عرضی نا	رو رو درد سنا تو آ
	میری سُن لے گریہ زاری نا
	کر دور میری غم خواری نا
	سُو یا محبیٰ ﷺ عرضی نا
	کرو پوری دل کی مرضی نا

غزل

گیو چھوڑ پر دیس مانھ منا آ دلدارا کدے کدے
یاد آویں تے خوشی نہیں رہتی یار پیارا کدے کدے

تھک گئی یاہ جان بچاری پھر پھر کے ان گلیاں مانھ
جن گلیاں مانھ ہوئیں ہوئیں تھا تھارا نظارا کدے کدے

بولیں تے کئی طعنا جھلیا، جھلیا بول شریکاں گا
دکھاں مانھ کئی رات گذاریں ہو یا سویرا کدے کدے

اُجڑ گیو وہ میلو ربا گئی بہار بیساکھی وی
کنگا گئی واہ جیہنگ وصل کی کھاں تھا لارا کدے کدے

اجکل سنیو تھارے پاسے گا بک پھریں گل لالاں کا
مہارے دیس وی آویں ہوئیں تھا وہ بنجارا کدے کدے

سی حرفی:

آ انگا دیکھ نبض میری، سارو لوک ہی تیری سدا دسے
علی جان نا پچھو کے کھاؤں وہ تے دید مفید غذا دسے
فرڈا کٹر نصیر نے بانہہ دیکھی وہ تے سروں ہی وصل شفا دسے
بھلا دس نذیر ہن جاؤں کنگا، ڈاکٹر شنگلو بھی یا، ہی دوا دسے

الف:

اڈ کا گا کبے اڈیئے نہ، سچے اڈ جے پچھڑیا یار آویں
نالے مٹھی زبان تیں بول کا گھب بول جے جھب دلدار آویں
کبے رہو توں بولتو اچ توڑی، سچے بولتاں کیوں نخر اہار آویں
خبرے سچن نا یاد نذیر آہو، توئیں نچھ منا ٹھنڈی ٹھار آویں

الف:

الف:

آ توں صلاح سلوک کر لے نہیں تے کوٹ مانھ تیر و چلان ہوئے گو
ہائی کورٹ وی تیرے تیں او پروہے تیر و دردی اُت کون انسان ہوئے گو
نہیں باجھ وکیل اپیل چلسیں، اڑیا دس توں کیڈ حیران ہوئے گو
منصف سچی سرکار نذیر ہوئے گی اُت فیصلو رڑہے میدان ہوئے گو

ج:

جا رے قاصدا خط لے جا میرا یار کے وچ دربار جاییے
تیرا راہ مانھ چن کو خاص ڈیرو میری طرفوں یاہ عرض گزار جاییے
کہنیے بیڑی گرداب مانھ ڈول گئی ہے، چنچو وصل کو مار کے تار جاییے
نتاں واسطو رب غفور کو ہے، پھیر و دیس نذیر کے مار جاییے

د:

دیس پردیسا مار پھیر و گھڑی گھڑی گذرے بے قراریاں مانھ
گن گن دن تے رات بسا چھوڑوں چناں تیریاں انتظاریاں مانھ
دتھ پے گئی زمیں آسمان جیڈی، کیوں مہر محبتاں تھاریاں مانھ
ہوئی رحم کی نظر نذیر کیوں نہیں میری عمر گذری متاں زاریاں مانھ

د:

درد جانے میر و کون ڈھولا رازدار نالے محرم حال توں تھو
تیرے نال امید تھی واسطہ سارا جگ مانھ ہم خیال توں تھو
اجکل ایڈخورے لا پرواہی کیوں ہے، صبح شام پہلاں نالو نال توں تھو
گن گن دکھ نذیر سناؤں کس نادکھاں درداں کو اک پیہال توں تھو

س:

سب کچھ گھول گھما چھوڑیو، پلے رہ گئی گل ہن چار باقی
اک تے ملن کی رہی اڈیک پلے دو بے رہ گئی رون کی کار باقی
تیجے رہ گیا داغ جدائیاں کا چوتھے رہ گئی انتظار باقی
میرو جین نذیر دشوار ہوؤ میرا مرن مانھ کے ادھار باقی

ش:

شہرتوں جا کے ہو یو شہری، کیوں پہاڑ کی یاد بسار چھوڑیں
اچھو میں وی ہجر کی رات لمیں تتاں کر کر یاد گزار چھوڑیں
بوہا کر کے بند محبتاں کا تاکی وصل کی کیوں تیں مار چھوڑیں
لکھاں کاگ نذیر اڈار بیٹھی، بلکہ کاگنی کہیں اڈار چھوڑیں

ک:

کے دسوں دردی کون میرو، سنے کون فریاد تے غم ڈھولا
انگا خوشیں تے عیش بہار تیراں انگا رون گران کو کم ڈھولا
ہجر درد وچھوڑا نے رت پوسی خالی رہ گیو ہے سکو چم ڈھولا
اچر کدے نذیر بسارسوں نہیں، چچر میرا وجود مانھ دم ڈھولا

ک:

کتیو تمیو گیو میرو سوتر گھٹ گیو تول میزان بچوں
نالے جرک گئی ماہل محبتاں کی صرف دو پھرائیاں لان بچوں
الغرض بے تیری اڈیک اندر بھاویں روح وی چلے گو جان بچوں
محشر تیک نذیر بسارسوں نہیں تیرا نام کو ورد زبان بچوں

طنز مزاح:

بچو جد پر انمیری پاس ہو یو فوراً ٹرت سکول چھڑا دتو
 پنڈ ماں بڑو کوئے چوہدری ہوئے جہڑو، ماچھی اس کے سنگ لا دتو
 اگے چکھے جا تکیو ساک ناٹو، چھوٹی عمر ماں پوت بیاہ دتو
 کئی عمر ساری گھر دامادگی ماں، ہتھیں چوہدری نا لکھ کے چا دتو
 ہتھیں لکھ جد باپ نے آپ دتو اس نا فر سکول پڑھائے کہڑو
 کہڑے طور زمانہ کو دور چلے، تیناں دس توں دھونگ جگائے کہڑو
 تیناں اپنا گھر ماں چھوڑ سوں نہیں بچیا کدے سکول ماں جائے گو توں
 اے بی سی کا حرفاں نا پڑھ کے تے بچیا اپنو آپ گمائے گو توں
 نمبر دار نا جناں کی لوڑ ڈا ہڈی، بہتر اس کی مھیس چرائے گو توں
 بچھلی مارے گوٹھنڈیاں مرگاں ماں، نالے ٹو کریں رج کے چائے گو توں
 روزی رہو کھا تو مھارو باپ دادو، ایویں کالجیں مغز کھپائے کہڑو
 کہڑے طور زمانہ کو دور چلے، تیناں دس توں دھونگ جگائے کہڑو
 بچیا عمر ساری کسے نے کد رہنو میری چار وصیت بھلائیے نہ
 دیکھئے تناں ماسٹر کتے ٹھگ لیں گا اک تے نیڑے سکول کے جائے نہ
 دو بے مقدم نانہ ناراض کریئے، تیجے پیٹ پتلون پھسائیے نہ
 چوتھی چیز کو ناں نہیں یاد مرنو اپر گل ماں واہ لٹکائیے نہ
 یوہ حال جس قوم کو ہوئے اس نا فر دس نذیر اٹھائے کہڑو
 کہڑے طور زمانہ کو دور چلے، تیناں دس توں دھونگ جگائے کہڑو

D:\Writers
org\sabir
afaqi.jpg not
found.

ڈاکٹر صابر آفاقی

پیدائش: 1933ء گواہڑی مظفر آباد

جدید گوجری ادب کا عظیم ہمدرد تے محسن، محقق، نقاد، ادیب تے شاعر چوہدری احمد دین پھامڑہ نا ادبی دنیا ڈاکٹر صابر آفاقی کا ناں نال جانے۔ پہلاں صابر تخلص کیوتے فر سوچ کے نال نال ناں مانھ وی آفاقی شامل ہوگیو۔ ویہ ۱۹۳۳ء مانھ مظفر آباد کا گواہڑی گراں مانھ پیدا ہویا۔ اُنکا والد مولانا علی محمد پھامڑہ بڑا علمی آدمی تھاتے انھان نے یاہ وراثت اپنی اولاد کے حوالے کرن کو پور حق ادا کیو۔ بُنیادی تعلیم تیں بعد انھان نے صابر آفاقی ہو راجی تعلیم واسطے پنجاب ٹور چھوڑیا تھاپراس خواب نا پورا ہوتاں دیکھن تیں پہلاں ہی اکھ مہچ لیں۔ صابر ہو راجراماحول کا ساراں دکھاں درداں کی پنڈو کلی لیکے ہمیشاں دنیا کے نال قدم ملا کے چلتا رہیا ہیں۔ بُنیادی عربی فارسی تعلیم توں بعد انھان نے ۱۹۵۲ء مانھ محکمہ تعلیم مانھ عربی کا اُستاد کے طور ملازمت شروع کی۔ صابر آفاقی ہو رانے علم کی وصیت کی پوری لاج رکھی تے تمام مشکلات کے باوجود تعلیم کو سلسلوئٹن نہیں وٹو۔ انھان نے ۱۹۵۶ء مانھ ایف اے ۱۹۶۰ء مانھ بی اے ۱۹۶۲ء مانھ تے فر ۱۹۶۵ء توڑی اُردو تے فارسی مانھ ایم اے کر لئی تھی۔ ۱۹۶۷ء مانھ ویہ مظفر آباد مانھ کالج کا لیکچرار مقرر ہو یا تے اگلے ہی سال فارسی مانھ پی ایچ ڈی واسطے ایران چلا گیا۔ جہڑی انھان نے راج ترنگنی کا فارسی ترجمہ کا موضوع پر ۱۹۷۲ء مانھ مکمل کی۔ واپسی پر مدت توڑی کالج پروفیسر کے طور ذمہ داری نبھائی تے اس عرصہ مانھ انھان ناملازمت کا ویہ سارا عذاب بھوگنا پیا جہڑا اک سنجیدہ، مخلص تے خوددار انسان کو مقدر ہوئیں تے نوں انھان نے آخر نوکری اپنا گل تیں پائی لیر ہاروں لاه سٹی تے آپ تن من نال گوجری ادب کا ہو کے رہ گیا۔

خالص گوجرا ماحول کی وجہ تیں گوجری زبان نال شروع تیں ہی پیارتھو۔ گوجری شاعری کی شروعات ۱۹۵۴ء مانھ کی تے یوہ سلسلو بلیں بلیں جاری رہیو۔ ۱۹۶۵ء مانھ گوجری کا دیگر لکھاڑیاں کی ہجرت نال اُنکے اندر کو گوجری فنکار ہور تکڑو ہو گیو۔ انھاں ذبیح، مہجور، قمر تے مہجور ہوراں جیہا ستلیاں نال رل کے گوجری کی نشر و اشاعت واسطے پر خلوص کوشش کیں، ریڈیو توں گوجری پروگرام شروع کروایا تے اشاعت واسطے ادارہ ادبیات تے گوجری ادبی بورڈ قائم کیا۔ اس دور مانھ گوجری لکھن کی شعوری کوشش کرن آلاں مانھ صابر آفاقی پہلی صف مانھ تھا تے ان کو یوہ جذبوتے خلوص ایران مانھ جا کے وی ٹھنڈو نہیں ہو یو، ویہ اُت وی گوجری شاعری کرتا رہیا۔

صابر آفاقی ہوراں کی گوجری شاعری مانھ، سی حرفی، غزل، رباعی تے نظم توں علاوہ مسدس حالی کو گوجری ترجمہ وی شامل ہے۔ صابر آفاقی پوری دُنیا خاص کر اسلامی دنیا نا اک وجود تصور کریں تے اُن کی زبان تے انکا دکھاں درداں ناسانجھا سمجھیں۔ اُن کی یاہی آفاقی سوچ ان کی تحریراں مانھ وی جھلک دے۔ ویہ شاعری مانھ مقصد بیت کا قائل سئی لگیں تے اکثر علمی سماجی، انقلابی تے اصلاحی مضمون ان کی شاعری مانھ نمایاں ہیں۔

گوجری مانھ ان کو ۱۹۷۱ء تک کو سارو کلام ”پھل کھیلی“ کی صورت مانھ گوجری ادبی بورڈ مضر آباد نے چھاپ کے دُنیا کے باندے رکھیو تھو۔ یاہ کتاب گوجری کا ادبی حلقاں مانھ کافی مشہور ہے تے ۲۰۰۲ء مانھ اُن کی اک ہور کتاب ”کیسر کیاری“ کا ناں نال شائع ہوئی ہے۔ انھاں نے گوجری گرائمر تے گوجری لکھاڑیاں بارے وی اک کتاب ”گوجری ادب“ پنجابی زبان مانھ لکھی تھی جہڑی لکیر کے ارار لے پاسے دستیاب نہیں ہو سکی۔ تے ویہ گنتی کا اُن گوجری لکھاڑیاں مانھ سرفہرست ہیں جہاں نا اللہ تعالیٰ نے تقابلی لسانیات کا علم تیں علاوہ تخلیق، تحقیق، تنقید تے ترجمہ کی صلاحیت تے مہارت وی بخشی۔

گوجری زبان تے ادب تیں علاوہ فارسی تے اُردو کے نال نال عالمی تاریخ پوری صابر آفاقی گہری نظر رکھیں تاریخ کشمیر تے راج ترنگنی کا ترجمہ سمیت دوسری زباناں مانھ وی

اُن کی کئی تخلیقات موجود ہیں جن کی وجہ میں صابر آفاقی دو جی ہمعصر زبانوں کا ادبی حلقوں وی اک معتبر ناں ہے۔ ڈاکٹر صابر آفاقی ہوں کی تصنیفات:

- ۱۔ نجم ڈری اُردو (بہائی فرقہ بارے) ۱۹۶۳
 - ۲۔ اتھروں تے ہاڑا ۱۹۶۱
 - ۳۔ شہر تمنا ۱۹۸۰
 - ۴۔ گلہائے کشمیر ۱۹۷۴
 - ۵۔ راج تزگنی (ترجمہ) ۱۹۷۴
 - ۶۔ حسین بن منصور حلاج (فرانسسی کتاب کو اردو تے گوجری ترجمہ) ۱۹۷۵
 - ۷۔ پھل کھیلی (گوجری) ۱۹۷۶
 - ۸۔ سانجھو کھلاڑو ۱۹۸۵
 - ۹۔ پیغام انقلاب (گوجری) ۱۹۹۷
 - ۱۰۔ کیسریاری (گوجری) ۲۰۰۲
 - ۱۱۔ گوجری ادیب تے شاعر (پنجابی)
 - ۱۲۔ گوجری قواعد ۱۳۔ شہر تمنا (اُردو)
 - ۱۳۔ پھلیں بسریں یاد
 - ۱۴۔ تاریخ کشمیر (اُردو)
 - ۱۵۔ مسدس حالی (گوجری ترجمہ)
 - ۱۶۔ اقبال اور کشمیر (اُردو)
- کلام کا نمونہ: سی حرفی:

ص

صبر ہے ڈھال مصیبتاں کی آویں ڈکھ تے صبر نا چھوڑیئے نہ
 وعدو کیو ہے یار کے نال جھڑو مر جائیئے تے دلوں توڑیئے نہ
 آوے خوف ڈران ہزارواری، منہ یار کی یاری تیں موڑیئے نہ
 صابر سدا حبیب کے طالع ریئے گا ٹو حکم تیں کدے مروڑیئے نہ

و:

واسطو رب رسول کو ہے کر منا غمگین نا شاد کا گا
 جا کے بیس توں یار کی بلی اپر رو رو کے کر فریاد کا گا
 بچا جیئیں تیرا لمی عمر ہووے رہے آلو تیرو آباد کا گا
 آوے دوڑ کے باہر توں یار صابر کر منا نا شاد نا شاد کا گا

نعت:

دُنیا ماں ہی رونق نہیں کُجھ اُس کا نور ظہوروں
دوئے جگ لشکارا ماریں پاک نبی کا نوروں

دُور دوراڈے بسن آلا ہور بھی نیڑے دِسیں
تھارا روضہ اُپر پوچے خلقت دوروں دوروں

تھاری اگ ماں ہو لیں ہو لیں دھکھے میرو سینو
تھارا غم نے کانی لائی بیٹھو پیو جھوروں

کوہ طوروں پر جا کے کانہہ نا اگ بیگانی منگیئے
دل میرو کوہ طور ہوؤ میں کے لینو کوہ طوروں

میرے اُپر کرم ہمیشاں کرتا رہیو صدقے
بناں وی چھٹکارو لھے درداں کا ناسوروں

میرا دل کی گل کہہ گیا میاں محمد صابر
'سمجھو نور اسے دے نوروں، اس دا نور حُوروں

ذره ماں تھارا نور کو لشکار یا نبی ﷺ
تاراں ماں تھارا رُوپ کو چکاریا نبی ﷺ

مُشکل ہر ایک کم کرو آسان یا رسول ﷺ
لنگھوں ہر ایک مرحلو دشواریا نبی ﷺ

دن رات تھارا عشق کو غم میل گیو مِناں
جاتو نہیں ایک ساہ میرو بیکاریا نبی ﷺ

تھارے حضور پیش کروں عاجزی کے نال
منی تھی میں منوت یہ اشعاریا نبی ﷺ

صاّبر ہے کس شمار ماں دیوانو جے ہوؤ
عاشق ہے تھاری ذات کو سنسار یا نبی ﷺ

غزل ۱:

سینو زخمی روز ازل تیں مُنڈوں ہی دل یار غزل کو
پیار کو پھل دے سکتو نہیں تاں تیر ہی کوئے مار غزل کو

لفظ کی سچی ڈور مانھ پویا معنا کا ان ڈٹھو لعل
جے توں پھیرو گھلے ایساں، گھلوں تیتا ہار غزل کو

فن کی جڑ مانھ ٹپو ٹپو خون چوانو پوئے گو
آپے جھڑو ڈیو اُس نے بیڑو دتو تار غزل کو

موسم مٹی وچوں کڈے، رتا نیلا پیلا پھل
گرمی کی رت آئی تے فرگرم ہؤو بازار غزل کو

اگلیں ویلیں میر ہوئے تھو، جس نے گھلی جان غزل ماں
اجکل چلے آفاقی کا سر پر کاروبار غزل کو

غزل ۲:

اک جذبولے کے جلیاں مانھ	فر جوگی آوی گلیاں مانھ
ہتھ مل مل گھسیا نوں میرا	اک لیک نہ رہی تلیاں مانھ
تک تک کے دیدا ساڑ نہ توں	نہیں بارش ہوتی ملیاں مانھ
کے ڈٹھو سیانف آلی نے	جا شامل ہوئی جھلیاں مانھ
کے جینو موا ماضی نے	کے ہمت ہڈیاں گلیاں مانھ

غزل ۴:

ہوں غماں کی پنڈلے کے آیو توڑوں کے کروں
اے دلا دس عشق نا چھوڑوں نہ چھوڑوں کے کروں

لہو کی لذت ہے میرا شعراں ماں نہیں شیر کی
مغز کی دن رات ہوں اوڑھی نچوڑوں کے کروں

عشق کے مہا بے میر و دل شیر ہے بے خوف ہے
سینہ کی ہوں اے سنگیو ٹلہڑی مروڑوں کے کروں

ہوں کھلوں تاں قافلہ نکھڑے چلوں تاں تم ہٹو
تم ہی دسو سنگیو بیسوں کہ دوڑوں کے کروں

گم گیو قوماں کا بن ماں لال صابر قوم کو
بوٹا بوٹا کے تلے پھر پھر کے لوڑوں کے کروں

غزل ۵:

لنگھیا ویہ دن مہارا یارا	ہن کت ویہ لشکارا یارا
بن بھی بسیو شہر بھی ڈٹھو	دوئے جگ کوکارا یارا
چا نہیں سٹو سٹ نہیں سکتو	بھار پیا سر بھارا یارا
تیرے باجھ کرے گو کہڑو	میرا غم کا چارا یارا
کنیں دیسیں بسیو جا کے	آفاقی سردارا یارا

اُٹھیں گا ہن جواں پر ہوں نہیں ہوسوں
مڑے گو کارواں پر ہوں نہیں ہوسوں

ترس کھائے گو اوڑک اک دھیائے
یوہ ظالم آسماں پر ہوں نہیں ہوسوں

بدل جائے گو ہے امید پکی
گوہاڑی کو گراں پر ہوں نہیں ہوسوں

بنڈیں گا لوک مٹھیاں کے بدلے
میری مٹھی زباں پر ہوں نہیں ہوسوں

کوئے ہووے تھو صابر لوک کہیں گا
میرو جیئے گو ناں پر ہوں نہیں ہوسوں

ق

تیریں چھیڑیں کس نے میلیں نو نہی ٹھگاوے منا
تیرا آتاں آتاں مٹی ہو جاؤں گو سڑ کے
رو رو ہسوں، ہس ہس روؤں پاگل ہووے ایسو
جس رہیا بدل چیت کی رت مانجھ برہتورہ اڑاڑ کے

ق:

جد صورت دس کے یار گیو بھل ہوں سارو سنسار گیو
ہم جس نا بھولو سمجھاں تھا اوہ آخر ہم نا چار گیو

گوجراشعر

یوہ بھیت ہے میری خوشیاں کو مچ کھا تو نہیں غم کرتو نہیں
میرا نواں خیال نہیں قید ہوئیں اچی کرو تم ہور دیوار کا نہہ نا
نکل آوے گو کوئے انگار صابر ذری سسر نا ہور پھلور سنگی
لگیں سولی تے کالجو کھان ہوئے گھولی چھیڑ نہ ہور توں یار کی گل
کیسا کیسا ان اکھاں نے مناد تا دھوکھا دوروں کھوڑی نظر آوے تھی پرنگلی ترکئی

دین نا دے کے دُنیا لینی چنگو نہیں یوہ سو دو
سَدگاں آلی مہیس کے بدلے لوک نہیں لیتا کھنڈی

گیت:

آ دِل میرا ماں بس گھولی

دل کھسپو گلاں گلاں ماں
سٹ دتی ڈنگھا چھلاں ماں
دل لیکے جے نہیں مُردنو ہُن
تاں رُوح بھی آ کے کھس گھولی
آ دِل میرا ماں بس گھولی

کس دلس گیو پردیسی رے
کیوں ہوں مسکین ہُن ہسری رے
راہ تک تک سڑگئیں اکھ میریں
ہُن مکھردو آ کے دس گھولی
آ دِل میرا ماں بس گھولی

ہوں صدقو تیرو لگ جاؤں
اس چندڑی نا قربان کروں
اکھ رستو تیرا پیراں کو
مت میرے کولوں نس گھولی
آ دِل میرا ماں بس گھولی

یوہ رُسنو تیرو نہیں چنگو
دل کانہہ نا ساڑ کے خاک رکیو
اک واری رج کے دیکھ مِناں
اک واری کھل کے ہس گھولی
آ دِل میرا ماں بس گھولی

چودھری فیض اللہ جوشی

پیدائش 1934ء کلانی پونچھ

وفات 1995ء میرپور

فیض اللہ جوشی ہوراں نادنیواک جوشیلا تے جذباتی، سیاسی تے سماجی کارکن تے گوجری پنجابی شاعر تے ادیب کے طور جانیں۔ ویہ 1934ء ماں پونچھ کا گراں کلانی ماں چوہدری دین محمد چچی ہوراں کے گھر پیدا ہويا۔ اسویلے کا حلات کے مطابق بنیادی تعلیم نزدیکی گراں کھنیر کی اک مسیت ماں حاصل کی۔ 1942ء کی ملکی تقسیم کے نال ہی ویہ پاکستان چلا گیا تے میرپور ماں مقیم ہو گیا۔ سیاسی تے سماجی مسلاں ماں دلچسپی انھاں نا بچپن ماں ہی ہو گئی تھی تے میرپور جا کے وی انھاں نے سماجی تے سیاسی خدمات کو سلسلو جاری رکھیو۔

1965ء تیں بعد اٹھن آلی گوجری زبان تے دب کی تحریک ماں وی شامل ہويا تے پنجابی تے پہاڑی کے نال نال گوجری ماں وی جذباتی شاعری کی۔ بعد ماں صحافت آلے پاسے وی توجہ دتی تے ”لکار“ کا ناں نال اک ہفتہ وار اخبار شائع کرتا رہیا۔ آخر طویل عرصہ کی سماجی خدمات تیں بعد میرپور ماں ہی دسمبر 1995ء ماں وفات ہوئی۔

پنجابی کلام:

ط:

طرف اسمان دی نظر کر کے، آہیں ماردا ماردا تھک گیا واں
سوہنے یار پیارے دے مکھڑے توں چند وارد اواردا تھک گیا واں
چرخہ ڈاہ کے غماں دی پاپونی، تند چاڑھا چاڑھا تھک گیا واں
پئی تند نہ مول تر کلتے تے، جوشی بانہواں الاردا تھک گیا واں

غزل کا شعر:

قہر قہاروں بدل بٹھو، کانگ ندی ماں آگئی ہے
 آجڑیاں کو پتہ نہیں چلتو چٹی کالی رڑھتی جائے
 نہ وہ پھل تے نہ کھیاریں، نہ وہ مپا ماہیں کا
 بھونڈی بھونڈ کی باغاں اندر، دیکھو محفل جڑتی جائے

گیت: (۱۹۳۱ء کی تحریک آزادی کا حوالہ سنگ)

رنگ پھلو زکھاں کو
 دیلو ڈٹھو ڈکھاں کو
 تے گیو دیلو سکھاں کو
 دھرتی پے گئی تنگ
 ڈٹھو پھلاں کو وہ رنگ
 نالے کلیاں کے سنگ
 آساں کی ہی آس اڑیا
 گل امن کی راس اڑیا
 جے وعدہ کو ہے پاس اڑیا
 پھر کدے نہ ہووے جنگ
 ڈٹھو پھلاں کو وہ رنگ
 نالے کلیاں کے سنگ

ملکھی رام کشان

(ہریانہ بھارت)

گوجری کا مایہ ناز لکھاڑی، ملکھی رام کشان کو تعلق شمالی بھارت کی ریاست ہریانہ نال ہے، تمام تر کوشش کے باوجود انہاں کی زندگی کا مکمل حالات معلوم نہیں ہو سکے یا بڑی دکھ کی گل ہے پرفروی خبرے کیوں دل انہاں ناس کتاب مانھ شامل نہ کرن واسطے نہیں منتو جہڑی پہلاں اک شرط رکھی گئی تھی۔

ملکھی رام کشان گوجری ماں کا واحد سپوت ہیں جن کو تعلق بھارتی ریاست ہریانہ نال ہون کے باوجود انہاں نے جدید گوجری ادب کی چڑھت مانھ بھر پور حصولیوتے اس سلسلہ مانھ جموں کشمیر مانھ ہون آلبیر معتبر کانفرنس تے مجلس مانھ شامل ہوتا رہیا ہیں۔ ہریانہ تے بھارت کا گوجراں تیں متعلق انکا تحقیقی مضمون شیرازہ گوجری مانھ شائع ہوتا رہیا ہیں جن مانھ انکا لوک ورثہ تے لوک ادب تیں متعلق کئی تحریر موجود ہیں۔ انہاں نے گوجری مانھ گھٹ مگر معیاری تے خوبصورت شاعری وی کی ہے۔

غزل:

چنو چن کو بہاراں نے لئیو	یوہ کلو کلاپو ہزاراں نے لئیو
رہیو دشمنان توں میں چوکس بہتیرو	میرو قافلو میرا یاراں نے لئیو
منگھتا کا راکھا یا دھرماں کا آگا	ہم بھولا بھالاں نوں ساراں نے لئیو
میں ہریاں باغاں کا دیکے بھلیکھا	کئی مہریاں ظاہر داراں نے لئیو
کشان دم بھریں تھا پیاراں کا جہڑا	ان بھروسہ شمن سیواداراں نے لئیو

گیت:

پنڈ میرا کو سوہنو ناں پنڈ میرا کی سوئی چھاں
 ایکھا پیپل بوہڑاں تھلے ٹھنڈی ٹھنڈی گوہڑی چھاں پنڈ میرا کو سوہنو ناں
 گھرو ایکھا چھیل چھیلا ہمت آلا تے پھرتیلا
 دین دکھی کو ہتھ بناویں سکھیا اُن تیں گل گراں پنڈ میرا کو سوہنو ناں
 دس نواں کی کریں کمائی ہس کے جھلیں ہر کرڈائی
 ہن ہتھ اڈیں لوکاں اگے ہوئے دھپ یا ہوئے چھاں پنڈ میرا کو سوہنو ناں
 فصلیں بھریو چار چوفیرو داتو بخشے ان بہترو
 ان کی محنت کو ہے سٹو منجھ مھیں تے سوئی گاں پنڈ میرا کو سوہنو ناں
 کھیتاں ماں ہیں پورا ہالی ڈنگراں ماں ہیں پورا پالی
 جُسے بھریا گھرو ایکھا جے جے ہوئے جدھر جاں پنڈ میرا کو سوہنو ناں
 دیس کی خاطر جان ونگاریں کلا کلا دس نوں ماریں
 شترو ان تیں تھر تھر کمیں لکن جوگی لمھیں تھاں پنڈ میرا کو سوہنو ناں
 سندر سزو ایکھی چھوریں سروں کی گندل، گنے پوریں
 سیتا اتے ساوتری درگی اچو ان تیں پیکو ناں پنڈ میرا کو سوہنو ناں
 دیا رام کی اس پر ہووے بچو بچو سکھ ماں سووے
 ذات گُشان اس ذاتا دسیں جیکھو سب تیں اچو ناں پنڈ میرا کو سوہنو ناں

D:\Writers
org\ram p
khatana1.jpg
not found.

ڈاکٹر رام پرشاد کھٹانہ

پیدائش: 8 فروری 1938ء گڑگاؤں ہریانہ
گوجری زبان تے گوجر قوم تیں متعلق تحقیق کرن آلاں مانہ رام پرشاد
کھٹانہ کوناں بڑواہم ہے۔ اس کو اندازاں گل تیں وی لایو جاسکے جے
اُن کی تخلیق ”گوجر، گوجری زبان وادب“ کا حوالا سنگ اس ویلے توڑی
کوئے پنج محقق پی، ایچ، ڈی کر رہیا ہیں۔

رام پرشاد کھٹانہ 8 فروری 1938ء پنجاہ کا گڑگاؤں علاقہ مانہ پیدا
ہو یا جہڑا جکل ریاست ہریانہ مانہ شامل ہے۔ بُنیادی تعلیم اتے حاصل
کی۔ کوروشیٹر یونیورسٹی تیں جغرافیہ مانہ ایم اے کرن تیں بعد اسے شعبہ
مانہ ہمالیائی قبیلاں (Himalayan Tribes) کا موضوع نالے کے گوجری تے
گجراں تیں متعلق تحقیق کر کے ڈاکٹریٹ کی ڈگری لئی۔ اس موضوع پر
اُنھاں کو بُنیادی کم ہے جس کا حوالہ Tribal Geography تیں متعلق تمام لٹریچر
درسی کتاباں مانہ موجود ہیں۔

اُن کی اس تحقیقی کتاب ”گوجر، گوجری زبان وادب“ مانہ گوجری زبان
پروی اتنی تحقیق تے بحث موجود ہے جے لسانیات تے ادب پر کم کرن آلاں
نے وی اُنھاں تیں پوری رہنمائی تے حوالہ لیا ہیں۔ اُنھاں کی یاہ کتاب
لکھن پڑھن تے تحقیق کرن آلاں واسطے اچھاں وی Indispensible یا Must
have کو درجور رکھے۔

1970ء میں بعد ریاست جموں کشمیر مانھ گوجری کا پُر جنم تے گجراں مانھ جاگرتی لیان واسطے جھدی کوشش ہونیں اُن مانھ ویہ جوش جذبہ نال شامل ہوتا رہیا۔ اس نظریہ نال شروع مانھ کجھ گوجری شاعری وی کی جھدی گوجر دیس تے شیرازہ گوجری کا ابتدائی رسالاں مانھ شائع ہوتی رہی پران کو زیادہ دھیان تحقیق آ لے پاسے ہی رہیو۔ ویہ ایسا مخلص محقق ہیں کہ گوجری زبان تے ادب تیں علاوہ ریاستی گجراں کی بہتری واسطے اُن کی ہمدردی تے محنت کدے وی نہیں بھلائی جاسکتی۔

گوجری ادب تیں علاوہ جغرافیہ کا میدان مانھ وی انھاں کوناں بڑو احترام نال لیو جائے۔ ویہ گورنمنٹ کالج گڈگاؤں تیں جغرافیہ کا پروفیسر کی حیثیت نال ریٹائر ہوں تیں بعد اچکل بنگلور مانھ بس گیا ہیں۔

D:\Writers
rg\khadim.jp
not found.

ماسٹر خادم حسین قمر

پیدائش: 1939ء کلانی پونچھ

ماسٹر خادم حسین قمر گوجری کا ہمدرد تے تخلص لکھاڑی ہیں۔ ویہ ۱۳۔ جولائی ۱۹۳۹ء نا پونچھ کا کلانی گراں مانھ چوہدری راج محمد کسانہ کے گھر پیدا ہو یا۔ ۱۹۶۰ء مانھ دسویں کو امتحان پاس کرن سات ہی اُستاد کی حیثیت نال محکمہ تعلیم مانھ ملازم ہو گیا۔ تے پوری نوکری کرن تیں بعد اچکل سرکاری ذمے داری کی ڈگی سروں لاه کے کھلا ڈالا ہو گیا ہیں۔

گوجرا سماج مانھ غلم تے زیادتیاں کے خلاف اواز بلند کرن آلا جدید گوجری لکھاڑیاں مانھ ماسٹر خادم ہوراں کوناں موہریاں مانھ آوے۔ انھاں نے ۱۹۶۵ء تیں بعد مٹھی مٹھی شاعری شروع کی جس مانھ ریڈیو کشمیر تے کلچرل اکیڈمی مانھ گوجری شعبا کھلن کے نال تیزی تے باقاعدگی آتی گئی۔ انھاں نے زیادا سی حرفی تے نظم کی صورت مانھ انقلابی شاعری کی ہے جس پر کم تنخواہ آلا ملازماں کا جلساں کا حوالہ نال کیونزوم کو اثر سئی لگے۔ نثر مانھ ریڈیو کشمیر واسطے لکھی وی گجھ طنز تے مزاح آلی لکھتاں تیں علاوہ شیرازہ گوجری واسطے وی گجھ تحقیقی مضمون لکھیا ہیں جن مانھ چوہدری شمس دین مہجور، حاجی حسن دین حسن، چوہدری عبدالغنی تے چوہدری فضل دین مہیسی پر لکھیا و امقالات شامل ہیں۔

کلام کو نمونو:

پتو نہیں ان پہاڑاں اندر کیونکر قسمت مھاری ہے
 مچ کماواں بھکھا بھانا کھان کی قسمت تھاری ہے
 اک ہی دھرتی اُپر بیٹھا جدا جدا مقسوم ہیں مھارا
 انگا پھٹا کپڑا، لاناواں انگا باغ بہاری ہے
 خادم حسین قمر

شاہباز راجوری

پیدائش: 24 فروری 1940ء بہرٹ راجوری

غلام نبی شاہباز راجوری اُردو، کشمیری تے گوجری کا منیا پڑنیا اُستاد شاعر تے ادیب ہیں۔ ویہ ۱۹۴۰ مانہ راجوری کا علاقہ بہرٹ مانہ اک کشمیری ناک خاندان مانہ پیدا ہویا۔ بچپن توں ذہین تے حساس تھا۔ وقتی حالات تے افراتفری کے باوجود اُردو مانہ ایم اے کی ڈگری لئی تے اُستاد کے طور ساری زندگی نسلاں کی خدمت کر کے سبکدوش ہویا۔

شاہباز راجوری ہوراں کا اپنا شاگرداں کی تعداد کئی سو تک ہے جن مانہ بڑا بڑا افسر وی شامل ہیں۔ سچا پکاتے تختی اُستاد کے طور اُن کی سماج مانہ اک الگ پچھان، قدر تے اُچو مقام ہے پر ریاستی سطح پر لوک اُنھاں ناک شاعر، ادیب تے عالم کے طور پر جانیں۔ ویہ مطالعہ کا بے حد شوقی ہیں خاص کر اسلامیات تے ادبیات کا ماہر ہیں۔ کشمیری مادری زبان تھی اس گلوں وی اس مانہ اظہار فطری تھو پر ماحول کا اثر نال اُردو، گوجری تے پہاڑی مانہ وی کافی ادب تخلیق کیو ہے۔

۱۹۷۵ء توں بعد شروع ہون آلی جدید گوجری کی تحریک نال اُنھاں نے پورے تعاون کیو۔ گوجری تیں متعلق سچ سارا تحقیقی مقالہ لکھیانے گوجری مجلساں، مشاعرے تے کانفرنساں مانہ شامل ہوتا رہیا۔ ان کو کلام ریڈیو کشمیر تے شیرازہ گوجری کا ذریعہ نال لوکاں توڑی بکھو رہیو ہے۔ گوجری ادب اک لحاظ نال اُنھاں کی اک بکھری تے اُچی جا ہے۔ اُنھاں نے گوجری مانہ نعتیہ شاعری کی ہے تے ویہ غالباً گوجری کا پہلا شاعر ہیں جنھاں نے نعتیہ کلام نال گ کتابی شکل دتی ہے۔ اُن کی یاہ کتاب انشاء اللہ جلدی ہی شاہباز راجوری تے گوجری زبان کا سانجھا محبتیاں کا ہتھاں مانہ آجائے گی۔

کلام:

نعت:

اللہ اللہ مدینہ نظر آ گیو
باب جبریل جاگے سلامی ہووے
سبز گنبدنا چوں کہ جالی دھوؤں
وے خدا کا خدائی کا محبوب ہیں
اپنی جھولی مانھ عیاں سخن کچھ نہ تھو
اج شہباز نشیں گھڑیں بے رکیں
نعتیہ شعر:

دیا ہیں دل کے بہڑے عقیدت کا بالیا
آقا ہوں تاہنگ لے کے مدینے تھو پوچھو
منا تے بھاکھ نہیں تھی محبت کا شہر کی
اکھاں نے دھرت چم کے، اتھروں یہ پالیا
یاداں مانھ بیقرار ویہ منظر سمہالیا
تھاری نوازشاں نال متھا اُجالیا

غزل ۱

روتی رات کے متھے لکھیو
شہرتے سارا تزئیں کویں
منا لوڑو جاڑ بناں مانھ،
کل مکلو رہ کے سوچے
میرا دس کی گل بے ہوتی
لفظ کی صورت ات وی ات وی
سجرو پر ان دیکھ تماشو
کوئے کدے انسان وی دستو
ہوں تے اپنا آپ تیں گمیوں
اس نا لوڑے روز تماشو
پلو پاٹو ہوں کیوں لیتو
دُنیا کو شہباز تماشو

غزل ۲

بستیاں کا گیت رُٹھا فر بہاراں نا بِلَا
لُٹ گیا ہیں نہیریاں مانھ راہکاراں نا بِلَا

دیا دیو کد ہسے گو ڈیکتی یاہ رات ہے
میں بلا یو اتھرواں نا توں ککاراں نا بِلَا

وقت کا سارا سمندر ریت مانھ ہیں سو گیا
پچھ ڈنگا ہور منگیں لہو دھاراں نا بِلَا

تس اتی پتھراں کے ہتھ ہے ساری تریل
ہے کہڑو درداں کو سانجھی رازداراں نا بِلَا

گل کائے، لفظ ہے شہباز مُنہ مانھ پا گئی
کے پھرو لیں لوک سارا ڈھیر ساراں نا بِلَا

غزل ۳

ہوں وی ہسوں لکھ جلا کے	سوت سمر کے سینے لا کے
رکھوں اپنو آپ چھپا کے	بے سکھ تلا چھمر سارا
ہم کے نکلاں سیس نوا کے	اُن کی رمز انجانی ہونیں
گل مانھ پھاہی منا پا کے	ہر کوئے ہرجائی ملیو
سُتو دِن کو مان بھلا کے	میرے بھانے رات اجیں تھی

غزل ۴:

ہتا سکھر رُنے بدل کس کے ناں
بکتو دریا ڈاڈی ہلچل کس کے ناں

گاتی وائے بہلی چلیے دسیے راہ
سجری سانوی لٹکے منزل کس کے ناں

آتا رہین گا ویل کویلے ان سدیا مہمان
جندے سب کچھ خواب کوچھل بل کس کے ناں

شیشو دیکھ کے ہوں بھی ڈریو ادھی رات
دیکھ پچھان ہے اپنی مشکل کس کے ناں

نگو نیزو بچا تارے بھولی سوچ
ٹھر کے ڈھٹھات ات پاگل کس کے ناں

ق:

نواشیں میرے بوہے پکھنو اڈارے
کہڑو آکے خواباں کا لتا اتارے
واہ سجری سویلی بناں کی جوانی
یوہ شہراں کا زہراں نا کہڑو ہلارے

اقبال عظیم چودھری

پیدائش: وانگت 1940ء

باباجی صاحب لاروی کا دوہتر اے میاں محمد اکبر بجران ہوراں کا فرزند میاں محمد اقبال نادبی دنیا اقبال عظیم کا نال نال جانے۔ اُن کی پیدائش بابانگری وانگت مانہ ہوئی تے اُتے ہی پیدادی تعلیم حاصل کی۔ علم تے ادب اُن کی چار چو فیری کھلر یو ووتھو۔ اس گلوں ویہ وی متاثر ہونو نہیں رہ سکیا۔ پر نال ہی گوجر اماحول کی تنگدستی، سماجی نا انصافی تے سیاسی حالات وی اس جذباتی نوجوان نابرداشت نہیں وہیں تھا۔ تے یوں مدت توڑی اُنکے اندر چھپیا وا اک درد مند شاعر تے سیاسی جن کے بشکار جنگ ہوتی رہی پر آخر کار معجزاتی طور پور اس شاعر نے سیاسی جن قانو کر لیوتے اس طرح گوجری زبان نا اس سپوت کی خدمات میسر آ گئیں جس پر بلاشبہ گجری ماں صدیاں تک مان کرے گی۔

بابانگری وانگت مانہ مقیم ہون نال اُنھاں نال لاروی دربار مانہ ہون آلی اکثر علمی تے ادبی محفلاں مانہ بابا نظام الدین لاروی، سائیں قادر بخش، خدا بخش زار، اسرائیل آرتے پنجابی کا کئی بلند پایہ شاعراں کی صحبت وی نصیب ہوئی تے حاجی جنید نظامی جیہا عالم کی داد تے رہنمائی وی۔ اس طرح بابا نظام الدین لاروی ہوراں کے ہتھیں لگی وی یوئی آج دیکھ دیکھتاں گوجری ادب کی سب توں گھونھری، سدا بہار تے معتبر شخصیت بن گئی وی ہے۔

اقبال عظیم ناوی زمانہ کی ویہ بے دردیں تے بے رحمیں جھلنی پینیں چھڑی اس دور کا

گجراں کو مقدر تھیں یا ہیں۔ اس نے زندگی قریب توں دیکھی تے دل مانھ اضطرابی کیفیت رکھن آلو یوہ بظاہر پُرسکون شخص بھادیں دُنیا ناپنا دل مانھ اوکڑ کے نہیں دیکھن دیتو پر قلم تیں وہ اپنا راز تے جذبات نہ چھپاسکیو۔ اُس نے اپنی شاعری مانھ جو کجھ لکھیو سچ لکھیو تے سچ تیں سوا کجھ نہیں لکھیو۔ یوہ درد مند تے آزاد طبیعت شہزادو پہلی بار ۱۹۶۹ء مانھ ریڈیو کشمیر سرینگر کی زنجیراں مانھ پاپند ہوگیو۔ اُسویے گوجری زبان کی نشری خدمات واسطے انھاں تیں بہتر شخص کوئے تھووی نہیں پر نسیم پونجھی کے سنگ سال کھنڈ گوجری نشریات چلان توں بعد ریڈیو کو بہرہ و چھوڑ دتو۔ ور ات کی ادبی سنگتاں کی تاثیر دل کی تختی توں نہ ملین ہوئی۔ کجھ عرصو ”گوجری دیس“ جموں کی اشاعت کے ذریعے گوجری کی خدمت کرتا رہیا۔ آخر جد ۱۹۷۵ء مانھ کلچرل اکیڈمی مانھ گوجری شعبو کھلو تاں اک بار فر زمانہ کی ادب شناس نظر اقبال عظیم تے نسیم پونجھی پر پیس۔ تہ توں بیہ بائی سال توڑی متواتر گوجری کی خدمت کر کے یہ دوئے شخصیت اتوں ہی سبکدوش ہو گئیں تے اجکل گھریار کی ذمے داریاں کے نال نال ادب کی خدمت وی جاری ہے۔

کلچرل اکیڈمی کی طرفوں شائع ہون آلی ہر اشاعت اُن کی کارکردگی کی ترجمان ہے۔ گوجری ادب تے لوک ادب کی شیرازہ بندی ماں انھاں کو اہم رول رہیو ہے۔ پر خاص کر گوجری ڈکشنری، تے بانھل بانھل (رانافضل) نغمہ کہسار (مہجور راجووی) کلام اثر (اسرائیل اثر)، مدینی قافلوتے خیام کی ربائیں (ترجمہ: نسیم پونجھی) تے گوجری ادب کی سنہری تاریخ (ڈاکٹر رفیق انجم) جیہی کتاباں کی اشاعت اُن کی عظمت تے ادب شناسی کی گواہ ہیں۔

اقبال عظیم ناگوجری ادب توں علاوہ اسلامیات، تصوف تے عالمی ادب پر وی عبور حاصل ہے جہڑو ہر کسے کابس کو کم نہیں ہوتو۔ ویہ گوجری توں علاوہ اُردو تے پنجابی کاوی اُچاقد

کا شاعر ہیں تے کدے گوجری آلے پاسے نہ لگا ہوتا تاں بلاشبہ اُردو کا بین الاقوامی معیار تے شہرت کا شاعر ہوتا۔ اُن کی گوجری شاعری کی پہلی کتاب ”رتجھ کولیں“ کا ناں نال شائع ہوئی تھی جس نا کیڑی کی طرفوں بہترین کتاب کو اعزاز حاصل ہے۔ تے اجکل ویہ گوجری تے پنجابی شاعری کی دونوں کتاباں کی ترتیب مانھ مصروف ہیں۔ گوجری کہانی تے افساناں کی کتاب شائع ہون مانھ ضرورت توں زیادہ دیر لگی ہے پر امید ہے جے یاہ کتاب آجان نال نوں لکھاڑیاں کی رہنمائی کے نال نال تنقید کرن آلاں کی زبان وی بند ہوئے گی۔

گوجری زبان مانھ اقبال عظیم نے ہر صنف مانھ معیاری تے مثالی تخلیقات پیش کی ہیں۔ نثر مانھ اُن کی علامتی کہانیاں تے ناولٹ ’توں آوی جائے دم ہی نہ آئے تے کے کروں‘ گوجری ادب مانھ اہم اضافو ہیں جد کہ شاعری مانھ گیت، غزل، نظم تے نعت سب کجھ لکھو ہے پر گوجری غزل اقبال عظیم کی پچھان بن گئی ہے تے عظیم گوجری غزل کی پچھان۔ بیہویں صدی کی گوجری غزل مانھ اقبال عظیم کا قد کو کوئے دوجو شاعر نہیں تے اُن کی غزلاں کورنگ گیتاں تے نظماں مانھ وی ڈیو ووسی لگے۔ اقبال عظیم کا تحقیقی مضمون وی اپنا اپنا موضوع پر حرف آخر کو درجور کھیں تے نوں تحقیق کرن آلاں کی رہنمائی کو کم کریں۔

اس خوب صورت گوجرا جوان کی بارعب شخصیت، طبیعت کی نرمی تے خلوص ہر اک ملن گلن آلا نا پہلی ملاقات مانھ ہی اپنی عظمت کو احساس دوا چھوڑے۔ میں بھاویں زندگی کا کئی سال ضائع کیا و ہیں پر اقبال عظیم کی سنگت مانھ گذاری وی ساعتاں پر بڈیا کرن کو حق بجا سمجھوں۔ رانا فضل راجوروی تے اقبال عظیم بلاشبہ گوجری زبان واسطے بیہویں صدی کو اک عظیم تحفو ہیں۔ ع : خُدا کرے کہ یہ پودا ہرا ہرا ہی لگے۔

نعت پاک:

وہ سچو سچیار اسے کا وہ اُچو اُچیا نئیں اُس کیس
سچ کی مہار ہے ہتھ اُسے کے وہ سچو سچیا نئیں اُس کیس

شہر علم کا اک امی کے ہتھوں بسیا روشن روشن
وہ عالم وہ عاقل شاعر جس نے گوریں گائیں اُس کیس

ویہی رب کا سچا عاشق، ویہ اُسکی مخلوق کا خادم
ویہ دانا ہیں جہڑا برتیں حرف حرف دانا نئیں اُس کیس

نام محمد ﷺ لکھتو ریئے، پڑھتو ریئے، روتو ریئے
اُس تیں سب کچھ گھول گھمایئے تم لئیے دُرسا ہیں اُس کیس

درویشی سر صدقو اُسکو اُسکا سر کی خیر ولایت
کھیٹی دل کی سادی رکھیں جہڑیں اکھتسائیں اُس کیس

نظم: سوداگر

یہ ٹٹیا وا دلاں کی آواز سُن کے یہ اتھروں پتیماں کا ہارا مانھ پُن کے
اُمیداں تے آساں کی قبراں ناکھن کے یہ سب حال دیکھے تے دل میرو جھٹکے

میرا دل کا زخماں کا وارث توں ہی دس

ہوں اتھروں نہ پتھوں تے کے لیکے پتھوں

خوشیں مہنگی مہنگی تے ارمان سستا پکیں گلکیں گلکیں یہ ایمان سستا
امیراں کی خوشیاں کا سامان سستا خریدو پکیں جسم بے جان سستا

میرا دل کا زخماں کا وارث توں ہی دس

ہوں اتھروں نہ پتھوں تے کے لیکے پتھوں

یہ لگھاں کا دشمن تے تھنداں کا پیارا غریباں کا دلاں مانھ کھٹیاوا آرا
یہ بھگیاڑ ہیں میری نظراں مانھ سارا دسیں جن نا مظلوم راہاں کا گارا

میرا دل کا زخماں کا وارث توں ہی دس

ہوں اتھروں نہ پتھوں تے کے لیکے پتھوں!

سوداگر ہوں احساس کی بستیاں کو ہوں گاہک بھی نہیں عزتاں سستیاں کو
تے نوکر بھی نہیں بے وفا ہستیاں کو ہا ہی گل ہے ملوم بھی ہوں مستیاں کو

میرا دل کا زخماں کا وارث توں ہی دس

ہوں اتھروں نہ پتھوں تے کے لیکے پتھوں!

غزل ۱:

لکھیں لکھیں رات بھر کیں پھر کا سنجھ سمیلا
یاد کسے کیں آس کسے کیں، کیوں اج موڑ مہار گئیں

کچھیں تندیں لمیں لاریں، چکنا چور جوانی
میریں آس کوراس کو چھیں، حتی بازی ہار گئیں

اتھروں پنو مر مر جینو اوکھت رنگ برنگیں
پر میریں اکھ بھار یہ بھارا لکھاں وار سہار گئیں
ڈاروں چھڑی ربا میرو میل محال ہمیشاں
سکن ساریں مار اڈاریں، میرو درد بسار گئیں

ہوں گھر آیا شرد کو لپو چھوڑ نہ سکیو ورنہ
مار کے جھاتی میرے یو ہے کیتی وار بہار گئیں

غزل ۲:

شرد کا جھکھو گیت ہجر کا گاوں گا	ڈھینا پتر سینے کانی لاویں گا
کیوں انہونی گل کی فر تصدیق کروں	نین سمندر ڈنگا بھیت چھپاویں گا
بستی بستی قصا جس کا بکھریں گا	بکتا دریا سوہلا اس کا گاوں گا
درد نستا ہو جائیں گا سرگی نا	شام پئی فر سجا ہو کے آویں گا
اتھروں کیوں اکھ دھوؤں دل صاف کروں	ان راہیں مت مڑ بنجارا آویں گا

غزل ۳:

تج آئے بہار ایسی فر زخم دکھا چھڑیا
 قربانی کے دیتو میں تیریاں خوشیاں تیں
 ارمان وصالاں کا تے درد جدائیاں کا
 ویریت کی ڈھیریں تھیں تیتلاں کا بگلا تھا
 انگ آیا زخماں نا تیزاب دوا دے
 غزل ۴:

تیرا خیال نے جے ہسا پوتے ہس پیو
 دل کی لگی بجھا کے نہیں جینو سواد کو
 غیرت کو روگ بن گیو غم روزگار کو
 میں گگن تے پاتال کی دُوری منی سدا
 میری دعا ہے شرد نہ آجائے دو گھڑی
 غزل ۵:

جھوٹا قول قرار نہ کریئے
 رب نا رب کر مئیے ہر دم
 آتی برہیا فر مُز آئیے
 جے نہیں لانی بازی سر کی
 نقدیں کریئے دل کو سودو
 سکھنے ہتھ پیار نہ کریئے
 اس گل مانھ بڈیار نہ کریئے
 دل نا فر پیار نہ کریئے
 سوکھو رپیے پیار نہ کریئے
 اس مانھ نیس ادھار نہ کریئے

ق:

پہر و تاراں کو بدلاتو رات کی رات میری بستی چن آجا تو رات کی رات
ست سمندر پی جائیں گائیں میرا یار نبھا میرو جگر اتو رات کی رات

ق:

نہ ہو جاؤں ملزم ہوں ناٹھکریاں کو عنایت کسے ناقضا کہتاں کہتاں
ذری دُنیا داری ناتج رل کے بیساں اتے رہ گوسب کجھ یرا ہتاں رہتاں

ق:

دھرتی تیں اُتھ میرے کولے رازاں کا سودا گر آیا
درداں کو کے چارو کرتا دھوڑ بلیبی زخم دکھایا
جا چکور نا طعنا دتا تیرو چن اک ویرانو ہے
تیرو پیاروی کوڑ ہے شاید چن کو سوچ اک افسانو ہے

ق

کوڈیاں کے مل نہیں یکسیں وفا کا شہر ماہ
یار کو نقشو دھیاناں تیں گُما بیٹھا کدے
توں شریکاں ماہ نہ ہولا کر گناہ بھارا سہی
دو گھڑی تیری گلی ماہ یار آ بیٹھا کدے

ق:

اس درد کو خبرے کے ناں ہے پر جان تیں چوکھو پیارو ہے
اک مدت گذری سینہ ماہ اک اک مٹھو مٹھو درد پلے
ویہ یار تھا آتی برھیا کا رت بدلی سارا بدل گیا
پر آس کو دیو سرگی تک ہر موسم ماہ ہر رات بلے

گوجرا شعر

ہٹی اُپر رکھن جوگی میلی شے نہیں ہوتی
نیلائی پر شہر تیرا مانھ پک جانی چند کھوئی

اتھرواں کی عام معافی ہونی تھی
ہوں قیدی پر قیدی گویا چھوڑوں تھو

منا ڈیرو تھو چاتاں تھوڑی دیر لگی
یاد رکھوں تھو آس ملن کی چھوڑوں تھو

سینہ کو داغ درد کی لذت کسے کی یاد
ہوں کے رکھوں تے کے دیوں غم کا بھیاں نا

میرا دل کی دنیا نا اوہ جھوئی لاون آلیا ربا
تیری دنیا اک دن ہوئے گی ڈھا کا ڈھیری میرے باندے

اُداس رستاں کا کینڈا پلو پکڑ کے اکثر سوال پچھیں
توں لیکو کیوں ہے ساسھی کت ہے حال دیکھیں تے حال پچھیں

سہ دُنیا آلا سودا گری تیں کدے نہیں رجیل کدے نہیں رجسیں
رھیں زلیخا کا دل کا مالک نا کھوئیں سسکیں چکا چکا کے

بھادیں فتویٰ لیکے آؤ بھادیں پھانسی چاہڑو
ہوں تے عرش عظیم کہوں گو یار اپنا کی بلیاں نا

چر تک ہوا مانھ درد کی سبیل کو بھار تھو
چپ نال اٹھ گیو کوئے اتھروں نچوڑ کے

کے دسوں ہوں جینو کے ہے خاب مانھ فُرنو کھلے ہیں کھیں
لکھیں چکلو شہر وفا مانھ فر پک جانو کوڑیں کھیں

گیت ا:

خیراں نال رب آنے میری جان مل جا
 سوٹھا دل کاتے پیار کا ایمان مل جا
 خیراں نال رب آنے میری جان مل جا
 کدے دل مانھ چھپایا وا خزانہ ڈھونڈتا
 کدے کھسیا بساریا، زمانا ڈھونڈتا
 تس اکھاں کی بجاؤں کدے آن مل جا
 خیراں نال رب آنے میری جان مل جا
 میں تے سڑیاں نصیاں کا سہاگا دیکھیا
 کدے کھسیا بساریا زمانا دیکھیا
 تس اکھاں کی بجاؤں کدے آن مل جا
 خیراں نال رب آنے میری جان مل جا
 لائی دل نا پرائی آپے اگ آن کے
 نالے پالیا خیال تیرا جند جان کے
 سانجھ سانجھ رکھوں تیرا دھیان مل جا
 خیراں نال رب آنے میری جان مل جا
 میری ترستیاں اکھاں ناتسائیں چھوڑ کے
 کت جائے گوتوں اپنی بنائیں چھوڑ کے
 رب کرے بڑی اچی تیری شان مل جا
 خیراں نال رب آنے میری جان مل جا

گیت ۲:

سوئی چال ہے موراں کی بے پرواہ چن توں میری پریت چکوراں کی
 پیا اتھروں بکتا رہیا تیں منا درد دتا، منا مٹھا مٹھا لگتا رہیا
 بگے پانی چھمراں کو رب تینا سکھیا رکھے، رونو گھل گیو عمر اں کو
 ندی پانی کی بگتی رہی رات جدائیاں کی، لمی صدیاں تیں لگتی رہی
 گل پیار نا لا بیٹھی اینویں کیویں روگ لیا، سکھ چین گما بیٹھی
 اینویں دھوم مچا چھوڑی دل تیں کھس کے تے مظلوم بنا چھوڑی

گیت ۳:

مُر چلیو تھو غم لا کے فر حال دی نہیں کچھو، بے دردا تیں آ کے
 کوٹھا پر دانا تھا چنگی بھلی چہڑی نا یہ روگ نہیں لانا تھا
 پھل کھلیو بہاراں گو آ کے تے کچھو تھو کدے حال بہاراں کو
 سکھ یاریاں لائیاں کو طعنا ستکناں کا نالے درد جدائیاں کو
 باغاں بچ پانی ہے داغ جدائیاں کو سجاں کی نشانی ہے
 چن لیاں راتاں کو اُچے چڑھ پئی دیکھوں راہ سجاں آتاں کو

D:\Writers
org\F
Mushtaq.jpg
not found.

چودھری فضل حسین مشتاق

پیدائش: 17 اپریل 1941ء کلرکٹل پونچھ

فضل مشتاق جدید گوجری ادب کا باقاعدہ تے معتبر لکھاڑی ہیں۔ ویہ ۱۹۴۱ء مانھ سُرکھوٹ کا گراں کلرکٹل مانھ اک کوئی خاندان مانھ پیدا ہويا۔ دسویں تک کی تعلیم سُرکھوٹ ہائی سکول تیں حاصل کی تے فرحکمہ تعلیم مانھ مدرس کے طور ملازمت شروع کرلئی۔ اسے دوران تعلیم وی جاری رکھی تے بعد مانھ پرائیویٹ طور پر اُردو مانھ ایم اے کی ڈگری حاصل کی۔ ملازمت مانھ ترقی کر کے ہیڈ ماسٹر بنیا تے فراسے حیثیت نال سال ۱۹۹۹ء مانھ ریٹائر ہويا۔

۱۹۷۵ء کے نیڑے تیزے شروع ہون آلی جدید گوجری کی تحریک مانھ جوش جذبہ نال شامل ہويا۔ گراں مانھ سماجی تے تعلیمی حالت نا بہتر بنان واسطے جہڑا جتن ہويا ہیں ان مانھ فضل مشتاق کی قربانی وی شامل ہیں۔ نویں نسل نا تعلیم آلے پاسے لان واسطے اُنھان نے طنز و مزاح کی صورت مانھ گجھ چنگی گوجری نظم لکھی ہیں جہڑی ریڈیو تیں نشر ہون تیں علاوہ شیرازہ گوجری مانھ وی شائع ہوتی رہی ہیں۔ گوجری ادب مانھ فضل مشتاق ہوراں کو اصل مقام اک سنجیدہ محقق تے مقالا نگاری حیثیت نال ہے۔ اُنھان نے گوجری شخصیات تے گوجری ادب بارے کئی تحقیقی مضمون لکھیا ہیں جہڑا آئیندہ ریسرچ کرن آلاں واسطے مضبوط بنیاد کی حیثیت رکھیں۔

نمونہ کلام: غزل

جتنی طاقت کا ویہ وار کرتا رہیا	تیر کھا کے زخم دل کا بھرتا رہیا
راہ کی مٹی وی چاکے ملی اکھاں پر	جاں وی ان کی گلی تیں گذرتا رہیا
دیکھ سکیونہ مجنوں کی اکھیں کوئے	گیسو لیلی کا اکثر سنورتا رہیا
کدے بھل کے نہ تکیا گناہ آہنا	شکوہ ان کی وفا کا ہی کرتا رہیا
جذبا دل مانھ دبا یا بہتیرا مگر	مسلا ارمان کا نت ابھرتا رہیا

نظم: ہمت

کئی منزل مکان یہ سڑک یہ دکان یہ
 ناز خزا شان یہ شینی تے گمان یہ
 تمہارا دم توں کے نہیں
 تم ہیں تے یہ نہیں
 قلی تم تے ہالی تم ماچھی تم تے مالی تم
 بہادر لا مثالی تم وطن کا رکھوالی تم
 اک سو پر بھارو ہے
 پر بھکھو ٹبر تھارو ہے
 مہیس منگی تے چا دتی لوئی منگی تے لاه دتی
 دولت سب لفا دتی خوب نیاز پکا دتی
 مسیں کڈھایا بھوت پچھاواں
 فر وی پیر کہ کدوں آواں
 ترک کا افغان کا ہند کا پاکستان کا
 لندن تے ایران کا زمیں تے اسمان کا
 ظلم تم سہتا رہیا
 فر وی چپ رہتا رہیا
 زندگی تھاری روتاں کنگھی پیریں پول تے گل مانھانگی
 کدے نہ نکلی تھاری تنگی سستی ایڈ نہیں ہوتی چنگی
 ہمت کر کے مارو ہلو
 تاں ہووے گو کم سبلو
 رہیا اج تک تم دبایا سب نے اپنا پھال چنڈایا
 جاگو تھارا ویلا آیا اگلا ویلا گیا گویا
 ہمت نال شباب لیاواں
 اٹھو انقلاب لیاواں

نظم: راجو کا ٹھہلا

راجو پکڑ سکول چلایو قاعدہ منگو دوجی لایو
گھر مانھ تھوڑو جیہو کم آيو راجو موڑ مہیساں پر لایو

سکولوں باپ ہناتو نہ

راجو ٹھہلا کھاتو نہ

باپ نا چسکو ددھ کو آوے پھرڑی بیچے لاری لیاوے
کی لگی تے قرضو چاوے نہ مکے تے زمیں بکاوے

اینویں چکا لاتو نہ

راجو ٹھہلا کھاتو نہ

گھر کو دولت مال مکایو نکا جیا کو بیاہ کرایو
جس دم شیرو ہوش مانھ آيو واہ چھوڑی تے ہور لیاوے

بیاہ پر مال اڈاتو نہ

راجو ٹھہلا کھاتو نہ

باپ راجو کو بڑو پکھنڈی بولیو کوائے تے چالئی ڈنڈی
نتھی عدالتاں وچ ترنڈی پئی تماشا دیکھے منڈی

دکیلاں کول لئاتو نہ

راجو ٹھہلا کھاتو نہ

گھر نہیں آٹو گھاتے اوکھر اڈ پڑ گیا راجو کا چوکھر
اج اسکو کل اسکو نوکر کھانی پئی در در کی ٹھوکر

ہتھوں وقت کھڑاتو نہ

راجو ٹھہلا کھاتو نہ

ڈاکٹر غلام حسین اظہر

پیدائش: بانیاں بھمبر (پاکستان) یکم جولائی 1941ء وفات: 2004ء بالاکوٹ
 غلام حسین اظہر ہند پاک کا ادبی حلقاں مانہ اک معتبر ناں سمجھو جائے، خاص کر
 تحقیق تے تنقید کا میدان مانہ۔ بھاریں ویہ ذاتی طور پر اردو ادب نا اپنومیدان سمجھیں پر جموں
 کشمیر کی علاقائی زبانوں نال اُن کی دل چسپی نے کشمیری، گوجری، پنجابی تے پہاڑی زبانوں
 مانہ وی اُن کی پہچان اک ہمدرد تے رہنما کے طور کر اچھوڑی ہے۔

ڈاکٹر اظہر ہور یکم جولائی 1971ء نا تحصیل بھمبر (پاکستان) کا بانیاں گراں مانہ
 چوہدری احمد خان ہوراں کے گھر پیدا ہويا۔ ویہ آپ وی بڑی علمی تے ادبی شخصیت کو درجو
 رکھیں تھا۔ اظہر ہوراں نے بنیادی تعلیم گھر مانہ ہی حاصل کی تے فر 1967ء کی افراتفری مانہ
 ہجرت کر کے گھر آلاں سمیت گجرات مانہ اباد ہو گیا تے اتے بی اے تک کی تعلیم حاصل کی۔
 1963ء مانہ اور نخل کالج لاہور توں اردو مانہ ایم اے کی سند لئی تے تے 1967ء توں لے کے
 پروفیسر کے طور ذمے داری سنبھالی۔ اسے دوران انھاں نے 1967ء مانہ اردو افسانے کا
 نفسیاتی مطالعہ کا موضوع پر تحقیق کر کے ڈاکٹریٹ کی ڈگری وی لئی۔

اُنکا علمی ادبی تحقیقی تے تنقیدی مضمون اکثر رسالاں مانہ شائع ہوتا رہیں۔ صابر
 آفاقی ہوراں کا کہن موجب تنقید، نفسیات تے کشمیر کی تاریخ انھاں کا پسندیدہ موضوع ہیں۔
 تے ویہ برصغیر کا اچا پایا کا تنقید نگاراں مانہ شمار ہوئیں۔ انھاں نا کشمیر کا علاقائی لوک ادب نال
 وی گوڑھی دلچسپی ہے تے کئی تحقیقی تے تنقیدی مضموناں توں علاوہ ”گوجری پہاڑی لوک گیت“
 تے ”میاں محمد بخش، شخصیت اور فن“ کاناں نال اُن کی دو کتاب وی شائع ہوئی ہیں۔

گوجری مانہ تخلیقی ادب آلے پاسے ویہ بھادیں تھوڑا چرکا مڑیا پر اس نال انھاں نا
 اُن مرحلاں توں نہیں گذر نو بیو جہڑا عام گوجری لکھاڑیاں نے دیکھیا یا بھو گیا۔ اس طرح انھاں کا
 تجرباں تے فنی پکیٹ کو ثبوت انھاں کا شعری کلام مانہ دیکھو جاسکے۔ اس توں علاوہ تحقیقی تے
 تنقیدی میدان مانہ وی انھاں نے اپنی ماں بولی کو حق ادا کرن کی کوشش کی ہے۔ شیرازہ گوجری
 مانہ شائع ہون آلا گوجری غزل، گوجری ڈرامہ تے گوجری افسانہ پرائیکا تنقیدی مضمون میرا
 اس دعویٰ کا ثبوت واسطے کافی ہیں۔ گوجری واسطے اپنی ان صلاحیتاں کا بھرپور اظہار تیں پہلاں
 ہی ویہ دسمبر ۲۰۰۴ء نا اللہ نا پیا را ہو گیا پر آن آلی نسلاں واسطے رہنما خطوط ضرور چھوڑ گیا۔
 گوجری کلام کا نمونا: غزل:

جس کی خاطر دُنیا چھوڑی، زلتو گیو بن کے
 اج اوہ میرے کولوں لنگھے اُچو گاٹو تن کے
 اوہ بے مہر و میت نہ بنیو، نیت نہ میری پرکھی
 پیار کے بہڑے جھوروں بیٹھو، گل ہوں دل کی من کے
 جس کی خاطر جھگو سڑیو، اُس نا دھوڑ نہ لگے
 سڑ کے جان سہاگو ہوئی، لانی نام بجن کے
 دل کی دھڑکن بن کے تینا سدا حیاتی بخشے
 روح میرو ہے روپ بجن کو، من کے شیشے چھن کے
 اوہ نظراں توں اوہلے اوہلے بھادیں منہ نہ دسے
 میں تے درشن کرنا اظہر، چڑھ کے سگر چن کے

نظم:

کد تک تینا سوچ آوے گی
 کد تک اڑیا بھکد رہے گو
 بے سمجھوتے اکھڑ رہے گو
 ظلم کو جھلتو جھکھد رہے گو
 اٹھ کے اکھ ملہو کے دیکھ
 کد تک تینا سوچ آوے گی

چودھری قیصر دین قیصر

پیدائش 1942ء گنڈی گجراں کرناہ

ریاستی حکومت مانہہ اک ایماندار ڈپٹی کمشنر تھے سکر بیڑی رہن کے نال نال زبان تے ادب مانہہ چودھری قیصر دین قیصر کی گجھی دلچسپی کسے تیں اوہلے نہیں۔ ویہ 1942ء مانہہ کرناہ، کپواڑہ کا گراں گنڈی گجراں مانہہ پیدا ہو یا۔ اس گوجرا ماحول مانہہ بی اے کی تعلیم حاصل کرن آلا ویہ غالباً پہلا شخص ہوئیں گا جہاں نے تحصیلدار کے طور سرکاری ملازمت شروع کی تے فرترقی کرتا کرتا سکر بیڑی کا عہدہ تک پوچھیا۔ اس طرح ویہ ریاستی گجراں مانہہ I.A.S. کو عہدہ ولین آلا وی پہلا شخص ہیں۔ سرکاری ملازمت کے دوران مختلف عہدوں پر کم رکھو: تحصیلدار، ڈپٹی کمشنر، ڈائریکٹر رہن تیں بعد ویہ ریاستی پبلک سروس کمیشن کا ممبر وی رہیا ہیں تے پسماندہ قبیلاں بارے ریاستی کمیشن کا رکن وی۔

ادب نال انہاں کی دل چسپی چروکنی ہے تے گوجری تیں علاوہ انگریزی تے اردو مانہہ وی مضمون لکھتا رہیا ہیں پر ادبی دنیا مانہہ ان کی پچھان گوجری کہانیاں کی وجہ تیں ہے۔

1965ء تیں بعد کی جدید گوجری ادبی تحریک نال ویہ بڑا خلوص تے باقاعدگی نال جڑو یا رہیا ہیں تے انہاں نے سرکاری عہدہ کی ڈگی کدے وی ادب مانہہ رکاوٹ نہیں بنن دتی۔ جد کہ انہاں کا کئی ہمعصر نوکری کی بکلی بکلی پنڈو کلی لے کے وی ادب کی گہل مانہہ قدم دین تیں قاصر ہوتا دیکھیا ہیں۔

ادب مانہ انہاں نے ڈراما، کہانی تے افسانہ لکھیا ہیں تے گوجری مانہ سب توں زیادا کہانیں لکھن کو سہرووی انہاں ہی کے سر جائے جد کہ ڈرامہ کا میدان مانہ رانا فضل ہو رانہاں تیں اگے سہی لگیں۔ اُن کی پوری تحریراں کو جائز و لین واسطے تے افسانہ نگاری کا کسے ماہر کی ضرورت ہے پر میرا مطالعہ کے مطابق گوجری کہانیاں مانہ سماجی نا برابر تیں علاوہ تعلیم آ لے پاسے رغبت دوان پر انہاں نے زیادہ توجہ دتی ہے۔ تے سماجی اصلاح ناموثر بنان واسطے انہاں نے طنز و مزاح کو وی ایسو شاندار استعمال کیو ہے جے پڑھن سنن آلا اپنا آس پاس دار دوبارہ دیکھن تے سوچن پر مجبور ہو جائیں۔ ذرا دیکھو چو ہدری قیصر دین قیصر اپنی کہانی نواں بوٹ ناسطرح ختم کریں:

”میں بڑی عاجزی نال سو پر کا موچی نا کہو کہ دھاگاں نال سیڑ چھوڑتا بنجے کچھ گزارو ہو جائے۔ موچی کہن لگو بے چلن نال دھاگو گھس جائے گو پر ہوں اپنی دھڑتوں نہ ہٹو۔ موچی نے تنگ آ کے کہو، موچی کو پوت ہوں ہاں، توں تے نہیں۔ اسطرح انکی کہانی گوجر بستی تے قسمت کا لیکھ وی پڑھن جوگی ہیں۔ گوجری کہانی کی اک بڑی خوش قسمتی یاہ ہے جے اسکی بنیاد حقیقت نگاری پر ہے“

چو ہدری قیصر دین قیصر کی تحریر کہانی، ڈرامہ تے تحقیقی مضمون کی شکل مانہ ریاستی اکیڈمی کا گوجری شعبہ کی کتاباں مانہ شائع ہوتی رہی ہیں پرا جہاں تک کتابی صورت مانہ چھپ کے باندے نہیں آسکی۔ جد یاہ کھڑی ٹپن ہوئی تاں قیصر ہوراں کی تحریر یقینی طور گوجری کا طالب علماں تے ریسرچ کرن آلاں واسطے بڑی دلچسپی کو مضمون ثابت وہیں گی۔

D:\Writers
org\tariq
2.jpg not
found.

چودھری سرور حسین طارق

پیدائش: 1942ء ڈھنڈکوٹ راجوری وفات: 2000ء راجوری

سرور حسین طارق اُن خوش قسمت لکھاڑیان بچوں تھا جنہاں نازبان تے ادب وِرشہ مانھ لہھی۔ ویر ۱۹۴۲ء مانھ ڈھنڈکوٹ راجوری مانھ مولانا مہر الدین قمر اوانہ کے گھر پیدا ہوا۔ یوہ وہ دور تھو جد مملکی ازادی کے نال نال سماجی نا انصافیاں کے خلاف جُراں کی جدوجہد زوراں پر تھی۔ تے چوہدری غلام حسین لسانوی، چوہدری دیوان علی، قمر راجوری تے میاں نظام الدین لاروی ہوراں جیہا گوجر سپوتاں کو قافلوستی قوم نادرہونگ جگان مانھ لگو ووتھو۔ اِن حالات کو اثر طارق ہوراں کا ذہن پر قدرتی تھو۔ پر ۱۹۴۳ء کی مملکی تقسیم کے نال ہی یاہ تحریک وی کھنڈ پھٹ گئی۔ قمر راجوری تے لسانوی صاحب پاکستان چلا گیا تے اِت رہ جان آلاں مانھ وہ جوش جذبہ بوج تک دوبارہ آسکیو۔

سرور حسین طارق بنیادی تعلیم توں بعد محکمہ تعلیم مانھ اُستاد کے طور ملازم ہو گیا پر ۱۹۶۵ء کی افراتفری مانھ جلا وطن ہو کے ایبٹ آباد، پاکستان چلا گیا۔ چت قمر راجوری ہور پہلاں توں موجود تھا۔ اس طرح انہاں نا اپنا باپ کی شفقت تیں علاوہ اک عظیم مفکر، ادیب تے شاعر کی سنگت تے رہنمائی وی نصیب ہوئی تے اِتے اُن کے اندر کا فنکار نے قلم کو کانو سمہالیو۔ گوجری تے جُراں تیں متعلق قمر راجوری کی تحریراں کو اثر سرور حسین طارق کی شاعری تے نثر مانھ وی محسوس کیو جاسکے۔

۱۹۷۶ء مانھ مولانا مہر الدین قمر کی وفات تیں بعد طارق ہوراں کی روح ہور بے چین ہو گئی تے آخر ۱۹۸۰ء مانھ وطن کی محبت تے دانہ پانی کی جھک اُنہاں نا واپس راجوری لے

آئی۔ جت انہاں نے اپنی زندگی کا باقی سال گداریا۔ راجوری ماٹھ واپس آ کے ابرار احمد ظفر ہاروں انہاں کا کیتنا خواب تے ارمان پورا ہو یا، ویہ آپ یا اللہ پاک ہی جانے پر گوجری ادب واسطے اُن کو آنو مبارک ہی رہیو۔ گوجری زبان تے ادب واسطے دوہاں کا خلوص ماٹھ کسے نا کدے کوئے کھوٹ نہیں لہو تے آخر عمر تک دوئے بل، لاروی دربار کی ادبی مجلساں تیں علاوہ ریڈیو کشمیر تے ریاستی کلچرل اکیڈمی کا ہر مشاعرہ تے کانفرنس ماٹھ جوش جذبہ تے باقاعدگی نال شامل ہوتا رہیا۔ پر خورے کس نظر نے دوئے موتی جلدی چن لیا۔

سرور حسین طارق نے گوجری ماٹھ کئی خوب صورت گیتاں تیں علاوہ سی حرفی تے غزل وی لکھیں جہڑی مہاروادب تے شیرازہ گوجری ماٹھ شائع وی ہوتی رہی ہیں۔ تے اکثر ریڈیو کشمیر تیں وی انہاں کو کلام اکثر نشر ہو تو رہے۔ انہاں نے پنجابی ماٹھ وی چنگی خاصی شاعری کی ہے جہڑی کدے شائع نہیں ہو سکی۔ شاعری تیں علاوہ انہاں کا کئی تحقیقی مقالے تے ریڈیو فیچر وی نشر ہوتا رہیا ہیں۔

اپنا ادبی سرمایا نا کتابی صورت ماٹھ دیکھن سمیت کئی ارمان سینہ ماٹھ چھپا کے ہی سرور حسین طارق ۲۵ اگست ۲۰۰۰ء ناول کی حرکت بند ہون نال اس دنیا توں رخصت ہو گیا۔ تے اس طرح قمر راجوری نالوں اُن کی ادبی خدمات وی اجماع تک تحقیق کرن آلاں کی اڈیکوان ہیں۔ کلام کا نمونا:

بیت:

تیرا دید کی منگی تھی بھیکھ رب تیں، تیر و جرتے مناں منظور نہیں تھو
میری اکھاں تے ہوؤ کیوں دور اتنو، جیکر دل تیں توں ایڈو دور نہیں تھو
کرے دفاتے ملے جفا بجا، اس تیں پہلاں تے یوہ دستور نہیں تھو
طالب ترفقا رہیا بے حال طارق، چتر یار کو ہوؤ ظہور نہیں تھو۔

سی حرفی:

الف:

آیو بساکھ بہار آئی، بولیں پکھنو ذکر گھوٹکار کر کے،
رنگ رنگ کا مھلیا پھل سوہنا، چمے پھلاں ناصبا پیار کر کے۔
گلی برف تے ہوئی ہیں مرگ نیلی، پانی چلیو تیز رفتار کر کے
طارق دس جامنہ پر دیسیاں نا، بھاویں مڑ جائیے گل چار کر کے

ب:

باکلیا ڈھول سپاہیا رے، صبح شام تیرو انتظار منا
آ دس جا ہس کے مکھ نوری، نہ تیر جدائیاں کا مار منا
جائیے نس نہ کھس کے دل میرو، تیرے باجھ نہ صبر قرار منا
طارق ہجر نے جگر کباب کیو، تیری یاد نی کیو لاچار منا

ت:

تاہنگ بہار کی سچ منا، آئی جیتاں نا فر بہار مڑ کے
مھلا مھل ہر ڈل مھلو اڑیاں کا، تازہ ہوا ہیں فر گھوڑا مڑ کے
پھیلیں دھند پنجال کی ماہلیاں پر، ٹونکیں فر نوں آبتار مڑ کے
باغاں بناں مانھ آئیں بہار طارق، اے جے نہیں آیو میرو یار مڑ کے

ک:

کت پیاریا جا بیٹھو، لا کے ہجر فراق کی لیک منا
ہر گلی گوچے پھروں ہوں کملی، طعنا دیں اج لوک شریک منا
ساری عمر تیرو انتظار کیو، رہ گی چھک تیری حشر تیک منا
طارق نہیں جاسیں تیری دلوں اُلفت، قبر وچ وی تیری اڈیک منا

غزل ۱:

اک پیاری نظر پیاراں گی کر دل کا ٹوٹا چارگئی
اک بجلی دل پر آن پئی تے ساڑ میرو سنسارگئی

اس پیت نگر کی بستی مانھ، ہر شخص منا مجبور دسے
کت آن پھسایا ہم دل نے جت قسمت بازی ہارگئی

یہ نازک تندو اُلفت کا، گیا اُلجھ پیار بھلیکھاں مانھ
واہ صورت دل مانھ آن بسی فر چیتا ہور بسارگئی

اس عشق پیار کی منڈی مانھ، مچ مہنگو دل کو مال پکے
جس نگری مانھ دلدار بسیں، اکھ اُس پاسے ہر بارگئی

غزل ۲:

رات ہجر کی مچ ستاویں دس ہن کیاں جاؤں
دسوں پاڑ کلیجو کس نا کس نا گل سناؤں

دل مانھ اگ بچھوڑا آلی بھانڈنت بھکھاوے
آوے یاد تیری جد بچنا بلیں بلیں گاؤں

ہمت کر کے آ اکواری تک جا زخم دلاں گا
تک لیوں رج کے مگھرو تیرو فر بھاویں مر جاؤں

کول میرے اج توں نہیں بھاویں دل مانھ یاد بسائی
پھل کلیاں مانھ لوڑوں تتا خواہاں وچ بلاؤں

طارق تیری خاطر ہم نے تن من ساڑ مکاپو
ساری دُنیا بھیت یوہ جانے کس تیں راز پھپاؤں

غزل ۳:

دل پر غم نا چھاپ گیو ہے پہلو اتھروں برہیا گو
اکھ میری تیں اج بکیو ہے پہلو اتھروں برہیا گو

چن تارا تے جگنو شبنم پھل ست رنگیا تے خوشبو
کتی بولیں بول رہیو ہے پہلو اتھروں برہیا گو

دکھیا چھوڑ کے جاتا سجا، چھپ کے دل بانھ بستا راہیا
یاد تیری نے تحفو دتو ہے پہلو اتھروں برہیا گو

ساون کی اج دھند ہے چھائی ان دناں کی فریاد آئی
دل میرا پر آن پو رے پہلو اتھروں برہیا گو

ہر دکھ طارق یاد آو رے اکھ ہوئی ہیں رتیں رو رو
میرا دکھیا دل کی صدا رے پہلو اتھروں برہیا گو

غزل ۴:

سکھ خوشی کو منہ نہیں تکیو	گذر گیا دن روتاں روتاں
جھونس گئی رے دل کی کوئیل	نظر کرم کی ہوتاں ہوتاں
اکھ جھپکتاں گئی جوانی	بہار گذر گئی سوتان سوتان
اتھروں سکیا اکھاں بچون	من کا پاپ نا دھوتان دھوتان
طارق کانگ چڑھی ہے غم کی	خون اکھاں کو چوتاں چوتاں

D:\Writers
rg\naseem.jp
not found.

چودھری نسیم پونچھی

پیدائش 1942ء گورسائی مہنڈر

گوجری کا نامور شاعر، ادیب تے محسن محمد بشیر الدین نسیم پونچھی کو تعلق ادبی پاچا آلی دھرتی پونچھ کا سب توں بڑا گراں گورسائی نال ہے۔ اس علاقہ نے پچھلی صدی مانھ نور و چچی تے موجودہ صدی مانھ نسیم پونچھی پیدا کر کے بے شک قوم پر احسان کیو ہے۔ یوہ شریف تے سادوگر ذہین، حساس تے جذباتی شخص ۱۹۴۲ء مانھ اک کالس خاندان مانھ پیدا ہو یو۔

اُس دور مانھ گوجر قوم واسطے جہڑا ٹھہلا مقدر مانھ وہیں تھا اُن وچوں نسیم پونچھی نے اپنوجھو جھولی بھر بھر کے لیو۔ قسمت نے یاہ ہولی جئی چند سُر کوٹ ہائی سکول (۱۹۶۲) تیں لیکے خیبر میڈیکل کالج پشاور (۱۹۶۴)، گوجر دیس جموں (۱۹۶۵)، حکمہ تعلیم جموں (۱۹۶۸)، سول سکریٹریٹ، ریڈیو کشمیر سرینگر (۱۹۶۹) تے جموں کشمیر کلچرل اکیڈمی (۱۹۷۸) تک پھیری تے آخر اتے کی ہو کے رہ گئی۔ کلچرل اکیڈمی مانھ گوجری شعبہ کھلسن کے نال ہی ویہ گوجری ایڈیٹر کی حیثیت مانھ ات آیا تھا تے سال ۲۰۰۲ء مانھ ڈپٹی سکریٹری کے طور ریٹائر ہو کے اچکل گاندر بل کشمیر مانھ اباد ہو گیا ہیں۔

گوجری زبان نا کاغذ قلم تھان مانھ نسیم پونچھی کی بڑی فُر بانی ہیں۔ سچی گل تے یاہ ہے جے گوجری واسطے سب توں زیادہ کم کلچرل اکیڈمی نے کیو ہے تے اس حوالہ سنگ وی نسیم پونچھی تیں بغیر کلچرل اکیڈمی کو ذکر ہمیشاں نا کمل رہ گو۔ نسیم پونچھی نے شاعری کی شروعات

جسوں میں کی ”یوہ شہر میرا مانا گو“ تے فریاہ تخلیقی کوشش ۱۹۷۵ء مانہ گوجری کی پہلی کتاب ”نین سلکھنا“ کی صورت مانہ دُنیا کے باندے آئی جہڑی اج توڑی وی گوجری کی بہترین کتاباں مانہ شمار ہوئے۔

نسیم پونچھی ہوراں نے نظم، غزل، گیت سب گچھ لکھو ہے۔ لوک گیتاں کی طرز پر لکھیا و انکا گیت رُج رسیلا تے دردیلہا ہیں۔ اُن کی شاعری مانہ سچا عشق کی مٹھی مٹھی چو بھدی ہے تے سماجی ظلماں کے خلاف دند کیڑوی۔ دُنیا پر جد جہد ظلم ہو یوتاں دُنیا آلاں نانسیم پونچھی کی ”چھنڈی“ تے کہر سسنگھ مدھو کر کی ڈوگری نظم ”گھانی“ ضرور یاد آویں گی۔ نسیم صاحب نے خیام کی فارسی رباعیاں کو گوجری مانہ منظوم ترجمہ تے مولانا ابوالحسن ندوی کی کتاب ”کاروانِ مدینہ“ کو ترجمہ ”مدینی قافلہ“ کاناں نال کر کے گوجری کا قہ تے وقار مانہ جہڑا اضافو کیو ہے اس نال اُن کی شخصیت وی ہورا ہم ہو گئی ہے۔

شاعری میں علاوہ نسیم پونچھی صاحب نے ”گجرانی“ سمیت کئی شاندار کہانیاں وی لکھی ہیں، تے ایڈیٹر کی حیثیت اُنکا لکھیا و اداریا تے چٹھی پتروی سرکاری خدمات کے نال گوجری ادب مانہ اہم اضافہ ہیں۔ اس عرصہ مانہ انھاں نے چھتاواں گوجری لکھاڑیاں نالنگی پکڑ کے ادبی زمین پر ٹرن کی جاچ دی انھاں کو شمار ہی نہیں ہو سکتو۔ ملازمت میں بعد انھاں نے اپنا لکھیا و انشائیہ وی جمع کیا ہیں جہاں نا ”کچھ کچھ کیل“ کاناں نال شائع کرن کی تیاری مانہ ہیں۔ اللہ انھاں کی عمر مانہ برکت دے تانجے ویہ گوجری کی مزید خدمت تے گوجری لکھاڑیاں کی رہنمائی کر سکیں۔

کلام کا نمونا:

نعت:

اُچیری محمد ﷺ کی شان اللہ اللہ

مدینے ہوں جاؤں نہیں سمیان کو لے
 ہے کھوٹی جے بس اک چند جان کو لے
 اُچیری محمد ﷺ کی شان اللہ اللہ

غریبی ہے کوئے وی نہیں سگ کر تو
 کوئے میرے بہڑے قدم وی نہیں دھر تو
 اُچیری محمد ﷺ کی شان اللہ اللہ

سلا ماں دروداں کے صدقے ہوں جاؤں
 ہوں بے نور اکھاں نامرؤ مگر گھماؤں
 اُچیری محمد ﷺ کی شان اللہ اللہ

کلکھی اندھیرو ہر اک پاس ہے آقا
 ترن کی نہیں لگتی کائے آس ہے آقا
 اُچیری محمد ﷺ کی شان اللہ اللہ

نظم:

سرما یا داراں کا توڑو یا اپنا دند تڑوا چھوڑو
 اک لاش ہے تھارا مونڈھاں پرچپ ہو کے چھنڈی لاچھوڑو
 افسوس یاہ تھاری شرم حیا
 ویہ پُوسیں تھارو خون پیا
 یہ پُوت ہیں ٹاٹا، برلا کا

سرما یا داراں کا توڑو یا اپنا دند تڑوا چھوڑو
 اک لاش ہے تھارا مونڈھاں پرچپ ہو کے چھنڈی لاچھوڑو
 صدیاں تیں تم غلام کیوں
 تم ہر تھاہی بدنام کیوں
 جت پوچھیں اُتے شام کیوں

سرما یا داراں کا توڑو یا اپنا دند تڑوا چھوڑو
 اک لاش ہے تھارا مونڈھاں پرچپ ہو کے چھنڈی لاچھوڑو
 تم محنت کر کے ہیں بھٹکھا
 ہر پاسے تم نا ہیں دھکا
 ویہ دیکھو ظالم آ ڈھکا

سرما یا داراں کا توڑو یا اپنا دند تڑوا چھوڑو
 اک لاش ہے تھارا مونڈھاں پرچپ ہو کے چھنڈی لاچھوڑو
 اس کندھ نازل کے ڈھاوتے
 اک ہو کے سوہٹا کھاوتے
 قربانی جان چڑھاوتے

سرما یا داراں کا توڑو یا اپنا دند تڑوا چھوڑو
 اک لاش ہے تھارا مونڈھاں پرچپ ہو کے چھنڈی لاچھوڑو

غزل:

ہستیں محفل نگر نگر کیں میرا گیت بسا گئیں
اُتی وار یاہ اُجڑی بستی جتنی وار بہار گئیں

نچن کھیڑن کا وہ میلا مڑ نہیں آتا مڑ نہیں لھتا
آئیں ساعت ہستیں ہستیں برچھی سینے مار گئیں

ایکن پل کو اک نظر کو اک ڈوری کو یہ جھیلو
انگی نظراں کے ہوں صدقے میریں اپنی ہار گئیں

یاداں کا موڑاں پر آکے دل کے اپر کے کے گزری
سب دتیں سوغات اس ظالم دل نا آپے دھار گئیں

نستوں نوں نسیم نا ڈوری چھک چھک کے پچھتاوے ہے
ٹکلیا سر ما مار کے تاری کتنی ہی جج پار گئیں

غزل:

سہواں مانھ ڈھل رات کی رات	جے کمیں مل رات کی رات
اکھاں مانھ کھل رات کی رات	لہتو دینہ ہے بے بسا ہیو
رُوحاں مانھ رل رات کی رات	بُت بُتاں کے سنگ نہیں ملتا
آ مینا چھل رات کی رات	میں پل پل نا دھوکھا دتا
آ پیاں ڈل رات کی رات	پانی گھٹ نسیم کے پاسے

غزل:

ہنگلا گیا خوشی کا سویرا کدے کدے
چکا گیا دلاں نا اندھیرا کدے کدے

مندراں تے مسجداں نے اڑ اڑ کے دیکھو
بدھتو تے کھولتو وہ سہرا کدے کدے

ڈلہا ہیں فرن فرن جیہا اکھاں تیں آتھروں
آیا ہیں بس خیال جد تیرا کدے کدے

پتھر ہے میرے سینے ہر وار میں کہو ہے
روا گیا خزاں کا یہ پھیرا کدے کدے

پھلاں کا ہار چاڑھیا میں جا کے اس جگہ
لایا تھا جت بہار ما ڈیرا کدے کدے

غزل:

پھر شرد اسی دلگیر گئی	تن چھجی لیرو لیر گئی
یاہ چاہت دی کے چاہت ہے	دل پہاڑاں کا واہ چیر گئی
اس رانجھا کے سنگ کے ہو یو	وہ اتے گیو جت ہیر گئی
واہ ساعت کتنی سدھی تھی	ڈھل سدھی سینے تیر گئی
واہ سنگو سنگ نسیم رہی	اٹھ ساراں توں اخیر گئی

غزل:

چھوڑ گیا تم اوڑک منا میخانہ کے نیڑے
 ہستی آجا ظالم دنیا دیوانہ کے نیڑے
 میرے دیسوں موڑ گیا کچھ پیری چور دلاں کا
 اکھاں مار مان بسن کو ویرانہ کے نیڑے
 مُوگیورخ نیناں کو جد مشرق تیں مغرب دار
 دنیا میری بس گئی آپے پیمانہ کے نیڑے
 ظالم رات کلکھی سوئے کندوں کی موہری ما
 روح کو کھنور پھر تو دسے مہماناں کے نیڑے
 اُجڑ گیا نسیم نگر تیں ہاساں کا سب میلہ
 بستا بستا بس گیا جا کے رُخسانہ کے نیڑے

غزل:

ہوں اپنا دلدار نا لوڑوں
 خبرے کت ہے یار نا لوڑوں
 جت کشتی کو جانو محل ہے
 دریا کا اس پار نا لوڑوں
 کونج کو کے ہکلور نمائی
 کہ تھی کت ہے ڈار نا لوڑوں
 قسمت میری دھو گیو ساون
 پیو لکھیاں کا گار نا لوڑوں
 لہ گیو دہنہ نسیم تیں پہلاں
 چن کی دکھ ہے یار نا لوڑوں

غزل:

چلی ہے کتے تیں ہوا ہو لیں ہو لیں
 توں دنداں ما چھپری دبا ہو لیں ہو لیں
 تیرو چن تے آخر سناں ہار یو ہے
 کوئے گیت اج وی سنا ہو لیں ہو لیں
 سچیں کاگ تیں وی چلیں جہاز بہلا
 چلا دے سنہوڑو لکھا ہو لیں ہو لیں
 تیرے کول کاغذ تھا ٹیپیں نہایا
 بلی ہے جے تیلی بجھا ہو لیں ہو لیں
 کسے وقت صافا بناویں ہوویں تھو
 بناوے نظر جے بنا ہو لیں ہو لیں

غزلاں کا گچھ شعر:

ہوں زندگی نا بیس کے جت جت اڈیکو
اُت اُت ہوں تاج محل کا نقشا بنا گیو

چڑھتے لہتے گہلیں گہلیں پیو بھلاوا کھاتو چلوں
میری چار چو فیری تیری باہیاں کو بس گھیرو دسے

نین اداس بناتے ویلے وہ بھی زنو ہوئے گو
ساساں کی جھولی تیں چا کے کت بسا پو گیو ہاں

اس نگر مانھ ساری دولت پک گئی تیری نسیم
گیت تیرے واسطے لکھیا تھا ویہ بھی ثل گیا

اپنا نے تیرے نال جو کیو بُرو کیو
کچا گھڑا نا فر تیرے ہتھیں تھما گیا

دل کی اڑی تھی ایکا دوئے غم نا بیس بنڈتا
تم بن گیا کسے کا ہوں کسے کو ہونہیں سکسوں

میرا زخم ڈنگا تے کھچیل کسے کی
کئی وار دکھیا نہ انگ آتاں آتاں

ریت مانھ سٹا اماہ گھڑو گھڑی اُمن لگا
برف کیس مانیں خزاں کے بعد وی گلتي رہیں

گیت ۱:

کوئے بڑی کو گھاء ماہیا اکھ میریں دکھن لگیں تیرا تک تک راہ ماہیا
 رستاں بچ پھل پھلیا رب تئاں ہستاں رکھے پردیسی تے ٹر چلیا
 پردیس نہ جا ماہیا لوکاں کا طعناں میناں چکھے دیں گا سکا ماہیا
 سنک سنک کے نہ جی بالو رت یاہ جوانی کی رو رو کے نہ پی بالو
 پی لینا ہیں غم ماہیا درد وچھوڑاں کا میناں لاویں گا ڈم ماہیا

گیت ۲:

گلی قینچی دلاں کی او ڈا ہڈو جھولو جھلیو رے
 سریوں کو رنگ ربا ہر پاسے ڈلھیو رے
 درشی کا بناں بٹ نکا نکا پھل رے
 ہسین میرا دکھڑا تے بند گیا کھل رے
 درشی کا بناں بچ نکو نکو گھاء ہے
 اک واری میل ربا اڑیو دو ساہ ہے
 درشی کا بناں بچ نکا نکا کاغ رے
 چڑھتی جوانیاں نا لگا سینے داغ رے
 درشی کا بناں بچ کے یوٹو آروں
 ربا نہ پھیردیے توں اڈتے اُداروں
 درشی کا بناں بچ منکا پرووں
 مڑیو نہیں منشی تے چھم چھم رووں
 گلی قینچی نماں کی رے دل ڈا ہڈو تنگ ہے
 گولی ماروں ظالماں نا اللہ تیرے سنگ ہے

گلی قینچی دلاں کی.....

گیت ۳:

تیری بنی کی نہ کہتے کائے بنگ ٹٹ جائے
میرے ہاروں نہ تیرو بھی کتے سنگ ٹٹ جائے

جانے میریئے اوچندے میریئے !!

کدے رونو ہے بہاراں ماں تیں یاد کر کے
سارا ڈکھڑا تیں سینہ ماں آباد کر کے

ایسی گھڑی ماں نہ تیری کہتے منگ ٹٹ جائے

تیری بنی کی نہ کہتے کائے بنگ ٹٹ جائے

جانے میریئے اوچندے میریئے !!

کدے کائے گی جوانی تیری آپے ڈھل کے
کدے سوچنوتیں پہراں توڑی آپے کھل کے

کدے ہستا وا پھلاں کو نہ رنگ ٹٹ جائے

تیری بنی کی نہ کہتے کائے بنگ ٹٹ جائے

جانے میریئے اوچندے میریئے !!

جد آئے گی بہار پھل کھیلی بن کے
کدے نکلے گی جد توں بھی بن ٹھن کے

نوںہی اڈتی وی کہتے نہ پتنگ ٹٹ جائے

تیری بنی کی نہ کہتے کائے بنگ ٹٹ جائے

جانے میریئے اوچندے میریئے !!

تیری بنی کی نہ کہتے کائے بنگ ٹٹ جائے

میرے ہاروں نہ تیرو بھی کتے سنگ ٹٹ جائے

جانے میریئے اوچندے میریئے !!

گیت ۴:

ادھی رات نہ بول پیپھا ادھی رات نہ بول

پردیسی نہیں کول پیپھا پردیسی نہیں کول

ہوں بے چاری جھٹکوں گاؤں بدل کے بچ کبہر بھاؤں

بر نا ڈھکوں ٹر تر گھوروں دل نا بیٹھی پئی بھٹکاؤں

ادھی رات نہ بول پیپھا ادھی رات نہ بول

موسم ظالم گھور رہیو ہے یوٹو بوٹو بور رہیو ہے

سجری جہی رت ہستی دے پردیسی بھی دور رہیو ہے

ادھی رات نہ بول پیپھا ادھی رات نہ بول

بدل پیری کڑک رہیو ہے گوری کو دل دھڑک رہیو ہے

ہر پاسے خوشبو بسی ہے انگ انگ ظالمھڑک رہیو ہے

ادھی رات نہ بول پیپھا ادھی رات نہ بول

گھمن گھیریں گھیر رہیو ہے چوہیں پاسیں پھیر رہیو ہے

موسم سارو نچو دے اتھروں اتھروں کیر رہیو ہے

ادھی رات نہ بول پیپھا ادھی رات نہ بول

اج کلیجو پھڑک رہیو ہے بوہو نو نہی کھڑک رہیو ہے

بلیں جے پئی بنجلی جے بنجارو کوئے چھڑک رہیو ہے

ادھی رات نہ بول پیپھا ادھی رات نہ بول

پردیسی نہیں کول پیپھا پردیسی نہیں کول

بابو نور محمد نور

پیدائش: 27 مئی، 1942ء چک کترو پونچھ

گوجری کا مشہور مزاحیہ شاعر تے ڈرامہ نگار نور محمد نور ۱۹۴۲ء مانھ پونچھ کا گراں چک کترو، مانھ پیدا ہو یا۔ بچپن غریبی مانھ گزار یو پر تنگ دستی انھان نادی توڑی تعلیم حاصل کرن تیں نہیں روک سکی۔ یاہ اُس دور کی گل ہے جد گوجر اما حول مانھ دسی پاس کرنی ہر کسے کا بس مانھ نہیں تھی۔ ویہ روز گار کی تلاش مانھ محکمہ مال کا در پونچھیا تے عمر ساری اُتے کا ہو گیا۔ یوں نور محمد تیں بابو نور محمد بنیا تے فرج تگ بندی شاعری ہو گئی تاں بابو نور محمد نور بن گیا۔

بابو نور ہوراں کو تعلق گوجری لکھاڑیاں کا اُس پورنال ہے جسھاں نے ریڈیو کشمیر تے کلچرل اکیڈمی مانھ گوجری شعبا کھلن کے نال ہی جوش جذبہ نال لکھو شروع کیو۔ جد نسیم پونچھی تے اقبال عظیم شاعری آلے پاسے مڑیا، امین قمر، سلیم تے قیصر نے کہانیں سنانی شروع کیں تاں نور محمد مذاہیہ شاعری آلے پاسے ایسا مڑیا جے اسے میدان کا کھلاڑی بن کے رہ گیا۔

انھان کی تقریباً ساری شاعری طنز و مزاح کی صورت مانھ ہے تے ہمعصر لکھن آلاں مانھ نذیر احمد نذیر، نور محمد نور تے تاج دین تاج تیں بعد کوئے چوتھو شاعر نظر نہیں آتو جس نے اختیاری طور پر مذاح آلے پاسے قدم رکھیو ہوئے۔ انھان نے پہاڑی زبان مانھ وی مذاح لکھن کا کامیاب تجربا کیا ہیں۔ میرا ذاتی مشاہدہ کے مطابق طنز و مذاح وہی شخص تخلیق کر سکے جہڑا اندروں پور پور ہوئے تے نور ہوراں کا ذاتی حالات مذاح واسطے عین مناسب تھا۔ انھان نے کئی خوب صورت مذاہیہ نظم لکھی ہیں جن مانھ ”دوبیہ“، ”شیر تے توت“ تے ”لاڑلو پوت“ شامل ہیں۔

گوجری مانہ شاعری میں علاوہ انہاں نے کئی سٹیج ڈراما لکھیاتے سٹیج کروایا ہیں جہڑا مذاہیہ انداز کی وجہ میں لوکاں نے سچ پسند کیا ہیں۔ انہاں ناڈرامہ مانہ اپنا آپ پر ہستاں دیکھ کے اُس ویلے کوئے یاہ نہیں سوچ سکتو جے یاہ چوٹ اپنے توں زیادا دیکھن سُنن آلاں پر یا سماج پر ہے۔ اس طرح ریاست مانہ گوجری ڈراما کی تاریخ وی نور محمد نورکاناں میں بغیر مکمل نہیں ہوتی۔

باؤ نور محمد نور ہوراں نے پنجابی شاعری مانہ دو کتابچہ ”رب دے پیارے“ تے ”وفات نامہ سائیں میر بخش“ کانان نال شائع کروایا ہیں پر گوجری ڈرامہ یا مذاہیہ شاعری اچھاں کتابی صورت مانہ باندے نہیں آئی۔ ویہ اجکل سرکاری ملازمت میں فارغ ہو گیا ہیں تے سُنا جے اپنی مذاہیہ شاعری نا ”بلتو دور“ کانان نال چھاپن کی تیاری مانہ ہیں۔

کلام کا نمونہ:

نعت شریف

میر آمدنی چن آقا

کئی واری عرض کری اکواری تے من آقا

سارو جگ سوالی ہے

دوہاں جہاناں مانہ تھاری شان نرالی ہے

کدے خواب مانہ آویں گا

مدتاں توں ترس رہیو کد کول بلاوین گا

یاہ دنیا فانی ہے

آقا تھاری تاہگاں مانہ گئی گذر جوانی ہے

ہم پوچھ نو اسی ہاں

ہم گناہگار آقا، بڑا عیبی تے عاصی ہاں

نظم: دو بیاہ

جاں میں اپنی سرت سہالی جو بن حُسن جوانی پالی
 باپ نے دتو گھر بسا کوئے نہ کریو دو بیاہ
 سوئی صورت سیرت آلی متھا اُپر چمکے لالی
 دتی مِنا بوہٹی لیا کوئے نہ کریو دو بیاہ
 دماغ میرا مانھ آیفور ہور رکھی اک دیسی حور
 رہیو ہوش حواس بھلا کوئے نہ کریو دو بیاہ
 چہا بنیا گھر مانھ دو بل پئی دو پاسے لو
 رہیو نہ کجھ شرم حیا کوئے نہ کریو دو بیاہ
 دو پاساں کو ہوں مہمان دیکھو میری کتنی شان
 منجی راہ مانھ دتی ڈاہ کوئے نہ کریو دو بیاہ
 اک کولوں میں منکیو پانی دوجی اندر گئی نمائی
 دتو اس نے زہر گھلا کوئے نہ کریو دو بیاہ
 اک ڈیرا کا بچا چار دو پڑھیں دو رہیں بیمار
 تھک گیو ہوں دوا لیا کوئے نہ کریو دو بیاہ
 چار دوجی کا ہويا اٹھ سون نہیں دیتارات چو پٹ
 تھکی دے دے دیوں سلا کوئے نہ کریو دو بیاہ
 ہوتا دو سکول چلاتو ایم اے پی ایچ ڈی کراتو
 اٹھاں نا کد سکوں پڑھا کوئے نہ کریو دو بیاہ

غزل:

میرا دل کا خواباں خیالاں کی رانی
توں کیوں چپ ہے دتی نہیں اپنی کہانی

تیرو کم جلاو میرو غم کھانو
توں خوشحال میری اکھاں ماٹھ پانی

کدے دل تر سے کدے دئے تسلی
بڑھاپو ہے یوہ یا کہ چڑھتی جوانی

ہویا جگ ماٹھ عاشق ہزاراں کروڑاں
گئی مک نہ اجنگ عشق کی کہانی

تیری دوستی تھی کہ چھولاں کو بڈھ تھو
گیا مک سارا زبانی زبانی

غزل ۲

سینے لگا سل اس برہیا	سکھ نہیں پایو پل اس برہیا
شہراں نال گراواں اندر	ہر پاسے ہلچل اس برہیا
غیرت آلا سک سک مویا	بے غیرت گیا پل اس برہیا
1 2 0 , 8 0 کا گولا	گیا سراں توں ڈھل اس برہیا
رات دھیاری نیند نہیں آتی	جان سکے پل پل اس برہیا
کون کسے کا درد بنداوے	مشکل دسے گل اس برہیا
مشکل جین گراواں اندر	دل کہ شہریں چل اس برہیا

گیت ۱

دینہہ چڑھیو چرخو کت گڑے
 کیوں رب رسول بھلایا ہیں تیرے کول کہڑا سرمایا ہیں
 جت جانو دلیں پرایا ہیں نہ مدد گار ہمسایا ہیں
 اُت اگ کا لگین تت گڑے
 دینہہ چڑھیو چرخو کت گڑے
 ات جھاں بھریں چنگیر گڑے ویہ دِسیں بڑیں دلیر گڑے
 نہیں جاتاں لاسیں دیر گڑے پئی ڈیکیں شام سویر گڑے
 تیری آخر ممکنی رت گڑے
 دینہہ چڑھیو چرخو کت گڑے
 جد لیکھو سوت کو منگیں گا اُت بڑا بڑا وی کہیں گا
 ساہ جن کا جگ تیں سمیں گا مُردو جی وار نہ جمیں گا
 تیری کس نے ماری مت گڑے
 دینہہ چڑھیو چرخو کت گڑے
 کی جمع تیں پائی پائی تھی فر یاہ جانداد بنائی تھی
 کجھ اپنی کجھ پرائی تھی سب رہ گئی دھری دھرائی تھی
 نہ جاتاں مل توں ہتھ گڑے
 دینہہ چڑھیو چرخو کت گڑے
 سٹ ڈھول ڈھکا ساز گڑے نہ کھول کسے کا راز گڑے
 آ غیر کماں تیں باز گڑے پڑھ پنچے وقت نماز گڑے
 نہ بیس پیار کے لت گڑے
 دینہہ چڑھیو چرخو کت گڑے

اُٹھناں میرے توں چل اڑیے
آ سُن لے میری گل اڑیے

اک واری پھیرو گھل اڑیے
اُٹھناں میرے توں چل اڑیے

کر دیری نہ اک پل اڑیے
اُٹھناں میرے توں چل اڑیے

جگ میلو ہے چل پل اڑیے
اُٹھناں میرے توں چل اڑیے

لساں کی لاہویں کھل اڑیے
اُٹھناں میرے توں چل اڑیے

تتاں سیر کراؤں ڈھوکاں کی
نالے شہر کا لہاں چوکاں کی

ہم دنیا نویں بساواں گا
دُکھیاں کا دل بہلاواں گا

دُنیا نا یاہ گل دساں گا
ہم چن کی بستی بساں گا

اِت کوئے کسے کو یار نہیں
کوئے دُکھیاں کو غم خوار نہیں

D:\Writers
org\r
bhati.jpg not
found.

پروفیسر محمد رفیق بھٹی

پیدائش: 21 جنوری 1943ء ساج راجوری

محمد رفیق بھٹی ۱۹۴۳ء مانھ راجوری کا ساج گراں مانھ اک راجپوت بھٹی خاندان مانھ پیدا ہوئے۔ بنیادی تعلیم اے حاصل کی۔ ۱۹۶۵ء کی جنگ مانھ ہجرت کر کے پاکستان چلا گیا۔ باقی تعلیم اے مکمل کی۔ میر پور کالج میں بی اے کرن میں بعد معاشیات مانھ ایم اے کی ڈگری لئی تے کالج مانھ لیکچرار کے طور ملازمت شروع کر لئی۔ تے اک طویل عرصہ کی علمی تے ادبی خدمت میں بعد پروفیسر کی حیثیت نال سبکدوش ہو یا ہیں۔

پروفیسر محمد رفیق بھٹی کشمیر کا علمی تے ادبی حلقاں ماں اک معتبر ناں ہے۔ ویہ طالب علمی کا زمانہ میں اے تک نظم تے نثر ماں برابر لکھتا رہیا ہیں۔ ویہ بقول خواجہ محمد عارف کے، شاعر، مصنف، قلم کار، عالم، معلم تے فنکار سب کچھ ہیں۔ تے اللہ جانے انکی شخصیت کا ہو رکتنا پہلو ہوئیں گا۔ انھاں نے الگ الگ موضوع تے الگ الگ زبان ماں متوجہ لکھیو ہے۔ اُردو ماں اے تک پنجال پبلشرز میر پور نے انکی جہڑی کتاب شائع کی ہیں انکا ناں ہیں: ”ستون دار“، ”لہونگر“، ”محسنین کشمیر“، ”دوستی کا سفر“، ”قرض حسنہ“ تے ”ایران صغیر سے ایران کبیر تک“۔ پروفیسر رفیق بھٹی ہور ۱۹۶۷ء کے نیڑے تیرے جدید گوجری ادب کی تحریک نال بڑی دل چسپی لے کے شامل ہو یا۔ انھاں نے غزل کی صورت مانھ سوئی تے معیاری تحریر گوجری ادب کے حوالے کی ہیں۔ اُن کی شاعری ریاستی کلچرل اکیڈمی کا شیرازہ گوجری مانھ باقاعدگی نال شائع ہوتی رہی ہے پر گوجری ماں اے جہاں تک ان کو کوائے شعری مجموعہ کتابی صورت مانھ نظر ایں نہیں گزر پو جسکی گوجری کا قدر دان نا مند تیں اڈیک ہے۔

غزل ۱:

آخر دم تک لڑتو رہیو اوڑک بازی ہار گیو
گجھ دن ہوروی جی لیتو پر شوق سجن کو مار گیو

گئے گئے پانی تھو جد اس دریا مانھ ڈیو تھو
چڑھتی کانگ مانھ کھلو کھلو ہوں کیتی واری پار گیو

کس نا کوئے سنگی سمجھ کس نا دشمن جانے
سجن بن کے ڈوبن آلو، دشمن بن کے تار گیو

چے چے سجدا کر کے ذری بروبر بھلیو جد
کی کرتائی کھوہ مانھ پے گئی، جو گجھ تھو بیکار گیو

اج تک کس نے جان سکی ہے اس دُنیا کی چال
ہستو ہستو آون آلو روتو زاروزار گیو

غزل ۲:

بستو رستو شہر مانھ کلو جنگل ہاروں ڈرتو رہوں
جین کو کوئے حال نہ دے سے جین کا ہاڑا کرتو رہوں

کل کلوتر اکھ تیری نا دو جو چنگو لگے گو
شوق کو سجنامل نہ کوئے شوق تیرا تیں ڈرتو رہوں

رکھ خیال مانھ کانگ کی شوکر تک نہ میرا سوکا نا
ہوں برسائی نالو بن کے موسم موسم چڑھتو رہوں

ہونی آخر ہو جائے ات سوچ کو چارو چلتو نہیں
رات دھیائی ہوں کیوں سگی سوچ کی سولی چڑھتو ہوں

دوزخ کی آگ کے ساڑے گی لوگو میرا جسا نا
ہوں تے عشق کی ٹھنڈی آگ مانھ شام سویرے سرتو رہوں

غزل ۳:

سکھ آدے تے اس نا اوکھت اوکھت ویلے یاد کراں
ہم وی کدے کدائیں لوگو گھر اپنا نا یاد کراں

ڈنگو سوچ وچارو کر کے یاہ گل سمجھ ماں آئی
جس ماڑی ماں بساں پہلاں نیں اسکی آباد کراں

دل کا بندی خانہ اندر لکھاں رتجھ ہیں قیدی
وسے کائے نہ پوری ہوتی کس کس نا آزاد کراں

انا الحق کو نعرو لاکے سولی لیاں گل ماں پا !
کد تک جھوٹھا لارا لاکے دل اپنا نا یاد کراں

یوہ تے پک یقین ہے مناج مقدموں ہاراں گا
اُسے ظالم نے لٹیا تھا جس آگے فریاد کراں

D:\Writers
org\qamar
1.jpg not
found.

چودھری محمد امین قمر

پیدائش: مارچ 1943ء کلانی پونچھ

امین قمر گوجری افسانہ نگاری مانھ بڑو معتبر ناں ہے۔ ویہ ۱۹۴۳ء مانھ کلانی پونچھ کا خالص گوجر اماحول مانھ پیدا ہویا۔ اُنکا والد قاضی حسن محمد ہوراں کی علاقہ مانھ اک اپنی سماجی تے علمی حیثیت تھی۔ لوہکی عمر مانھ ہی (۱۹۴۷ء) افراتفری تے تقسیم کی ایسی ہوا چلی جے ملک کے سنگ برادری تے خاندان وی کھنڈ پھٹ گیا۔ امین قمر ناوی پاکستان کار فیوجی کمپ کی زندگی کو سواد چکھو پیو۔

دسی پاس کرن توڑی اُن کا اکھ کن کھل گیا تھا تے اک دن اچانک انھاں ناوطن کی محبت واپس پھک لیا ئی۔ کچھ عرصہ تک کشمیر مانھ جماعت اسلامی کی درس گاہ نال جُو یار ہیا تے تعلیم وی جاری رکھی۔ ریاستی محکمہ تعلیم مانھ اُستاد کی حیثیت نال ملازمت شروع کی۔ اسے دوران علی گڑھ مُسلم یونیورسٹی تیں ایم اے (ایجوکیشن) تے فر بعد مانھ بی ایڈ کی۔

۱۹۷۵ء مانھ ریڈیو کشمیر جوں تیں گوجری نشریات شروع ہون کے نال ہی فیض کسانہ نے جہڑا نواں لکھاڑی دریافت کیا انھاں مانھ پہلوناں امین قمر کو آوے۔ انھاں نے طنز و مزاح تے کہانیاں لکھنی شروع کیں تے بڑا جلدی اس فن کا ماہر ہو گیا۔ ۱۹۷۸ء مانھ ریاستی کلچرل اکیڈمی مانھ گوجری شعبہ کا کھلن نال اُن کی تحریر مانھ ہو رنکھا آ تو گیو تے ہر مجلس مانھ اُن کی واہ واہ ہون لگی۔

گوجری کہانی کاراں مانھ امین قمر کو بڑو اچو مقام ہے۔ اس مانھ اُنکا ذاتی مشاہدہ تے حساس طبیعت کو بڑو حصو ہے۔ پہلی صف کا گوجری کہانی لکھن آلاں مانھ اُنکے نال قیصر

دین قیصر، محمد حسین سلیم، غلام رسول آزاد، محمود رانا، ڈاکٹر نصیر الدین بارو تے مختار الدین تبسم شامل تھا پر امین قمر کی کہانیاں ان ساراں تے دکھری تے نیمکلی پچھان رکھیں۔ اُن کی کہانیاں خالص گوجر ماحول کی عکاسی کے نال نال، سماجی ٹھیکیداراں پر وی زبردست چوٹ کریں تے مذاہیہ انداز مانھ پڑھن آلاں ناوی غور کرن پر مجبور کریں۔ اُن کی کہانیاں توں رُوسی کہانیاں کی ہنار آوے۔ میر و خیال ہے جے امین قمر کی تحریر گوجری ادب کے نال نال سماجیات تے فلسفہ کا طالب علماں واسطے وی بڑی کارآمد ثابت ہو سکیں۔

امین قمر اپنی کہانی بیاہ مانھ مقدم کو حلیو اس طرح بیان کریں:

مقدم خیر و (جہڑ و ہن مقدم گھٹ تے خیر و زیادہ رہ گیو ہے) نے اپنے ویلے جت چنگی مہیس دیکھی نہیں چھوڑی۔ سدھے ہتھیں لہ گئی تے چنگی گل نہیں تے مقدم خیر و دوجا ہتھ دسناوی جانیں تھو۔ وہی دوجا ہتھ وہ انھاں ناوی دسے تھو جہڑا اک واری بلایا نال لیتری مانھ نہیں آویں تھا۔ پنڈ اور بنی وی لکیر کسے ملک کا نقشہ ہاروں اراں پراں دھیڑا توڑی دستا پھریں تھا۔ تے گھر آ لیں بنا تپا تپا کے ٹھکور کرتی رہیں تھیں۔

امین قمر کی کہانیاں، آٹا کو پاء، لگیاں کو سینھ، اوکھو پینڈو تے بیاہ تے ان کو مذاہیہ مضمون، یوہ وی فن ہے بیوی نا خوش رکھنو، عوام نے مچ پسند کیا تھا۔ اسے سال شائع ہون آلی اُن کی کہانیاں کی کتاب ”چاننی“ نواں لکھاڑیاں واسطے رہنمائی کو کم کرے گی۔

گوجری ادب نادس اک سال کی دین توں بعد ویہ گجھ عرصو گوجر ہوسٹل کا وارڈن، بلاک ایجوکیشن افسر، ماڈل سکول کا پرنسپل تے اسٹنٹ ڈائریکٹر وی رہیا ہیں پر اس عرصہ (۱۵-۲۰ سال) مانھ انھاں نے گوجری ادب دار اکھ پرت کے وی نہیں دیکھو۔ اللہ کرے اُن کے اندر کو فنکار فر فر جائے تا نچے ویہ گوجری ادب کا بقایا جات ادا کر سکیں۔ (آمین)

D:\Writers
org\LH
Gohar.jpg not
found.

چودھری لعل حسین گوہر

پیدائش: 1943ء کھنیز پونچھ

لعل حسین گوہر کو شمار گوجری کا اُن مخلص لکھاڑیاں مانھ ہوئے۔ جہاں جدید گوجری کی تحریک نال ۱۹۷۵ توں اُراں باقاعدگی نال جُویا رہیا ہیں۔ ویہ پونچھ کا کھنیز گراں مانھ ۱۹۳۳ء مانھ اک بہروال خاندان مانھ پیدا ہويا۔ بُیادی تعلیم تیں بعد محکمہ تعلیم مانھ اُستاد کی حیثیت نال ملازمت شروع کی تے پچھلے سال ہیڈ ماسٹر بن کے ریٹائر ہويا ہیں۔

شاعری نال اُن کی دل چسپی نکا ہوتاں ہی توں تھی تے ۱۹۷۵ء مانھ کلچرل اکیڈمی کا گوجری کا شعبہ کھلن توں بعد ہر مجلس تے مشاعرہ مانھ باقاعدہ شامل ہوتا رہیا ہیں۔ ان کو کلام گوجری شیرازہ مانھ وی شائع ہوتورہیو ہے تے ریڈیو کشمیر کاجموں تے پونچھ سٹیشن تیں اکثر نشروی ہوتورہے۔ گوہر نے شاعری مانھ زیادا نظم لکھی ہیں تے قوم کی سادگی تے بدحالی پر زمانہ کا ظلم ستم کو ڈکراؤنکا کلام مانھ عام ہے۔

کلام:

دل میرو کوئے لے گیو وہ موڑ مناں ہن دیتو نہیں
ہوں پیار کو بھکھو راہی تھو کوئے اس نا میرو چیتو نہیں
ایک درد ہجر مانھ سڑ سڑ کے میرو سینو پک کباب ہو یو
کچھ سوٹھا دل مانھ ہوتا رہیا نہیں پورو کوئے خواب ہو یو
اس اُجڑیا دل آوارہ کو کوئے دردی فرکد آوے گو
اس زخم درد وچھوڑا پر کائے ملہم آکے لاوے گو
ان درد الم کا ناڑاں کی کوئے جا کے کت فریاد کرے
یاہ اُجڑی نگری بستی نہیں کون اس نا ہن آباد کرے
گوہر دل آوارہ ہو کے ہتھ کدے نہ آوے گو
یوہ پروانو پیار کو سگی، شمع نا ٹکراوے گو

نظم:

مُحسن جوانی سدو نہیں رہتی، دولت چار دناں کی
کھیں تو نگر خالی ڈٹھا، دولت گئی جھماں کی

مطلب باجھ نہیں بھائی بنتا، لالچ باجھ نہیں یاری
نفسو نفسی کرتاں کرتاں دُنیا ٹُر گئی ساری

مار کرے پئی گونی آپے، مُڑ مڑ نکر لاوے
ہوے بدناں سَنگل کو ڈاڈھو، بھادیں سر نہ چاوے

رب رحیم کریم ہمیشاں آپے فضل کماوے
تیر کمانوں سخن زبانوں نکلیاں ہتھ نہ آوے

آنو جانو اس دنیا پر یاہ ہے ریت پرانی
کر لے ہوش سنبھل کے بندیا اپنی بار ٹپانی

کرنی مچ کتیری مندی، سر کے بھار بگاوے
جس نا رب گرامی پکڑے، اس نا کون بچاوے

گوہر نال خوشی کے ریپے، فر نہیں مُڑ کے آنو
ہستاں گاتاں صاف دلی نال، مل جل وقت بھانو

D:\Writers
rg\mukhlis.jp
not found.

چودھری مخلص وجدانی

پیدائش: 21 مارچ 1944ء گوہاڑی مظفر آباد

بیہویں صدی مانہ گوجری غزل کی چچان بن جان آلا مخلص وجدانی کو اصلی ناں محمد دین ہے۔ ویسے 1944ء مانہ مظفر آباد کا گوہاڑی گراں مانہ مولانا محمد علی پھامڑہ کے گھر پیدا ہویا۔ ویسے مشہور ادیب تے شاعر صابر آفاقی ہوراں کا نکا بھائی ہیں۔ بچپن مظفر آباد مانہ گذار پوتے اتے ایف اے تک تعلیم حاصل کی۔ کچھ عرصہ گھر کو کم کاج تے زمینداری کرتا رہیا تے فریسمابی طبیعت نے نوکری کی تلاش مانہ کراچی پہنچا چھوڑیا۔ اتوں واپس آ کے سال کھنڈراولپنڈی مانہ پرائیویٹ نوکری کی تے فراہ کینٹ مانہ کلرک بن گیا۔ ات 1967ء توں لیکے 1977ء توں نوکری کی پر یاہ جگہ وی رس نہ آئی تے ویسے نوکری چھوڑ کے مظفر آباد واپس آ گیا۔ تے اجکل ریڈیو کا گوجری پروگرام کی جان بن گیا ہیں۔

کراچی تے راولپنڈی مانہ انھاں نے اُردو ادب وی پڑھیوتے اسے دوران آپ وی شاعری شروع کر لئی تھی۔ پہلاں اُردو تے فر گوجری مان لکھن لگا۔ یوہ پاکستان مانہ گوجری ادب کو بڑواہم دور تھو۔ جدات کا گوجری لکھاڑیاں نے گوجری کی نشر و اشاعت واسطے دوڑ دھوپ شروع کی تھی۔ تے اس راہ جدا انھاں نے اپنا قلم کی مہار اُردو تیں گوجری آلے پاسے موڑی تاں انھاں نا گوجری کلام پر پوری داد ملی۔

گھریلو حالات تے مخلص کی حساس طبیعت شاعری واسطے پہلاں ہی موضوع تھی ایسا حالات مانہ معمولی جرک وی حساس ذہن نا کہن لکھن پر مجبور کر چھوڑے تے مخلص نا دنیا کا بے شمار ٹھہلا جھلنا پیتھا اس طرح انھاں نے اپنا تے زمانہ کا غم اپنی مٹھی مادری زبان گوجری

مانھ ڈھال کے گوجری شاعری تے خاص کر گوجری غزل ناچھڑی ادبی تے ابدی شہرت بخشی ہے ویہ آپ وی اسکی پہچان بن گیا ہیں۔

اُن کی گوجری غزلاں کی پہلی کتاب ”ریرا“ کا ناں نال شائع ہوئی تھی۔ پچھلے سال مخلص تے صابر آفاقی ہوراں کی شاعری سا نچھو کھلا ڈو کا ناں نال شائع ہوئی ہے۔ ان کو کلام خالص گوجر ماحول کی عکاسی کرے تے ادبی معیار پر پورے اترے۔ مخلص بلاشبہ گوجری غزل کا کامیاب ترین شاعر اں مانھ شمار ہوئیں تے انھان نے گوجری غزل کسے وی دو جی زبان نال موٹھ سو جوڑن کے قابل بنا چھوڑی ہے۔ مخلص کی گوجری غزل نواں لکھن آلاں واسطے بہترین رہنمائی کو کم کرے گی۔

مخلص وجدانی ہوراں نے پہلے اُردو ماں شاعری شروع کی تھی تے بعد ماں گوجری کے نال نال وی اُردو شاعری جاری رکھی۔ انکی اُردو شاعری بڑی معیاری ہے تے ہن تک انھان نے اُردو ماں وی کئی کتاب شائع کی ہیں۔ انکی تخلیقات کی تفصیل اس طرح ہے۔

- اُردو: ۱۔ صلیبوں کا شہر (شاعری) ۲۔ نئی بہار نئے پھول (اُردو نظمیں)
 ۳۔ امن کے گیت (انتخاب) ۴۔ رشحات ابر (تدوین کلام، ابرار حسنی)
 ۵۔ بوئے پیر ہن (اُردو مثنوی) ۶۔ پیار کے پھول (اُردو نظمیں بچوں کے لئے)
 گوجری: ریرا (گوجری غزل) ۲۔ سا نچھو کھلا ڈو
 کلام کا نمونا: غزل:

پورو ہور ارمان ہوؤ	دل کو فر نقصان ہوؤ
اوہ تے ڈاہڈو سدے تھو	منجھوں ہی نہیں جان ہوؤ
میرو دل تھو ایک پتنگ	ہونو تھو قربان ہوؤ
دیکھ کے بجن کو برتاء	دشمن بھی حیران ہوؤ
مناں مندرو ہیر کے مخلص	اچو ہور اشمان ہوؤ

غزل ۲:

کس کس درتوں ہو کے پوسچے اُت تاثیر دواواں کی
اس دھرتی پر مٹی پوئے کتنا ایک خداواں گی

اُٹھ کے فر ہوں جانہ سکیو، نوں کو آ کے بیٹھو ہوں
دسوں تینا کے وے لوکا، غم کی گھنیاں چھاواں کی

شہراں کو فرناں نہ لئے جے کدے اکواری توں
لہتی رسمیں دیکھے شخصہ آ کے شان گراواں کی

رگاں وچوں لہو سکاوی، اکھاں وچوں گئی لو
جاتے وقت جوانی ظالم کر گئی جڑی پچھاواں کی

یوسف کھنہ مانھ سٹیو پر بھگیاڑاں نا نہیں دتو کھان
اتنی جے ہمدردی ہوتی مخلص آج بھراواں کی

غزل ۳:

میں کہو سو وار نہ جا	ندی کے اس پار نہ جا
میری من لے یار نہ جا	گھسن کے بشکار نہ جا
جا کے فر پچھتاوے گو	دل کو کے اعتبار نہ جا
مدہ پچھے ملیو ہے توں	گل کراں دو چار نہ جا
چنگو موسم نہیں یوہ مخلص	لے کے دل بازار نہ جا

غزل ۴:

نہ درویشی راس آئی نہ اٹھکل سکھی شاہی کی
اکھاں کا سکشول ہیں خالی در در میں اگرہی کی

جہڑا نا تریاکل کریئے اوہی پلے اسکی گل
کہڑو میری گل کرے ہے خلقت چڑھتی باہی کی

جسکو جتنو بادر ہوئے اتنی اچی اسکی سوچ
نکا جاتک کی ہے خواہش نکی جیہی چاہی کی

تیری پوجا کرنی پئی چنگو دردی آہو توں
اٹی ڈاہی تھنی پئی لوڑ تھی منا ڈاہی کی

اتھرواں کو سگ میں لایو مخلص دل کی باڑی نا
کیوں نہ غم کو فصل ہو تو بتر مانھ میں راہی کی

ق:

جے احسان مکانو چاہوے تاں اس نا زندگانی دے
جس بوتا کی چھاں بیٹھو ہے اس بوتا نا پانی دے
پھٹ جے گھلیا ہیں تاں ان پر لون وی اپنے ہتھیں لا
جت یہ درجا کھٹیا ہیں اُت ہور اتنی قُربانی دے

ق:

ہوں ایکسبر بھار غماں کو چکے کون چکاوے کون
خوشیاں کا تھا سارا سنگی، غم مانھ پچھے بھالے کون
کس کو بند یوان ہے شخصاً ہن تے سا جھٹ گھڑی
کس نا دیکھے اٹھ اٹھ بہوے، انھیں راہیں آوے کون

ق:

میرا ارماناں کا اجر چھو گیا دل کا جنگل مانھ
دھند غباری، سینہ کو خورو، اُپروں بارش ساون کی
اپنی قسمت مانھ تھو رُلنو رُلنو جگ کا پیراں مانھ
کون سرہانے رکھتو مخلص رسی تھو ہوں داون کی

ق:

زمانو تے تھو میرو ازلاں تیں پیری
توں کس گل کا گن گن کے بدلا مکاوے
خفا نہیں طبیعت ہی ایسی ہے مخلص
مزا مانھ ہوئے تے بڑیں گل سناوے

ق:

دھرتی لگتا ڈٹھا لوک ہائے کیسا کیسا لوک
دُنیا کی ہر حالت ڈٹھی ملتا لوک چھوڑتا لوک

غم وی آویں رات گزارن
دینہہ نا ہو جائیں اکو اک

متفرق شعر:

بھاند آئی تے دل کا اک اک پھٹ ناگسا سو سو پھل
 سریاں پھلن تک ڈوگی مانھ باندے ہر اسہاڑ رہو
 نہ درویشی راس آئی نہ اٹھکل سکھی شاہی کی
 اکھاں کا کشکول ہیں خالی درد میں اگر ہی کی
 اٹھ کے ملوں تھوتے کہیں تھا اپنا کم نا کرے سلام
 اٹھن کی نہیں ساہی رہی تے سارا کہیں مغرور ہے یوہ
 کے کے اپنی اوچر دسوں کے کے دسوں اپنا غم
 رنگو رنگ ہیں قضا میرا، میرا روگ ہیں گونا گون
 کیوں مخلص جھلپو ہوو ہے، کیوں پلا لیرو لیر کیا
 ویہ پلا پکڑیں گل پکھیں، ہوں پلا کھسوں کے دسوں
 اینویں توں دل رکھے میرو دل نا ہووے دل کی بھوم
 مٹھیں نچھ آجاتیں منا لگتیں میریں ہسیر کدے
 پکاؤ مال اگر ہو توتے کد مخلص کے ہتھ آتو
 خدایا شکر تیرو عشق بکتو نہیں بزاراں مانھ
 کسے موسم ماں نہیں جاتی رونق میرا باغاں کی
 بھاند آوے تے پھلیں بوٹا، غم ماں کھلیں میرا شعر
 زمانو تے تھو میرو ازلاں تیں بیری
 توں کس گل کا گن گن کے بدلا مکاوے

مولانا عبدالقیوم راز

پیدائش: اپریل 1944ء ہاڑی سُرکھوت پونچھ

مولانا عبدالقیوم راز صاحب نیا پڑنیا دینی عالم تے گوجری لکھاڑی ہیں۔ ویہ
۱۹۴۴ء مانھ پونچھ کا گراں ہاڑی مانھ مولانا محمد اسماعیل گورسی ہورسی ہوراں کے گھر پیدا
ہویا۔ جہڑا آپ وی اُس دور تے علاقہ کا جید عالم تھا۔ بیادی تعلیم گھر مانھ ہی حاصل کی
تے بعد مانھ دھلی تے دیوبند تیں سندھی۔

تعلیم تیں بعد دینی خدمت کا جذبہ نال کشمیر مانھ ہجرت کر لئی تے اُتے ترال
کشمیر مانھ مقیم ہو گیا۔ کافی عرصہ توڑی جماعت اسلامی کا مدرساں تے دارالحدیث سلفیہ
مانھ درس کی خدمت تیں بعد اچکل طبیعت خراب ہون کی وجہ تیں اپنے گھر ترال مانھ ہی
رہیں تے دینی درس کو سلسلووی جاری رکھیو و ہے۔

گوجری ادب مانھ ویہ ۱۹۷۵ء کی گوجری تحریک کے نال ہی شامل ہو یا تے
ریڈیو تے کلچرل اکیڈمی مانھ گوجری شعبا کھلو ان آلا مخلص قافلہ کے سنگ سنگ رہیا۔ تد
تیں ریڈیو تے کلچرل اکیڈمی کی مجلساں، کانفرنساں مانھ باقاعدہ شامل ہوتا رہیا ہیں۔
تے ان کو کلام ریڈیو تیں نشر ہون تیں علاوہ شیرازہ گوجری مانھ وی شائع ہوتو رہیو ہے۔
کلام کا نمونا:

بیت ۱:

کہنیے یار نا قاصدا حال میرو جد اُس دربار مانہ جائے گو توں
 مُرد جھب بہلو انگا گھل پھیرو، بیٹھو مل کے راہ کد آئے گو توں
 بکلیں اکھاں توں غم کا نیر چھم چھم کد دُکھ سیلاب سکائے گو توں
 لمی تاہنگ تھی میرا اداس دل نا، کوئے صبر کا جام پلائے گو توں

بیت ۲:

دُکھ غم تے سوز گداز دل کو، ہوویں جگر کا چیر لنگار اتھروں
 بدل جائیں طوفان اندھیرکت رہیں، کریں دُبیاں کا بیڑا پار اتھروں
 کچھ لہیں طناب زمین کی تاں، ہووے وصل تے دیں دیدار اتھروں
 عرش فرش زمین آسمان کہے، روئے جد مظلوم دکھیار اتھروں

باراں مانہ:

پوہ:

پیو فراق جدائیاں گو، رو رو دُکھ مانہ اکھ سُکائی ہیں میں
 بیٹھو ایکنو مار دیوار بُوہا، کئی عمر مانہ سدا جدائی ہیں میں
 سکھ کا یار نہیں دُکھ کا بھار بندتا، کئی وار یہ گل آزمائی ہیں میں
 لگورگ ہے راز پوہی سوگ منابس ہن ملن کی آس مکائی ہیں میں

مانہ:

ہوں مار اواز بلاؤں دس سچنا کد آنو ہے
 تیری اس جدائی مانہ میں رو رو حال گمانو ہے
 دُکھ دسوں تے گواہنڈی ہسین، سارو لوک بیگانو ہے
 راز ہم نے دس باجھ خدا کے، کس نا حال سنانو ہے

نظم:
برہیا

سوہنا مست اواز ہیں پنکھیاں کا سکو، بلبل تے گھگی مور برہیا
گلے برف مانی نیلو صاف پانی ٹرتی ندیاں کا پونیں شور برہیا
تتہ کٹی کی مرگ تے ناگ ویری آن جان رہے پونچھ راجور برہیا
لدھا دھار تے پیر کی ماہل اچی کوثر ناگ آباد تین کور برہیا
ماہو ہیر تے گیت شپاہی گا تا ماٹھی مہیس چاریں گلیں ٹور برہیا
چٹی ندی ڈسم تنن راہ نیرو دجی ڈھوک بے سیم کور برہیا
ماریا خزاں کا چور مجبور کیا جوگی بن پھریں ہوا خور برہیا
نیلیں مرگ نیزہ تلا ماہل دسیں چمکے دیس سوہنو اسے طور برہیا
لا دیس نارنگ سبزے زاریاں کو پھریں پھلاں نا سوگھتا بھور برہیا
گلرگ ادھی سوہنہ مرگ چھاڑی شالہ مار رہے سیر کو دور برہیا
خزاں دیس ناراز اجاڑ کر دے عاقل سوچتا رہیں کرتا غور برہیا

چودھری مختار الدین تبسم

پیدائش: 1944ء آلن گڈول امت ناگ

مختار الدین تبسم گوجری کا اُن مخلص تے باقاعدہ لکھاڑیاں بچوں ہیں۔ جہڑا ۱۹۷۵ء تیں شروع ہون آلی گوجری ادبی تحریک نال شامل رہیا ہیں۔ ویہ ۱۹۴۴ء مانھ آلن گڈول امت ناگ مانھ پیدا ہويا۔ بُنیادی تعلیم تیں بعد محکمہ سماجی بہبود مانھ ملازم ہو گیا تے اجکل سبکدوش ہو کے زبان تے قوم کی خدمت مانھ لگاوا ہیں۔

ان کو ادبی سفر ریڈیو کشمیر تے کلچرل اکیڈمی تیں گوجری شعبا کھلن کے نال ہی شروع ہو یو۔ ویہ اُن گوجری لکھاڑیاں بچوں ہیں جہاں نے اختیاری طور پر گوجری نثر کو میدان سمہالیو تے دلچسپی نال کہانی لکھنی شروع کیں۔ شیرازہ گوجری مانھ اُن کی کہانیں بڑی باقاعدگی نال شائع ہوتی رہی ہیں۔ تبسم گوجری کا معتبر کہانی کار شمار کیا جائیں۔ اُنھان نے گوجرا ماحول کا مسئلاں کی عکاسی تے اصلاح واسطے کہانی کی زبانی بڑی مخلص تے کامیاب کوشش کی ہیں۔

مختار الدین تبسم بُنیادی طور پر نثر نگار تے کہانی کار ہیں پر جدا انھان نے قلم کی مہار شاعری آلے پاسے موڑی تاں کجھ مُج ہی سوہنا گیت گوجری ادب کے حوالے کیا ہیں۔ جہڑا گیت کا کسے وی باقاعدہ شاعر کا مقابلہ مانھ رکھیا جا سکیں۔ انھان نے گوجری لوک ادب کی شیرازہ بندی مانھ وی وی اہم رول نبھایو ہے۔ اُن کی شاعری کی کتاب ”سنجھیلی“ سال ۲۰۰۳ء ماں شائع ہوئی تھی جد کہ اُن کی کہانیاں آلی کتاب ”کوسا اتھروں“ کا ناں نال جلدی ہی شائع ہون آلی ہے۔

گیت ا:

میں پھلاں نال نہیں پیار کیو
 میں کنڈاں نال نہیں پیر کیو
 میرا بجن دُشمن جیتا رہیں
 میری بیٹی کہانی کے چکھیں
 میری جان نمائی کے چکھیں
 میں روشن گل سنسار کیو
 میرا سنگی سارا تارا ہیں
 میرا سنگی دکھ پیارا ہیں
 زخماں کو کد شمار کیو
 وہ دیکھے چن اس ماہلی توں
 ہوں صدقے تیری لالی توں
 تیرا داغ نے بیقرار کیو
 مناسوئی لگے دھیازی رات
 دیکھوں پیو ماناں کی ساعت
 سہاگ کی رات اقرار کیو
 ہر اکن کو اعتبار کیو

گیت: ۲

ساری رات گنوہاں تارا
یاد کروں ہاں تیرا لارا
ساری رات گنوہاں تارا
مُو آؤ نہیں بے اعتبارا
نت پیار تیرا کی بھکھی
سڑتی جان غماں مانھ سکی
ساری رات گنوہاں تارا
ہویا لوک بیگانا سارا
کئی واری بھلیکھا کھاہدا
یاد کیا جد تیرا وعدا
ساری رات گنوہاں تارا
تاکی کھول اک بار پیارا
میں سڑ سڑ کے جانس کائی
بے دردا تیں مار مکائی
ساری رات گنوہاں تارا
مفت مانھ منا لا کے لارا

گیت: ۳

بنگ لینی بازاراں ماں
بنگ بھری ہوئی بٹنی ہے
گوری چٹا چٹا دند تیرا
تیری جھکیاں ماں آؤں گو
گوری ہس کے توں مکھ دس جا
پھل پھلیا بہاراں ماں
بتا ڈھونڈوں گو ہنگراں ماں
طعنہ لوکاں کا سر جھلیا
دُده جیہا ہتھ تیرا سوہنی شکل ہزاراں ماں
چکھو تیرو کد چھوڑون بھاویں جان وی دینی ہے
موتیاں کا لڑ لایا کالا بال پسند تیر
اگ لاؤں شہراں نا، سونہ مرگ بساؤں گو
اک پردیسی نا گھڑی پل کوئے سکھ دس جا
کالا بالاں نارکھ اُفراں چن چمکے گوتاراں ماں
ہری ہری ماہلیاں ماں اسمان کا کنگراں ماں
تیریاں اڈیاں ماں راہ چھوڑ کے پل ملیا

گیت ۴:

اک بیچارو پنچھی اڈتو
 رو رو جھٹکے گیت رے
 ہائے ربا میرو میت رے
 عمراں کو وہ سنگی میرو
 گم گیو دل جیت رے
 ہائے ربا میرو میت رے
 خوشمیں خوشمیں پریت میں لائی
 گایا خوشی کا گیت رے
 ہائے ربا میرو میت رے
 دکھ سکھ جھلنا رسم پرانی
 دنیا کی یاہ ریت رے
 ہائے ربا میرو میت رے
 دل اپنو تھو پیار پراپو
 وقت گیو ہن بیت رے
 ہائے ربا میرو میت رے
 پیار کا باغ ماں پھل لوایا
 بلبل کا سنگیت رے
 ہائے ربا میرو میت رے

گیت ۵:

گنگا کیاں ماہلیاں ماں لگو سوہنو چن رے
 لے جاتوں ماہی میرے کولوں تن من رے
 گنگا کیاں ماہلیاں ماں لگو سوہنو چن رے
 تک تک راہ تیرا ہو گئی تنگ رے
 واسطو ہے رب کو توں آجا میرے سنگ رے
 گنگا کیاں ماہلیاں ماں لگو سوہنو چن رے
 ٹھنڈو ٹھنڈو پانی نالے برفاں کا چھنج رے
 گٹ گٹ پوری رکھوں ماہی باجھ تنگ رے
 گنگا کیاں ماہلیاں ماں لگو سوہنو چن رے
 سیل وی سراں کو نالے دیکھاں ہر مکھ رے
 چن کی رات بیساں بنڈاں دکھ سکھ رے
 گنگا کیاں ماہلیاں ماں لگو سوہنو چن رے
 پکا پکا قول سارا کیوں گیو بھل رے
 سچیاں محبتاں کو کھوٹو کیو منل رے
 گنگا کیاں ماہلیاں ماں لگو سوہنو چن رے
 ماہلیاں ماں ٹھنڈ ہوئی بدلاں کا چھم رے
 اکھ میری نت روئیں ماہی تیرو غم رے
 گنگا کیاں ماہلیاں ماں لگو سوہنو چن رے

D:\Writers
org\MH
Saleem.jpg
not found.

چودھری محمد حسین سلیم

پیدائش 1944ء مڑھوٹ پونچھ

قوم کا پڑھیا لکھیا سیاسی تے سماجی کارکن تے وکیل ہون کے نال نال
محمد حسین سلیم حکمہ تعلیم مانھ گوجر ہوٹل کا وارڈن تے گوجری کا ادبی حلقاں
مانھ نامور کہانی کار کی شناخت رکھیں۔ ویہ ۱۹۴۴ء مانھ ضلع پونچھ کا
مڑھوٹ گراں مانھ اک بھٹی خاندان مانھ پیدا ہو یا۔ بنیادی تعلیم تیں بعد
حکمہ تعلیم مانھ استاد کی حیثیت نال ملازمت شروع کی تے اپنی تعلیم کو سلسلو
وی جاری رکھیو۔ بعد مانھ پرائیویٹ طور پر ایم اے تے فوجوں یونیورسٹی
تیں ایل ایل بی کی ڈگری وی لئی۔ سرکاری ملازمت کے دوران ۱۹۸۰ء تیں
اُراں زیادہ عرصہ واسطے ریاست کا مختلف ضلعاں مانھ گوجر ہوٹل کا وارڈن
رہیا ہیں تے اسے حیثیت نال سال ۲۰۰۲ء مانھ کٹھوہ تیں ریٹائر ہو کے
اجکل سیاسی، سماجی تے دینی خدمت کے نال نال سرنکوٹ مانھ وکالت کریں
لگاوا۔

محمد حسین سلیم اُن ذہین، حساس تے باصلاحیت گوجر سپوتاں وچوں ہیں
جہڑا جدید گوجری تحریک مانھ جوش جذبہ نال داخل ہو یا تے ریڈیو کشمیر تے
کلچرل اکیڈمی کی مجلساں مانھ باقاعدگی نال شامل ہوتا رہیا۔ ریڈیو
کشمیر جوں تیں فیض کسانہ کی سرپرستی مانھ نشر ہون آلا طنز و مزاح کا
سلسلہ پر مدت توڑی امین قمر تے محمد حسین سلیم کی حکمرانی رہی تے لوکاں نا

ان کو مضمون مثل کی رفتار تقریباً زبانی یاد ہو گیا تھو۔

محمد حسین سلیم نے گوجری مانہ کئی تحقیقی تے تنقیدی مضمون وی لکھیا ہیں پر گوجری ادب مانہ اُن کی اصل پچھان افسانہ نگار کی حیثیت نال ہے۔ اُن کی کہانیاں ریڈیو تیں نشر ہون کے نال نال شیرازہ گوجری مانہ باقاعدہ شائع ہوتی رہی ہیں۔ ان کو موضوع اکثر سماجی نا انصافیاں کو رہو ہے تے اس سلسلہ مانہ اُنھاں نے کجھ مچ ہی سوئی کہانیاں گوجری ادب کے حوالے کی ہیں۔ خاص طور پر اُن کی کہانی ”لاڈلی“، ”پیر کرامت شاہ“، ”بیکلی“ تے ”کتن آئی چئیں“ پڑھن سنن جوگی ہیں۔

سلیم صاحب کی یہ سب خوب صورت کہانیاں اجمہاں کتابی صورت مانہ شائع نہیں ہو سکیں حالان کہ کدے اس پاسے دھیان دیتا تاں اُنھاں واسطے یوہ کوئے مشکل کم نہیں تھو۔ گوجر ہو سٹل مانہ عرصہ توڑی وارڈن رہن کے دوران اُن کا تخلیقی سفر مانہ وی ڈھلایا ئیں آگئی تھی۔ پر اُمید کراں جے اپنی کتاب شائع کرن تیں علاوہ ہن فرصت نال ویہ گوجری ادب کی ہو روی بہتر خدمت کریں گا۔

ڈاکٹر جگدیش چندر شرما

پیدائش: 10.6.1944: چلکانہ، پانی پت

ڈاکٹر جگدیش چندر شرما ملک کانیا پڑھیا ماہر لسانیات ہیں۔ ویہ جون ۱۹۴۴ء مانہ پنجاب کا ضلع پانی پت کا گراں چلکانہ مانہ پیدا ہو یا (یہ تمام علاقہ اجکل ریاست ہریانہ کا حصہ ہیں) تے دسویں توڑی کی تعلیم موضع سماکھ مانہ حاصل کی۔ اس توں بعد کوروش کوشیتر یونیورسٹی تیں ۱۹۶۵ء مانہ بی اے، ۱۹۶۷ء مانہ ایم اے تے فر ۱۹۷۲ء مانہ لسانیات مانہ ڈاکٹریٹ کی ڈگری لئی۔

جے سی شرما صاحب نے ۱۹۷۴ء مانہ بھارتی زبانوں کا مرکزی ادارہ CIIL مانہ محقق تے لیکچرار کی حیثیت نال ملازمت شروع کی جت ویہ اج تریہ سال کی تحقیق کے نال ترقی کرتا کرتا پروفیسر تے اسے ادارہ کا ڈپٹی ڈائریکٹر کے طور ذمے داری نبھادیں لگاوا۔ اس سفر کے دوران انہاں نے تقریباً بیہ کتاب تے پنجاہ تیں زیادہ تحقیقی مقالہ لکھیا ہیں۔ قبیلوں کی زندگی تے زبانوں بارے تحقیق انہاں گومن پسند موضوع رہو ہے تے اس سلسلہ مانہ ویہ گوجری زبان مانہ سنجیدگی نال بنیادی تحقیق کرن آلا سب توں اہم شخص ہیں۔

انہاں نے ۱۹۷۲-۷۳ء مانہ گوجری زبان پر گرائمر تے صوتیات تیں متعلق تحقیق شروع کی تھی جہوی بعد مانہ بھارتی زبانوں کا مرکزی ادارہ CIIL کی

طرفوں ۱۹۷۹ء مانھ گوجری صوتیات (Gojri Phonetic Reader) تے ۱۹۸۲ء مانھ گوجری گرامر (Gojri Grammar) کا ناں نال شائع ہوئیں۔ جدید گوجری ادب کی تحریک صحیح معناں مانھ جے سی شرما ہوراں کا اس نیک بُنیا دی کم تیں بعد ہی شروع ہوئی۔ جہڑی اسو پلے جوانی کا عالم مانھ ہے۔ تے اس طرح جدید گوجری کو ہر لکھاڑی تے تحقیق کرن آلو ہمیشاں واسطے ان کو احسان مندرہ گو۔

اس توں بعد وی انہاں نے گوجری زباناں ناطو نہیں توڑ پوتے گوجری تیں متعلق انہاں کا کئیں تحقیقی مقالا مختلف کتاباں تے رسالاں مانھ شائع ہوتا رہیا ہیں جن مانھ راجستھانی تے دوجی زباناں نال گوجری کی سنجھیالی تے لسانیات تیں متعلق گوجری زبان کی باریکی شامل ہیں۔ اج وی گوجری مانھ تحریر تے تحقیق کا ہر اک طالب علم تے لکھاڑی کی رہنمائی واسطے ویہ ہر ویلے ہستا متھاناں تیار رہیں۔

D:\Writers
org\arif.jpg
not found.

چودھری عبدالغنی عارف

پیدائش: جون 1944ء اندروٹھ (بگلہ نڈیالہ) راجوری
گوجری کا ہمدرد تے مخلص شاعر تے ادیب عبدالغنی عارف ۱۹۳۳ء مانہ راجوری کا
گراں اندروٹھ مانہ چوہدری محمد اسماعیل بجران ہوراں کے گھر پیدا ہويا۔ بچپن اتے گزارو
تے بنیادی تعلیم وی اتے حاصل کی پر شادی تیں بعد بابانگری وانگت مانہ نوں بھرت کی جے
ہمیشاں واسطے اُتے کا ہو کے رہ گیا۔

بچپن تیں ہی اسرائیل آرتے اقبال عظیم ہوراں کی سنگت نصیب ہوئی تے یوں
گوجری زبان کی ترقی واسطے انجمن ترقی گوجری زبان وادب قائم کر کے گوجری مجلس، شعرو
شاعری تے ریڈیو کشمیر تے کلچرل اکیڈمی مانہ گوجری شعبا کھولن واسطے کی جان آلی کوششاں
مانہ خلوص نال شامل رہیا۔ تے فر کشمیر مانہ قائم ہون آلی ”ادبی سنگت کشمیر“ مانہ وی جوش
جذبہ نال کم کیو۔

عارف مخلص تے حساس گوجری لکھاڑی ہیں جہڑا باقاعدگی نال گوجری تحریک نال
شامل رہیا ہیں تے ریڈیو یا اکیڈمی کی ہر مجلس تے کانفرنس مانہ شامل رہیں۔ بنیادی طور پر شاعر
ہیں پر کجھ کہانیں تے تحقیقی مقالا وی لکھیا ہیں۔ تے کلچرل اکیڈمی کی طرفوں چھاپی جان آلی
گوجری ڈکشنری تے لوک ادب کی شیرازہ بندی مانہ جوش جذبہ نال شامل رہیا ہیں۔
اسرائیل آرتے اقبال عظیم تے نسیم پونچھی ناٹج نیڑے تیں دیکھن، سُنن تے پڑھن آلا
غنی عارف نا جنید نظامی کی رہنمائی وی حاصل رہی ہے۔ ان کو خلوص شخصیت ہاروں اُن کی
تحریراں مانہ وی اُمتوسئی لگے۔ غزل، نظم تے گیتاں آلی اُن کی پہلی کتاب ”مہمرا چھاں“ نا

ریاستی کلچرل اکیڈمی کی طرفوں بہترین کتاب کو ایوارڈ وی ملو ہے۔ اُس تیں بعد کی گوجری شاعری دوجی کتاب کی شکل مانھ چھاپن کی تیاری مانھ لگاواہیں۔

غنی عارف اُن خوش بخت لوکاں وچوں ہیں جھماں نے زندگی کا کسے مقام پروی تخلیقی میدان تیں ہٹن یا تھک کے مین کی گل کدے نہیں سوچی تے ہمیشاں اپنی ٹور ٹار تارہیا ہیں۔ ویہ گوجری زبان تے ادب واسطے سچ سچ اک قیمتی سرمایو ہیں۔

کلام کا نمونا: نعت:

مدینے بکلا لے مدینہ کا والی
تیرا در پر آو ہوں اک سوالی
مدینے بکلا لے مدینہ کا والی
بخش دے خطا جے ہوں مچ نکارو
بخش بنا نہیں کوئے بھی چارو
اس در تیں کوئے مڑیو نہیں خالی
مدینے بکلا لے مدینہ کا والی
ڈک ڈک کے رکھے یاہ قسمت نکاری
دل تیں نہیں ہرگز یاد میں بساری
تاہنگ اُس بوہا کی رہ نت نرالی
مدینے بکلا لے مدینہ کا والی
اس در کا کوچا تے گلیاں کے صدقے
میناراں کی لائاں بلیاں کے صدقے
عرض گل سناتو پکڑ کے واہ جالی
مدینے بکلا لے مدینہ کا والی

نعت ۲:

کے سوئی محمد ﷺ کی شان اللہ اللہ
بخش کے ہے تو قرآن اللہ اللہ
ہے سوئی محمد ﷺ کی شان اللہ اللہ

سلا ماں دروداں کی بارش برہاؤں
مدینہ کا آقا تیں صدقے ہوں جاؤں

ہے قربان جند میری جان اللہ اللہ
ہے سوئی محمد ﷺ کی شان اللہ اللہ

مدینہ کی گلیاں کو ہوں بھی بھکاری
ہواؤ عرض تم نے کیوں نہیں گذاری

دیہہ ہو جاتا فر مہربان اللہ اللہ
ہے سوئی محمد ﷺ کی شان اللہ اللہ

ہے تقدیر نوکر قضا تھاری آقا
خدا خود بھی چاہے رضا تھاری آقا

ہے دُنیا کے اُپر احسان اللہ اللہ
ہے سوئی محمد ﷺ کی شان اللہ اللہ

یوہ عملاں کو گھاٹو مایوسی لیائے
میری آس پل پل پل ہو ہلائے

تے آقا نا دوڑے بلان اللہ اللہ
ہے سوئی محمد ﷺ کی شان اللہ اللہ

یاہ جھولی ہے سکھنی تے کرماں ناڈیکے
قلب کی غلاظت نامت کوئے لے کے

اسے ہتھ ہے ساری کمان اللہ اللہ
ہے سوئی محمد ﷺ کی شان اللہ اللہ

سی حرفی:

لام:

لوڑ کس کی کریں اکھ بھیڑیں گور گور کے چار چوہر دیکھیں
 محرم دلاں کا گیا ہیں چھپ کتے دن رات یا شام سویر دیکھیں
 گمیاں پھل ٹولیاں کد لہیں، جھلی اکھ موتی گھمن گھیر دیکھیں
 عارف گمیاں چن ناہوں لوڑوں، شانداکھ ہن قسمت کو پھیر دیکھیں

باراں مانہ:

کتک کانگ کائے آئی طوفان بن کے، دتا روہڑ سب شان گمان چنا
 منگھر پیا ہندکھ ہزار مگر، لیا لٹ ویہ مان تران چنا
 پوہ پوہ ہن عمر نصیب رونو، محرم دلاں کا ہوا روان چنا
 مانہ مرن جیون عارف نال کس کے، دے سب جہان ویران چنا

مہکن پھل کھلنا مہاری کس کاری، اپنا باغ کی بہار ہن گئی ہوئی ہے
 دے آس امید کی جا خالی، چیت چاہ چروکئی رہی ہوئی ہے
 سارو ملک ویران اُجاڑ دے، اجکل ات بساکھ وی بھی ہوئی ہے
 غماں پٹھ ہن جیٹھ دُبا دتا، ضرب بجر عارف سینے سہی ہوئی ہے

گیو ہاڑ لتاڑ اُجاڑ کر کے، پچھے کون ہم نا اجکل ڈھولا
 ساون سکھ کولہنوں ہو پو مہنگو، اوکھا دسین ہن یہ لمبل ڈھولا
 بھلیں بھادرے کد لنگار دل کا، لوک ٹوک لائیں ہر ہر گل ڈھولا
 اُسو آس چروکئی مک گئی، گیو سال عارف جل جل ڈھولا

غزل ۱:

لٹ گئی واہ تیری ادا بلیں بلیں
یہ اسکی عنایت کیس کجھ اک نشانی
ٹٹیا وا دل کیس پھینکر یہ ساریں
وہ میرو خدا بے سہاراں کو مالک
میری اس بہتی کی یاہی سرحد ہے

غزل ۲:

چھوڑ کے ات یار نہ جا
تیری رتجھ نے ات پچپائی
منت منی کاگ اڈایا
ساہ گو کوئے بساہ نہیں اڑیا
دندکن پے گیا تے خبرے

غزل ۳:

برف کی چٹی رات کی قسمیں
اس نے ساریں رتجھ گمائیں
عمر گذاری جھکتاں جھکتاں
اسے ساہی پر جیتو رہو
چان کی بارات کی قسمیں
نظراں کی سوغات کی قسمیں
وصل کی اس رات کی قسمیں
آساں کی سوغات کی قسمیں
ساون کی برسات کی قسمیں

گیت:

فر مُڑ آئی برہیا برہیا
 آس کا پتر ہریا ہریا
 تیں میرا مُڑ مان نہ کریا
 فر مُڑ آئی برہیا برہیا

بیسوں چڑھ کے سیل کی ڈھیری
 تھی جت سانجھ تیری تے میری
 تیں مُڑ انگا خیال نہ کریا
 فر مُڑ آئی برہیا برہیا

پانہ بھروں تے مُڑ مُڑ ہیروں
 مت وہ لنگھے راہ کے پھیروں
 راہ ڈھوکاں کا شاد نہ کریا
 فر مُڑ آئی برہیا برہیا

چلوں ساگ نا گھل مگھی
 مُڑ مُڑ راہ در دوڑوں بھلی
 میرے بر احسان نہ دھریا
 فر مُڑ آئی برہیا برہیا

میوا لب تیری کا پکیا
 پتر ٹوپاں واسطے کپیا
 اکھ کا ڈولن یاد مانھ بھریا
 فر مُڑ آئی برہیا برہیا

ڈیک مانھ کئی پکوان پکاؤں
 راہ مانھ اینویں بانھل ڈاہوں
 مکھن ددھ ملائی دھریا
 فر مُڑ آئی برہیا برہیا

اچھی چھلی آس کی ٹیروں
 گل مانھ مہنڈی کھلی کھلی
 تھو توں دُور تے پونج نہ سکیا
 ادہ نہیں لہتو جس نا چاہوں

D:\Writers
org\bagri.jpg
not found.

چودھری برکت علی باگڑی

پیدائش 1945ء، بجالتہ، جموں

برکت علی باگڑی گوجری کا پرانا نامہ روتے لکھاڑی ہیں۔ ویہ ۱۹۴۵ء ماہہ جموں کا
مجالۃ گراں ماہہ پیدا ہويا۔ بچپن تیں ہی ملکی تقسیم تے افراتفری کو ماحول دیکھنو پیواس گلوں
زیادہ تعلیم وی نہیں حاصل کر سکیا۔

جدید گوجری ادب کی تحریک سنگ شروع تیں ہی بڑا خلوص نال جڑیا رہیا ہیں۔
ریڈیو، ٹی وی، تے کلچرل اکیڈمی کی تمام مجلساں ماہہ باقاعدگی نال تے نمایاں طور پر شامل ہوتا
رہیا ہیں۔ ادبی زندگی ماہہ زیادہ دھیان شاعری آلے پاسے رکھیو ہے تے ان کی زبان تے
تحریر ماہہ جموں کو لہجہ باندے نظر آوے۔ یوہ رنگ گوجری ناہور ہی گھونہر و بناوے۔

دُنیا ہاروں گوجری لکھاڑیاں ماہہ وی نت نویں تبدیلی آتی رہی ہیں۔ تے پچھلا
تریہ (۳۰) سالوں ماہہ گوجری کی مجلس ماہہ کئی نواں لکھاڑی آیتے گیا پر برکت علی باگڑی کی
مستقل مزاجی تے خلوص ماہہ ذرا فرق نہیں آویو۔ گوجری زبان تے ادب واسطے انہاں کو
جوش تے جذبہ و اج وی جوان ہے۔

نظم:
سائھی دھرتی

یاہ سائھی دھرتی مہاری ہے یاہ دھرتی جان تیں پیاری ہے
یاہ دھرتی تے ماں ہے سب کی ماں تے ٹھنڈی چھاں ہے سب کی
جیتاں نا یاہ ذوق کھلاوے سویاں نا وی گود سلاوے
یاہ سائھی دھرتی مہاری ہے یاہ دھرتی جان تیں پیاری ہے

دُنیا

ات سدا نہیں کسے نے بیس رہنو آخر جانو ہے اس جہان وچوں
دردِ دل تے خدمتِ خلق کر لے مٹھو بولے سدا زبان بچوں
اوڑک ہونو ہے مٹی کو ڈھیر سب نے روح اڈ جانو چند جان بچوں
برکت علی نہ کرے گمان اتنو خالی جانو تیں جگ جہان وچوں

آخرت

سچ جھوٹ متا رپو جائے گو ات واہ عدالت تے سچی سرکار کی ہے
کوئے وکیل تے نہ اپیل چلنی واہ کپہری پاک غفار کی ہے
لکھو اسکو کوئے نہیں مٹا سکتو اچی شان سچا پروردگار کی ہے
برکت علی نہیں گجھ وی سنگ جانو جھوٹی دولت یاہ جگ سنسار کی ہے

ماسٹر عبدالغنی

پیدائش: 1945ء کلائی پونچھ

ماسٹر عبدالغنی کلائی پونچھ کا رہن آلا ہیں۔ ویرہ ۱۹۴۵ء مانھ اک چچی گھرانہ مانھ پیدا ہويا۔ بُیادی تعلیم اتے حاصل کی تے محکمہ تعلیم مانھ مدرس کے طور ملازمت شروع کر لئی۔ بعد مانھ بی اے تے فر پرائیویٹ طور پر اردو مانھ ایم اے کی ڈگری لئی۔ عرصہ توڑی اردو کا اُستاد کی ذمے داری نبھان تیں بعد پچھلے سال ہیڈ ماسٹر کے طور سرکاری ملازمت تیں سبکدوش ہو یا ہیں۔

گوجری ادم مانھ انھاں نے تھوڑو چر کو قدم رکھيو پر ساری عمر اردو ادب نال جھڑو رشتور ہو ہے اسکی وجہ تیں شاعری کا سب اصول تے ضابطا انھاں ناسی تھا اسطر ح اُن کی گوجری شاعری مانھ وی کوئے فنی جھول نہیں دستو۔ شاعری مانھ ویہ غزل کا میدان تیں باہر نہیں گیا۔ تے کجھ سوہنی تے سُتھری غزل گوجری ادب کے حوالے کی ہیں۔ انھاں نے تھوڑو مگر سوہنو لکھيو ہے۔ انھاں کو کلام گوجری مشاعر اں مانھ وی سُنن آلاں نے پسند کیو ہے تے شیرازہ گوجری مانھ وی شائع ہو تو رہيو ہے۔ ہُن انھاں نا بہل نصیب ہوئی ہے تے امید کراں جے ویہ گوجری ادب کی بہتر خدمت کے نال نال نواں لکھن آلاں کی رہنمائی وی کریں گا۔

ق:

یاہ میری نیک نیتی ہے جے تیری آس پر جیوں
 نہیں تے ہوں وی دُنیا مانھ ہزاراں آسرا رکھوں
 تیرا سینہ مانھ کے ہے، وہ خدا جانے یا جان آپے
 ہوں اپنی صاف کہ چھوڑوں جے ہوں سینو صفا رکھوں

☆ طرب احمد صدیقی

☆ تعارف: رانا فضل حسین راجوروی

”انکو اصلی ناں پروفیسر محمد امین ہے، قلمی ناں طرب احمد صدیقی ہے تے حال ہی
مانھ ڈگری کالج جہلم تیں ریٹائر ہو یا ہیں۔ ویہ کھٹانہ گوجر ہیں تے علاقہ کالا گجراں کا قدیمی باسی
ہیں۔ پہلاں تیں میاں لکھیا جائیں۔ اردو پنجابی تے گوجری کاسو ہنشااعر ہیں۔“ پیش ہیں انکا
گوجری کلام کا نمونہ:

نظم: ”امید“

اک سوئی موئی صورت بے میرے نال
جیویں پھل کپاہ کو کھڑ کھڑ ہسے میرے نال

میرا بسا کے بچ نچے نشہ کی اک لہر
میرے لئی واہ ٹھنڈی چھاں ہے اندر ش، کھر دوپہر

دل بچ ادھ کھلیاں کلیاں کی ننھی جئی خوشبو
میرے چار چوہیرے نھیرا نھیراں بچ اک لو

غزل ۱:

یاد سخن کی دل نا چو بھالائے رے
 بے اک نگھتی نظروی اس نادیکھ لیوں
 دل تیں نقشِ محبت آلا نہیں مٹتا
 اپنا جمیاں اپنے ڈھڈیں پالیا رے
 رات وے تے نیندر کس نا آئے رے
 دنیا کے کے بھل بھلیکھا پائے رے
 جنڈی بھادیں پل پل سنگ بٹائے رے
 دھرتی سہنی ہاروں بچہ کھائے رے
 اکھ کی پھڑکن کائے گل جتائے رے
 دل ڈبے رے اج طرب جی خیر نہیں

غزل ۲:

ڈکھ اندر کو آکھ سناپو مسیں مسیں
 بہتی چپ وی اپنو جسو لو ہے رے
 دل کو چانن چٹتا جچ اندھیرا ماں
 سدھر سفنا آس پیاس کے نال طرب
 میں اکھر کو روپ بٹاپو مسیں مسیں
 ڈکھ سکھ پھولن کو بل آپو مسیں مسیں
 رتیں رتو پھل کھڑاپو مسیں مسیں
 ہم نے دل کو شہر بساپو مسیں مسیں

غزل ۳:

گل بلا کے کرن کو موسم نہیں
 سنا جذبا جگان کی رت ہے
 دیکھ وصلوں نا جاگتی اکھیں
 دے دوہائی جے جان لئے خلقت
 بیلیو ہن ڈرن کو موسم نہیں
 نوں ہی ہوکا بھرن کو موسم نہیں
 سفناں ماں ترن کو موسم نہیں
 چپ چپتاں مرن کو موسم نہیں
 صرف وعدے جرن کو موسم نہیں
 گل مکایے طرب تے مکے رے

غزل:۴

ڈھیری ڈھا جو بہہ جائے رے راہواں کے بچ رہ جائے رے
 سچ تے گور ازل کا پیری نال اک دو بے کھہہ جائے رے
 کدے کدائیں جھل بللو کم کی گل دی کہہ جائے رے
 پوہ پھٹے تے دینہہ چڑھے رے نصیر و قبر ماں لہہ جائے رے
 لسا کے گل جہڑو پوئے ڈاڈا اگے چھہہ جائے رے
 سپاں ڈنگیو ڈرتو ہی رہے رسیں تک تریہہ جائے رے
 اوہی رے سکھ جھولی پائے دکھ طرب جو سہہ جائے رے

گیت:

ڈاڈا روگ پرایا چندے ڈاڈا روگ پرایا
 ان روگاں نے تن من بلیو اندر غم کو بھانبر بلیو
 اکھاں ساون لایا ڈاڈا روگ پرایا
 نیوں کو رستو ہے ان پدھر سفنا ہیں ترہایا
 ٹنٹیں کچ کے ہاروں سدھر ڈاڈا روگ پرایا
 جذبا مٹیو مٹی زلیا کنڈا جھولی پایا
 پیار کا رُکھ نہ پھلیا پھلیا ڈاڈا روگ پرایا

D:\Writers
rg\mushsi.jp
not found.

منشی خان چودھری

پیدائش: 4 جون 1946ء پلانگڑ راجوری

گوجراماحول مانھ پیدائش کے وقت جاتک کاکن مانھ اذان دین کارواج کی پابندی ہوئے یا نہ منشی خان چودھری کی اواز ہرکونے باقاعدگی نال سُنے تے شاید اسے گلوں انھاں ناریاست کو بچو بچو جانے۔ انھاں ناماسٹر جی کافرہی نال نال ریڈیو کشمیر جموں تیں قوم تے زبان کی زبانی خدمت کرتاں ہُن قریب تریہ سال ہو گیا ہیں۔

ویہ ۱۹۴۶ء مانھ راجوری کا پلانگڑ گراں مانھ اک کسانہ خاندان مانھ پیدا ہو یا۔ بنیادی تعلیم اتے حاصل کی تے فرایم اے تے ایل ایل بی کی ڈگری لین تیں بعد ۱۹۷۷ء مانھ ریڈیو کشمیر جموں کا گوجری شعبہ مانھ اناؤنسر کی حیثیت نال ملازم ہو گیا جت ویہ ارج تک اپنی ذبے داری بڑی خوبصورتی نال نبھاویں لگاوا۔ سیاست تے سماجیات مانھ مہارت رکھن آل منشی خان چودھری گوجر ادب مانھ وی گجھی ول چھی رکھیں۔ تے ریڈیو کی نشریات تیں علاوہ ریاستی کلچرل اکیڈمی کی مجلساں مانھ وی باقاعدگی نال شامل ہوتا رہیا ہیں۔

گوجری ادب مانھ انھاں نے نظم، گیت، کہانیں تے تحقیقی مقالاسب گجھ لکھیو ہے تے اُنکا یہ شہ پارہ شیرازہ گوجری مانھ شائع ہوتا رہیا ہیں۔ تقریر ہاروں اُن کی تحریر مانھ وی انقلابی پہلو نمایاں لھے۔ تے ویہ اپنی سستی، انگھلیٹی قوم کا اجڑنا نہ دھونگ جگان تے رچھاں بھگیاڑاں تیں بچان واسطے ہر ویلے بے تاب سئی لگیں۔ نوکری کی بیڑی نہ پی ہوتیں تاں قوم کا اس سپوت مانھ چودھری غلام حسین لسانوی تے فیض حسین انقلاب کارستا پر چل کے مچ گجھ

کردن کی صلاحیت موجود تھی۔ مہاری یا ہی دُعا ہے۔ جے اللہ انھاں نا خلوص تے مہلت دئے
تیں جے ویہ اس ادھورا کم نا کمل کرن کے نال نال گوجری ادب کی وی بہتر خدمت کر سکیں۔

کلام:

سی حرئی:

ف:

فجر تے شام دوپہر دیکھوں، اکھ نوں ہی بلیں پل پل اڑیا
تیرا ہجر جدائی کے نال مینا، لگیں کالجہ مانھ سو سوسل اڑیا
کدے پا پھیرو دیکھ حال میرو، دیہاڑی رات دیکھوں رستامل اڑیا
منشی ڈیکے غلام فقیر تیرو، کدے بیس جاپئے پھیرو گھل اڑیا
منشی خان کسانہ ہور سچ نا کوٹھاپر چڑھ کے کہن کا حق ماں ہیں تے کوٹھاپروں انھاں نا نا انصافی
کی سچ ساری گل پتو لگیں جن ور ہور نا کی گھٹ نظری پی ہے۔ ویہہ ایک جگہ لکھیں۔

اُن کی بلیں ماس نہیں کھائیں

پردہ وچوں باہر نہیں آتیں

کار بغیر ہوا نہیں کھاتیں

سینما با جھ نہیں موج مناتیں

کتا پچھے لاؤں گو تھارے کونے آؤں گو!

تھارا حق دواؤں گوتے تھارے کونے آؤں گو

D:\Writers
org\faiz.jpg
not found.

چودھری فیض کسانہ

پیدائش: 22 جون 1946ء ریکہ جموں

جدی گوجری زبان تے ادب ناعام کرن مانھ ریڈیو کشمیر کی فربانی نہیں بھلائی جا سکتی، چتوں 1969ء (کشمیر) تے 1975ء (جموں) تیں گوجری نشریات شروع ہوئیں۔ گوجری کا عام پڑھن سنن آلاں ناریڈیو کوناں آتاں ہی فیض کسانہ کی شکل اکھاں آگے آجائے جھان نے عرصہ تک ریڈیو کشمیر جموں تیں قوم تے زبان کی خدمت کی ہے۔

فیض حسین کسانہ جون 1946ء مانھ جموں کا علاقہ ریکہ مانھ پیدا ہویا۔ بچپن گوجرا ماحول مانھ گذریوتے اتے ہی بی اے تک تعلیم حاصل کی۔ 1975ء مانھ ریڈیو کشمیر جموں تیں گوجری نشریات شروع ہوتاں ہی ویہ پروڈیوسر کی حیثیت نال ریڈیو کا عملہ مانھ شامل ہویا۔ آج ترقی کر کے ویہ سٹیشن ڈائریکٹر بن گیا ہیں تے گوالیار (مدھیہ پردیش) مانھ تعینات ہیں۔

گوجری لوک ادب کی صدا بندی تے نشریات تیں علاوہ نواں لکھاڑیاں کولوں نویں نویں تے قسم قسم کی تحریر لکھا کے گوجری مانھ سنن آلاں کی دلچسپی قائم رکھ مانھ فیض کسانہ نا کمال حاصل ہے۔ اُن کو دور ریڈیو کشمیر تیں گوجری نشریات کو سنہری دور کہو جا سکے۔ اُنھاں نا ادب تے ادیب کی جہڑی پرکھتی، بڑا گھٹ لوکاں نا نصیب ہوئے۔

امین قمر، محمد حسین سلیم، محمود رانا تے غلام رسول اصغر جیہا معتبر گوجری لکھاڑی اصل مانھ فیض کسانہ کی دریافت ہیں۔ اُنھاں نے یہ نوجوان گوجری ادب آلے پاسے موڑیا تے ان کولوں کئی تحقیقی مقالا، کہانی تے انشائیہ لکھوایا۔ اُس دور کا گل بات کا دلچسپ عنوان اجنگ لوکاں نا پرچاویں۔ پرافسوس کی گل ہے جے بھتو ادب انھاں نے تخلیق کروا یو وہ سب ہوا مانھ

اُڈ گیو۔ ویہ انشائیہ، مقالائے کہانیں، کدے کتابی شکل مانھ محفوظ ہو جاتا تاں گوجری ادب مانھ بڑواہم اضافو ثابت ہو سکیں تھا۔

فیض کسانہ ہوراں نے آپ وی کجھ شاعری کی ہے۔ تھوڑی شاعری ہے پر لوک گیتاں کی طرز پر لکھیا و اُنکا کجھ خوبصورت گیت اجھاں وی اکثر ریڈیو کشمیر تیں نشر ہوتا رہیں۔

گیت ا:

چن میرو چڑھیو رے اُپر پہاڑیں
طعنا بھیڑی سنگناں کا کالجہ نا ساڑیں
ملتیے ضرور میری جان

چن میرو چڑھیو رے ککراں تیں اوہلے
سکھنے بنیرے ربا کاں کد بولے
ملتیے ضرور میری جان

چن میرو چڑھیو تے بدل وی چھایا
درد نمانا کد چھپیا چھپایا
ملتیے ضرور میری جان

چن میرو چڑھیو ہے اُپر رے کھیری
چار چوہیرے لے جگ سارو بیری
ملتیے ضرور میری جان او

گیت ۲:

باہل کو ڈیرو
 ہے ویرا تیرو
 رہسیں نیہہ میرو
 میں مڑات نیہہ آنو
 باہل دھیاں ٹر جانو

ویراں کی پیاری
 اماں کی دلاری
 رہسوں نیہہ تھاری
 میں مڑات نیہہ آنو
 باہل دھیاں ٹر جانو

باہل کی گلی
 سیاں نے ملی
 چلی ہوں اگلی
 میں مڑات نیہہ آنو
 باہل دھیاں ٹر جانو

پردیس مناں جانو
 دچھوڑو پیو سہنو
 دلاسو کس دینو
 میں مڑات نیہہ آنو
 باہل دھیاں ٹر جانو

دور بنے ڈیرو
 باہل دئے پھیرو
 چھے منا کہرو
 میں مڑات نیہہ آنو
 باہل دھیاں ٹر جانو

چودھری غلام یاسین غلام

چوہدری غلام یاسین غلام ہور ضلع پونچھ، تحصیل حویلی کا علاقہ ٹاٹ، بانڈی عباس پور کارہن آلا ہیں۔ جت انکا ٹھیکریہ خاندان کا بڑا بڈیرا علاقہ کا غان تیں آکے بس گیا تھا۔ انھاس نے ایم اے بی ایڈ تک کی تعلیم حاصل کر کے محکمہ تعلیم ماں ملازمت شروع کر لئی تے ترقی کر کے اجکل عباس پور ماں ہی ہائی سکول کا ہیڈ ماسٹر کے طور ذمے داری نبھاویں لگاوا۔ انکی تاریخ پیدائش تے مکمل جانکاری حاصل نہیں ہو سکی۔

۱۹۶۷ء تیں شروع ہون آلی گوجری زبان تے ادب کی تحریک ماں ویہہ وی جوش جذبہ نال شامل رہیا ہیں تے اُت کی ادبی مجلساں ماں شریک ہوتا رہیا ہیں۔ انھاس نے اپنو گوجری کلام ۱۹۹۴ء ماں ”دنیو“ کانا نال شائع کیو تھو جس ماں حمد تے نعت تیں علاوہ زیادہ تر نظم ہی شام ہیں پر جگہ انکا کلام ماں دینیات کی جھلک باندے دے سے جھڑی غالباً انکی ذاتی زندگی کو عکس ہے۔ (بحوالہ: چوہدری کرم دین چوہڑہ)

پیش ہیں انکا کلام کا نمونہ:

باراں مانہہ:

چڑھیو چیت تے رت بہار آئی، گوجر قوم نا اجمہاں خیال کوئے نہ
اکو جیہا ہیں دن تے رات اُن کا، بھانے انھاس کے ہوؤ سیال کوئے نہ
بھکھ دُکھ نے گھیریا چار طرفوں جنوں انھاس کو ہوؤ نہال کوئے نہ
غلام عیساں ماں بنیا یار سارا، تنگ ویلا کی قوم بھیاں کوئے نہ

نعتیہ اشعار:

اک لکھ تے چوی ہزار وچوں نبی پاک ﷺ جیہونہ ذیشان کوئی
آوے آخر تے ملے نمبر پہلو، اُس جیہونہ وچ مرسلان کوئی

نظم: ”تیری شان ربا“

حمد: نہ لکھ سکے یاہ قلم میری، کدے حمد ثناء تیری شان ربا
پنڈھ عیاں کی دے سے مچ بھاری، او گنہار ہے میری زبان ربا
لوح قلم تے عرش فرش کیو، پیدا گن تیں گل جہان ربا
ہتھاں نال آدم کو بت بنیوں، فربت ماں گھلی تیں جان ربا

حمد:

الف: اللہ کی حمد کروڑ باری، پیدا گن تیں گل جہان کیو
اٹھاراں ہزار جون تیں جگ بھریو، اچاں انھاں تیں فرانسان کیو
سورج چن تے زمیں اسمان اُپر مُشت خاک نا تیں چکھران کیو
غلام ٹھکر ہے شکل انسان بخشی، محمدی اُمت کو تیں مسلمان کیو

نعت:

ب: بعد ماں کروں تعریف اُس کی، جہڑو گل نبیاں کو سردار ہوو
آتاں ساتھ ہی سٹیو بر سجدے، واسطے اُمت کے بے قرار ہوو
آپ اُمی درس توحید دتو، روشن جگ سارو اکو وار ہوو
بنی آدم نا کیو آزاد جس نے، غلام اُسے کو تابعدار ہوو۔

میاں ممتاز احمد

پیدائش: 22 مارچ 1947ء واگت وفات: 11 اگست 2004ء واگت
 میاں ممتاز ہور بانی مارچ ۱۹۴۷ء نامیاں غلام جیلانی صاحب کے گھر ہری دہی
 واگت ماں پیدا ہويا۔ پنجی تک کی پڑھائی واگت ماں ہی کی تے فرنگن ہائی سکول ماں دس تک
 پوچھ کے تعلیم کو سلسلو رک گیو۔ ویہ بلا کا حاضر جواب تے زندہ دل نوجوان تھا جہڑا اپنی ظریفانہ
 طبیعت تے حاضر جوابی کی وجہ تیں اکثر محفلاں ماں چھایا رہیں تھا۔ انھاں نا کرکٹ،
 کبڈی، ڈراؤری تے تیراکی کی مچ شوق تھی۔ مچھی پکڑن کو مشغلو بھی بچپن تیں اپنا یو و تھو تھو آخر
 اسے بہانے ۱۱ اگست ۲۰۰۴ء ناویہ دریا ماں جھڑیا تے ابدی نیند سو گیا۔
 انھاں کو بچپن شعر و ادب کی دھرتی بابا نگری ماں گذر یو جت اکثر علمی تے ادبی مجلس
 لگتی رہیں تھیں۔ اس ماحول تیں متاثر ہو کے انھاں نے وی شعر کہنا شروع کر لیا تھا تے پنجابی
 کے نال گوجری ماں وی کجھ چنگو کلام تخلیق کیو جس ماں نظم، غزل تے گیت شامل ہیں۔
 گیت:

یہ ماہلی نیلی ڈھوکاں کی	ہوں تھک بیٹھی ہاں چن چن کے
یہ سبزی دل کا سوٹھاں کی	ہوں تھک بیٹھی ہاں چن پن کے
یوہ پانی بگ بگ جھمراں کو	تھک بیٹھی طعنا سُن سُن کے
لا روگ گیو ہے عمراں کو	ہوں یاد گھسیر وں کھن کھن کے
ہن نین میرا بھی ڈلھ بیٹھا	
کیوں وعدا پیار کا بھل بیٹھا	
یاہ بلبل بھیڑی جد بولے	
تیری یاد ماں میرو دل ڈولے	

D:\Writers
org\sabir
1.jpg not
found.

ڈاکٹر صابر مرزا

پیدائش: 5 مئی 1947ء بہروٹ راجوری

ڈاکٹر صابر مرزا اُردو، گوجری تے پہاڑی کا شاعر تے ادیب ہیں تے ابجکل ریاستی کلچرل اکیڈمی مانھ کلچرل آفیسر کے طور زبان تے قوم کی خدمت کریں۔

صابر حسین مرزا ۱۹۴۷ء مانھ بہروٹ راجوری مانھ پیدا ہويا۔ بیادی تعلیم اتے حاصل کی تے محکمہ تعلیم مانھ اُستاد کے طور ملازمت شروع کر لئی۔ بعد مانھ جموں یونیورسٹی تیں پرائیویٹ، اُردو مانھ ایم اے کی ڈگری لئی تے ریاستی کلچرل اکیڈمی نا کلچرل آفیسر کی حیثیت مانھ پسند آ گیا۔ جت ویہاں توڑی یاہ ذمے داری بڑی خوبی نال نبھائیں لگاوا۔

صابر مرزا ہوراں نا لکھا پڑھی کی شوق پہلاں توں تھی۔ اُردو، پہاڑی تے گوجری زبان مانھ شاعری کریں اور سؤنی شاعری کریں۔ اُن کی گوجری شاعری مجلساں، مشاعرے تے کانفرنساں تے علاوہ کلچرل اکیڈمی کا شیرازہ گوجری مانھ وی چھاپے چڑھتی رہی ہے تے اُن کی گجھ اک غزل تے گیت ریڈیو کشمیر تیں وی اکثر نشر ہوتا رہیں۔ صابر مرزا نے سماجی میر تیر تیں اُپر اُتھ کے، جس زبان مانھ سوچو اُسے مانھ اظہار کیو۔ تخلیق کا اس قدر ترقی طریقہ واسطے ویہ مبارکباد کا مستحق ہیں۔

صابر مرزا ہوراں نے ملازمت کے دوران ہی جموں یونیورسٹی تیں ریاست کی علاقائی زبانوں کا موضوع پر ڈاکٹریٹ کی ڈگری وی لئی ہے جس مانھ گوجری وی شامل ہے۔ اُن کی یاہ تحقیق جلدی ہی کتابی صورت مانھ آن آلی ہے۔ اُنھاں نے کئی ہور تحقیقی مقالا وی لکھیا

ہیں پرویہ بنیادی طور پر شاعر ہیں۔

اُمید کراں جے کئی سالوں کی گوجری شاعری ناکٹھا کر کے ویہ جلدی کتابی شکل دیں
گاتانجے نواں تے عام لکھن پڑھن تے تحقیق کرن آلا ڈاکٹر صابر مرزا کی سوچ، لہجہ، اظہار
تے خلوص تیں واقف ہو سکین۔

غزل ۱

سکو بوٹو ڈھٹھا پتر سنگی ٹالو ٹال گیو
روئیں مُد مُد بھور بچارا اگ ہجر کی بال گیا

دل دکھڑا نا مُد مُد سدے درد بلاویں درداں نا
اکھ نمائی ڈولے اتھروں، ہستاں روتاں سال گیو

تسیا سنگر، رویا پکھروں، برف کا بیڑا ہسیا فیر
بھل بھلیکھاں کو یوہ بیلو، کس کے نالو نال گیو

رنگ ہیں سارا کچا پکا، سوچ سمجھ کے چنئیے توں
ہیرا موتی سنگ جواہر مہنگو مہنگو لال گیو

ہتھ پیراں نا بھانہڑ دسوں، نالے جاؤں رکت
جس کا گھر کی آس تھی صابر آخر وہ بھی ٹال گیو

غزل ۲:

آئی رُت رنگیلی مُز کے ڈالی ڈالی بھور گیو
میریں پکھیں کولے رہیں، چن پردیسی دُور گیو

بکتا اتھروں ساڑو دل کو اُس نا کیتنا پیارا تھا
سارا ہس ہس دیکھن لگا، سولی چڑھ منصور گیو

پتھر کیٹا چُن چُن رکھیا، درداں کی اگ بال چھوڑی
بہڑو بہڑو خالی دسے، پیار میرو جُور گیو

نیلی رُت مانھ، سکا پتر رنگ نمانا جھونس گیا
پیار وفا نا ڈھونڈے کوئے کد کو وہ دستور گیو

غزل ۳:

کُنڈاں نا دلگیر نہ رکھیے	پھل اکھاں مانھ نیر نہ رکھیے
دل مانھ واہ تصویر نہ رکھیے	جس تیں متھو میلو ہووے
ایسی کائے تحریر نہ رکھیے	دیکھ کے اکھ دکھ جھاکھیں جس تیں
تھال مانھ گھل کے کھیر نہ رکھیے	تس بُجھا کے سپ فر ڈنگیں
اکھ مانھ ترکھا تیر نہ رکھیے	قتل تیرے سر صابر لگے

غزل: ۴

رُت جھلیں بوئیں ہیہنگ پیس دینہ چن ہلاریں کس کس نا
ہر یاد مراد کی آس دے توں بول بساراں کس کس نا

چو مکھی پھل گلاباں کا، چو لکھیں لشک ہیں شیشاں کیں
اس پتھر دل کا واراں سنگ توں دسیے ماراں کس کس نا

سب طوطا مینا چوگ چگیں، اج گھگی بولیں مٹھوا گیت
آساں کی بستی باساں تیں ہن دور اڈاراں کس کس نا

خوشیاں کی آس مانھ ہر کوئے جند جان گمان میں تلیو ہے
پر غم کا کھمن گھیراں تیں دس پار اتاراں کس کس نا

تھی صابر جن کی آس منا ویہ رانجھن ماہی مڑ چلیا
ان ماہلیں تلاں بیلاں مانھ، دس ہور سنگھاراں کس کس نا

غزل: ۳

وہ جد فر دلگیر کرے گو دل نا لیرو لیر کرے گو
میری ہر تحریر نا ہتھیں پاڑ کے چیرو چیر کرے گو
منن آلا دل تیں منیں پتھر نا کے نیر کرے گو
خواب رتاں کا ساڑ کے سارا موسم بے جاگیر کرے گو
لکھیو جھولی پے گو صابر اج کے منت فقیر کرے گو

D:\Writers
rg\shabaaz.jp
not found.

چودھری شاہ محمد شاہباز

پیدائش: ۱۱ اگست ۱۹۴۷ء پروڑی راجوری

شاہباز ہور پنڈ پوڑی گجراں ماں چوہدری امیر حسین چوہان ہوراں کے گھر ۱۹۴۷ء
ماں پیدا ہويا۔ ويہہ ماہ ناز گوجری سپوت حاجی رانا فضل حسين ہوراں کا بھتیجا ہیں۔ شاہباز
ہوراں نے میٹرک تک کی تعلیم راجوری میں حاصل کی تے فرپنا چا چا کی پیروی ماں زمینداری
تے تجارت آلے پاسے لگ گیا۔ ۱۹۶۵ء کا غدر ماں انکا والد تے پنج بھائی شہید ہو گیا تے
انھاں نا پاکستان ہجرت کرنی پئی۔ اس بڑا صدمہ نے انکی طبیعت ماں جہڑی ہلچل پیدا
کی، شاعری اسکا اظہار کو قدرتی ذریعہ بنیو۔ بھادیں دنیا داری کا غماں نے انھاں نا اس پاسے
زیادہ دھیان نہیں کرن و تو فروری رانا فضل ہوراں کی رہنمائی ماں انھاں نے اچھی خاصی شاعری
کی ہے جہڑی انھاں کا چچرا بھائی چوہدری منیر حسین ہوراں کے سنگ ”سانجھ“ کا ناں نال
شائع کی ہے۔ انھاں کی شاعری ماں سادگی تے مقصدیت کے نال نال سانجھ تے نمیکلا
درداں کی جھلک وی دیکھی جاسکے۔

دیکھو کلام کا نمونا:

نعت:

جاگیا بھاگ سُنّا وا سارا اوکھت ساری بیتی
آقا نے فر آن سمھالی، گڑھتی انسانیتی

کُل جہاناں کی رحمت نے بنجریں بتر لایا
اچھل یوٹا آساں کا مہر سہل ہوتا آیا

بے آساں کی آس محمد ﷺ، ہمت بے ہمتاں کی
دُکھیا دل وی چوڑ دتا، ملھم لا درداں کی

صدقے جاؤں نعت سناؤں سچا مان ہتھایا
صلی اللہ علیہ وسلم، سچ مھارا سرمایا

پڑھوں درود سلام ہمیشاں کہتو رہوں رورو کے
نذر عقیدت پیش کروں گو مھلاں ہار پرو کے

لاج رکھو شاہباز اپنا کی، آقا جی لُج پالو
ہر اوکھت وچ پگرو پگرو بن مولا رکھوالو

نعت ۲:

مھاری شہر پناہ تم آقا ہم اجکل مجبور
کاج بساریا تھارا دسیا خبرے تاں رنجور

فر ظلماں کی آندھی جھلی، اُمت پر دکھ آیا
اوکھت آن دیوچن لگی، جھڑ گیا ناسور

فر سنسار ماں انسانیتی، ظلم سمندر پھانسی
گھسن گھیر افتاداں اندر، فر بیڑی کو پور

تنگ مُسلم کوئے سنگ نہ ساتھی، دُنیا ویری ہوئی
آساں کا سب محل منارا، ہو گیا چکنا چور

بگڑی گل بناؤ آقا، لاج رکھو فر مھاری
رب سبب کرے مڑ چنگا، پگرو آپ حضور

نظم: وطن کی یاد

وطن میرا کا سینہ اُپر خونی لال لکیر
روح اپنوں اُس پار بسا یو جھو تر نے ات
پونچھ بھلیس، ارناس اڈیکے راہ دیکھے کشمیر
بنا ازادی جینو مندو کدے نہ لگے چت
اپنا پر بت سنگو سو بھیں ڈنہ لاڑتے ماہلیں
یاد وطن کی رہے ہمیشاں میری کار کرت
اچی مار اڈاری لمیں، اڈتا رہیں شاہباز
سوہنا پیارا دیس میرا کا پکھو پڑھیں کہت

نظم: معاہدہ امرتسر

پک گئیں ماہلیں، چوئیس ڈناں بیچ دو سنسار
اونے پونے اینویں کینویں، مٹلیں یکہ بہار

پھلاں آلو وطن پیارو نہیں تھی بست بزاری
آدمیاں کا سودا ہو یا، ہو گیو بیچ بزار

ظلموں کا طوفان مچایا، پھندا پھاہی لایا
لوٹیں کوئیں دھاڑا مچیا ہو گئی عام بگار

ہتھیں کڑیں تے پیریں پیڑیں ظلم تسیا بھارا
قید اذیت جورا جوری زرا اندھیر غبار

مسلمان شکنجے کیا ترٹی چوڑ غلامی
ادھت مچ ازماش توڑیں نہ کوئے انت شمار

جنت جیسی دھرتی اُپر راج ظلم کا ہویا
ہڑھ بگیا تے بٹھی مھارا لہو کی بوند پھوار

دیش اکھنڈ پاکھنڈ رچاپو عام ہو یو قلام
گئی بہار چنار وی سڑیا ہو گیا لال انگار

گیت ا:

آپو وی بساکھ سوہنو آپو ہے سپاہی رے
جی او جی سہاگ میں تے چندڑی گھمائی رے

مچھٹی لے کے آن کی رکھی وی اڈیک تھی
پیاراں کی سوغات آئی حُب رے بدھیک تھی

آپو ہے سپاہی اج خوشی میرے آئی رے
چھن چھن چوڑیاں کا ہاسا اج کھنڈیا

نیڑے نیڑے آپو کوئے دور ہو جا چھنڈیا
موج میلہ لگنا ہیں مکی وی جدائی رے

باندے ہو کے سجاں کے ڈاہڈی شراماؤں گی
لاڈاں تے پیاراں آلیں گل نہ سناؤں گی

جیو رے سپاہیا جیو موج بن آئی رے
جائیے نہ سپاہیا جی ایکی نانا چھوڑ کے

مساں مساں رب جی نے آئیو ہے موڑ کے
میری ڈھولا زندگی ہے تیری اشنائی رے

پھلاں نے دسیا بہاران کا آنا
 یاداں ماں آیا رے دُکھڑا پرانا
 آتی بہاراں نا مُڑ مُڑ کے ہیروں
 کول کا ہاڑا رے بولیں پکھیروں
 باغاں ماں بلبل تے چڑیاں کا گانا
 ہالی نے اپنی ڈاگی رے باہی
 ڈھوکیں تے بہکیں ٹریا ہیں راہی
 اجڑاں کا راکھا تے مانجھی نمانا
 پکھنو بہاراں کا اڈتا وی آیا
 پھلاں کیکولے ڈیرا وی لایا
 دھرتی ہے ساوی تے سبزہ سوہانا
 آتی بہارے توں مُڑ مُڑ کے آجا
 پھلاں کی رانی رے سنگواں کا راجا
 ہسریں نہ اپنا رے ملنا ملانا

رتی رتی مہندی سوہنی ہتھاں بچ لائی ہے
 پھل تے گلاب جیسی گوری شرمائی ہے
 گھنو جیہو رنگ لاوے مہندی رنگیلوی

ڈولی چڑھ چلی سوہنی گوری اج ساہورے
 لاڑا کو لے خوشی بے جیوڑو نہ گھاہرے
 خوشی ہے سہیلوی اے چھیل تے چھیلوی

ساہورے ہیشگی تے کدے کدے پیکڑے
 خوشی بے گوریے تے خوشی تیرے لیکھڑے
 رتو سوہنو رنگ تیرو، چچی تیری ٹیلوی

گوری گوری باہیاں بچ، چوڑیاں کو سوہنو
 اللہ اللہ کیڈو یوہ جوانیاں کو جوہنو
 گہنا آلی گوریے او سونے رنگ پیلوی

چودھری نذیر حسین فدا

پیدائش: ۲۳ اگست ۱۹۴۷ء ساج راجوری

نذیر حسین فدا گوجری کا سوہناتے سنجیدہ شاعر ہیں۔ ویہ ساج راجوری کا رہن آلا ہیں، جت اُن کی پیدائش ۱۳ اگست ۱۹۴۷ء ناہوئی۔ بنیادی تعلیم توں بعد محکمہ ایگری کلچر مانھ ملازم ہو گیا۔

ریڈیو کشمیر تے ریاستی کلچرل اکیڈمی مانھ گوجری شعبہ کھلن تیں بعد گوجری کی لکھا پڑھی شروع کی۔ مشعراں تے کانفرنساں مانھ خلوص تے باقاعدگی نال شامل ہوتا رہیا ہیں۔ اُن کی شاعری مانھ وی درد، خلوص تے ٹھیکہ گوجرا لفظ اس اٹھکل نال پرویاوا ہیں جے خدا بخش زار مرحوم تیں بعد خالص لہجہ مانھ اسی شاعری ہو رکوئے نہیں کر سکیو۔

نذیر حسین فدا نے گوجری ادب نا کجھ مچ سوئی غزل دتی ہیں پر زیادہ توجہ سی حرفی آلے پاسے رکھی ہے۔ اُنھاں نے حولیا تے طبیعت ہاروں شاعری مانھ وی ذرا بناوٹ نہیں آن دتی۔ لکھتاں مانھ وی محلی ٹور رکھی ہے۔ پر جو کجھ گوجری ادب کے حوالے کیو ہے وہ صاف ستھر و تے چھٹیوا چھیر یو و ہے۔

ان کو کلام باقاعدگی نال شیرازہ گوجری مانھ شائع ہون تیں علاوہ ریڈیو کشمیر تیں وی اکثر نشر ہو تو رہے۔ اللہ کرے جے اُن کی خوب صورت شاعری جلدی کتابی صورت مانھ شائع ہو کے گوجری کا قدرداناں توڑی پوچھے۔

کلام:

غزل:

ویہ درد خزاں کا کے جائیں ہیں مالک مست بہاراں کا
مٹھلاں کی جھوہلی پلپلیا ہیں کد چوبھا لگا خاراں کا

کیوں اگ گھسیریں دبی وی یاہ دل میرا مانھ صدیاں تیں
مت ہتھ سڑ بل جائیں لُو ہے جائیں جے لگا تے انگاراں کا

اک کیمہ ہمنشاں رہے بھکھتو، نت اندرو اندر ہر نیلے
دن دھکھنا دھکھنا گزر جائیں، کونے پیش نہیں حیلان چاراں کا

نہیں پڑ کسے کے ہتھ آئی، سچ اوہل ہے ڈنگا درداں کی
یوں کسر کسے نے نہیں چھوڑی، احسان کرم ہیں ساراں کا

نذیرؔ بچر کا پھٹاں کی بے قدر زمانو کے جانے
ان زخماں نا کد انگ آویں، اُن بے درداں کی ماراں کا

☆☆☆

کے، ڈی، مینی

پیدائش: پہلی اکتوبر 1947ء گنڈی، سرنکوٹ۔ پونچھ

موجودہ ادبی دنیا ماہ کے ڈی مینی اک معتبر نام ہے۔ ویہ اُردو، گوجری، پنجابی تے پہاڑی کا سوہنا شاعر تے ادیب ہون تیں علاوہ تاریخ دان وی ہیں۔ خوش دیوا اکتوبر ۱۹۴۷ء ماہ سرنکوٹ پونچھ کا گنڈی گراں ماہ پیدا ہو یا۔ آپ گھروں بل تھاپر ماحول ماہ غریبی، بے کسی تے افراتفری انھاں نے اپنی اکھیں دیکھی جس کی جھلک انھاں کا ادبی کارناماں ماہ باندے دے۔

بنیادی تعلیم کے دوران ہی خوشدیو مینی ہوراں نا ادب کا مطالعہ کو موقع ملیو تے کرشن چندر، ٹھاکر پونچھی تے منشی پریم چند نے انھاں کی سوچ متاثر کی۔ ریاضی ماہ ایم اے کرن تیں بعد ویہ ریاستی محکمہ منصوبہ بندی ماہ ملازم ہو گیا جت ویہ ڈپٹی ڈائریکٹر کی حیثیت نال کم کرن تیں بعد سبکدوش ہو یا ہیں تے ابک صحافت کا میدان ماں قدم رکھو ہے۔

تعلیمی دور تیں ہی انھاں ماہ لکھا پڑھی کو راجان موجود تھو تے اس دوران ویہ کئی علمی ادبی تنظیمیاں کا رکن وی رہیا ہیں۔ پر تاریخ تے تحقیق ہمیشاں توں انھاں کا لاڈلا موضوع رہیا ہیں۔ خوشدیو اُردو تے پنجابی کا بہت سوہنا لکھاڑی ہیں اسویلے توڑی اک درجن تیں زیادہ کتاب لکھی ہیں۔ ۱۹۷۵ء کے قریب جدید گوجری کی چڑھت ماہ ویہ بڑا جوش جذبہ تے خلوص نال شامل ہو یا تے ریڈیو کشمیر تے کلچرل اکیڈمی کی گوجری مجلساں ماہ باقاعدگی نال آتا رہیا۔ کجھ عرصو گوجری زبان و ادب کی انجمن کا سکرٹری وی رہیا۔ گوجری ادب تے تاریخ تیں متعلق کجھ سارا تحقیقی مضمون لکھیا جہڑا گوجری رسالاں تے کتاباں ماہ شائع ہوتا رہیا ہیں۔ انھاں نے ”رجی“ سمیت کجھ کجھ ہی شاندار تے جاندار گوجری کہانیاں وی لکھی ہیں تے شاعری آلے پاسے قلم کی مہار موڑ کے خوب صورت گوجری غزل وی لکھی ہیں۔

کے ڈی مینی ہو راس نے ٹی وی تے ریڈیو واسطے سلسلہ وار لکھیا ہیں جن مانہ پیر پنجال کو مشترکہ کلچر ان کومن پسند موضوع رہے۔ اللہ انھاں نا گوجری زبان تے ادب کی ہور خدمت کرن کی توفیق دے تانجے انھاں نال محبت کرن آلاں کی تسلی ہو سکے جہڑا ا جھاں اُن کی گوجری کتاب کو منہ دیکھن کا اڈیکوان ہیں۔ انکی اج تک شائع ہون آلی کتاباں کی تفصیل اسطرح ہے: ۱۔ تاریخ پونچھ، ۲۔ تاریخ راجوری، ۳۔ زیارت شاہدرہ شریف، ۴۔ پونچھ (تحقیقی مقالا) ۵۔ راجوری (انگریزی) ۶۔ کپیس (طنز و مزاح) ۶۔ چادر (اردو افسانا) اڈیکاں ۷۔ (پنجابی افساناں) ۸۔ برتیاں (پہاڑی افساناں) ۹۔ چاند کے ساتھ ساتھ (اردو شاعری) ۱۰۔ سکن (پہاڑی شاعری) ۱۱۔ رمزاں (پہاڑی لوک ادب) ۱۲۔ پہاڑی قبائل (تاریخ اور شخص) گوجری کلام: غزل: ۱:

اس برہیا جد کوئے گیت سناوے گو	یاد تیری کی برچھی سینے لاوے گو
رات اڈیکے گی گہلاں مانہ لوڑے گی	شنگراں پر چن اپنی چادر ڈا ہوے گو
جہڑو چھوڑ گیو اکواری کد ملے	پر پنجارو بہڑے بہڑے گادے گو
سینہ اندر جہڑو ہر دم ساڑ کرے	اتھروں بن کے آخر باندے آوے گو
رستیں رستیں کھنڈی وی ہے آس تیری	کے جانو تھو اس راہ وی ترساوے گو
ہم سارا کھڑیا لاں ہاروں نٹھاں گا	کہہو اس بستی توں سالم جاوے گو

غزل: ۲:

ڈنگ پچائیے زہرتیں ڈریئے	سپاں کا اس شہرتیں ڈریئے
اپھل بونا کم آویں گا	بیلا کی دوپہرتیں ڈریئے
دھرتی بچوں رت دھر سے	تیراں ربی قہرتیں ڈریئے
لارا پر نہ گھول گھمایئے	دل ٹھگنا بے مہرتیں ڈریئے
باندے باچھڑ گجھ نہیں ہوسیں	چُپ چپتا بیرتیں ڈریئے

غزل: ۳

دل چاہوے تیرو سنگ اڑیئے
 حالیں وی چھنکیں بنگ اڑیئے
 دوہاں کے اندر جنگ اڑیئے
 بن جوگی پیر ملنگ اڑیئے
 سوچاں ور جمیو زنگ اڑیئے

رہ ہر دم تیری منگ اڑیئے
 یاداں کی گھمن گھیری مانھ
 ہوں ہو رکولے دل ہو رکولے
 در چھٹیو تاں در در پھریو
 کے لکھوں یہ ان چھوہ جذبا

غزل: ۴

آس نمائی شام ہوتاں مُڑاؤے گی
 بستی بستی میرو حال سناؤے گی
 کوئل بھادیں گُو کے گی کرلاؤے گی
 اُس بھانڑنا کہڑی کا نگ بھادوے گی
 لکھ لکھ واری بھادیں گھول گھاؤے گی

اتھروں بن کے ڈلکے گی تڑفاؤے گی
 باج تیرے تیں کس راکس راہیتی ہے
 برہیا کی پھلکاری آخر سرنو ہے
 بھڑک گیو ہے جہڑو میرا سینہ مانھ
 نہیں ملسیں رسیو دوستگی نہیں ملسیں

غزل: ۵

میرے اندر ہر دم تیرو ناں اڑیئے
 تڑفے چھڑ کے ہد کے میری جاں اڑیئے
 نہیں بسری واہ دلیں اپنا کی باں اڑیئے
 بنے دل دریا نا منوں تاں اڑیئے
 یاد سمندر مانھ ہم ڈلو کھاں اڑیئے

آساں کی یاہ ٹھنڈی ٹھنڈی چھاں اڑیئے
 نہیں لکتو روح بستی مانھ بازاراں مانھ
 گنتاں ویلے بنگاں کا چھکنا تھا
 کے ہو یو جے چاڑھ لئی کھیاڑی تیں
 رات انھیری گھمن گھیری بھالے رے

غزل ۶:

باس تیرا جُسا کی میرا سا ہواں اندر
 رات انھیری واقف کارنے دھوکھولا یو
 عشق ملاوے رب نافر بھی خورے کیوں
 یاس کا اتھروں ڈلکیں نین نشیلاں تیں
 منزل آخر پیر نا چھے چٹے گی
 غزل ۷:

توں بیٹھو ہے دل گیاں درگا ہواں اندر
 گھل مکھو ڈابو کھاؤں راہواں اندر
 گنیو جائے یوہ وی ٹچھ گنا ہواں اندر
 آس کو بھانڈو سکھنو دل دریاواں اندر
 چلتو رہے گو جیکر تیز ہواواں اندر
 غزل ۸:

شام ہوتاں ہی یاد کا بھانبز بالاں گا
 منزل آخر پیر نا چھے چٹے گی
 کوسا کوسا ڈم ہجر کا کھا کے وی
 نہیں ملنو گمبو وو موتی نہیں ملنو
 ہن بستی تیں رات نا مار مکانو ہے
 غزل ۸:

اچن جھتیں سینے برچھی مار گیو
 باجھ تیرے تیں بستی کو چکار گیو
 یاد تیری کو جذبو نیندر ساڑ گیو
 دل دریا نا ٹپ کے کہڑو پار گیو
 جس ویلے وی تھارے منہ رو بکار گیو
 اک جھلکارو لاکے کہڑی تھار گیو
 خورے سورج بن کے توں ہی چمکے تھو
 بیڑ کر کے راتیں جاگوں ترفوں میں
 بڑا تارو وی اس کنڈے ڈُہیا ہیں
 اک ذری نہ ہوٹھاں نے برلاپ کیو

چودھری میر حسین فدا

پیدائش: 3 اکتوبر 1947ء، کلر پلوامہ

میر حسین فدا ہوراں ناڈ نیا گوجر ہوٹل کا وارڈن کے طور جانے پر ویہ گوجری زبان کا مخلص تے باقاعدہ شاعری ہیں جہڑا کچھلا تر یہ سالوں تیں ادبی میدان مانھ وی اپنی پچھان بنان مانھ کامیاب رہیا ہیں۔

فدا ہور ۳ اکتوبر ۱۹۴۷ء نا پلوامہ کشمیر کا کلر گراں مانھ پیدا ہويا۔ تے بُنیادی تعلیم تیں بعد مکملہ تعلیم مانھ اُستاد کی حیثیت نال ملازم ہو گیا۔ بعد مانھ انھاں نے سرکاری ملازمت کو زیادہ عرصو گوجر ہوٹل کا وارڈن کے طور قوم کی خدمت کی ہے۔ گوجری ادب مانھ ویہ کلچرل اکیڈمی کا گوجری شعبا تیں بعد ہی شامل ہويا تے گوجری مجلساں تے مشاعر اں مانھ اپنی شاعری سُنانی شروع کیا انھاں نے سی حرفی، نظم تے گیت خوب لکھیا ہیں۔ ان کو کلام شیرازہ گوجری مانھ وی شائع ہو تو رہیو ہے تے دو سال پہلاں اُن کی کتاب ”چنگیز“ کا ناں نال شائع ہوئی ہے جس مانھ اُن کی چنانم تخلیق شامل ہیں۔

نظم: ہاڑا

کد ہوئے دعا منظور میری رنج کراں جے گل دو چار صدقے
اندرو اندری سڑے یاہ جان میری نالے سڑے اج لوک ہزار صدقے
رہیو گلاں کو ڈاڈھو افسوس منا دتو نہیں موقعو دلدار صدقے
دوروں دیکھو تھار واج مچ ساڑے رار آویں کہ آؤں ہوں پار صدقے
کرتو گل ساریں دستو حال ساروا جھاں نہیں منا کائے وار صدقے
کچھ منہ توں کدے وی بول فدا پتو لگے تے ہوئے اظہار صدقے

D:\Writers
org\zia 2.jpg
not found.

چودھری غلام حسین ضیاء

پیدائش: 15 اگست 1948ء رائے پور کھیری جموں

غلام حسین ضیاء اک مخلص گوجری لکھاڑی تے اجکل ریڈیو کشمیر سرینگر کا ڈائریکٹر ہیں۔ ویہ ۱۹۴۷ء مانہ رائے پور کھیری جموں مانہ پیدا ہويا۔ بی اے، ایل ایل بی کرن تیں بعد محکمہ خوراک مانہ بطور تحصیل افسر ملازم ہو گیا۔ جدید گوجری کی تحریک نال جد ریڈیو کشمیر مانہ گوجری ناہکی جی تھلی لہی تاں ویہ پروڈیوسر کی حیثیت نال اُت جا بیٹھتے ترقی کر کے ہُن ڈائریکٹر بن گیا ہیں تے اجکل اسے حیثیت مانہ قوم کی خدمت مانہ مصروف ہیں۔

جدید گوجری کی نشر و اشاعت مانہ ریڈیو کا حصا تیں سب واقف ہیں۔ تے کوئے انکار نہیں کر سکتو۔ گوجری لوک ادب کی جمع بندی، لوکاں کا دل تیں جھا کو مٹانو تے دوجی زبان بولن آلاں نا گوجری تیں واقف کران مانہ ریڈیو کی بڑی قربانی ہیں۔ لیکن ان توں علاوہ وی گوجری ادب مانہ محقق کے طور غلام حسین ضیاء کو اک الگ تے باوقار مقام ہے۔

ضیاء صاحب نے قوم تے زبان تیں متعلق سچ سارا تحقیقی مضمون لکھیا ہیں۔ جہڑا ریاستی کلچرل اکیڈمی کی کتاباں مانہ محفوظ ہیں تے نواں لکھاڑیاں واسطے رہنمائی کو سمیاں وی ہیں تے قیمتی سرمایہ وی۔ وی اپنی اکل سری کے باوجود گوجری مجلساں تے کانفرنساں مانہ شامل ہوتا رہیا ہیں۔ اور تحقیق کا سلسلہ مانہ پُرانا گوجری لکھاڑیاں نال انھاں نے ذاتی ملاقات تے رابطہ وی کیا۔ جن مانہ خدا بخش زار، شمس دین مہجور، محمد حسین بیدار، علم دین بن باسی تے سروری کساناں جیہا معتبر ناں آویں۔

غلام حسین ضیاء، ہوراں کو تحقیقی کم گھٹ سنی مگر اس قدر معیاری تے بنیادی قسم کو ہے جہڑا آئیندہ تحقیق کرن تے لکھن آلاں واسطے قیمتی سرمایہ ہے

چودھری لعل حسین پرواز

پیدائش : نومبر 1948ء مھٹھیاں راجوری

لعل حسین پرواز ہوراں کو تعلق گوجری لکھاڑیاں کی دو جی پیڑھی نال ہے جہاں نے گوجری تحریک کے نال ہی لکھنوشروع کیو۔ گوجری کا قدردان انہاں نا گوجری کا ہمدرد تے دردمند شاعر کے طور جانیں جہد امدت توڑی گوجری مجلساں نا اپنی پڑتائیں شاعری نال سجاتا تے گر ماتا رہیا ہیں۔ پرواز ہور نومبر ۱۹۴۸ء ماں راجوری کا گراں مھٹھیاں ماں پیدا ہو یا۔ بنیادی تعمی اپنا گراں ماں حاصل کی تے دسویں کو امتحان ہائی سکول ریکی باں تیں پاس کیو۔ ۱۹۶۷ء ماں دیہہ پولیس ماں بھرتی ہو گیا۔ نوکری کے دوران انہاں نا دور دور تک جان تیں علاوہ کچھ بڑا لوکاں نال ملن کو موقع وی ملیو تے انکے اندر اسے دور ماں قوم کی سماجی خدمت کو جذبہ وی جا گیو۔ آخر سماجی تے سیاسی خدمت کو جنون اس حد توڑی بدھ گیو کہ انہاں نے ۱۹۸۵ء ماں پولیس کی سرکاری نوکری چھوڑ کے اپنا علاقہ کی خدمت واسطے کمر کس لئی جت دیہہ ارج تک مصروف ہیں۔

گوجری شاعری انہاں نے ۱۹۶۵ء تیں شروع ہون آلی گوجری تحریک کے نال ہی شروع کی تے فرکلچرل اکیڈمی کی طرفوں ہون آلی اکثر مجلساں تے کانفرنساں ماں شامل ہوتا رہیا۔ انقلابی نظم تے سی حرفی کی صورت ماں انہاں نے گھٹ مگر خوبصورت تے معیاری شاعری کی ہے۔ انکو کلام ریڈیو کشمیر تیں نشر ہون تیں علاوہ شیرازہ گوجری ماں وی باقاعدہ شائع ہو تو رہیو ہے۔ پراج تک کتابی صورت ماں نہیں آسکیو۔ اللہ کرے دیہہ قوم کا نال نال زبان کی خدمت واسطے وی کچھ وقت کڈھے کے توجہ دیں۔

کلام کا نمونہ:

ک

کد توڑی کوئے ظلم جھلے، کد تک رہوں گوہوں کھڈیاں بن کے
 کچر تک جھلّوں ہوں ڈنڈوں تیرا، کد توڑی تیں برھنوسیاں بن کے
 کچر دوہلتا ہاسا تیں سر میرے، کچر رہنوں میں تیرو بھیاں بن کے
 خوابوں جاگ پرواز ہن لو ہوئی، سنکيا پھر نہ ایویں خیال بن کے

ل:

لنگھ سنگی جھل بھن اگے، رستا ڈھونڈیں تے توں پہاڑ بن جا
 چھوڑ چیت بساکھ ناکھ اتے، جیٹھ نالے توں سنکيا ہاڑ بن جا
 گھاٹے تولتی بستی چھوڑ اتے، بستہ شہر ماں یار اُجاڑ بن جا
 اُجاڑیں فصل پرواز بھگیاڑ تیرا، لوی فصل کی سبنا ہاڑ بن جا

غزل:

بھلاوا ہی کھاؤں بہاراں کے صدقے	رسیلی رسیلی بہاراں کے صدقے
تیرا دور کا ہوں بزاراں کے صدقے	ماہلیں تے چھمر تیرے تیں گھولوں
ہوں یاراں کا سوہنا اُلا راں کے صدقے	جھکھرتے جھولا بڑا درد مند ہیں
درداں کا مٹھا بلاراں کے صدقے	درد مچ دوروں پرواز لشکیں

غزل ۲:

سجری جی رہ دل ماں پر یاد پرانی ہے
آواز بٹائی ہے، فریاد پرانی ہے

درداں کی گٹھڑی نا بے یارتوں سہنی دئے
آساں کی تیری بستی آباد پرانی ہے

بچی ہوا سڑ بل کے ارمان میرا دل کا
یاہ تیری امانت ہے، سوغات پرانی ہے

مٹھی جی خوشبو ہے، ٹوہنا میری آساں کا
سڑ سڑ کے منگی ہے جائداد پرانی ہے

اس ادھکت زہدی تیں پرواز کے ہتھ آئیو
ہے سجری سویل تیری، میری ریت پُرانی ہے

غزل ۳:

تیرا گھر تیں بھلو ہے راہ بلیں بلیں	بے اثر ہو گئی ہے دعا بلیں بلیں
حسن اپنوتیں اس راہ ہے نکھاریو	دل ماں بس گیوتاں خدا بلیں بلیں
یاہ میری بے مروتی یا تیرو ستم ہے	اس دور نے بدلی ہے ادا بلیں بلیں
کل تک تھو دل ماں انگاراں کو ڈر	چلی ہے اج آپے ہوا بلیں بلیں
توڑاں گامنڈیں پرواز پچتاں پچتاں	کھاؤں کیوں نہ آپے سزا بلیں بلیں

D:\Writers
rg\hameed.jp
not found.

چودھری عبدالحمید کسانہ

پیدائش: 15 اپریل 1949ء

حمید کسانہ ہور بُنیادی طور کٹھوعہ کارہن آلا ہیں جت ویہ ۱۵ اپریل ۱۹۴۹ء نا پیدا ہويا۔ بچپن مانھ خانہ بدوش زندگی کو گُوڑھو تجربہ ہو یو۔ برہیا کشمیر تے سیالے کٹھوعہ آجائیں تھا۔ اوکھتاں نال بُنیادی تعلیم حاصل کی۔ ۱۹۷۵ء تیں اُراں ریڈیو کشمیر سرینگر کا گوجری شعبہ نال قوم تے زبان کی خدمت مانھ رُدھیا واہیں تے اجکل سرینگر کشمیر مانھ ہی مقیم ہیں۔

گوجری ادب مانھ حمید کسانہ کی اصل چھان اُن کی کہانیاں کا حوالہ سنگ ہے۔ جہڑی انھاں نے سرکاری ملازمت کے دوران لکھنی شروع کیں۔ اس عرصہ مانھ انھاں نے کئی خوب صورت کہانیں گوجری ادب کے حوالے کی ہیں۔ جہڑی ریڈیو تیں نشر ہون تیں علاوہ کلچرل اکیڈمی کا شیرازہ گوجری تے شیرازہ کا افسانہ نمبر مانھ وی شائع ہوئی ہیں۔

اُن کی کہانیاں مانھ خالص گوجر ماحول کی عکاسی تیں علاوہ پڑھن سُنن آلاں واسطے اک پیغام وی ہوئے۔ اُن کی کہانی ”دوڑ“ پڑھ کے سماج کی گٹھاں پر اُن کی نظر تے کہانیاں بارے اُنکا فنی پکیبت بارے انداز ولا پوجا سکے۔

چودھری غلام رسول اصغر

پیدائش: 30 جون 1949ء پچمال ٹمنوں

غلام رسول اصغر اک کامیاب وکیل، درد مند سیاسی تے سماجی کارکن تے گوجری کا مخلص لکھاڑی ہیں۔ ویہ ۱۹۴۹ء مانھ جموں کا پچمال گراں مانھ اک گوجر ہکلہ خاندان مانھ پیدا ہویا۔ ماں کی ٹھنڈی چھاں تیں جلدی محروم ہو گیا تے تعلیم کے دوران اٹھی جماعت توڑی پوچتاں باپ کی جھتری وی سرتیں ہٹ گئی۔ پر اُن کی خوش قسمتی تھی جے اُنھاں ناگوجر صحافی چودھری مقبول احمد جیہا بڑا بھائی کی شفقت نصیب رہی۔ تے ویہ زمانہ کی ظالم دھپاں تیں کے حد توڑی بچ سکیا۔

دسویں تیں بعد گاندھی میموریل کالج جموں مانھ داخل ہویا تے اتے اُن مانھ لکھا پڑھی کی شوق جاگی۔ مطالع کے نال نال اُردو مانھ نظم، غزل تے افسانہ لکھنا شروع کیا جہڑا کالج کا رسالہ ”توی“ تیں علاوہ ”سندیش“ اخبار مانھ وی شائع ہوتا رہیا۔ اسے دور مانھ ویہ غلام رسول تیں اصغر بنیا تے کجھ عرصو کالج میگزین کا ایڈیٹر وی رہیا۔ 1965ء مانھ غلام رسول اصغر پچمال گراں چھوڑ کے جموں شہر مانھ آ گیا جت مقبول صاحب سندیش اخبار مانھ کم کریں تھا۔ بعد مانھ مقبول ہوراں نے ۱۹۶۸ء تیں اراں اپنو چھاپہ خانولا کے حمایت اخبار کڈھنی شروع کی جس مانھ گجراں سمیت سماج کا کچھڑیا واطبقاں کی گل وی ہوئیں تھیں۔

غلام رسول اصغر ہوراں نے اپنی تعلیم وی جاری رکھی تے اس عرصہ مانھ LL.B کی قانونی ڈگری لے کے ۱۹۷۵ء تیں اراں وکالت کو پیشو شروع کیو جس پر ویہ اج

توڑی قائم ہیں۔ اسے دور مانھ جدید گوجری کی تحریک شروع ہوئی۔ ریڈیو کشمیر تے کلچرل اکیڈمی تیں گوجری کو چرچو ہون لگو۔، تاں غلام رسول اصغر وی سروری کسانہ مرحوم تے فیض کسانی کی سرپرستی مانھ گوجری لکھن پڑھن لگا۔ گوجری مانھ انھان نے نظم، غزل تے گیت تیں علاوہ زیادہ کم تحقیقی میدان مانھ کیوہے تے گوجراں کی تاریخ تے زبان تیں متعلق کئی جاندار کھوجی مضمون لکھیا ہیں جہڑا گوجری کانفرنساں تے ریڈیو کشمیر تیں نشر ہون تیں علاوہ گوجری شیرازہ تے مہاروادب مانھ وی شائع ہو یا ہیں۔ غلام رسول اصغر گوجری کہانی تے افسانہ کی حدان تیں آگے لنگھن آلا پہلا لکھاڑی ہیں جہاں نے ۱۹۹۰ء مانھ گوجری کو پہلو ناول ” آخری سہارو “ شائع کیو جس پر انھان نا اکیڈمی ایوارڈ وی ملیو۔

۱۹۸۰ء مانھ بڑا بھائی مقبول صاحب کی وفات تیں بعد حمایت اخبار کی ادارت وی سمہالنی پئی تے یوہ سلسلو اچھاں وی جاری ہے۔ اس مانھ قوم تے زبان تیں متعلق مضمون خاص طور پر شامل رہیں۔ اصغر صاحب بڑی دیر تیں گوجراں اصلاحی کمیٹی نال جڑیا رہیا ہیں جس نے گجراں مانھ سماجی تے تعلیمی بیداری واسطے بڑو کم کیو ہے۔ اچکل ویہ چوہدری بلند خان کی سربراہی مانھ قائم ہون آلی نویں تنظیم گوجر کانفرنس کاسکرینیٹری کے طور کم کریں لگاوا۔ اللہ انھان نا اس دوران دلہی کافرینضہ کے نال نال قلم مانھ وی مضبوطی سنگ سمہالن کی توفیق دے تانجے ویہ گجراں کے نال گوجری کی وی مذید خدمت کر سکیں۔

پروفیسر یوسف حسن

تعارف: رانا فضل حسین راجوروی

”پروفیسر یوسف حسن ہورلون کشمیری ہیں۔ کوئی دو سو سال پہلاں انکا بڈ کا کسے بڑا ڈا ہڈا کال کے سے بارہ مو لے کشمیر تیں اُجڑ کے پنجاب پاکستان آ گیا، ہجرت کے سے تھائی کھائی پھرتا کالا گجراں جہلم آ بسیا۔ ات اپنو گھر بنا ليو۔ ایم اے اُردو ہیں۔ گورنمنٹ اصغر مال کالج راولپنڈی مانھ پڑھائیں۔

بنیادی طور پر ویہ تھند اُسٹھرا کھرا شاعر ہیں۔ اردو پنجابی تے گوجری مانھ سو ہنا شعر کہیں۔ اک مجموعہ کو کلام گوجری زبان مانھ ہے۔ تے گوجری پراک تحقیقی مسودوی تیار ہے جس مانھ مھارا قدیم گوجری شاعر حضرت بابا فرید الدین شکر گنج تیں اُراں کوئی پنجاہ قدیم گوجری شاعراں پر مچ ہی سوئی پرکھ پڑتال ہے۔ اپنوارو کلام اجاں نہیں چھاپ سکیا تے نہ پنجابی شاعری کو مسودو چھاپ سکیا۔ اردو تے گوجری مانھ متا سارا تنقیدی مضمون تے مقالوی لکھیا ہیں، تے یوہ سلسلو جاری ہے۔“ گوجری کلام کا نمونا:

نعت شریف:

رب کی ذات نے تھاری ذات نا اپنا چان لایا

تم سارا سنسار کی خاطر رحمت بن کے آیا

مٹی ماں وی دھڑکن بولیں سو مانے اکھ کھولیں

تم نے دھرتی کا صدیاں تیں ستا بھاگ جگایا

تم نے ہر اک ہتھ مٹائی دس کے یاہ سچائی
اک رب کا ہیں بندہ سارا اک آدم کا جایا۔

سرتو بلتو تھل ہے دنیا تم رحمت کا ساگر
تھارا در ہی دیکھیں سارا چاہت کا ترہایا

تھاری گل نا ردن آلا، ردیا گیا جہانیں
جو تھارے لڑ لکيا اُن نے اُچا رتبہ پایا۔

گیت: ربا جن میل رے!

لکن سکلے درداں ماری
اڈ گیو وو مار اڈاری
سچی پنی گھمیل رے
ربا جن میل رے

دھ دسوں ہوں کہوا کہوا
اس کی یاد ما دل کا بہوا
وہماں کی کھچکیل رے
ربا جن میل رے

ملن کیں نہ آئیں تریک
بلی بلی بلی بلی اڈیک
سنھ نہ جائے تیل رے
ربا جن میل رے

میریاں سدھراں کا سکھ بن کے
کون کھلو ہے وہ رکھ بن کے
ملوں میں بن کے تیل رے
ربا جن میل رے

غزل ۱:

جیون کیکن جریو میں ریت سمندر تریو میں
 پھٹ لگا تھا دھرتی نا لہو رو رو کے مریو میں
 توں تے میرے کولے تھو فر کیوں ہو کو بھریو میں
 جتے یار نہ جتے توں اپنی تھائیں ہریو میں
 زور تھو کے دریاواں کو اپنا ہی چھل تیں ڈریو میں
 نوری ناری جو وی تھو دھوؤں پھک پھک مریو میں
 یوسفؑ انھاں گلیاں ما چان سفو دھریو میں

غزل ۲:

بول کہیا وی بول اندر بس نہ گھول
 لہ چنگیاری کوئی ساس سواہ پھرول
 اپنا لیکھ پرکھ رڑھتی ریت نہ رول
 ہن تون اپنی سوچ سدھراں نا نہ گچھول
 ہر شے بچ ہے کھوٹ بس اک درد نرول
 اڑی تے اڑیو دل اک بالک ان بھول
 کہہ گئی تیز ہوا پیڑیا بوہا کھول
 پڑے خالی خالی بجیں سکھنا ڈھول
 سچ کو ساتھ امر جھوٹھ ہے ڈانوا ڈول
 کھپ ماں کھب نہ جا بہہ چھٹ اپنے کول
 دل کیسو منکو ککھ نا پائے جھول
 یوسفؑ پڑھ کولے اسم در چندرایا کھول

غزل ۳:

تاریک مکان ماں نہ آئیو
توں میرا جہان ماں نہ آئیو

اُبھری نہیں لیک چائناں کی
جد تک توں گمان ماں نہ آئیو

ہر شے نا نظر لا کے تکیو
انسان ہی دھیان ماں نہ آئیو

پُورو چور کھلر گیو میں
پتھر کی امان ماں نہ آئیو

دھمیاں تے بڑی سنی تھی یوسف
دینہہ میرا مکان ماں نہ آئیو

غزل ۴:

دھرتی کیوں دلگیر تھی	جندڑی مچ زہیر تھی
سفنو تے سالم تھو پر	کرچ کرچ تعبیر تھی
نواں نکور وجود ماں	روح کیوں لیر تھی
ساگر بچ ساونو	دریا کی تقدیر تھی
کون سواد پچھانتو	جیہاں پر کریہ تھی
جگ ماں اپنی جندڑی کے	کھیڑاں کے گھر ہیر تھی

چودھری اے، کے سہراب

پیدائش: 1950ء وچارناگ، نوشہرہ، سری نگر

آصف کرامت اللہ سہراب ۱۹۵۰ء مانہ حاجی غلام نبی بجاڑ ہوراں کے گھر وچار ناگ سرینگر مانہ پیدا ہويا۔ سکولی تعليم کے دوران ہی Child Artist کے طور پر ریڈیو کشمیر سرینگر مانہ ایسوان جان شروع ہو یو جے ات گوجری شعبہ کھلتا ہی ہمیشاں واسطے ریڈیو کا ہو گیا۔ اس مخلص شخص نے ریڈیو کے ذریعے گوجری ادب کی جمع بندی مانہ بنیادی نوعیت کو کم کیو ہے۔ تے پنجابی گائیک آسا سنگھ مستانہ تے سریندر کور جیہا فنکاراں کی اواز مانہ ریکارڈ کروایا و گوجری گیت آج وی قیمتی سرمایہ کی حیثیت رکھیں۔

تخلیقی کماں مانہ انھاں نے اپنے واسطے نثر کو میدان ہی پسند کیو ہے تے شاعری کو کوئے حوالو نہیں لھتو۔ ات وی تحقیقی مقالا، ریڈیائی ڈراماں تے انشائیہ ہی لکھیا ہیں۔ گوجری کی اکثر ادبی مجلساں تے کانفرنساں مانہ شرکت کرن تیں علاوہ انھاں نے گوجری زبان تے لکھاڑیاں تیں متعلق کئی تحقیقی مضمون لکھیا ہیں جن مانہ علم دین بن باسی، قدیم گوجری ادب تے گوجری ادب نار یڈیو کی دین جیہا مقالا شامل ہیں۔ اُنکا کجھ اک معیاری انشائیہ وی شیرازہ گوجری مانہ شائع ہوتا رہیا ہیں پر ان کو اصل کم ریڈیائی ڈراماں کا میدان مانہ ہے۔

۱۹۸۶ء مانہ اے کے سہراب کی ریڈیائی ڈراماں آلی کتاب، چون، گوجری مانہ اس موضوع پر شائع ہون آلی پہلی کتاب ہے جس نا اگلے سال یعنی ۱۹۸۷ء مانہ ریاستی کلچرل اکیڈمی کی طرفوں بہترین کتاب کو ایوارڈ وی ملیو تھو۔ پر اکثر گوجری لکھاڑیاں ہاروں ویہ وی اجکل بسہونی کریں لگاوا۔

D:\Writers
rg\shinaas.jp
not found.

چودھری احمد شناس

پیدائش: 1951ء شاہدرہ شریف راجوری

ریاستی ادبی دنیا مانہ احمد شناس اک معتبر نا مینو جائے، ویسے ۱۹۵۱ء مانہ راجوری کا گراں شاہدرہ شریف مانہ اک گوری خاندان مانہ پیدا ہویا۔ بنیادی تعلیم تھہ منڈی تے راجوری مانہ حاصل کر کے فرڈگری کالج پونچھ تیں بی اے تے جموں یونیورسٹی تیں ایل ایل بی کی ڈگری حاصل کی۔ انہاں نے ۱۹۸۴ء مانہ ریاست کو کے اے ایس امتحان پاس کر کے سیکریٹریٹ مانہ ملازمت شروع کر لئی تے اس دوران کئی اہم عہداں پر کم کیو۔ سروس سلیکشن بورڈ کا ممبر تے گورنر مشاورتی بورڈ کا سیکریٹری تے ایڈیشنل ڈپٹی کمشنر راجوری کی حیثیت نال رہن تیں بعد اچکل ڈی سی رام بن کے طور ذمہ داری نبھاویں لگاوا۔

۱۹۸۰ء کے قریب ریاست مانہ گجری کی نویں چڑھت کے نال انہاں نے وی گجری مانہ طبع آزمائی شروع کی پر زیادہ دلچسپی اردو آلے پاسے ہی رہی جت انہاں نے اپنو اک نمیکلو مقام پیدا کر ليو ہے۔ انکی اردو شاعری کی کتاب جلدی ہی شائع ہون آلی ہے۔ گجری مانہ انہاں نے گھٹ مگر معیاری شاعری کی ہے:

ع:

اج تک چھپا کے رکھیا تھا جس نے گھراں کا راز
رشتاں کی واہ قمیض وی ہن لیر لیر تھی

غزل:

ویہ حور پریاں کا دلیں جیسی خیالی بستیں
بسائیں ہم نے وی کیسی کیسی خیالی بستیں

ویہ جن کا بار ماں گیت لکھیا تھا شاعراں نے
کدے کتاباں ماں دب گئیں وہنجیالی بستیں

سوائے واویلا شور کے ہو کر کچھ نہیں لہنتو
یہ شہر نگراں ماں آ بسیں کیسی خالی بستیں

مکان دولت کا بے بہا حسن کا نمونا
یہ انکے اندر عجیب نادار کالی بستیں

یہ لوک اپنا وجود توں مچھڑیا وا سایا
سفر کے دوران لٹ گئیں یہ سوالی بستیں

D:\Writers
org\asadullah
wani.jpg not
found.

ڈاکٹر محمد اسد اللہ وانی

پیدائش: 18 جولائی 1951ء بھگوتہ (ڈوڈہ)

ڈاکٹر اسد اللہ وانی کوناں ریاست کا ادبی حلقاں مانھ بڑو مشہور ہے۔ خاص طور پر اُردو تے گوجری کا لکھاڑی انھان تیں چنگی طرح واقف ہیں۔ محمد اسد اللہ ضلع ڈوڈہ کا گراں بھگوتہ۔ مرمت مانھ ۱۹۵۱ء مانھ اک کشمیری وانی خاندان مانھ پیدا ہويا۔ بی اے کی تعلیم تیں بعد ریاستی کلچرل اکیڈمی مانھ محقق کے طور ملازمت شروع کی تے تعلیم کو سلسلووی جاری رکھیو۔ بعد مانھ ایم اے تے فر اُردو مانھ پی ایچ ڈی کی ڈگری لئی تے اجکل محکمہ تعلیم مانھ اُردو کا لیکچرار کے طور پر ڈگری کالج اُدھم پور مانھ سرکاری خدمت نبھاویں لگاوا۔

ڈاکٹر اسد اللہ وانی کی غیر سرکاری ادبی خدمات بلاشبہ انھان کی سرکاری پچھان تیں بھاری ہیں۔ ریاست کی علاقائی زبانان کا ادب واسطے انھان نے بڑا خلوص نال بنیادی نوعیت کا کم کیا ہیں۔

جدید گوجری ادب کی تحریک نال ویہ ۱۹۷۵ء تیں اُراں مجو یا وا ہیں۔ جس ویلے اجاں ریاستی کلچرل اکیڈمی مانھ گوجری شعبووی نہیں کھلیو تھو۔ ۱۹۷۵ء تیں لیکے ۱۹۷۸ء تک جہڑی کلچرل کانفرنس ہوتی رہی ہیں انھان کی کاروائی تے تحقیقی مقالان نا جمع کر کے کتابی صورت مانھ ”گوجراور گوجری“ کا ناں نال چھاپن کو کم سب تیں پہلاں اسد اللہ وانی نے ہی کیو تھو۔ اس طرح ویہ گوجری کا پہلی صف کا محقق ہیں جنھان نے پچھلا پنجی تریہ سالان مانھ گوجری زبان بارے کئی تحقیقی مقالان تیں علاوہ گوجری لکھاڑیاں کی رہنمائی وی کی ہے۔

جدید گوجری ادب کا اشاعتی سفر مانھ اسد اللہ وانی قدم قدم سنگ ٹریا ہیں تے اس سلسلہ مانھ اُن کا خلوص، باقاعدگی تے گوجری ادب واسطے خدمات کو اعتراف عین حق کو اعتراف ہے۔

D:\Writers
org\tariq
1.jpg not
found.

چودھری سکندر حیات طارق

پیدائش: 27 ستمبر 1951ء بانڈہی چیچیاں پونچھ

گوجر قوم چودھری وزیر محمد ہکلمہ کاناں تے فر بانیاں توں چنگی طرح واقف ہے۔ سکندر حیات طارق انھاں کاسپوت ہیں جہڑا ۱۹۵۱ء مانھ پونچھ کاگراں بانڈھی چیچیاں مانھ پیدا ہويا۔ بنیادی تعلیم اتے حاصل کی تے لوکی عمر مانھ ہی سرکاری ملازمت شروع کر لئی جت ویہ اج سوشل ویلفئر افسر کے طور سماج کی خدمت کریں لگاوا۔ گوجراں کی تاریخ تیں متعلق جانکاری انھاں نے گھر مانھ ہی حاصل کی تے تاں ہی اُن کی لکھتاں مانھ تاریخ کو پہلو نمایاں لھے۔

۱۹۷۵ء تیں بعد جدید گوجری ادب کی تحریک کے نال ہی گوجری لکھن کو سلسلو شروع کیوتے ہر گوجری مجلس تے کانزس مانھ شریک ہوتا رہیا۔ ویہ عرصہ تک پونچھ مانھ انجمن ترقی گوجری ادب کاسکریری وی رہیا ہیں۔ تے گوجری زبان تے ادب واسطے کی جان آلی تمام کوششاں نال جی جان نال تعاون کرتا رہیا ہیں۔ انھاں نے گجراں کی تہذیب تے تاریخ تیں متعلق کئی تحقیقی مقالا لکھیا جہڑا ریڈیو کشمیر تیں نشر ہون تیں علاوہ گوجری شیرازہ تے مہارو ادب کا ورقاں پرچتر یاوا موجود ہیں۔ کجھ اک نظم تے غزل وی لکھیں پر اُن کی پچھان تاریخ تیں متعلق اُنکا تحقیقی مقالا ہیں۔

طارق صاحب اک عرصہ تیں نموش ہیں۔ اللہ کرے ویہ اک بار فر قلم سمہالیں تے ادھور وکم مکمل کر کے جموں کشمیر کا گوجراں کی تاریخ تیں متعلق اپنی اک کتاب ترتیب دئیں جسکی گوجری کا ادبی حلقاں مانھ سخت ضرورت سمجھی جائے۔

نظم ”گجراتی“

چہرہ چہن تے چاننی ہاسا دند چمکتا تارا
 تن مکھن من دُدھلو دُدھلو چاں لھکتا آرا
 اُچی سچی سوئی گندل سوئی مست جوانی
 رگو پوتھ مانھ دریا دندے متھرا کی گجراتی
 گلیاں اُپر لالی نیچے نین شراب کٹورا
 جھانجر کا چھکار کے اندر ساز ہیں دوہرا چوہرا
 گرمی سردی مناں بھاویں یاہ شنگراں کی رانی
 ڈھوکیں بہکیں مال پئی چارے یاہ ٹیار گجراتی
 دل دلیر شیرنی ہاروں پھرے یاہ ماہلی ماہلی
 بول رسیلا کوئل ہاروں مٹک چکوراں آلی

غزل:

درد چھپاؤں ہاساں مانھ پر اتھروں فر وی ڈلیں
 زخم سینہ کا کھڑ کھڑ ہسین پھل غماں کا پھلیں
 خوشی کا میلا کدے کدائیں غم کا نت نت پھیرا
 ہجر کا سودا کر کر اتنا جھولا فر وی پھلیں
 یاد بہاراں گذریاں کیں درد پھلوریں کتنا
 نین تسایا نیلے نملوں بھر بھر اتھروں ڈولیں
 ہجر وچھوڑا غم کا بھانبر ساڑیں کالجو سلیں
 دے کے ابھاری رگ رگ بچوں رت کا موتی ڈلیں
 جیکر محرم دل کو تھہاوے ڈکھڑا کھول سناؤں
 طارق بن دردی کے کد یہ بھیت دلاں کا کھلیں

☆ منیر حسین چودھری

☆ تعارف: رانا فضل حسین راجوری

”منیر حسین چودھری میرا سکا بڑا بھائی احمد مصری مرحوم کا فرزند ہیں، میری اکا ہی بیٹی ثریا جبین ہے واہ اسے کے گھر ہے۔ منیر صاحب لاہور یونیورسٹی میں بی اے، ایل ایل بی ہیں۔ چار بیچ سال میر پور مانہ وکالت کی فرپبلک سروس کمیشن کا مقابلہ کا امتحان مانہ کامیاب ہو کے ایس ڈی ایم تعینات ہوا۔ اپنی لیاقت تے دیانت داری کے سبب جلدی ڈپٹی کمشنر ہو گیا۔ اج کل بیہواں گریڈ مانہ کمشنر امور منگلہ ڈیم ہیں۔

گوجری مانہ حمد، نعت، مرثیہ، غزل، نظم تے گیت بہت ہی سوئی سٹھری کہیں۔ گوجری ڈراموں لہو کی خوشبو وکالت کے سے لکھی تھو جہد و شیرازہ گوجری مانہ شائع ہوؤ۔ گیت کہانی تے مچ سار لہو کی لکھی جہد اتر اڑکل ریڈیو تیں اکثر نشر ہوتا ہیں۔ ملازم ہون تیں بعد مصروف ہو گیا تے فر کچھ نہ لکھ سکیا۔ انکی شاعری کو مجموعہ ’سانجھ‘ کے نامے طبع ہو یو ہے جس ماں میرا بڑا بھائی چودھری امیر حسین شہید کا سپوت تے گوجری شاعر چوہدری شاہ محمد شاہ باز ہوراں کی گوجری شاعری دی شامل ہے۔“

کلام کا نمونہ:

باراں مانہ:

چیت رُت بہار بسا کھ سوئی جیٹھ دھپ تتی ہاڑ ساڑ چھوڑے
ساون بھادرے برھے بدلار اتھروں اٹو پیر پنجال اجاڑ چھوڑے
کنک کات غم کی منگھت تیر دل کا پوہ برف ناپ نکلیاڑ چھوڑے
مانہ ماندڑی چنداں گنت ڈکھرا مہکن درد منیر دل پاڑ چھوڑے

نعت:

جگ جگ دھم دھائی کس نے
 بگڑی بات بنائی کس نے
 بگڑیاں گگڑیاں انساناں کی
 قسمت آن جگائی کس نے
 کس نے لاڈ کی انکل دی
 پیار کی ریت سکھائی کس نے
 کھنڈوں کھیروں جوڑ لوکائی
 سدھے رستے لائی کس نے
 کرم کریم کا ہایا سارے
 رحمت رت مشکائی کس نے
 دکھیا انساناں کی ڈگی
 بنا محمد ﷺ چائی کس نے
 چھپے نام منیر اسے کو
 اُس بن آس پوہچائی کس نے

نعت ۲:

تم نے آکے رُت بدلائی
 دنیا کرماں نال بسائی
 سماں پیار کا دیکے تم نے
 رحمت کی پھل کھیل بنائی
 بھائی چارہ تم نے دس کے
 ظلماں تیں مخلوق بچائی
 تھارو آن مہارکھ ہوو
 لساں کی بگڑی بن آئی
 رحمت سب سنساراں کی تم
 تھارے صدقے شان ہتھائی
 سب کی لاج رکھن تم آیا
 بے آساں کی آس بدھائی
 دکھیا تم نے سکھیا کر کے
 لوء اک سوہنا رب سنگ لائی
 چاکر سدا منیر وی تھارو
 بخشو لاڈاں نال اُچھائی

نعت ۳:

چوں ناں محمد ﷺ ہر دم
صلی اللہ علیہ وسلم

اُن کے مُوہے یاہ درخاس سدیں گامت اپنے پاس
پوری کر کے میری آس اُنکی سنگت مِناں راس

ویہہ مھارا تے اُنکا ہم
صلی اللہ علیہ وسلم

دل بسیو رہ سوہنو ناں کرماں کی سر سوئی چھاں
آس رکھی میں اُنکی تاں قسمیں ڈاہ پناہ کی تھاں

اِت اُت کو نہیں مِناں غم
صلی اللہ علیہ وسلم

مِناں چندوں جانوں پیارا ویہہ مِناں ایمانوں پیارا
سوہنا سب جہانوں پیارا پیارا ہر ارمانوں پیارا

اُنکو میرا دل ماں ڈم
صلی اللہ علیہ وسلم

جیتاں رہنو یاد سہارے دل کی آس مراد سہارے
بس اُنکی امداد سہارے نعتاں کی فریاد سہارے

عرض منیر کروں دم دم
صلی اللہ علیہ وسلم

غزل ۱:

یاداں کا دلِ دلِ دیا تمکین آساں کا دلِ سُننا
سُنکیاں کا کچھ گیت پرانا یاراں کا کچھ سُننا

چارے کونٹ اندھیر پھریا رُٹھا راہ نہیں دستا
اپنا ہاڑا کون سنے گو کون سنے گو دُکھنا

چڑھیا ہڑھ سیلاب ماں سٹ کے آپے ہو یا کنارے
ہن کیوں رُڑھتو دیکھ کے نم ہیں تھارا نین سلکھنا

ہوں بے دوس نما نو فر وی تم نا دوس نہیں دیسوں
ہتھیں دتیں دندیں کھولوں دُکھڑا دسوں کس نا

بند زبان ہوئی ہن گنگلی بند منیر کا ہاڑا
ہوٹھیں چاڑھیو چُپ کو چندرو گُوڑ کریں ات سچ نا

غزل ۲:

جاگ اکھاں بچ رات گذاری	تارا لے گیا نیند ادھاری
چن کا چانن کی آساں ماں	بیت چلی کائے رُت بہاری
مٹھیاں مٹھیاں خاباں کے بچ	من اندر کائے صورت پیاری
دل کا کھوہ ماں درد چھپایو	فر دی جانے دنیا ساری
مرن تے جین منیر بروبر	اس کے صدقے زندگی ہاری

غزل ۳:

شیری بھریا اکھر جوڑوں
ہوں درداں کا دفتر جوڑوں

لکھیں کراماً کاتبِ دوئے
اُن کا لکھیا پتر جوڑوں

کبے ہتھ ملے گی پوتھی
نتِ عملوں کا نمبر جوڑوں

سچے ہتھ لکھت مت لھے
لوڑ نصیب کی سدھر جوڑوں

دُکھ درداں کی سیل سیل
جوڑ جکاڑ سمندر جوڑوں

گنگن پاتالاں کی ہتھ پے گئی
کیوں رے دھرتیہ انبر جوڑوں

نفرت کا پنڈھ لم لمیرا
کاہناں سپنا سندر جوڑوں

گیت:

دل ڈاہڈو دگیر نمانو روگی انت سریر نمانو
 بھانڑ بلیا کہڑا جھورا
 تاپ غماں کا تتردا کھوہرا
 سریا درد اکیر نمانو
 دل ڈاہڈو دگیر نمانو
 جیوں مچھی بن پانی تڑنے
 تڑنے چند نمائی تڑنے
 تک ماں ساس اخیر نمانو
 دل ڈاہڈو دگیر نمانو
 دل کو پُڑو پُڑو کیروں
 بھنجر بھنجر کھنڈوں کھیروں
 ہو یو لیرو لیر نمانو
 دل ڈاہڈو دگیر نمانو
 بہڑے آکے بول رے کاگا
 آوے جانی کول رے کاگا
 تنکوں بے تقصیر نمانو
 دل ڈاہڈو دگیر نمانو
 دوس بے دوسا کے سر چڑھیا
 نوہرا میرے متھے مڑھیا
 حال بے حال منیر نمانو
 دل ڈاہڈو دگیر نمانو

گیت ۲:

روپ کو چانن لایو ہن تے رُوپ سُندر کوئے آوِ ہُن تے
 ہاسا اج پھل کھیل ہو یا رے
 دل سنسار بسا پو ہُن تے سوہنا کے سنگ میل ہو یا رے
 روپ کو چانن لایو ہن تے
 خوش ہو یاں کائے نظر نہ لگے
 آس نے آن ہسا پو ہن تے فر کائے مناں کسر نہ لگے
 روپ کو چانن لایو ہن تے
 رج کے ہسینے ہاسا تھایا
 چن چڑھتل نظر پو ہن تے رُٹھڑا رُٹھڑا یار ہن آیا
 روپ کو چانن لایو ہن تے
 خوشیاں کی رت صدقے جاییے
 لاڈ پیار ہتھاپو ہن تے سوہنا تیں چند گھول گھمائیے
 روپ کو چانن لایو ہن تے
 مہراں کے سنگ تکیئے جانیں
 کول منیر بلا پو ہُن تے نظر کرم کی رکھیئے جانیں
 روپ کو چانن لایو ہن تے

گیت ۳:

رُت بساکھ بہار کا میلا
 پیر پنجال کی دھار کا میلا
 رُت بساکھ بہار کا میلا
 اُچیاں ماہلاں کا پہناوا
 ہلاں کا رنگ روپن ساوا
 سنگت سانجھ پیار کا میلا
 رُت بساکھ بہار کا میلا
 چانن برف کی چانیاں کا
 نابن ناڑا چھم ندیاں کا
 جھمر چھاں پھوار کا میلا
 رُت بساکھ بہار کا میلا
 ڈھوکاں بہکاں مرگاں کی رُت
 نویں نکوری مٹھلاں کی رُت
 سُوچ سُوہنا سنسار کا میلا
 رُت بساکھ بہار کا میلا
 ان نا تکیاں جنت دُسرے
 لاڑاں ماں ہریا دل کھلے
 ہر پاسے ہبکار کا میلا
 رُت بساکھ بہار کا میلا

D:\Writers
org\shaheen
2.jpg not
found.

چودھری محمد شریف شاہین

پیدائش: 1952ء برنیٹ بونیار اوڈی

محمد شریف سُو صاحب جن ناگوجری ادبی دنیا شریف شاہین کا نال نال جانے،
۱۹۵۲ء ماٹھ اوڈی کا گراں برنیٹ بونیار ماٹھ اک سو دگرانہ ماٹھ پیدا ہو یا۔ بیادی تعلیم
بونیار ماٹھ ہی حاصل کی تے دینی تعلیم گھر ماٹھ ہی اپنا والد صاحب تیں حاصل کی جہذا اس دور
ماٹھ اپنا گراں کا بچاں ناقران پاک کو درس دیں ہوئیں تھ۔ شریف صاحب شروع تیں ہی
ذہن تے محنتی طالب علم بنیا جائیں تھ۔ انہاں نے بعد ماٹھ کشمیر یونیورسٹی تیں ایل ایل بی کی
ڈگری حاصل کی تے فر ۱۹۸۳ء ماٹھ ریاست کو کے اے ایس کو امتحان پاس کر کے ریاستی
سیکریٹ ماٹھ ملازمت شروع کی۔ سماجی بہبود سمیت کئی محکماں ماٹھ خدمت تیں بعد اجکل
ریاستی بھرتی بورڈ کا رکن کی حیثیت نال اپنی بے لوث خدمات انجام دیں لگاوا۔ ویہ بڑا قابل
تے ایماندار افسر بنیا جائیں۔

شریف شاہین صاحب نا شروع توں ہی عالمی ادب نال بڑی دلچسپی تھی تے جد
ریاستی کلچرل اکیڈمی ماٹھ گوجری شعبہ کھلو تاں شاہین صاحب وی اپنی ماں بولی کی خدمت
واسطے گوجری دارمڈ آیا۔ انہاں نے کہانیں مقالا تے کجھ شعری مواد وی گوجری ادب کے
حوالے کیو ہے۔ پر کہانیاں ماٹھ انکو جو ہر کھل کے بانڈے آ یو ہے تے گوجری کہانی ہی انکی
اصل پچھان ہے۔ تے گوجری افسانہ نگاری ماٹھ انکو اک نمیکلو مقام ہے۔

چودھری محمد اسحاق بجران

پیدائش 1952ء بیرہ گواہ کالاکوٹ

محمد اسحاق بجران بیرہ گواہ کالاکوٹ کا رہن آلا ہیں۔ ویہ ۱۹۵۲ء مانھ پیدا
ہویاتے بُنیادی تعلیم تیں بعد کالاکوٹ کا کونلہ آلابجلی گھر مانھ ملازمت شروع
کرلی۔

گوجری ادب نال انھاں کو تعلق چروکنو ہے۔ گوجری شیرازہ مانھ وی اُن
کی شاعری شائع ہوتی رہی ہے تے گوجری کی ادبی مجلساں مانھ وی ویہ
شامل ہوتا رہیا ہیں، تے ادب کا بڑا قدردان وی ہیں۔
گوجری تے گوجر قوم کا اس ہمدرد نے سی حرنی، غزل، نظم وی لکھی ہیں۔
گھٹ شاعری کی ہے پر سنجیدہ شاعری ہے۔

سی حرنی:

ع:

عرض میری اللہ پاک اگے زندہ رہیں تم روز اخیر توڑی
تھاری جھولی مانھ پھلپھل جہڑا اُن کی رہے خوشبو اخیر توڑی
اک اک پھل تیں ہونیں لکھ پھل اگے رہے فیض تاثیر اخیر توڑی
محشر تک اسحاق یوہ رہے جاری چشمو خاص اکسیر اخیر توڑی

D:\Writers
g\mazloom.jpg
not found.

لعل الدین مظلوم

پیدائش: 1952ء درنگلہ کرناہ کپواڑہ

لعل الدین مظلوم پٹھانیہ ہور درنگلہ کرناہ کپواڑہ کا رہن آلاں ہیں جت ۱۹۵۲ء مانھ انھاں کی پیدائش اک پٹھانیہ خاندان مانھ ہوئی۔ بنیادی تعلیم اتے حاصل کی تے فر ریاستی محکمہ زراعت تے باغبانی مانھ ملازم ہو گیا۔ ویہہ محض ملازمت واسطے تعلیم کا حامی نہیں۔ انھاں نے اپنا بچپن کو مطالعہ آلو شوق جاری رکھیو۔ شاعری تے ناول انھاں کا پسندیدہ موضوع رہیا ہیں۔ یاہی وجہ ہے کہ جدا انھاں نے آپ لکھنو شروع کیا تاں شروع تاں روز بان مانھ جاسوسی ناولاں تیں کی۔ پھر اپنی مانھ بولی مانھ وی شاعری تے سماجی مضمون لکھیا۔ کرناہ کپواڑہ کو ماحول گوجری پہاڑی کو ساٹھو ہے لہذا ویہہ گوجری مانھ شاعری کرنو وی نہیں رہ سکیا تے ۲۰۰۳ء مانھ انھاں کی گوجری شاعری کی کتاب ”ہجراں کو شہر“ شائع ہوئی۔ جس مانھ نعت، نظم، غزل تے گیت شامل ہیں

اپنا محدود وسائل کے باوجود انھاں نا تخلیق کے نال نال اشاعت کی وی ڈاڈھی شوق ہے تے ویہہ اج توڑی نو دس کتاب چھاپ رہیا ہیں۔ مہاراج لکھاڑی متو کچھ لکھیں پر کتاب چھاپن تیں ہمیشاں کن مارتا رہیں۔ نتیجہ کے طور پر ساہ کے نال ہی ساری تحریر وی ہوا ہو جائیں۔ مظلوم ہوراں کو اشاعت کو یوہ جذبہ قابل تعریف تے قابل تقلید ہے۔ انھاں کی شائع ہون آلی کتاباں کی تفصیل اس طرح ہے: گوجری: ”ہجراں کو شہر“

پہاڑی: انوار مدینہ، سدا بہار، جنت دی کنجی، کڑیاں دی آزادی دافریب، پھلاں دی چنگیر، اردو جاسوسی ناول: تقدیر کا فیصل، ’انو کھے زخم‘، شبستان مظلوم، ’ماٹھو شیطان‘

گوجری کلام کا نمونہ: غزل ۱:

قسم قول اقرار نا سہکوں دل کا ہوں اظہار نا سہکوں
 بچ کی گل ہے کوئے نہیں دستو خوشیاں کا بازار ر نا سہکوں
 ہو گئیو دل نا خبرے اج کے سچنا کا اعتبارر نا سہکوں
 بسیا ویہ رقیب کے نیڑے ورکے ہوں دلدار ر نا سہکوں
 ہیں مظلوم یہ لیکھ متھا گا ٹٹی آس ہیں پیار نار نا سہکوں

غزل ۲:

ہن مٹھو بھارو کس کاری جد اجڑیو ڈھارو کس کا ری
 جد دھرتی بوند نے سگی نہ نو نہہ چکڑ گارو کس کا ری
 جد دل ماں اُن گا پڑیا نہ تاں جھوٹھو لارو کس کا ری
 جد دل کو زنگ ہی لتھو نہ فر منہ کو نعرو کس کا ری
 بے شک مظلوم جے کھ تہ نہیں ور سو دو دھارو کس کا کاری

غزل ۳:

دتی آپ سزا نا چھیے دل گو حال خدا نا چھیے
 چن تارا وی شاہد ہیں میرا بنتی زہر دوا نا چھیے
 کت ہیں چھینٹا لہو گا میرے رتی اس سر پائے نا چھیے
 جرم ہے کس کو تیرو میرو منصف بے پرواہ نا چھیے
 بے شک ہوں مظلوم نکموں کس تیں ہوئی خطا نا چھیے

چودھری وزیر بجران

پیدائش: ۲۰ اکتوبر ۱۹۵۲ء اڑگی راجوری

چودھری وزیر حسین بجران ہور ضلع راجوری کا گراں اڑگی ماٹھ اکتوبر ۱۹۵۲ء ماٹھ پیدا ہويا۔ بنیادی تعلیم راجوری ماٹھ حاصل کی تے فر بی اے تیں بعد جموں تیں اُردو تے انگریزی ماٹھ ایم اے کی ڈگری لئی۔ ادب ماٹھ گوڑھی دلچسپی کی وجہ تیں ۱۹۷۲ء ماٹھ ایم فل کی ڈگری وی حاصل کی۔ اگلے ہی سال یعنی جون ۱۹۷۵ء ماٹھ جد جموں کارپڈ یوسٹیشن ماٹھ گوجری شعبہ کھلیو تاں ویہہ اناؤ نسر کی حیثیت نال ماں بولی کی خدمت ماٹھ لگ گیا۔ فیض کسانہ تے محمود رانا ہوراں کے سنگ گوجری ماٹھ لکھا پڑھی کو سلسلو وی شروع ہو یو۔

۱۹۷۸ء ماٹھ کلچرل اکیڈمی ماٹھ گوجری شعبہ کا کھلن نال مچ لکھاڑیاں کی طرحیا اکی مٹی تحریر وی شیرازہ گوجری ماٹھ شائع ہون لگ پئیں۔ انھاں کی تحریراں ماٹھ سنجیدگی تے فنی پکیئت شروع تیں ہی موجود تھو۔ انھاں نے شاعری کے نال نال کچھ مضمون بھی گوجری ادب کے حوالے لکھیا تھا پرا نکا ادبی جوہر گوجری کہانی ماٹھ کھل کے باندے آیہت انھاں نے سماج کی گچھ کوڑی 'سچائی' باندے آنن کی کوشش کی تھیں۔

خبرے کس کی نظر لگی کہ ویہہ ادبی گہرائیاں نا چھوڑ کے اکتوبر ۱۹۸۱ء ماٹھ ریاستی سیل سپاٹا کا حکمہ ماٹھ بھرتی ہو گیاہت ویہہ اجکل ترقی کر کے ڈپٹی ڈائریکٹر بن گیاہیں۔ گوجری دار انھاں نے فراکھ پرت کے وی نہیں دیکھیو۔ اللہ کرے انھاں کے اندر کو سنجیدہ گوجری لکھاڑی دوبارہ جاگے تے ویہہ ماں بولی کا بقایا جات ادا کر سکیں۔

D:\Writers
org\chopra
2.jpg not
found.

چودھری کرم دین چو پڑہ

پیدائش: 4 فروری 1953ء

کرم دین چو پڑہ گوجر قوم کا اک پڑھیا لکھیا سماجی تے سیاسی کارکن، جوش جذبہ تے استقامت آلا مخلص گوجری محقق لکھاڑی تے اک کامیاب وکیل ہیں۔ ویہ ۱۹۵۳ء مانھ ضلع کٹھوہہ کا اک گراں مانھ پیدا ہويا۔ بنیادی تعلیم اتے حاصل کی تے بی اے تیں بعد محکمہ تعلیم مانھ ملازم ہو گیا۔ اپنی تعلیم کو سلسلو جاری رکھ کے ایم اے تے فرجوں یونیورسٹی تیں ایل ایل بی کی ڈگری وی لئی۔

کرم دین چو پڑا ۱۹۷۱ء تیں لے کے جدید گوجری ادب کی تحریک نال بڑا خلوص تے باقاعدگی نال جویا رہیا ہیں۔ گوجری ادب مانھ سب تیں زیادہ تحقیقی مقالہ لکھن آلا کرم دین چو پڑہ گوجری کی ہر مجلس مانھ نمایاں طور پر شامل رہیں۔ انھان نے گوجری ادب، گوجر سیاسی، سماجی تے علمی شخصیات تے گوجر قوم کی تاریخ بارے ہر موضوع پر تحقیق کی ہے تے انکا یہ تحقیقی مقالہ ریڈیو کشمیر تیں نشر ہون توں علاوہ گوجری کتاباں مانھ وی باقاعدگی نال شائع ہوا ہیں۔ ویہ گوجر قوم کی تاریخ بارے لکھن آلا دو جا محقق سکندر حیات طارق تیں وی اگے سٹی لکھیں تے انھان نابلاشبہ اس فن کو ماہر کہو جاسکے۔

سرکاری ملازمت کے دوران کرم دین چو پڑہ ۱۹۸۰ء تیں لے کے دو دو

بارگور ہو سٹل کٹھوعہ تے جموں کا وارڈن وی رہیا ہیں تے فرجد ملازمت
چھوڑ کے ویہ سیاست تے وکالت کا میدان مانھ آیا تاں عرصہ توڑی ریاستی
تے ضلع کی سطح پر گور مشاوری بورڈ کا رکن بھی رہیا ہیں۔ اجکل ویہ کٹھوعہ مانھ
اک وکیل کی حیثیت نال اپنی قوم کی خدمت تے رہنمائی کو کم کریں لگاوا۔
گوجری لکھاڑیاں مانھ سب تیں چنگی ذاتی لائبریری رکھن
آلا کرم دین چو پڑہ نے اچھاں اس خزانہ مانھ اپنی تخلیقات کتابی صورت
مانھ شامل نہیں کیں۔ حالاں کہ اُن کی لکھتاں ناموضوع کے مطابق تقسیم
کیو جائے تاں اُن کو لے کئی کتاباں کو مواد موجود ہے۔ امید کراں جے ویہ
اشاعت کو یوہ اوکھونیز دوی ٹپ جائیں گاتے گوجری پڑھن لکھن تے تحقیق
کرن آلاں کی رہنمائی مانھ ہوو کر س نہیں کر سیں۔

محمد امین بانہالی

پیدائش: 18 مئی 1953ء بانہال

امین بانہالی اردو، ڈوگری تے گوجری کا معتبر شاعر ہیں۔ ویسے ۱۹۵۳ء مانہ بانہال مانہ پیدا ہويا۔ اُنکا بزرگ پہلاں جموں کا پنجواں گراں کارہن آلا تھا پرے ۱۹۴۷ء توں بعد ویہ بانہال چلے گیا جت امین ہوراں کی پیدائش ہوئی۔ ۱۹۸۰ء مانہ والد صاحب کی وفات تیں بعد ویہ اپنا دو جا بھائییاں سمیت واپس جموں آ گیا تے آج تک اتے مقیم ہیں۔ امین بانہالی ہوراں نے میٹرک تک کی بنیادی تعلیم بانہال مانہ ہی حاصل کی تے فروری ۱۹۷۹ء مانہ بھید بکریاں کا سرکاری محکمہ مانہ ملازم ہو گیا تے ا جکل نوکری کا سلسلہ مانہ جموں ہی تعینات ہیں۔

ادبی دنیا مانہ امین بانہالی نے سب تیں پہلاں اردو مانہ شاعری شروع کی تے فر ڈوگری تے گوجری لکھنی شروع کی۔ ۱۹۹۰ء کے قریب گوجری ادب مانہ آن تیں بعد ویہ ہر مجلس مانہ وی باقاعدگی نال شامل ہوتا رہیا ہیں۔ اُن کی گوجری شاعری شیرازہ گوجری مانہ شائع ہون تیں علاوہ ریڈیو کشمیر تے دور درشن تیں وی نشر ہوتی رہی ہے۔

گوجری شاعری مانہ امین بانہالی ہوراں نے غزل کو میدان پسند کیو ہے تے گوجری ادب کی جھولی مانہ کجھ ہی سوئی تے معیاری غزل باہی ہیں۔

نمونہ کلام:

غزل: ۱

چار دناں کو حُسن جوانی	یوہ وی فانی واہ وی فانی
سب تیں سوہنا سب تیں پیاری	اکھ کا اتھروں یاد پُرانی
سب غزلاں مانہ میر و قصو	سب نظماں مانہ تیری کہانی
دُشمن ہو یو جان کو دل کو	جس ناکھوں تھو ہوں دل جانی
ہر انسان امین مسافر	ہر شے اِت کی آنی جانی

غزل: ۲

ان کا دھوکھا مہارا دھوکھا
 جھانسا مانھ نہ آئیے بالکل
 ان تیں چٹکیں مہاریں کُلّیں
 کمال ذات خدا کی بندیا
 اک دوجا توں پیارا دھوکھا
 جھوٹی نظر نظارا دھوکھا
 اچا محل منارا دھوکھا
 سورج چن تے تارا دھوکھا
 اج کا تحت ہزارا دھوکھا
 ہن کوئے رانجھو ہونہیں سکتو

غزل: ۳

مہاری خاطر کال برابر
 سارا چنگا ہم ہی ماڑا
 وہی چہرا وہی لئیرا
 میرا شعر تے ہونہیں سکتا
 باقی سب خوشحال برابر
 گھر کی ککڑی دال برابر
 بدلیو نہیں کچھ بال برابر
 غالب یا اقبال برابر
 فر وی تھارے نال برابر
 ساتھ امین اگر نہیں دیتو

ق:

نہ رستو ملے گو نہ منزل گھٹے گی
 میرو گب نہ دیکھو میری چال دیکھو
 ہے تقدیر میری سفر زندگی بھر
 نہ کر پایو سدھی کمر زندگی بھر

اپنی کمزوریاں ناگن بے شک
 خویاں گو مگر حساب نہ کر

یارو کرو نہ مان کہ دُنیا کسے کی نہیں
 تُرجائیں گاسارا چارون اپنا گدار کے

ق:

مر کے جیتو رہیو جی کے مرتو رہیو
 ہوں تیرا غم مانھ کے گچھ نہیں کرتو رہیو
 ہوں کرنی تے بھرنی تھی بیجا مگرا
 ہوں تیری کرنیاں ناوی بھرتو رہیو

ڈاکٹر نصیر الدین بازو

پیدائش: فروری 26، 1953ء، گرکوٹ، اوڑی، کشمیر

ڈاکٹر نصیر الدین بازو گوجری کا معتبر کہانی کار ہیں۔ وہ 1953ء ماہ بارہمولہ کشمیر کا گراں گرکوٹ اوڑی ماہ چودھری کمال الدین بازو ہوراں کے گھر پیدا ہو یا۔ بنیادی تعلیم اتے حاصل کی۔ بعد ماہ سری نگر میڈیکل کالج میں ایم بی بی ایس کر کے ریاستی محکمہ صحت ماہ میڈیکل آفیسر کے طور ملازمت شروع کی۔ کوئے دس سال اپنا لوکاں کی خدمت کرن میں بعد تشخیص کا شعبہ ماہ ایم ڈی کی ڈگری لئی تے اجکل میڈیکل کالج سرینگر ماہ اسٹنٹ پروفیسر کے طور ذمے داری نبھاوین لگاوا۔

گوجری ادب ماہ ڈاکٹر بازو ریاستی کلچرل اکیڈمی ماہ گوجری شعبہ کھلن کے نال ہی داخل ہوا۔ نسیم پونجی کی ادبی سنگت ماہ کہانیں کے لکھنی شروع کیں جے ہمیشاں کی سنگت واسطے دوئے ٹونرگاندر بل ماہ اباد ہو گیا۔ ڈاکٹر نصیر الدین بازو ہوراں نے گوجری ماہ کچھ تحقیقی مقالے طنز و مذاح وی لکھیو ہے پر بنیادی طور پر وہ کہانی کار ہیں تے گوجری ماہ اُن کی یا ہی پچھان ہے۔ ڈاکٹر بازو کی کہانیں گوجرا سماج کی عکاسی تے اصلاح کا موضوع پر ہیں تے ٹھیٹھ گوجرا لہجا ماہ انھاں نے اپنا نظریا نا بیان کرن کی کامیاب کوشش کی ہے۔ امین قمر تے مرزا خان وقار کی طرز پر انھاں نے کہانیاں ماہ طنز و مذاح کی زبان استعمال کر کے پڑھن سنن آلاں کی دل چسپی وی برقرار رکھی ہے تے سماج کی تلخ تھپتیاں نا سنگھاتیں لاہن ماہ وی مدد کی ہے۔

ڈاکٹر بازو ہوراں نے کئی خوبصورت کہانیں لکھی ہیں پر اچھاں انھاں نا کتابی شکل دین پر توجہ نہیں دے سکلیا۔ کسے کو تھاپڑے تاں اُن کی کہانی ”لہو“ پڑھن سنن جوگی ہے۔

D:\Writers
org\azad
2.jpg not
found.

چودھری غلام رسول آزاد

پیدائش 1954ء کپواڑہ کشمیر

غلام رسول آزاد کپواڑہ کا رہن آلا ہیں۔ ویہ ۱۹۵۴ء مانھ اک بڈھانہ خاندان مانھ پیدا ہويا۔ تے بنیادی تعلیم اتے حاصل کی۔ سری نگر توں بی اے تے فر کشمیر یونیورسٹی تیں ایم اے کرن تیں بعد ریاستی محکمہ اطلاعات مانھ ملازم ہو گیا جت ویہ اج ترقی کر کے ڈپٹی ڈائریکٹر بن گیا ہیں۔ ملازمت کی وجہ تیں تعلیم جاری نہیں رکھ سکیا ورنہ دور کی نظر تھی۔

آزاد صاحب کا تعلیمی دور مانھ ہی کلچرل اکیڈمی مانھ گوجری شعبہ کھلیو تے ویہ شریف شاہین کی سنگت مانھ بڑا جوش جذبہ نال جدید گوجری کی اس تحریک مانھ شامل ہو گیا۔ انھان نے کجھ اک معیاری تحقیقی مضمون وی لکھیا ہیں۔ پر اپنے اندرون کا اظہار واسطے انھان نے کہانی تے افسانہ کی صنف پسند کی تے کجھ سچ سچ سٹیٹسٹری گوجری ادب کے حوالے لکین۔ جہڑی شیرازہ گوجری مانھ شائع ہوتی رہی ہیں۔ کہانیاں مانھ انھان نے گوجرا ماحول کی پوری نفسیات سلین کی کوشش کی ہے۔

کلچرل اکیڈمی کی کتاباں نا پھلورتاں پہلا دس سال کی اشاعت مانھ گوجری افسانہ پر غلام رسول آزاد کی حکمرانی سئی لگے۔ پر اللہ جانے کس کی نظر نے ویہ اتنا اکلستر تے بے مہرا کر چھوڑیا جے پچھلا پندرہ سالوں تیں گوجری دارا کھ پرت کی نہیں دیکھتا۔ اس عرصہ مانھ گوجری کہانی نے کئی نواں لکھاڑی وی ہاڑیا تو لیا، سچ ساری کہانی وی باندے آئیں۔ پر جدید گوجری ادب مانھ آزاد صاحب کی کہانیاں کا مجموعہ کی کمی ہر کورے محسوس کرے۔

چودھری محمود رانا

پیدائش: 1954ء کالابن مہنڈر پونچھ

محمود رانا ہور گوجری کا نامور کہانی کار ہیں۔ وہ ۱۹۵۴ء مانھ ضلع پونچھ کا گراں کالا بن (مہنڈر) مانھ پیدا ہوا۔ اُنکا والد بابو فیض احمد بجاڑ ہوراک دوراندیش تے باعمل دانشور ہیں جہاں نے مدت توڑی چودھری غلام حسین لسانوی ہوراں نال سنگت کی تے قوم واسطے سانبھا خواب بنیا۔ محمود رانا ہوراں نے بنیادی تعلیم مہنڈر مانھ حاصل کی تے پونچھ کالج تیں بی اے کر کے ریڈیو کشمیر جموں کا گوجری شعبہ مانھ اناؤنسر کی حیثیت مانھ ملازم ہو گیا۔ بعد مانھ اُردو تے فرنگریزی مانھ ایم اے کی ڈگری لئی۔

محمود رانا کو ادبی سفر ریڈیو تیں ہی شروع ہو یوچت فیض کسانہ جیہا پارکھ پہلاں ہی موجود تھے تے انھاں نے امین قمر تے محمد حسین سلیم ہور گوجری نثر آلے پاسے پہلاں ہی لایا وا تھا۔ تحقیق کرن آلا اس گل پر متفق ہیں جے افسانوں انگریزی ادب کی دین ہیں۔ لہذا انگریزی افسانہ کا تمام آداب تیں واقف کی وجہ تیں محمود رانا نا گوجری افسانوں لکھتاں زیادہ مشکل نہیں آئی۔ گوجری مانھ کئی لکھاڑیاں نے شاندار کہانی لکھی ہیں لیکن اسکی اک وجہ یاہ ہے جے گوجرا ماحول مانھ تحریری ادب توں پہلاں وی لوک کہانی عام تھی تے عوام کہانی نا آسانی نال سمجھ سکیں۔ لیکن محمود رانا کی اکثر کہانیاں فنی تے تیلیکی اعتبار نال افسانہ کا معیار پر پوری اتریں۔ گوجری مانھ گھٹ ہی لکھاڑیاں نے کہانی تے افسانہ کے بھکار نازک جیہا فرق نامحسوس کرن کی کوشش کی ہے جن مانھ محمود رانا کو ناں نمایاں ہے۔ انھاں نے رومانی پلاٹ وی گوجرا سماج کی بجزوریاں مانھ گھٹ کے بڑا خوبصورت انداز نال پیش کیا ہیں۔ اسکو انداز و اُن کی مشہور کہانی بھابی تیں وی لایو جاسکے۔

محمود رانا ہوراں دس سال ریڈیو کشمیر کی ملازمت تیں بعد کے اے ایس کو امتحان پاس کر کے محکمہ خوراک مانھ چلا گیاچت اجکل وہ ڈپٹی ڈائریکٹر کے طور کم کریں۔ پر گوجری ادب واسطے یاہ گل مبارک نہیں ثابت ہوئی۔ انھاں نے گوجری لکھو ایسوچھوڑیو جے اج تک اپنی لکھی وی کہانیاں نا وی کتابی شکل نہیں دے سکیا۔ اللہ کرے وہ فر گوجری آلے پاسے مہار موڑیں۔

مولوی فقیر محمد فقیر

پیدائش: اگست 1954ء جبرجندالی مظفرآباد

گوجری کا مشہور ادیب تے نیا پڑنیا عالم دین مولانا فقیر محمد فقیر اگست 1954ء مانھ مظفرآباد کا علاقہ جبرجندالی مانھ محمد عبداللہ چچی ہوراں کے گھر پیدا ہويا۔ گھر مانھ علمی تے ادبی ماحول کی وجہ تیں بچپن توں ہی دینی تعلیم کی شوق جاگی۔ تے دیہہ سکول کی مروجہ تعلیم چھوڑ کے مدرسہ مانھ داخل ہو گیا۔ اسلامیات کی تیس بھجان واسطے انھان نا ملک کا کئی علمی اداراں مانھ جانو پیو تے کئی جدید علماء نال ملاقات تے استفادہ کو موقع وی ملیو۔ انھان نے جامعہ اسلامیہ خانیوال تے ملتان بورڈ تیں مولوی فاضل کو امتحان پاس کیو تے فر مدرسہ انوار العلوم کے ذریعے ایم اے اسلامیات کی سند لئی۔ 1975ء تیں لے کے تقریباً چار سال تک فوج مانھ مذہبی استاد کے طور کم کیو۔ تے 1980ء مانھ ادارہ تحقیقات اسلامی مانھ ملازمت شروع کر لئی۔ تے اس ادارہ کی نسبت نال دنیا کی چنام اسلامی کتاباں کا مطالعہ کے نال نال تحقیق تے تحریر کام کی وی شروعات کی۔

مولانا فقیر محمد فقیر ہوراں نا تصنیف تے تالیف کام کے نال نال گوجری زبان تے ادب کی تاریخ پر وی عبور ہے تے اجکل گوجری تاریخ کا موضوع پر وی کم کریں لگاوا۔ پر انکو اصلی کار نامہ موقر ان پاک کا گوجری ترجمہ کو ہے جہڑو انھان نے 1988ء تیں 1998ء تک کا دس سالہ عرصہ مانھ مکمل کر کے چھپوايو۔ اس توں علاوہ انھان نے پیغمبر اسلام حضرت محمد مصطفیٰ ﷺ کی سیرت پاک پر پہلی گوجری کتاب تالیف کی ہے جسکونان ہے ”سیرت طیبہ محبوب دو عالم ﷺ“ اللہ پاک انھان نا اجر عظیم تے ماں بولی کی مزید خدمت کی توفیق دے۔ (آمین!)

چودھری غلام سرور چوہان

پیدائش: 1955ء کالا بن مہنڈر پونچھ

چودھری سرور چوہان ۱۹۵۵ء ماٹھ پونچھ مہنڈر کا گراں کالا بن ماں پیدا ہوا۔
بُیادی تعلیم مہنڈرتیں حاصل کی تے فر ڈگری کالج پونچھ تیں بی اے کی ڈگری لئی۔ جموں
یونیورسٹی تیں سیاسیات تے اُردو ماں ایم کر کے وی انکی علمی تہس پوری نہیں ہوئی تے انھاں
نے اپنی تعلیمی سلسلو جاری رکھتاں قانون کی ڈگری (ایل، ایل، بی) وی حاصل کی۔ اسے طرح
انھاں نے محکمہ تعلیم، صحافت تے وکالت کی رسیں توڑی تے آخر ۱۹۸۴ء ماٹھ ریاستی سرکار کو کے
اے ایس کو امتحان پاس کیو تے ۱۹۹۲ء ماٹھ محکمہ پولیس ماٹھ ایسا قدم رکھیا کہ ہُن کسے نواں
تجربا کی گل وی نہیں سوچ سکتا۔ بھاری ہُن ویہ ترقی کرتا کرتا ایس ایس پی بن گیا ہیں پر یہ
بڑیں انھاں کے اندر کا قہکارنا جگر نہیں سکلیں۔

انھاں کی ادبی سرگرمی یونیورسٹی ماں تعلیم کے دورانم شروع ہوئیں۔ اتفاق کی گل ہے
جے اُسے دور ماٹھ کلچرل اکیڈمی ماں گوجری شعبووی کھلو تھو۔ شروعات شاعری تیں کی تے بعد
ماٹھ افسانہ انشائیہ تے ڈراما وی لکھیا جہڑا گوجری شیرازاں ماں شائع ہون تیں علاوہ ریڈیو کشمیر
جموں تیں وی نشر ہوتا رہیا ہیں۔ کجھ دیر تک انھاں نے جموں تیں وادی گلنار شائع کر کے
صحافت کی شروعات وی کی پر سہما بی طبیعت نے یوہ سلسلو زیادہ دیر تک نہ چلن و تو۔

گوجری کی ادبی مجلساں ماں ویہہ مصروفیات کے باوجود باقاعدگی نال شامل ہوتا
رہیا ہیں تے اس سفر ماں انھاں نے کجھ سوئی تے مٹھی یاد ادبی کارواں کے حوالے کی ہیں۔
یکی بحر ماں ویہ سوئی غزل لکھتا آیا ہیں تے ۲۰۰۱ء ماں شائع ہون آلی انکی شاعری کی کتاب

نمین کٹوراوی ادبی حلقاں ماں پسند کی گئی ہے۔ اگلے ہی سال انہاں نے اپنی پسند کی گوجری شاعری وی شائع کی تے فر سال ۲۰۰۳ء ماںھ انکی نثری کتاب ”کھوٹا سکا“ وی شائع ہوئی جس ماں انکی کہانیاں، انشائیہ تے ڈراما شامل ہیں۔ اُنکو یوہ ادبی سفر جاری ہے تے انکی تحریر کا کجھ نمونا تبصرہ تیں بغیر حاضر ہیں تا نچے پڑھن آلا انکا فن کو اندازو تے سواد آپ لاسکیں۔

گوجری کلام:

غزل ۱:

آپے بول پیا اتھروں	بھیت کھول گیا اتھروں
یہ اتھروں نما ناں ہیں	چند رول گیا اتھروں
اتھروں نہیں موتی ہیں	انمول گیا اتھروں
اتھروں تیری یاداں کا	گول گول گیا اتھروں
جھڑا نہیں ڈُلیا آپے	غم گھول گیا اتھروں

غزل ۲:

خیالاں کی بستی ماں آ بلیں بلیں	میری جان مناں ستا بلیں بلیں
محبت کی پہلیں ادا بلیں بلیں	اک واری مُڑ فر دکھا بلیں بلیں
یہ بل کھاتی ندریں مچلتا وا دریا	زُلفاں کی چوٹی بنا بلیں بلیں
اجاں لُج آوے اجاں شرم آوے	ہو جاں گا ہم آشنا، بلیں بلیں
چن کے کرے گو تیرا حُسن اگے	متھا تیں جھنڈ نا ہٹا بلیں بلیں

غزل ۳:

سوئی رُت بہار نا ترے
لینکلاں جیو اوکھو دے
کوہ طور نا مُرُ مُرُ دیکھے
دُنیا کی تصویر کو رنگ ہے
سینے لاؤن مر مر جاؤں
ہوں بھی ترسوں حبیب اُسے نا

میرو دل دی یار نا ترے
پتھری کوچ اڈار نا ترے
عاشق یوں دیدار نا ترے
بوہٹی ہار سِنگار نا ترے
تجن ہتر یار نا ترے
جرہاہ گل گُردار نا ترے

غزل ۴:

ہوں کئی بھلیکھا کھا بیٹھو
میں چاہو اک بنا پو تھو
یاہ کہڑی فصل جی ہے
میں امن کی گل کہی تھی
لوک ڈھونڈیں پنج سمندراں کے

گل اپنے لا کے پھاہ بیٹھو
جہڑو آپے ہی ہوں ڈھا بیٹھو
یوہ کہڑو شیخ ہوں راہ بیٹھو
توں ایٹم بم بنا بیٹھو
توں ہتھیں لعل کھڑا بیٹھو

غزل ۵:

نہیں مریو شیطان میرے اندر گو
کت کت کت تیرا لشکاراگی
گجھ ہاڑا گجھ ساڑا تیری یاداں گا
کے پئی نظر چھوہاتی اُس پاسے
اک لحظہ ماں کُنچی حوالے چوراں گے
کیوں سوا لیس سستی دی حیاتی نا
کر کر انکی صفت لوکاں ماں حبیب

کے ہو یو انسان میرے اندر گو
بُت ہو یو انسان میرے اندر گو
یوہی تھو سامان میرے اندر گو
دل ہو یو بے ایمان میرے اندر گو
کر گیو نادان میرے اندر گو
جاگے گو انسان میرے اندر گو
اُچو کیو مان میرے اندر گو

D:\Writers
org\hayder.jpg
not found.

چودھری غلام حیدر عادل

پیدائش: 2 ستمبر 1955ء ہندواڑہ (کشمیر)

غلام حیدر عادل کشمیر کا علاقہ کپواڑہ مانہ اک بڑھانہ خاندان مانہ ۱۹۵۵ء مانہ پیدا ہوا۔ بنیادی تعلیم اتے حاصل کی تے فرسرینگر تیس بی اے کرن تیں بعد ریاستی محکمہ پولیس مانہ ملازم ہو گیا۔ ویہ ترقی کرتا کرتا ایس پی ہو گیا ہیں تے ارج کل سری نگر مانہ تعینات ہیں۔

ویہ تعلیم کے دوران ہی جدید گوجری ادب کی تحریک نال جویا، نثر تے نظم لکھنی شروع کی جیہڑی شیرازہ گوجری مانہ پہلا پنج دس سال باقاعدگی نال شائع ہوتی رہیں۔ نظماں غزلاں مانہ عادل تخلص کرتا رہیا ہیں۔ گوجری مانہ کجھ چنگی کہانیں وی لکھی ہیں۔

غلام حیدر عادل ہور وی کئی دو جا گوجری لکھاڑیاں ہاروں پچھلا دس پندرہاں سالوں تیں چپ چاپ ہو کے بیس گیا ہیں تے اُن کی کائے نویں تحریر نظر اں تیں نہیں گذری۔ اُن کی شاعری وی اجمال تک کتابی صورت مانہ عوام کے باندے نہیں آسکی۔ اجکل ویہہ کشمیر کی گوجری انجمن ”ادبی سنگت کشمیر“ کا صدر کی حیثیت نال وی ذمے داری نبھاویں لگاوا۔ اللہ کرے ان کے اندر کو گوجری قلم کار وی جاگے تانجے ویہہ گوجری کا حقوق دا کر سکیں۔

چودھری محمد اشرف چوہان

پیدائش: 20 اکتوبر، 1955ء سنٹی، سُرکھوٹ، پونچھ

محمد اشرف چوہان گوجری کا نوجوان تے مُخلص لکھاڑی ہیں۔ ویہ ۱۹۵۵ء مانھ سُرکھوٹ پونچھ کا گراں سنٹی مانھ چودھری کا چوہان ہوراں کے گھر پیدا ہويا۔ پونچھ کالج تیں بی اے کرن تیں بعد محکمہ تعلیم مانھ ملازم ہو گیا تے فرماجیات تے انگریزی مانھ ایم اے کرن تیں بعد لیکچرار کے طور کم کرتا رہیا ہیں تے اچکل ہائر سینڈری سکول کا پرنسپل کی حیثیت مانھ قوم کی خدمت مانھ مصروف ہیں۔

گوجری ادب مانھ آیاں انھاں ناہن پنڈراں بیہ سال ہو گیا ہیں۔ ویہ کلچرل اکیڈمی کی اکثر مجلساں مانھ بڑا جذبہ، خلوص تے باقاعدگی نال شامل ہوتا رہیا ہیں۔ انھاں نے کجھ اک تحقیقی مقالاوی لکھیا ہیں پر بنیادی طور پر ویہ کہانی کار ہیں تے انھاں نے کافی چنگی کہانی لکھی ہیں۔

محمد اشرف چوہان ہوراں کی کہانیں گوجرا سماج کو خلیو بڑی صفائی نال باندے آئیں تے انھاں نے سماجیات کا ماہر ہون کے ناطے سماجی برائیاں کی نشاندہی تے اصلاح کی کامیاب کوشش کی ہیں۔ ان کی کہانیں شیرازہ گوجری مانھ شائع ہوتی رہی ہیں پراج تک کتابی صورت مانھ باندے نہیں آسکی۔

D:\Writers
organwar.jpg
not found.

چودھری انور حسین انور

پندرہ ایش: 9 دسمبر 1955ء فتح پور راجوری

ریڈیو کشمیر جموں کا گوجری شعبا تیں دھوئی دھائی وی گوجری اواز انور حسین کی پہچان ہے۔ ویہ ۱۹۵۵ء مانہ راجوری کا گراں فتح پور ڈنہ مانہ اک جٹ خاندان مانہ پیدا ہو یا۔ بنیادی تعلیم تیں بعد ریاستی محکمہ تعلیم مانہ استاد کے طور ملازم ہو گیا تے مدت توڑی پڑھان کی ذمہ داری کے نال نال اپنی پڑھائی کو سلسلو وی جاری رکھیو تے اُردو مانہ ایم اے کی ڈگری لئی۔ ۱۹۸۷ء مانہ ریڈیو کشمیر جموں کا گوجری شعبہ مانہ اناؤنسر کی حیثیت نال گیا چت ویہ راج توڑی یاہ ذمہ داری بڑی ذمہ داری نال نبھادیں لگاوا۔ گوجری زبان تے ادب واسطے ریڈیو کی طرفوں کی جان آلی کوششاں مانہ اُن کو بڑوہو ہے۔

گوجری ادب مانہ ویہ ۱۹۹۰ء کے قریب مقالہ نگاری کی حیثیت نال داخل ہو یا۔ پر بعد مانہ غزل کا میدان مانہ نوں قدم رکھیو جے غزل ہی اُن کی پہچان بن گئی۔ جدید گوجری غزل مانہ انور اک معتبر ناں بنو جائے لگووو۔ اُنکا کلام مانہ فنی پکلیت کے نال نال ایسو خالص گوجرو لہجو ہے جس مانہ نواں نواں مضمون تے پرانا پرانا گوجری محاورا بڑی اٹھکل نال گنھیاوا ہوئیں۔ گوجری غزل کا حوالہ سنگ نویں صدی نے انور حسین نال بڑی امید لائی ہیں۔ اللہ کرے جے ویہ باقاعدگی نال لکھتا رہیں تے گوجری آلاں کی تس بھاتا رہیں۔

کلام: حمد

سارا عالم کو بادشاہ توں ہے	حمد لائق بس اے خدا توں ہے
ہم تیری صفت کے بیان کراں	ساری صفتاں کی انتہا تیں ہے
ہر مصیبت مانہ توں ہی یاد آوے	ہر کسے درد کی دوا توں ہے
کول اتنو کہ دل مانہ ہے موجود	دور اتنو کہ لاپتا توں ہے
زندگانی ہے اک سفر یارب	توں ہی منزل ہے راہنما توں ہے

غزل ۱

کھلی اکھیں نظر نہیں آتا، خواباں مانھ تڑفادیں لوک
ہور بدھاویں بیتابی نا، ایسو دل پرچاویں لوک

پہلاں اپنو میت بناویں فر دیں داغ جدائی کا
خورے کس تقصیر کو بدلو مہارے نال مکاویں لوک

بھاویں اکھاں کی بولی مانھ اک اک گل سمجھا چھوڑیں
دل کو حال زبانی اپنی، دن تیں شرماویں لوک

یوہ ان کو دستور سہی پر اپنا بس کی بات نہیں
ہم انھاں نا بھل نہیں سکتا ہمناکھ بھلاویں لوک

دُبن چلی آپ تے دسے ترنو آئڈھ گمانڈی نا
اپنی ہوش وی نہیں کر سکتا، ہمناکے سمجھاویں لوک

غزل ۳:

یاری بھاویں کھیر تے کھنڈ ہے	منہ بھر منہ ہے کنڈ پھر کنڈ ہے
جرص کو پالو کس نے پٹیو	چتنا پلا اتنی ٹھنڈ ہے
اپنو محرم حال نہیں ملتو	نوں تے یاراں کو ترنڈ ہے
پلو اپنو سام کے رکھیے	یاہ دُنیاں بیری کو جنڈھ ہے
خواب ماں دیکھوں ہوں محشر ماں	بسر پر پاپاں کی اک پنڈ ہے

غزل ۲:

بھروسہ تک لیو یاراں کی یاری دیکھ لی ہم نے
محبت دوستاں کی بار باری دیکھ لی ہم نے

سماں کے نال بدلن آلیو پارو بدل جاؤ
دھیلاڑا چار تھاری چاریاری دیکھ لی ہم نے

جہاں نے جان وارن کی قسم کھاہدی تھی مہارے تیں
ضرورت پین در انکی عیاری دیکھ لی ہم نے

بڑو ارمان تھو اک دن خوشی کو دور دیکھاں گا
مگر اس آس مانھ ہی عمر ساری دیکھ لی ہم نے

پتو نہیں ہور کے کچھ دیکھو باقی ہے قسمت مانھ
بہتیری زندگی مانھ خواری دیکھ لی ہم نے

غزل ۳: (ڈاکٹر رفیق انجم کے ناں)

تیر و خلوص دیکھ کے دل نا خوشی ملی	کر نہ سکوں بیان مسرت جہڑی ملی
تیر و سلام آویو میرے ناں زہے نصیب	پیار حسرتاں نا نویں زندگی ملی
خوشبو مثال یاد تیری دل مانھ مہک اٹھی	سدھراں کی کوئپلاں نا عجب تازگی ملی
تیرا ملن کی خیر تمنا رہی مگر!	اے دوست تیرا درد مانھ لذت بڑی ملی
انور نا ہور چاہیے کے اس جہان مانھ	ہوں خوش نصیب ہاں کہ تیری دوستی ملی

چودھری ابرار احمد ظفر

پیدائش: 4 جنوری 1956ء ایبٹ آباد وفات: 25 مارچ 1998ء جموں

چودھری علی محمد گورسی علاقہ گول گلاب گڑھ کا ذیلدار، عالم تے سیاسی بصیرت رکھن آلابو رگ تھا جسھاں ناملکی تقسیم کا عذاب پوٹنا پیا تے اپنوتخت تاج چھوڑ کے ایبٹ آباد مانھ مہاجراں آلی زندگی گزارنی پئی۔ ابرار احمد ظفر اسے پردیس مانھ پیدا ہو یا پر پنج سال کی عمر مانھ ہی یتیم ہو گیا تے نوں شروع تیں ہی زندگی کا سارا سیک ننگے سر برداشت کرنا پیا۔

علمی ادبی خاندان ہون کی وجہ تیں ظفر مانھ ادبی ذوق موجود تھو جس ناوتی حالات نے یوں سگ لائی جے نظماں، گیتاں تے غزلاں کی پیروی پنگرن لگ پئی تے اُس فصل کو کیمقا بلو ہو سکے جس کی پال پوس تے گوڑی تالی کی ذمہ داری رانا فضل حسین جیہا ادیب تے شاعر نے قبولی ہوئے۔ ابرار ظفر کا سارا کلام مانھ وطن کی محبت، پردیس کا دکھ درد تے اپناں کی بے مہریاں کو جھڑو ذکر ہے اُس مانھ رانا فضل کی تربیت نمایاں دے۔

بُیادی تعلیم تیں بعد ابرار احمد ظفر کافی عرصہ تک ریڈیو تراڈ کھل نال جوبیا رہیا جت اُنکے اندر کو تخلیق کار جوان ہو و پروطن کی تاہنگ اُنھاں نا آخر 1981ء مانھ واپس چھک لیائی تے ویہ آکے گول گلاب گڑھ مانھ بس گیا۔ پرات آکے اُن کیا کے کے ریحھ پوری ہوئیں تے کتنا خواب ریزہ ریزہ ہو یا اسکوانداز و اُنکا کلام توں ہی لایو جا سکے۔ کیونجے اُن کی حیاتی کی کشمکش، دکھاں درداں، محرومیاں تے مایوسیاں کو چھالو شاعری مانھ وی موجود ہے۔

ظفر نے بھاویں ہر صنف مانھ شاعری کی کوشش کی ہے پرویہ اپنا اندرون کو درد نظماں مانھ کھل کے بیان کر سکیا ہیں۔ تے اُن کی نظم ہی اُن کی شاعری کی جان ہیں۔

”سدہراں کا موتی، ڈھول اواز ادوروں سو بھیں، اکھر۔ تے ہوں نہیں ہوسوں“ اُن کی شاہکار نظم ہیں۔ اُنہاں نے کئی درد یلا گیت وی لکھیا ہیں تے خوبصورت غزل وی، مگر ہر صنف مانھ ان کو اک اپنوں پھوئے نمیکلو رنگ ہے۔ اُنہاں نے جس خوبصورتی نال ٹھیٹھ گوجری لفظ تے محاورا اپنی شاعری مانھ برتیا ہیں اُس تیں اپنی مادری زبان پر اُن کی پوری قدرت کو اندازہ ہو سکے۔

ان کو کلام گذشتہ سال 2003ء مانھ ریاستی کلچر اکیڈمی نے ”گھمن گھیر“ کا ناں نال شائع کیو ہے جہڑ بلاشبہ گوجری ادب مانھ اک اہم اضافی وی ہے تے نوجوان لکھاڑیاں واسطے پات وی۔ وطن تے انسانیت نال محبت کرن آلو یوہ شیر جوان اک سڑک حادثہ کی وجہ تیں 25 مارچ 1998ء ناساراں تستیاں تیں ازاد ہو گیو۔ تے نوں گوجری زبان اک درد پئی اواز تیں محروم ہو گئی۔ کلام:

نظم: خونی بستی

اس پیار کی خونی بستی مانھ ارمان میرا نت رُلیا ہیں
 ات ظلم کا جرگا لگا ہیں، ات قہر کا بھکھو جھلیا ہیں
 ارج دیکھ کے کد اعتبار آوے، اس باغ کی خستہ حالت نا
 کدے ات بہار وی آئی تھی، کدے یہ یوٹا وی بھلیا ہیں
 ہوں جد تک ہوش مانھ رہیو ہاں، یاہ دل کی تانی الجھی بچ
 جد ہوں مستی مانھ ڈبیو تے فر راز بہتیرا کھلیا ہیں
 میری مہر وفا کو اوڑک ات، انعام لھو تے کے لھو
 ات لاجھی غرضی لوکاں نے، احسان میرا نت بھلیا ہیں
 ات پیار محبت دھو کھو ہے، ات خلق خلوص نہ جانے کوئے
 نت غرضاں کا پروانا سنگ، ارمان ظفر کا ٹکلیا ہیں

ماں نظم:

دُکھ میرا ماں جھلے تھی توں سینو اپنو سلے تھی توں
 جد وی ہونی سر پر آئی اگو میرو ملے تھی توں
 قدر تیری اج آوے ماں
 میرا درد بنداوے ماں
 رُوں کدے کدے ہسوں چوں چھڑکوں اُتو پھسوں
 دُکھ درداں نے گھیرو دِتو توں ہی دس ہاں کیاں نسوں
 دُنیا انت ستاوے ماں
 منا سینے لاوے ماں
 جے امڑی اج کو لے ہوتی میرا دُکھڑا سن سن روتی
 دور میرے تیں امڑی میری روئے ڈوپلے اتھروں موتی
 میرا درد بنداوے ماں
 منا سینے لاوے ماں
 یاد تیری مچُجُجُ آوے منا رُوں سہکوں ترسوں تینا
 دُکھ درداں نے گھٹی لائی غم دُنیا کا جھلوں کناں
 دُکھڑا کون بنداوے ماں
 منا سینے لاوے ماں

نظم: ہوں نہیں ہوسوں!.....

گیت میرا نت گائیں گا تم
ہوں نہیں ہوسوں ہوں نہیں ہوسوں

آپ دھیانی سوچاں مانھ جد
میری صورت ابھرے گی
اپنے کول بلائیں گا تم
ہوں نہیں ہوسوں ہوں نہیں ہوسوں

جدوی کوئے بھل بھلاوے
میر و ناں بلاوے گو
چھم چھم نیر برہائیں گا تم
ہوں نہیں ہوسوں ہوں نہیں ہوسوں

اج کے قدر بیدرداں نا
اوڑک وہ دن آنو ہے
کوکیں گا کر لائیں گا تم
ہوں نہیں ہوسوں ہوں نہیں ہوسوں

اوڑک اک دن حسن خزانو
اپنے ہتھیں بنڈنو ہے
کوڈی مل چکائیں گا تم
ہوں نہیں ہوسوں ہوں نہیں ہوسوں

فر جد کوئے سوت کی اٹی
حسن کو مل چکاوے گو
ڈاہڈا پچھوتائیں گا تم
ہوں نہیں ہوسوں ہوں نہیں ہوسوں

جھولی بھر کے سچرا سچرا
سچر سویل مٹھلاں کا گچرا
قبر ظفر پر آئیں گا تم
ہوں نہیں ہوسوں ہوں نہیں ہوسوں

غزل ۱:

میں گیت وفا کا گا تکیا
وہ اسراں آج کچھ رُٹھا ہیں
وہ دل تیں ڈیرو پٹنا نہیں
ہتھ عشق کو موتی آہو نہ
سکھ دی ظفر نا راس نہ آہو
کچھ پیار کا دھوکھا کھا تکیا
کر ترلا منٹ منا تکیا
میں سوسو وار بھلا تکیا
تن من کا لعل کھڑا تکیا
دکھ دی میں گل لا تکیا

غزل ۲:

دل میرا نا ساڑ گیو کوئے
نین ملا کے اکھ چھوہا کے
لکھ کے پیار کی پریم کہانی
لارا لا کے عشق نگر کا
جین کی ظفر آس نکھی
ہجر کی چنیا چاڑھ گیو کوئے
گھل غماں کا پہاڑ گیو کوئے
دل کو درقو پاڑ گیو کوئے
ادھ ایشانوں جھاڑ گیو کوئے
آس کو شہر اجاڑ گیو کوئے

غزل ۳:

ستھرا ہی رہ گیا ہیں ڈیرا چلے گیا
ہوں رہ گیو تھو سکھنی گٹھڑی نا تو ستو
میرا نصیب مانھ رہی یاہ شام غم کی شاید
میرا خلوص کو منا انعام کے دو
ہوں دے نہ سکیو کائے ظفر بد دعا بھلیں
دل مانھ میرے تھا جنکا بسیرا چلے گیا
سرمایو سارو لیکے لٹیرا چلے گیا
سنگ اپنے لے خوشی کا سویرا چلے گیا
دے کے ویہ غم گھنیرا گھنیرا چلے گیا
عاجز وہ کر کے بھائیں نصیرا چلے گیو

غزل ۴:

غم اتنا توں جریا نہ کر
لکھ کو لکھیو ہو کے رہنو
بھوگوں گو ہوں آپے ہونی
نہیں مرتو کوئے ہجر مانھ اڑیئے
نہ ملیا ات حشر ملاں گا
دکھ کو پانی بھریا نہ کر
سوچ متی مچ کریا نہ کر
رو رو کے توں مریا نہ کر
دوری تیں مچ ڈریا نہ کر
دل چھوٹو توں کریا نہ کر

غزل ۵:

بیتیا وقت بھلا نہیں سکساں
ہوں مجبور تے توں ہے بے بس
جگ بیری ہے پیار آلاں کو
ہم رسماں کا قیدی دوئے
آس کی کشتی نازک بودی
اتنو لموں چھیڑ نہ چھڑیئے
ظفر کہانی توڑ نہیں چڑھنی
جاغ نویں بھی لا نہیں سکساں
کھل کے باندے آ نہیں سکساں
جگ کے سنگ ٹکرا نہیں سکساں
قسم نا توڑ نبھا نہیں سکساں
پار ندی تیں جا نہیں سکساں
مرد کے بہکیں آ نہیں سکساں
گیت خوشی کا گا نہیں سکساں

غزل ۶:

اک دل کہ تیرے گھر آؤں
دیکھ تیاں بھی چین نہیں آتو
توں ہے ویری ناگ کی مچی
سوچ میریں تیرے در ہمزیں
مت توں بے وفا نہیں ہوسیں
فر سوچوں نہ اُس در جاؤں
نہ دیکھوں تاں بھی گھبراؤں
تک تک اینویں جی ترساؤں
کس راہ تیری یاد بھلاؤں
دل نا سوٹھا دے سمجھاؤں

غزل ۷:

دل کی ہر گٹھ کونے توں ہے
 آپ دھیانو ہسوں روؤں
 دل میرا کو دشمن ہوؤ
 خیال میرا کی منزل توں ہے
 میری آس امید وی توں ہے
 ڈیرو تیرو ہانھل ہانھل
 پیار تیرا ماں پاگل پاگل
 اکھ تیری کو کاجل کاجل
 میری سوچ کو ساحل ساحل
 طلب میری کو حاصل حاصل

غزل ۸:

میری دھڑکن میری صدا بن جا
 پوچھ اٹھروں تے میری کاری آ
 کانگ دکھ کی تے دور ہے ساحل
 بن جا میرو نصیب میری خوشی
 میرو ارمان بن کے جی غزلے!
 میری چاہت میری وفا بن جا
 میرا درداں کی توں دوا بن جا
 میری کشتی کی ناخدا بن جا
 میری کرنی کی نہ سزا بن جا
 میرا ہوٹھاں کی توں دعا بن جا۔

غزل ۹:

ٹھٹھو یوہ زنجیر ملی رے
 خواب اک ڈٹھو جاگتی اکھیں
 جس کی خاطر بھیس بناو
 ملیو تیرو پیار غزل جی
 جس جنت نا ہوں طلبوں تھو
 ہوں سوچوں جاگیر ملی رے
 اُس کی یاہ تعبیر ملی رے
 منان میری بہر ملی رے
 کیا سوئی تقدیر ملی رے
 دوزخ بھوگ اخیر ملی رے

گیت:

پکھو اداسیا رے ڈالی ڈالی بول
ڈکھڑاں تے درداں کی گھڑی پھروں
پکھو اداسیا رے ڈالی ڈالی بول

ٹور کے کویلے ماہیو ہن پچھو تاؤں
دور گیاں سجاں کی خیر مناؤں
ڈکھڑا یہ لگیاں کا کس نا سناؤں
کس نا پوہ دسوں سینو اپنوں ہوں کھول
پکھو اداسیا رے ڈالی ڈالی بول

اج منا سٹ گیو ماہیو ہان کو
چکھو سواد کیسو اکھ بھیڑی لان کو
کناں کچو نکلیو ماہی زبان کو
بھلیو ہے سوہنو سارا وعدا تے قول
پکھو اداسیا رے ڈالی ڈالی بول

ہویو کے قصور ماہیا لہھی یاہ سزا
دو دل سا بھجا سا بھجا ہویا ہیں جدا
دھکھوں دھکھوں دل کرے میریا خدا
قضیاں ماں سنھے گئی چند میری سوہل
پکھو اداسیا رے ڈالی ڈالی بول

زندگی تیں اک چلی ہوں بیٹھی روؤں
تیرا دتا زخماں نا کس طرح دھوؤں
ساری ساری رات جوگوں پل وی نہ سوؤں
کشتی حیاتی آلی اج ڈانوا ڈول
پکھو اداسیا رے ڈالی ڈالی بول

موت آوے میرے بہڑے شگن مناؤں
اس روگی زندگی ناگ وی نہ لاؤں
سجاں کا درداں ماں مرجانو چاہوں
جس پچھے چند گالی جینے سوہنو ڈھول
پکھو اداسیا رے ڈالی ڈالی بول

رانا غلام سرور صحرائی

پیدائش: 3 فروری 1956ء پروڈی گجراں راجوری

سرور صحرائی ناپردیس کو احساس، پیر پنجال کی ہڈک تے شاعری وراثت مانھ لہھی ہے۔ ویہ گوجری ادب کا پیر پنجال رانا فضل حسین راجوری کا سپوت ہیں۔ جہاں نے ملکی تقسیم کے دوران، ہجر کا درداں کی پنڈو کلی قدروں باہری بنھ لئی تھی تے ویہ سنگیاں ساتھیاں تے وطنیاں کو ہصو اج توڑی شاعری کی زبان مانھ پچکاوین لگاوا۔ سرور صحرائی نے وی اس بچوں اپنا حصہ کی بندھن کے لئی ہے۔ ویہ ۱۹۶۵ء مانھ راجوری تیں ہجرت کر کے میر پور جالبسیا تھاتے تعلیم مکمل کر کے اجکل ادب کے نال نال تدریس کو فرض وی نبھاوین لگاوا۔

گوجری ادب مانھ غلام سرور صحرائی کی طبیعت شاعری آلے پاسے چلی تے تے رانا فضل ہوراں کی رہنمائی نال اس مانھ ایسوکھار آ تو گیو جے اج گوجری ادب مانھ سرور صحرائی کو اک اپنا سلوب، مقام تے پچھان ہے۔ انھان نے ہر صنف مانھ شاعری کرن کی کوشش کی ہے پر انھان نے روایتی شاعری کا بنیا بنایا اصولاں تیں ہٹ کے گوجری مانھ نواں تجربا وی کیا ہیں۔ جہڑی گوجری لکھاڑیاں تے پارکھاں نے مچ پسند کیا ہیں۔ ان کو گوجری کلام ریاستی کلچرل اکیڈمی نے پہلاں ”سجری سویل“ تے ”زرت زوئی“ کی صورت مانھ شائع کیو ہے جس نال انھان ناپڑھن تے سمجھن آلاں کی تعداد مانھ مچ اضافہ ہونے گو۔ چھوٹی بحر مانھ باراں مانہ لکھ کے انھان نے مولانا فضل پانی پتی کی یاد تازہ کر چھوڑی ہے۔

صحرائی بنیادی طور نظم کا شاعر سی لگیں تے یوں انھان کی تخلیق کجھ خوب صورت نظماں تے ماہیا کی طرز پر لکھیا و اباراں مانہ تے گیتاں کے نال نال غزل مانھ وی نظم آلورنگ

یوں ڈُل آئی ہے۔ جے ان کی اکثر غزل مسلسل غزل کہی جاسکیں۔ شاعری مانہ چن، وطن تے عمید
جی اصطلاح رانا فضل توں مستعار محسوس وہیں۔ شاید اس گلوں وی جے پڑھن سُنن آلاں نایہ
لفظ رانا فضل ہو راں کی زبانی سُنن کی عادت جی ہو گئی وی ہے۔ بہر حال سرور صحرائی کا کجھ
نواں تجربا دل نائجُ نائجُ پرچا ویں تے امید ہے جے نواں لکھن آلا انھاں تیں ضرور رہنمائی حاصل
کریں گا۔

کلام:

نعت:

سچا سچا اعلیٰ اچا کاج سکھاون آیا
سدھا راہ سبلا سوکھا راس بناون آیا

یگوی یگوی آن بنائی درس توحید پڑھایا
کفر شرک گمراہیوں مہاری جان بچاون آیا

بھلا گتھا، کڈھ بھلیکھا سدھے رستے لایا
رہبر پاک محمد ﷺ عربی تھا بخشاون آیا

ماڑا ریڑا لسا ماندا حضرت نے سرچایا
نیکیو کار انسان کی اچی شان بدھاون آیا

رکھی لاج رسول اللہ ﷺ نے رحمت کا کر سایا
اُمت کے باغیچے پیارا بوٹا لاون آیا

غزل ۱:

پھیلاں ہار ہنار کسے کی
 رگ رگ بچے تار کسے کی
 واہ سُندر سنسار کسے کی
 پیاری پیار پیار کسے کی

غزل ۲:

نویں زوئی سجری یادیں
 آساں کا پھل دل کے باغیں
 اُنکا چیتا رُت مُشکاویں
 لاڈ اُنھاں سنگ پال کے رکھیا
 وہ بسیا وا سدھری یادیں
 پھلایا کس کی ہگری یادیں
 وہ لگیا من سجری یادیں
 بچپن کی بے فکری یادیں
 گندل پیار کی پنگری یادیں
 مہلے بیل وفا کی سرور

غزل ۳:

سجری سویل تے رُت بہار
 سماں کا نین تریل نے دھویا
 دل یاداں کی چنیا چڑھیو
 کیوں نہیں ملتا دوئے کنار
 غزل میری وی پھیلاں ہار
 رُت نے رنگیو وو سنسار
 اک چندڑی تے دُکھ ہزار
 دیکھیں ندیوں پار ارار
 عشق اُستاد ہو پورے سرور
 حُسن کی پٹی پڑھے پیار

غزل ۴

پہلاں ویہ ارمان بنیں تھا
 جے ہُن اکھ پرت نہ دیکھیں
 ارماناں کا مان بنیں تھا
 فرکانہ نادل جان بنیں تھا
 اُف کروں تھوتاں ویہ سوہنا
 آپے دردی آن بنیں تھا
 لوڑ پئی تاں دُڈو دسیو
 ایویں نین پران بنیں تھا
 دیکھ مناں انجان بنیں تھا
 اوپریاں اکھاں تیں صدتے

غزل ۵

خبرے خابیں کون آیو رے
 دے گیو تھو کوئے پیار کا لارا
 جاگ آئی تے رون آیو رے
 ایویں دردی ہون آیو رے
 یاداں کی اک برچھی ترکھی
 دل ناسل پرودن آیو رے
 تچ دتو اس بے پرواہ نے
 نین سڑیں لہو چون آیو رے
 ہوں سرور ہنگلا تو جاگوں
 من میرے کوئے سون آیو رے

ق:

چن عید کو سانجھو چڑھیو رے یاہ عید ہے روزیداراں کی
 تم دور تے ہم مجبور ہويا کے عید وچھوڑے ماراں کی
 چن سانجھ سنجھیالی اک سانجھی تم چن دیکھیں ہم چن دیکھاں
 تم جدا جدا ہم جدا جدا ہے سا جھ رے دینہ چن تاراں کی

باراں ماہیہ:

چیتر کی رُت ربا
 چڑھتل چن چوٹی کد پوچوں اُت ربا
 بیساکھ بہار آوے
 چڑھتل چن چوٹی مت سُدر یار آوے
 چُج جیٹھ کی گرمی نے
 کوئے شوخ بنا چھوڑیو لاڈاں کی نرمی نے
 ساون کی رُت برھیا
 قسمت جے ہوئی بیساں گا لا پرہیا
 کتک مانھ یاد کروں
 وہ آکے سُن جاتو ہوں کے فریاد کروں
 مگھر کو مہینو رے
 چاہت دل کی تھی تیرے سنگ جینو رے
 پوہ پالا برفاں کا
 کورا گل جاناں ان میرا حرفاں کا
 مُڑ آئیے ماگھ اڑیا
 سجری لسی ہے سریاں کو ساگ اڑیا
 پھکنا کی آوت ہے
 دُنیا مطلب کی یاہ گُوڑ کہاوت ہے

گیت: ۱

چن میرو چڑھیو چوٹیاں تیں اوہلے
 چنناجی کدے کول بسینے ڈھار باچوٹیاں ناچن میرو بولے
 چن میرو آوے کدے چائیں راتیں
 چنناجی کدے کول بسینے من پرچاوے میرو آن گلین باتیں
 چن سوہنو دسے منا چاننی نا بنڈتو
 چنناجی کدے کول بسینے آوے کالی راتاں وچ پیار پیار چھنڈتو
 اُپر چنار چنناں کاگ اج بولیو
 چنناجی کدے کول بسینے آئی تیری یاد ڈاہڈی چور زورے ڈولیو

گیت: ۲

پھلاں نے رنگ لایا
 سجری سویل سمیں پردیسی مُڑ آیا
 اکھ رات کی روئی ہے
 سجری سویل سمیں رت نویں زروئی ہے
 اج آوت راہیاں کی
 سجری سویل سمیں مگی رات جُدا یاں کی
 مٹھی باس بہاراں کی
 سجری سویل سمیں رت لاڈ پیاراں کی
 کائے سانجھ تپوشاں گا
 سجری سویل سمیں ہر جوڑ کے سوچاں گا

گیت ۳:

سجر سویل ہوں راہ کے کنڈے کس نا ڈیکوں ٹھنڈے ٹھنڈے

نت آؤن ات لوء ہوتی نا نہ کوئے آکے ڈکھڑا بندے
بیٹے بیلو نت روتی نا کس نا ڈیکوں ٹھنڈے ٹھنڈے

دل کا درد بسون نہیں دیتا جین نہیں ہوتو جوڑے کنڈے
یاد کا کنڈا سون نہیں دیتا کس نا ڈیکوں ٹھنڈے ٹھنڈے

میں راہ ملیا ہمیش اڈیکی آس کی بیل نہیں چڑھتی منڈے
ہو گئی گہلاں کی بستیکی کس نا ڈیکوں ٹھنڈے ٹھنڈے

اونویں بیت چلی زندگانی کدے نہ آن سنجھیالی گنڈے
نہ اس رستے آہو ہانی کس نا ڈیکوں ٹھنڈے ٹھنڈے

بھانویں اڑیا ہوں نہیں سوئی اپنی شے کیوں آپے بھنڈے
دل کی چنگی شکل کلونی کس نا ڈیکوں ٹھنڈے ٹھنڈے

ہجراں درد جدائیاں مارے سرور پیار نا نکلے چھنڈے
ملن کی آساں لائیاں مارے کس نا ڈیکوں ٹھنڈے ٹھنڈے

گیت ۴:

دُنگھا دُکھ گروں تے سہی گجھیا وا دردا بول تے سہی

تکھیے بانھل اوہل تے سہی جد کیں اکھ بجن سنگ لائیں
دوئے دُنگی ڈاب دُکائیں

دُنگھا دُکھ گروں تے سہی بے آواز بے جیہا اتھروں
درد انگار پھروں تے سہی بنیا لہو سڑیاوا اتھروں

دُنگھا دُکھ گروں تے سہی

اوکھا راہ کو راہی ہوکے یار تپوش سودائی ہو کے
ہو جا ڈانواڈول تے سہی گم سم چپ سب رہنو چھوڑ
دُنگھا دُکھ گروں تے سہی

درد کی کٹھڑی کھول تے سہی ہوٹھیں لایا جنڈرا توڑ
دُنگھا دُکھ گروں تے سہی

ندی وفا کی ہڑھ آوے تے آس کو مکھن چڑھ آوے تے
پیار کو دُدھ چھچھول تے سہی

دُنگھا دُکھ گروں تے سہی خابیں فرمت میت ملے گو
من ماں یار ڈھنڈول تے سہی سرور دُکھیا گیت سُنے گو
دُنگھا دُکھ گروں تے سہی

D:\Writers
org\shouq.jpg
not found.

میاں اشتیاق احمد شوق

پیدائش: مارچ 1956ء وائٹ کشمیر

شوق ناگوجرا لوک اک رسیلاتے سجیلا شاعر کے طور پر چھانیں۔ تے بڑا گھٹ لوکاں نا پتو ہے جے ان کو ناں اشتیاق احمد ہے تے ویہ میاں نظام الدین لاروی کا صاحبزادہ ہیں۔ ویہ خواہش کرتا تاں مال دولت، ملازمت، سیاست، سب کچھ حاصل کر سکیں تھا۔ پر اس شہنشاہی تے روحانی سلسلہ مانہ جمیا پلپیا اس گوجری بھرتری ہری نے سارا کہیں نا تیاگ کے غالب کی طرفداری شروع کی تے گوجری ادیبان، شاعراں تے قدر دانان نے سراکھیں بسال لیو۔ دیکھ دیکھتاں انھاں نے وہ مقام حاصل کر لیو جے ۱۹۸۰ء تیں اراں کائے گوجری مجلس تے کانفرنس اشتیاق احمد شوق کا ترنم آلا کلام توں بغیر مکمل نہیں سمجھی جائے تھی۔

اشتیاق احمد شوق نے گھٹ شاعری کی ہے مگر صاف سُٹھری تے سؤنی شاعری ہے۔ بنیادی طور پر ویہ غزل کا شاعر ہیں پر انھاں نے گیت تے طنز و مزاح مانہ وی کچھ چنگا اضافہ کیا ہیں۔ خالص گوجراتے ادبی ماحول مانہ جم پل کی تاثیر انکا کلام مانہ وی ٹھیٹھ گوجری کی صورت ظاہر ہوئے جس مانہ حاجی مجنید نظامی تے اقبال عظیم جیہا نیاں پڑنیا پارکھاں تے ادیبان کی تربیت نے سونا پر سہاگا کو کم کیو ہے۔

شوق صاحب عرصہ توں چُپ ہیں اللہ جانے کیوں۔ اچھاں تک ان کو کلام کتابی صورت مانہ دیکھن واسطے وی متی اکھ تسائی ہیں۔ خدا کرے گوجری غزل کو یوہ شاہسوار فرماہار موڑے تا نچے گوجری زبان تے ادب کا عاشقاں کی تس بجھان کے نال نال ماں بولی کی بتری دھاراں کو حق وی پور و پورا داہو سکے۔ کلام:

غزل ۱:

نظراں نا یار تیری تد تک تلاش ہے
موٹڈھاں پر زندگی کی جد تک یاہ لاش ہے

منا ہجر کی دھپ بھلا ساڑے گی ہور کے
ڈھکی دی غم کی چھاں چیر یوں آس پاس ہے

تصور مانھ توں نظر مانھ توں ہر ویلے کول ہے
فر تیرے میرے درمیاں کیوں لفظ کاش! ہے

راتاں کلکھیاں نا توں منا ہی سوئپ دے
سرگی کا خوف تیں میرو دیو اداس ہے

اتھروں مانھ شوق ڈھال کے اکھاں تیں کیر نہ
ہر غم نا سہن واسطے ٹھنڈی جی ساس ہے

غزل ۲:

رہیو راز دل مانھ ہوں اج تک چھپا تو
کہڑو میری سنتو تے کس نا سنا تو

ہتھ دل پر رکھ کے توں اتنو ہی کہ چھوڑ
کدے بھی نہ آتو، توں جد جد بلا تو

توں پیارو تھو تاں ہی خدا کی قسم
رہیو تیرا زخماں نا اج تک کھڈا تو

زمانہ کا ٹھہلا نے کت لے پچاپو
اگیرے پھلاں تیں یوہ کنڈاں کو احاطو

تتاں نہیں تھو آنو تے نہ آیو شوق
صبح شام ایویں رہیو کاگ اڈا تو

غزل ۳:

چن کے نال یہ تارا چمکیں خوش اج دُنیا ساری ہے
انگی وی کیوں دل میرا مانہ ایک غماں کی آری ہے

منا مہل کے کے گجھ تھا پو بہانو پیار کو جھوٹھو تھو
یاد توں جد جد آیو سجا دُنیا اک بساری ہے

ٹٹ پوئے اسمان ہی بھادیں ایسودی ہوں سوچوں تھو
ہُن اِس پیار کا ٹٹا بُت پرچن کی لوء وی بھاری ہے

دھوکھو کھا نہ جائیے صدقے رُت گجھ ایسی بدلی ہے
پھلیں تھا جت مہل خوشی کا غماں کی مہلواری ہے

تاراں کی لو مہکی مہکی چن بھی شوق انگلا یو ہے
رات نہیں گزری گویا سجا عمر ایک گزاری ہے

گیت:

نیناں کا تیں کٹورا چکيا تے ڈل گیا
چھپيا وا بھيت سارا آپے ہی کھل گیا

کتنی ہی وار کیریا اتھروں میں جھولیاں ماں
آساں کا شہر ماں سب کوڑی کے مل گیا

نیناں کا تیں کٹورا چکيا تے ڈل گیا
چھپيا وا بھيت سارا آپے ہی کھل گیا

چننا پیا ہیں کنڈا ربا توں خیر کریئے
جت جت خزاں گئی اتوں ہی مہل گیا

نیناں کا تیں کٹورا چکيا تے ڈل گیا
چھپيا وا بھيت سارا آپے ہی کھل گیا

جس نے دتا ہیں زخم وہ جانتو نہیں ساتھی
اجڑے گی شوق نگری جے یہ بھی گل گیا

نیناں کا تیں کٹورا چکيا تے ڈل گیا
چھپيا وا بھيت سارا آپے ہی کھل گیا

گیت: اشتیاق احمد شوق

کائے یاد کرے اج کھینچل
 منا دور کدے توں لے چل
 سوہنا چن کا دیس کی وا
 تیرو ضامن میرو خدا
 او دُور گیا چن آ
 تیرو ضامن میرو خدا
 اک روح تے جسم جدا
 تیرو ضامن میرو خدا
 کھلی دیکھوں تیرا راہ
 تیرو ضامن میرو خدا
 کس بزم کی ایڈ سزا
 تیرو ضامن میرو خدا

بہڑے کاگ کوئے جد بو لے
 میرو پیو کلیجو ڈولے
 توں میرو ہوں تیری کے
 چن تاراں تیں آچھ لے
 ہر خوشی کے نال ہے غم
 تیری یاد ماں نکلے دم
 توں حسن تے ہوں بچاری
 تیری بلمیں زلوں پیچاری

طنز و مزاح:

آ بھائی یو با مہنیں نا موڑ
 جے ہوں جا تو کدے سکول
 پڑھن کی نہیں تینا لوڑ
 ڈیرے کون بنا تو پُول
 ہوں گری تے عالم کھوڑ
 جگنی کرتی کد قہول
 آ بھائی یو با مہنیں نا موڑ

D:\Writers
rg\gulshan.jpg
not found.

چودھری منظور حسین گلشن

پیدائش: جون 1956ء پلانگڑھ راجوری

منظور حسین گلشن گوجر قوم کا اک باصلاحیت نوجوان ہیں جن مانہ تخلیقی تے انتظامی رُحان بچپن تیں موجود تھو۔ ویہ ۱۹۵۶ء مانہ ضلع راجوری کا گراں پلانگڑھ مانہ اک کسانہ خاندان مانہ پیدا ہويا۔ بُنیادی تعلیم اتے حاصل کی تے بعد مانہ پونچھ کالج تیں بی اے تے فر جوں یونیورسٹی تیں ایم اے کی ڈگری لئی۔

منظور گلشن تعلیم کے دوران ہی جدید گوجری ادب کی تحریک مانہ شاعر کی حیثیت نال شامل ہويا۔ انھان نے کئی تحقیقی تے تنقیدی مضمون وی لکھیا ہیں جہڑا شیرازہ گوجری مانہ شائع ہوتا رہیا ہیں۔ مطالعہ کا عادی تے عالمی ادب پر نظر رکھن آلا منظور گلشن یونیورسٹی مانہ تعلیم کے دوران کچھ عرصہ واسطے سروری کسانہ مرحوم کا رسالہ گوجر دیس کا ایڈیٹوری رہیا پر استاد کی حیثیت نال سرکاری ملازمت شروع کرن تیں بعد یوہ سلسلو بند ہوگیو۔

ریاستی محکمہ تعلیم مانہ تھوڑی مدت استادی کرن تیں بعد انھان نے زیادہ عرصہ گوجر ہوٹل کا وارڈن کے طور قوم کو مستقبل بنان مانہ دن رات محنت کی ہے تے اس سلسلہ مانہ ڈوڈہ، اودھم پورتے پونچھ مانہ خدمت کرن تیں بعد اچکل راجوری مانہ مقیم ہیں۔

سرکاری ذمے داریاں مانہ اُلجھ کے ویہ اپنی تخلیقی صلاحیت گوجری ادب پر نہیں لاسکیا تے گوجری پڑھن تے لکھن آلا انکا علم تے منصوبہ بندی کو قلمی اظہار نہیں دیکھ سکيا۔ اُمید کراں جے ویہ اس پاسے مناسب دھیان دیں گاتے معیاری گوجری ادب کی تسائی اکھاں ناہور نہیں ترسائیں۔ کلام:

غزل

محبت کا میرا خیالاں مانھ آئیے گھڑی واسطے فر وصالاں مانھ آئیے
 کد تک ہوں بیسوں تے جھلوں تسپیا توں اتھروں تے درداں کا نالاں مانھ آئیے
 اس بستی توں راہاں گا دوئے کنارے توں شنگراں کی جھولی پنجالاں مانھ آئیے
 ہوں ڈیکوں تے دیکھوں ہاں رستاویہ تیرا توں بہکاں تے ڈھوکاں کی ماہلاں ما آئیے
 اُن رستاں نا مانجیں گا گلشن کا اتھروں توں مندر مسیتاں شوالاں مانھ آئیے

سی حرئی:

خ:

خوشی ہزار کروڑ سنا تھارا ناں جے خوب جلیل ہوویں
 ہوئے خوشی تے امن کو دور دورو، سارا کم جے نال سبیل ہوئیں
 ہوویں لوک خوشحال اس قوم اندر حاکم اپنا وچ تحصیل ہوویں
 گلشن کرے دُعا جبار اگے، ایڈوکیٹ ہزار وکیل ہوویں

د:

دس جا سوہنیا بھیت دل کو، کہڑی طرف چلیو کد آئے گو توں
 کد موڑے گوہارتوں دیس مہارے، ڈھوکاں مہاریاں مانھ ڈیرالائے گو توں
 تیرے باج رہنو دکھیا حال ہم نے، اُجڑیا دلاں نا کد بسائے گو توں
 سوہنی آوے گی باغ بہار گلشن باغاں وچ پھیرا کد پائے گو توں

D:\Writers
org\rashid
3.jpg not
found.

چوہدری عبدالرشید ناز

پیدائش: 1956ء، ہل جم پتھری شوپیاں

عبدالرشید ناز ہوراج توں پنجاہ سال پہلاں کشمیر کا علاقہ ہل جم پتھری، ضلع شوپیاں مانھ اک گوری خاندان مانھ چوہدری محی الدین گوری ہوراں کے گھر پیدا ہويا۔ وقتی حالات کی وجہ تیں زیادہ باقاعدہ تعلیم نہ حاصل کر سکيا۔ بس تھوڑی مچ دینی تعلیم تیں بعد گھر مانھ ہی مال چوکھرتے زمینداری کو خاندانی کم سمھال لیوتے پوہی سلسلو اجاں وی جاری ہے۔

کچلر اکیڈمی تے ریڈیوٹی وی نال رابطہ کی وجہ تیں گوجری مانھ شاعری شروع کی تے اتلو کلام اس طرح شیرازہ گوجری تے نشریاتی اداراں کے ذریعے لوکاں تک پہنچن لگو۔ ویہہ زیادہ ترس حرنی تے نظم لکھیں تھاپر ہن انھاں نے گوجری غزل مانھ وی قدم رکھ لیو ہے تے انکا کلام تیں نوں لگے جے ویہہ سوئی شاعری کی صلاحیت رکھیں۔

کلام کا نمونہ: غزل:

بجناں کے خط لے جا میر ڈاکی بن کے کاگ نا کہیئے
ترسیں اکھ نمائی دوئے موڑ اٹگا ہن واگ نا کہیئے
اوپرو دسے منا اجکل اپنو دیس بیگانو
تس بھکھ مک گئی کے کرنو ہن روزی ساگ نا کہیئے
لکھ گیو وہ لکھن آلو لیکھ میرا مانھ دُوری
دس اڈیک لمی کیوں ہوئے، ستا وا اس بھاگ نا کہیئے
جھولی وچ چھپا کے رکھیا بھیت تیرا میں اوہلے
ڈنگ چلیاتے ہائے نہیں کی میں ہجر کا اس ناگ نا کہیئے
سکھ آرام نصیب تیرا مانھ، میرے بے قراری
اپنی اکھیں دیکھ لے بھاویں، سینہ کے بچ داغ نا کہیئے

ڈاکٹر مرزا خان وقار

پیدائش: 28 جنوری 1957ء، موگلاہ کالا کوٹ

ڈاکٹر مرزا خان وقار موجودہ دور کا بہترین گوجری کہانی کار ہیں۔ وہ موگلاہ کالا کوٹ مانہ جمیا پلپیا تے اتے بنیادی تعلیم حاصل کی۔ خانہ بدوش زندگی بڑی قریب تیس دیکھی تے بھوگی۔ دلیری تے چالاکی دیکھ کے محکمہ پولیس ناپسند آ گیا تے سپاہی کے طور بھرتی کر لیا۔ پرائیویٹ طور پر بی۔ اے، ایم۔ اے تے فر اُردو مانہ گوجری زبان کا موضوع پر ڈاکٹریٹ کی ڈگری لیکے اچھل ڈگری کالج راجوری مانہ اُردو کا لیکچرار کے طور قوم تے زبان کو مستقبل سجان کی ذمے داری بڑی چابکدستی نال نبھاویں لگاوا۔

اُردو ادب کا مطالعہ کے نال نال ریڈیو کشمیر تے ریاستی کلچرل اکیڈمی سنگ رابطہ کی وجہ تیں مرزا خان اس اعتماد تے وقار نال تخلیقی میدان مانہ داخل ہو یا جے مرزا خان وقار بن گیا۔ طبیعت طنز و مزاح تے انشائیہ آلے پاسے زیادہ لگے تھی پر انھوں نے اختیاری طور پر کہانیاں لکھنی شروع کیں۔

گوجری افسانہ نگاراں مانہ انھوں تیں پہلاں قیصر، امین قمر، سلیم، غلام رسول آزاد، محمود رانا، تبسم تے ڈاکٹر بازو نے کچھ سوئی کہانیاں گوجری ادب کے حوالے کی ہیں۔ پر افسوس کی گل ہے جیب قیصر تے ڈاکٹر بازو تیں بغیر سارا ہی تھک کے بیس گیا ہیں۔ اسلوب کا لحاظ نال وی گوجری کہانی مانہ امین قمر کو اک اپنومقام ہے پر ایمانداری نال جائز ویو جائے تاں مرزا خان وقار نا موجودہ دور کو بہترین کہانی کار کہیو جاسکے۔ اس کو انداز و ان کی جلدی شائع ہون آلی گوجری کہانیاں کی کتاب تیں ہر کسے نا لگ جائے گو۔

انکی مشہور کہانی ”آدمی“ کو اقتباس دیکھو:

”ٹھک.....ٹھک! کا کا جمعہ نے دل نا بتو دو تو مت پرلاں گمانڈیاں کو داند ہوئے بہکل داند رات کھل کے کدے کدے کنداں نال کھینسرے ہوئے تھو۔ پھر دل ماسوٹھو کیو جے اپلاں گمانڈیاں کو کتو ہوئے گو۔ وردل مادعاء کی خدا یا تیری کائے ہو ر مخلوق نہ ہوئے۔ پھر ایک باری ایسوٹھک ہوؤ جے بوہا کو روڑھو وی چینک گیو۔ بلوتے کوکاں اٹھ کے باپ کے نال چمزن لگاتے وہ پیرتے زو جیلا نا چھالاں نال پار کرن آ لواج بوہا کا روڑھا تک دو گز جا ماڈرڈر کے تے مرمر کے کھجیو۔ روڑا کی تھہ بچوں دوڑ تک چاننی ما ایک نظر ماری تے مڑ کے ایکن دو جا کے گل لگاواتے جیتا موادا بلوتے کوکاں درد دیکھ کے کہیو۔ باہر..... آدمی نہیں“

ہیں..... ادا آدمی نہیں۔ کوکاں کا منہ تیں نکلیو۔ کا کا جمعہ نے ساہ پھرتاں جواب دتو۔
ہاں..... آدمی نہیں“

اک ہور کہانی ”راجکماری“ کو اک اقتباس:

خیرنوں بھی یوہ پیٹ پریم تے محبت کی نشانی گھٹ تے بگاری کار زیادہ تھو۔ دکھیا عورت ہمدرداں نادل کی گل دس ہی چھوڑے بھانویں نامحرم ہی کیوں نہ ہوئے۔ کم کے آخری دھیڑے راجکماری نے میرے اگے اتھروں کڈھیا۔ ”ہمراہ پتی بہوت جالم ہے باوساب..... سام کو سراب پیوت ہے۔ رات کو اس کا بات نہ مانوں تو مار پیٹ کرت ہے۔ نسہ چڑھت ہے ناسالے کوں“

وقار نے اپنا مخصوص انداز مانھ سماج پر اتنی گہری چوٹ کی ہے جے اُن کی بعض کہانی عالمی ادب کا معیار کی ہیں۔ اُن کی کہانی راج گُماری، دودراں کی گُتی، تے آدمی پڑھن سنن جوگی ہیں۔ مختصر عرصہ مانھ ویہ تمام گوجری کہانی کاراں تیں اگے لگھ گیا ہیں تے جے کسے کی نظر نہ لگے تاں اُن کو لوں گوجری ادب ناچ مچ امید تے آسرا ہیں۔

چودھری سعید بانیا

پیدائش: ۲۷ فروری ۱۹۵۷ء مظفر آباد

مظفر آباد کا مشہور قانون دان تھے گوجری ماں کا سپوت سعید بانیا فروری ۱۹۵۷ء ماٹھ اک گوجر بانیا خاندان ماٹھ پیدا ہويا۔ انھوں نے مظفر آباد یونیورسٹی میں ہی ایم اے تیس بعد ایل ایل بی کی سند لئی تھے ریاستی محکمہ عدل و انصاف ماٹھ خدمت شروع کی جت ویہہ اجکل اسٹنٹ رجسٹرار کے طور ذمے داری نبھادیں لگاوا۔ اتنا مشکل تھے مصروف پیشہ کے باوجود ویہہ قوم تھے زبان کو پورا احساس رکھیں۔

نثری ادب نال ہرزبان کی طرح گوجری ماٹھ وی متر و سلوک ہو تو رہیو ہے تے شاعری نے ہر صورت اپنی حکمرانی قائم رکھی ہے۔ پاکستان ماٹھ تخلیق ہون آلا گوجری ادب ماٹھ نثری لکھنوی زیادہ مدت توڑی رہیو ہے۔ تجب یا افسوس کی گل یاہ ہے جے گوجری افسانہ جوڑو کہ گوجری نثر کی مقبول ترین صنف ہے اس ماٹھ وی پاکستانی لکھاڑیاں نے پس ماندگی کو ثبوت دتو ہے۔

کئی سالوں کا مسلسل روڑا تیں بعد پچھلے سال چودھری سعید بانیا ہوراں نے پاکستان ماٹھ گوجری افسانہ نگاری کی کمی پوری کی ہے اپنی گوجری کہانیاں نا ”دل کا تارا“ ناں کی کتابی صورت ماٹھ شائع کر کے۔ یاہ کتاب گوجری ادبی بورڈ مظفر آباد نے شائع کی ہے جس کی سربراہی مستند لکھاڑی تے پرکھوئی ڈاکٹر صابر آفاقی ہور کریں۔ یاہ کتاب اجاں جموں کشمیر ماٹھ دستیاب نہیں اس واسطے اسکی فنی باریکیاں بارے گل نہیں ہو سکتی۔ پر یاہ حوصلہ افزائی آلی گل ہے جے اُس پاسے شائع ہون آلی یاہ گوجری افسانہ کی پہلی کتاب ہے جد کہ پاکستان کا دوسرا گوجری افسانہ نگار حاجی رانا فضل حسین راجوروی ہوراں کی کہانیاں آلی کتاب ”تھ گنگن پاتال“ اجھاں چھاپہ خانہ کا مرحلہ تیں نہیں گزر سکی۔

D:\Writers
org\fidayee
2.jpg not
found.

عبدالرشید فدائی

پیدائش: ۷ جون 1957ء کنیاں آلی بارہمولہ

عبدالرشید فدائی ہورجون ۱۹۵۷ء ناچوہدری سیف الدین پھامڑہ ہوراں کے گھر
کنیاں آلی بارہمولہ ماٹھ پیدا ہويا۔ اس دور کی مجبوریاں کے باوجود بنیادی تعلیم پر ہی بس نہیں
کی بلکہ تعلیمی سفر جاری رکھیوتے پہلاں بی اے تے فربنی ایڈ کی ڈگری وی حاصل کی۔ اجکل
محکمہ تعلیم ماٹھ ہیڈ ماسٹر کے طور ذمہ داری نبھاویں لگاواتے نال ہی شیڈیول ٹرائب ملازماں کی
بھلائی بہتری واسطے کم کرن آلی تنظیم ماٹھ وی اہم رول ادا کریں۔
گوجری ماٹھ لکھا پڑھی انھاں نے کلچرل اکیڈمی ماٹھ گوجری شعبہ کا کھلن کے نال
ہی شروع کی تے فربا قاعدگی نال گوجری مجلساں تے مشاعرے ماٹھ شامل ہوتا رہیا ہیں۔
شیرازہ گوجری ماٹھ شائع ہون تیں علاوہ انکی شاعری ریڈیو تیں وی اکثر نشر ہوتی رہے۔ پیش
ہیں انکا کلام کا کچھ نمونا:
غزل:

کوئے بے سہارو سہاراں ناتر سے	کسے بے وفا کا بلاراں ناتر سے
بڑی شوق ماٹھ ہے بڑی ڈیک ماٹھ ہے	میر و ساہ کسے کا اشاراں ناتر سے
نصیبیاں کی ماری تے ساڑی وی دنیا	تیرا دلہیں کا ارج نظاراں ناتر سے
ہے رت یاہ بے دوسی گلو کچھ نہ کریو	یاہ شرداں کی ماری بہاراں ناتر سے
ہسیو نہ سجنو فدائی بے چارو	کدے توں بھنور ماٹھ کناراں ناتر سے

غزل:

دیا بال دیکھوں ٹٹولوں تلاشوں
منا زندگی پھر بھی تھا تے نہیں سکسیں

سروں بے وفا ہاں جے چُچھ بھی نہیں سکتو
کدے مڑ کے پھر بھی توں آتے نہیں سکسیں

ہوں بھولو ہاں پھر بھی بھروسو ہے یارو
منا زندگی یاہ بھلا تے نہیں سکسیں

پیارا ہیں منا یہ کنڈا بھی سجنو
نرا پھل میرو بھأ گما تے نہیں سکسیں

یاہ ایلے دلوں پئی ستاوے رے دنیا
فدائی نا جیتاں گما تے نہیں سکسیں

غزل:

کدے دل کا پرداواہ چاتی ہوئے گی
نصیبیاں کی تسبیح کا گن گن کے تارا
خیالاں ماں میری واہ بستی بسا کے
میری یاد کا چھاملالے کے اوہلے
کائے یاد کیوں اج فدائی نا چھیڑے
میری یاد سینے جگاتی ہوئے گی
کدے کاگ پھر واہ اڈاتی ہوئے گی
نواں نت بھلاواہ کھاتی ہوئے گی
اندھیرا ماں بانھ پھر گھماتی ہوئے گی
یاہ اس ناوی جا کے ستاتی ہوئے گی

نذیر درانی

پیدائش: ۱۹۵۸ء مظفر آباد

نذیر احمد درانی ہور ۱۹۵۸ء ماں مظفر آباد کا گراں تلی کوٹ ماں پٹھان فتح محمد درانی ہوراں کے گھر پیدا ہويا۔ اتے ہی ایف اے تک تعلیم حاصل کی تے اسے دور ماں شاعری کے سنگ وی دلچسپی پیدا ہوئی۔ پہلاں اردو ماں لکھنؤ شروع کیو پر چھیکر گوجری کا منیا پڑنیا شاعر مخلص وجدانی ہوراں کی سنگت تے رہنمائی نے ویہہ وی گوجری آلے پاسے موڑ آنیا۔ درانی ہوراں نے گوجری ماں نعت، نظم، غزل تے گیت سب کچھ لکھو ہے۔ انھاں کی گوجری شاعری کو مجموعہ ”جھڑی“ کا ناں نال شائع ہو یو ہے۔ کلام کا نمونا:

غزل:

کسے نہ چٹھو میرو حال	مر مکیو ہوں غم کے نال
ہوں اک لسر کے کرسکوں	سر پر بھارو پیو جنجال
پلے نہیں ہے پیسو دھیلو	منا جانے سب کنگال
غم کی دھپ ماں ایوسٹو	گذر گیا کتنا سال
دنیا ماں جد سکھ بیہ ملیو	کے ہوے گو ات کو حال

چودھری محمد قاسم بجران

پیدائش: 1958ء دوداسن بالا، کانیاں راجوری

محمد قاسم بجران ہوراں کو تعلق راجوری کی ادب خیز دھرتی تے گوجری لکھاڑیاں کی دوجی پیڑھی نال ہے۔ جہاں نے ۱۹۷۵ء آلی گوجری تحریک ماں جوش جذبہ نال شمولیت کی تے تے گوجری کی بنیاد مضبوط کرن ماں اہم رول ادا کیو۔

محمد قاسم بجران ہور ۱۹۵۸ء ماں راجوری کا گراں دداسن بالا ماں اک بجران خاندان ماں پیدا ہو یا۔ بنیادی تعلیم اپنا گراں ماں ہی حاصل کی تے فربنی اے تیں بعد کلچرل اکیڈمی ماں گوجری شعبہ کھلن کے نال ہی ریسرچ اسٹنٹ کے طور پر ملازمت شروع کی جت نسیم پونچھی تے اقبال عظیم جہی ادبی شخصیات پہلاں توں موجود تھیں۔ انکی سنگت تے سرپرستی ماں قاسم ہوراں نے اپنا ادبی سفر شروع کیو۔ یوہ گوجری ادب کی شیرازہ بندی کو ابتدائی دور تھو جس ماں چوہدری حق نواز گوری تے قاسم بجران ہوراں نے بھر پور حصو لیو۔ اسے دور ماں قاسم بجران ہوراں نے اپنی شاعری کی کتاب ”تاہنگ رنگیلی“ ۱۹۷۹ء ماں شائع کی تھی۔ قاسم صاحب کی خوبصورت گوجری شاعری کی شروعات نا دیکھ کے ادب کا قدرداناں نے انھاں نال مچ مچ آس تے تاہنگ لالی تھیں پر خبرے کس کی نظر لگی کہ یہ دوئے نوجوان ادب کی دھرتی ناسکی تے لگھی سمجھ کے محکمہ پولیس ماں بھرتی ہو گیا۔ اجکل ترقی کر کے حق نواز ہور ڈی ایس پی تے قاسم بجران ہور فائرسروس ماں اسٹنٹ ڈائریکٹر بن گیا ہیں۔

اللہ کرے قاسم بجران ہور دنیا کی اگ بھان کے نال نال گوجری قدرداناں کی ادبی تس بھان آلے پاسے وی توجہ دیں۔

کلام کا نمونہ:

نعت شریف:

جت پھل کھیلی ہے بہاراں کی
جت رونق سب نظاراں کی
جت رونق سب زمیناں کی
واہ دھرتی پاک مدینہ کی

اُن گلیاں تیں قربان جاؤں
ہوئے قسمت اس جہان جاؤں
جت رونق سب زمیناں کی
واہ دھرتی پاک مدینہ کی

اُٹھو چلاں غم سب دور کراں
دل پتھر ہیں کوہ طور کراں
جت رونق سب زمیناں کی
واہ دھرتی پاک مدینہ کی

اک وار تھارو دیدار ہو تو
میرو سٹو لیکھ بیدار ہو تو
جت رونق سب زمیناں کی
واہ دھرتی پاک مدینہ کی

غزل:

جوانی چنویں ہے بہاراں کے اوہلے
کدے بیس گیو ہاں نظاراں کے اوہلے

تیرے کول بس کے ہاں فر دور اتنو
بیٹھو رہوں ہاں انگاراں کے اوہلے

دُنیا کو جینوتے مرنو دی کے ہے
ہزاراں کی بستی ہزاراں کے اوہلے

عشق نے حسن کی منزل نہ طے کی
دینہہ دُوب گیو ہے چناراں کے اوہلے

قاسم خیالاں خواہاں ماں دُوبو
ساراں کے باندے تے ساراں کے اوہلے

غزل ۲:

میی زندگی کا سہارا سہارا	تیرا حسن کا یہ نظارا نظارا
دینہہ چن کہوں یا چمکیں یہ تارا	خدایا حسن کی حد ہو گئی ہے
کد تک ستائے گو مناں او یارا	غم دل ماں اڑیا تے اکھاں ماں اتھروں
دُکھیا بول ہوئیں میرا یہ سارا	قاسم کا دل کی آواز سُن لے

D:\Writers
rg\mansha.jp
not found.

چودھری محمد منشاء خاکی

پیدائش: نومبر 1959ء کالاکوٹ

محمد منشاء خاکی نومبر ۱۹۵۹ء مانہ کالاکوٹ راجوری کا اک گراں مانہ پیدا ہوا۔ گوجرا ماحول کا ڈکھ درد تے تستیا باندا انہاں ناوی پوٹنا پیا۔ پھروی ہم دیکھاں کہ تعلیم کی شوق انہاں نا مشکلات کا جنگل تے جنگل تیں کڈھ آئیں تے ویہ ایم اے تک کی تعلیم حاصل کرن مانہ کامیاب ہو جائیں۔

اُن کا اسے تعلیمی دور مانہ ریاستی کلچرل اکیڈمی مانہ گوجری شعبہ کھلیو تے ویہ دی مجلساں تے مشاعرے مانہ شامل ہون لگا۔ 1983ء توں محقق (ریسرچ اسٹنٹ) کے طور سے شعبا مانہ شامل ہو گیا۔ اقبال عظیم، نسیم پونچھی تے کجھ عرصہ واسطے مرحوم سرور کی کسانہ کی صحبت وی نصیب ہوئی۔ کلچرل اکیڈمی تے پہلی صف کا گوجری لکھاڑیاں کی ہمیشاں کی سنگت اُن کا ذوق واسطے بڑی مفید ثابت ہوئی تے انہاں نے اپنا ادبی سفر قدم پھوک پھوک کے دھرتاں شروع کیو۔

بیہ سالوں کارو کیا واہاڑا ہند کا اُنکا جگر نا ”لخت لخت“ کر کے سال 2003ء مانہ شائع ہوا ہیں۔ منشاء جی کی اواز مانہ گوجرا ماحول کو سارو درد سمیا پووسی لگے۔ ویہ حساس، مخلص تے شرموکل شخص ہیں۔ اُن کی دو خوبی خاص طور پر داد کے قابل ہیں۔ اک تے ساری عمر ادب کا کاروبار مانہ گزار کے وی جھوٹھی شہرت تے راتورات بڑا فز کار بنن واسطے انہاں نے کوئے حربا استعمال نہیں کیا۔ تے دوجے اقبال عظیم جیسی گھونہری شخصیت کا سایہ مانہ رہ کے وی ادبی رہنمائی بھاریں حاصل کی ہوئے پر انہاں نے شاعری تے اسلوب مانہ اپنی شناخت قائم رکھی

ہے۔ یوں کسے لالچ یا کسے کارعب مانھ آن تیں بغیر بنی بنائی شاہراہ پر چلن کے بجائے انھاں نے بلیں بلیں کھنوتر کے اپنوسلکو آپ کڈھیو ہے۔ یوہ کم اکثر لوکاں واسطے سوکھونہیں ہوتو۔

منشاء خاکی کو اسلوب نمیکلو ہے۔ شاعری مانھ غزل انھاں کو من پسند موضوع ہے۔ پر روایتی غزل تیں ہٹ کے انھاں نے نواں تے نچھوہ مضمون وی اپنی غزلاں مانھ شامل کیا ہیں۔ چھوٹی بجر مانھ خوب صورت گوجری غزل لکھن آلاں مانھ ویہ مخلص وجدانی تے ڈاکٹر رفیق انجم کے سنگ باوقار کھلائی لگیں۔ کسے بازوق پڑھن آلا کو تھہ پڑیوتاں ان کی کتاب (لخت لخت) پڑھ کے میرا تاثرات کی تصدیق ہو جائے گی۔

نمونہ کلام:

غزل: ۱:

متھا کی تقدیر نا رنو	رنو وقت اخیر نا رنو
ہوں اس پائی لیر نا رنو	آخر گل تیں لہنی پے گئی
ہوں کہدا دلگیر نا رنو	سارا منا ہستا دسیں
ہر حیلہ تدبیر نا رنو	یوہے بوہے بچو بھریو
ہوں غریب امیر نا رنو	ساراں کا دکھ سانجھا میرا

غزل: ۲:

آ منا وی گا لے بھاویں	دل کو ساز بجا لے بھاویں
سو باری ازما لے بھاویں	ہوں کد ہلوں اپنی گلوں
دل مانھ ڈیرو لالے بھاویں	بس اکھاں مانھ یا پھر یاہ کر
اکھا مانھ توں پالے بھاویں	پیس کے منا سُر مو کر کے
دل مانھ یار بسا لے بھاویں	منتو نہیں تاں یاہ کر منا

غزل: ۳

تنگھٹو نہیں پیار نظر کو
خوف اکھاں تیں ڈھلتو دے سے
کون بنے دلدار نظر کو
کس نا دیکھے کون سیانے
اٹھ گیو اعتبار نظر کو
اتھرواں کی کوٹھی بچوں
کچھ نہیں کہو یار نظر کو
سجن پرکھ پریت کی اوکھی
کریو میں دیدار نظر کو
کون پچھانے پیار نظر کو

غزل: ۴

دیکھ کہو تھو باہر نہ جانیے
روئے تے پچھتاوے گو توں
ماہلی کے اس پار نہ جانیے
تیرو اُنکا دل نہیں لکسیں
زندگی ہے دن چار نہ جانیے
کوئے لیرو ٹھگ لئے گو
توں میرا دلدار نہ جانیے
سچن دل بازار نہ جانیے
میری گل بسار نہ جانیے۔
صدقے ساری زندگی یارا

غزل: ۵

بھل بھلاوے کوئے آوے گو
آتی رت بہار مڑے گی
منا اپنے گل لاوے گو
دور کتے پردیسیں ڈیرو
گمیو جو کچھ فر تھاوے گو
بلیتی اگ مانھ سٹ کے منا
نہ مڑیو تاں خط آوے گو
میرا خط نا پڑھ کے خاکی
چر لایو تے پچھتاوے گو
پاڑ سٹے گو فر چاوے گو

گیت ۱:

وعدو وی نہ توڑیئے تے قول وی نہ ہاریئے
 واسطو ہے تینا میری یاد نہ بساریئے
 وعدو وی نہ توڑیئے تے قول وی نہ ہاریئے

بکتا ان پانیاں کا جھمراں نا دیکھ لے
 اُچا اُچا کاڑ نا لے کھمراں نا دیکھ لے
 دیں گا یہ گواہی گل سوچئے بچاریئے
 وعدو وی نہ توڑیئے تے قول وی نہ ہاریئے

وطنائیں دور آکے بسوں پردیس مانھ
 ملیئے ضرور بھاویں جوگیاں کا بھیس مانھ
 سراں آلی ڈھوک میری، پھیر و کدے مائیئے
 وعدو وی نہ توڑیئے تے قول وی نہ ہاریئے

منواں کا یوٹاں کو لے، گھر میری ماں کو
 ٹھنڈو ٹھنڈو پانی اُس چھاڑی آلی باں کو
 یاداں کا المبا ہُن جُج نہ اُبھاریئے
 وعدو وی نہ توڑیئے تے قول وی نہ ہاریئے

گیت ۲:

خوشیاں کو پیغام بیساکھی
 لٹ گئی عیش ارام بیساکھی
 صبراں کو انعام بیساکھی
 وصلوں کو پیغام بیساکھی
 ہر دل کو ارمان بیساکھی

گھر گھر خوشیں جھاتی ماریں
 ماچھی ماہلی ماہلی چاریں
 لگیں رونق شہر بازاریں
 دل کی دھڑکن جان بیساکھی
 ہر دل کو ارمان بیساکھی

میلا لگیں شہر گرائیں
 سارا ساچھی خوشی منائیں
 بچیں ڈھول تے بھنگڑا پائیں
 میرو مان گمان بیساکھی
 ہر دل کو ارمان بیساکھی

یارا ڈاڈی یاد ستاوے
 جے کر رسوں کون مناوے
 مناں صبر قرار نہ آوے
 آیا لوک منان بیساکھی
 ہر دل کو ارمان بیساکھی

آئی بیساکھی توں بھی آئیے

تیری یاد کلیجوں سے
میرا دل کا یوہا ملے
دُنیا میلو دیکھن چلے
مناں ہور نہ یار ستاپئے
آئی بیساکھی توں بھی آئیے

اتھروں میرا چہم چہم بکین
میری چھری جھولی سکین
تیرا نچ بھلاوا لگین
مناں اپنے من بساپئے
آئی بیساکھی توں بھی آئیے

نہ تھکوں تے نہ ہوں اکوں
تیرا رستا پل پل نکوں
جے ملے تاں کہتاں جھکوں
کائے وصل کی چھانٹ برہاپئے
آئی بیساکھی توں بھی آئیے

کس در جاؤں ہوں بے چاری
درد پچھوڑا غم کی ماری
دس جاتو اس روگ کی کاری
سجناں دل میرو پرچاپئے
آئی بیساکھی توں بھی آئیے

مولانا عابد حسین رحمانی

پیدائش: 1960ء کھنیر پوٹھ

مولانا عابد حسین کو لی ہور پوٹھ راجوری کا نیا پڑنیا عالم دین تے خطیب ہیں جہڑا مدت تیں اس علاقہ کی دینی خدمت مانھ مصروف ہیں۔ ویہہ ۱۹۶۰ء مانھ ضلع پوٹھ کھنیر گراں مانھ پیدا ہويا۔ کجھ عرصواتے ہی بنیادی مروجہ تعلیم تیں بعد دینی تعلیم واسطے دیوبند چلا گیا۔ اتوں فاضل کی سند لے کے واپس آیا تاں پوٹھ تیں تھنہ منڈی راجوری مانھ نقل مکانی کر کے دینی خدمت شروع کر لئی۔ تعلیمی سلسلو جاری رکھ کے آگرہ یونیورسٹی تیں ایم اے اُردو تے فرالہ آباد تے علی گڑھ تیں دینیات کی اعلیٰ سند وی لئیں۔ کجھ عرصو خورشید بیکل ہوراں کی سنگت مانھ مسلم ایجوکیشنل ٹرسٹ تھنہ منڈی مانھ عربی استاد کے طور کم کیوتے فر محکمہ تعلیم مانھ مدرس ہو گیا۔ جت ویہہ اچ تک درس تدریس کی ذمہ داری تیں علاوہ جامعہ مسجد تھنہ منڈی مانھ امام تے خطیب کی ذمہ داری وی نبھای لگاوا۔

قوم تے علاقہ واسطے انگی تھنہ منڈی آلی ہجرت مبارک ہی ثابت ہوئی۔ ات خورشید بیکل ہوراں جیہی علمی تے ادبی شخصیت کی سنگت کی تاثیر ہو کے رہی۔ انھاں ہی کی ترغیب پر عابد صاحب نے قرآن پاک کا گوجری ترجمہ کو کم ۱۹۸۷ء کے ال پل شروع کیوتے ترے چار سال مانھ مکمل وی کر لیو پر فر وقتی حالات کی وجہ تیں اس کی نظر ثانی تے اشاعت مانھ ضرورت تیں زیادہ تاخیر ہوئی۔ آخر راجوری کا ہی مفتی فیض الوحید ہوراں نے اس ترجمہ کی نظر ثانی تے تفسیر کو کم ست سالوں کی محنت تیں بعد مکمل کیوتے ۲۰۰۴ء مانھ شائع کروایو۔ بھادیس قرآن پاک کا گوجری ترجمہ کی کئی کوشش صدیاں تیں ہوتی آئی ہیں تے قدیم گوجری ادب مانھ وی ترجمہ کا حوالہ لہیں تے آئینہ وی یوہ سلسلو جاری رہے گو پر اس ویلے تک شائع ہون آلا چار پنچ گوجری ترجمہ مانھ یاہ سب توں بہتر تے جامعہ کوشش ہے۔ اللہ پاک ہر دو عالماں نا ابر عظیم دئے۔ (آمین!)

چودھری گلاب دین جزا

پیدائش: 1960ء تلیلی گریز کشمیر

گلاب الدین لون ہورہ ۱۹۶۰ء مانہ تلیلی گریز (بارہمولہ) مانہ غلام محمد لون ہوراں کے گھر پیدا ہويا، پر وہ بچپن مانہ ہی اتوں نقل مکانی کر کے وانگت کنگن کا گوجراما حول مانہ آ بسيا۔ انکی مادری زبان شینا تھی پر لکھن پڑھن تے گوجراما حول کی تاثیر نال گوجری لکھنی شروع کی جت اقبال عظیم ہوراں کی حوصلہ افزائی نے وہ اک پُر تاثیر تے مستند گوجری شاعر بنا چھوڑیا۔ انکی شاعری ریڈیو تے ٹیلیویژن تیں نشر ہون کے علاوہ شیرازہ گوجری مانہ وی باقاعدہ شائع ہوتی رہے۔

کلام کا نمونہ:

غزل:

دیو نہ باندے توں بال اج بھی	ہجر کی راتاں نا ٹال اج بھی
میرو یوہ اتھروں اثر تیں خالی	ہوا توں لے جا سوال اج بھی
پیراں ماں بیڑی گھلیں ہیں اس نے	آنو ہے میرو محال اج بھی
میری اکھاں ما آیاوا اتھروں	غماں کی زندہ مثال اج بھی
جزا یہ دل کا میں آ لہ مان	ناگ رکھیا ہیں پال اج بھی

غزل ۲:

سینے چوٹ کراری دے جا
یا اک غزل ادھاری دے جا

کھلتا پھل کی روک لے خوشبو
بھور نا چار دیواری دے جا

سہن نہیں ہوئیں تیری جدائی
وصل کی اک چنگاری دے جا

بستو رہے گو شہر حسن کو
عشق نا خود مختاری دے جا

گُوڑا قصہ مہر وفا کا
پنڈ غماں کی بھاری دے جا

اتھروں بارش سیک ہجر کو
توں منا اس واری دے جا

ہس کے سب کچھ سہتو رہوں گو
پیڑ جزا چ ساری دے جا

چودھری ارشاد احمد قمر

پیدائش: مارچ 1960ء بابانگری واگت

حضرت بابانظام الدین لاروی کا پوتا تے میاں جنید احمد نظامی کا فرزند ارشاد احمد قمر
مارچ 1960ء ماٹھ بابانگری ماٹھ پیدا ہويا۔ بُنيادي تعليم تے تہذيب اتے سکھي۔ اسا خميرونا
کدے اقبال عظيم، نسيم پونچھی تے غني عارف جیہی سنگت نصيب ہوئے تاں شاعري کا اُماہ اپنے
آپ پھٹن لگ پونئیں۔

اس قسم کا ادبی ماحول ماٹھ جميا پلایا ارشاد قمر پچھلا پندراں سالوں تیں ریاستی کلچرل
اکیڈمی کا گوجری شعبہ ماٹھ ملازمت کریں تے اس طرح اکیڈمی کا مشاعرے تے مجلسوں ماٹھ
شامل ہوں کو کوئے موقع نہیں ضائع کرتا۔ ارشاد قمر نے شاعري کے نال نال کجھ معیاری تحقیقی
مقالا وی لکھیا ہیں پر بُنيادي تے فطری طور پر وہ گوجری شاعر ہیں جن کا کلام ماٹھ گوجر اردوں
کی تپش محسوس کی جاسکے۔ تھوڑی شاعري کی ہے پر ان کی شاعري صاف سُتھری، دھوئی دھائی
وی تے معیاری شاعري ہے۔ نمونہ کلام:

غزل: 1

تیری یاد ما اچ بہاراں نا دیکھوں	ویہ مڑیا نہیں انکا مزاراں نا دیکھوں
توں بیٹی وی رتاں کی یاداں نا کہیئے	نشانی ہیں تیری چناراں نا دیکھوں
مٹانا تھا کس نے نصیباں کا لیکھا	پہینگاں کا ٹٹا وا لاراں نا دیکھوں
ہوں لگیا کا جھڑتا کھناراں کے باندے	رتجھاں کی جھنگی تے ڈھاراں نا دیکھوں
یہ نہیرا کی بانہہ گھماؤں تے سوچوں	ویہ آیا تے ان کا پیاراں نا دیکھوں

غزل: ۲

اُن ماہلاں پر بول رے پنچھی جن پر درد بندایا تھا
ات کتے تھیں آس کیں ڈھیریں سدھراں نے سمجھایا تھا

روپ نگر ما پیار تیرا نا کت کت ڈھونڈن جاؤں
لماں لارا یار کسے کا سبجرا بول گھمایا تھا

کوئل بولے قمری گائے کوک دلاں کا ہاڑاں نا
اوہ نہیں آہو، مڑ نہیں ڈٹھو جس کا نقش بنایا تھا

ساون کو آس وی گئیں پچھ لے بھاویں بستی نا
پچھلی برہیا آن کسے نے میرا درد جگایا تھا

تیں کد نال نبھائی میرے اوکھی منزل لماں پھیر
بول ندی توں باندے بول تیرا بول ازمایا تھا

غزل: ۳

خبرے کیوں اعتبار نا پرکھے	اج بھی یار پیار نا پرکھے
بھولو کوئے ہونہار نا پرکھے	گھپ نماشاں راہ مانھ بیٹھو
تاں بھی گاہک بزار نا پرکھے	ہر جا ہٹی ہر شے پکے
سسی بیس سوار نا پرکھے	نہ کوئے پٹو نہ کائے ڈاچی
کونجاں کا اڈار نا پرکھے	تاہنگاں کی یاہ ڈور نہ لٹے

غزل:۴

جوگی پھل نا ڈھونڈن جوگی کن کن پتیں پار گیا
 لگ ملگی پی کرلاؤں میرا پچھڑ ڈار گیا

آتی رت مت نال لیائے کھل کھل دیکھوں راہاں نا
 اس تیں اگے سکھنا سارا کتنا بار اتار گیا

دور کتے کوئے جا ٹھکانو پچھ پیپھا بازاں نا
 بستی آلا دس نہیں سکتا مچاں گا ادھار گیا

آس نراس تے رتجھ کولیں کس کس سانجھ نا لوڑوں پی
 تاہنگ نمائی توں ہی دسیئے رٹھو وا دلدار گیا

پوٹوں درد تے سوز ہجر کو میری کجھ نشانی تھیں
 بے پرواہ نا ترس نہیں آئیو میرا اجڑ سنسار گیا

D:\Writers
org\lateef.jpg
not found.

چودھری محمد لطیف قمر

پیدائش: ۱۷ مارچ ۱۹۶۰ء وفات: ۵ جولائی ۱۹۹۳ء

گوجری لکھاڑیاں کی نوجوان نسل نال تعلق رکھن آلا شاعر چوہدری لطیف قمر نالوک مٹھی اواز کی نسبت نال یاد کریں۔ ویہ مارچ ۱۹۶۰ء مانھ ضلع بارہمولہ کا علاقہ بلبل آباد مانھ پیدا ہویا تے اتے اپنی تعلیم حاصل کی۔ تعلیم کے سنگ سنگ شاعری کی شوق وی جاگی تے دیکھ دیکھتاں یوہ خوبصورت جوان ۱۹۸۰ء توں لیکے دس سال تک اکیڈمی تے ادبی سنگت کی طرفوں منعقد ہون آلی گوجری مجلساں کی شان بنو رہیو۔ ان کو کلام کلچرل اکیڈمی کا شیرازاں مانھ شائع ہون تیں علاوہ ریڈیو تیں وی نشر ہو توریہو۔

زبان تے قوم کو درد رکھن آلا اس نوجوان کا مچ خواب سینہ مانھ ہی رہیا تے ۵ جولائی ۱۹۹۳ء مانھ اچانک ان کی وفات ہو گئی (انا اللہ وانا الیہ راجعون)۔ اس طرح گوجری مانھ اک لائق، باصلاحیت تے دردمند سپوت تیں محروم ہو گئی۔

نمونہ کلام:

ق:

تیرا خیالاں کا شعر بنیا میں نیر سارا نچوڑ سٹیا
مہک تھی جن مانھ تیرا وصل کی ویہ شامیا ناوی چھوڑ سٹیا
ہوں بیقراری کا لیکے نغمہ کدے کو تیری سمہال رکھوں
اسے گلی مانھ تیری تجلی نے میرا ہاسا مروڑ سٹیا

ق:

نظر دور توڑی تے پینڈو لمیرو
 توں نظراں تیں اوہلے تے پو انہیرو
 پئی شوق مہنگی تیری دل لگی کی
 میرے سینے پتو رہو درد تیرو

ق:

اجاں لھکن دے نیناں ناتوں اتھروں کیر نہ لئیے
 کدے ہوں بھل گیو منزل یہ بانہل پھیر نہ لئیے
 منایاداں کا بہو امانھ تے زندگی اج وی کو کے تھی
 یاہ حالت میرا دل کی ہن کتے توں ہیر نہ لئیے

گیت:

یہ ڈھا کا اچا پہاڑاں کا
 ات پکھو گاویں جاڑاں کا
 توں گلایاں وچوں آ جائیے
 میرا سبب ازختم مٹا جائیے

D:\Writers
org\shakir.jpg
not found.

چودھری لعل دین شاکر

پیدائش: ۲۰ فروری ۱۹۶۱ء کاٹھل ہل پٹھری اڈوی

چودھری لعل دین شاکر ہور بنیادی طور پر اڈوی کارہن آلا ہیں جت ویہہ ۱۹۶۱ء مانھ کاٹھل ہل پٹھری مانھ پیدا ہويا۔ تعلیم تیں بعد محکمہ زراعت مانھ ملازم ہو گیا تے اجکل ترقی کرتا کرتا ایگریکلچر ایسٹینشن آفیسر بن گیا ہیں۔

گوجری ادب نا پڑھن آلا، چودھری لعل دین شاکر ہوراں نا چنگلی طرح جانے پچھانیں۔ انھاں نے گوجری لوک ادب کی شیرازہ بندی مانھ کچھ لکھی اکیڈمی نال چنگو تعاون کیو ہے۔ تخلیقی میدان مانھ زیادہ لوک انھاں نا گوجری کہانیاں کی نسبت نال جانیں پر جد ویہہ شاعری آلے پاسے مُدیں تاں ات دی اپناں ہانیاں سنکیاں نال مونڈو جوڑ کے مُرتا سئی ہوئیں۔ گوجری ادب مانھ کسے اک تخلیقی میدان نال کے لکھتا رہیا تاں اپنی صلاحیت کے سہارے دور تک جاسکیں گا۔ (انشا اللہ)۔ کلام کا نمونہ:

ق:

چپو	چپو	چپو	چپو	مہنگو	دنیا	کو	سودو	ہے
چاپئے	چاپئے	چاپئے	چاپئے	اجکل	ہتھ	ملان	تیں	بعد
چاپئے	چاپئے	چاپئے	چاپئے	انگلی	یارا	گنئی	چاپئے	چاپئے

غزل

رُٹھو	وو	جگ	سارو	دے	ہر	کوئے	اج	بھارو	دے
دے	دے	دے	دے	دے	چن	بھی	اج	نظر	نہیں
دے	دے	دے	دے	دے	دل	کا	پرزہ	پرزہ	ہویا
دے	دے	دے	دے	دے	اس	شہر	کے	چپے	چپے
دے	دے	دے	دے	دے	کت	ہیں	شاکر	بس	آلا
دے	دے	دے	دے	دے	خالی	دل	کو	ڈھارو	دے

چودھری گلاب دین طاہر

پیدائش: 5 فروری 1961ء آورہ کپواڑہ

گوجری کانوجوان تے باعل لکھاڑی گلاب دین طاہر ضلع کپواڑہ کا گراں آورہ کا رہن آلا ہیں۔ ویہ ۵۵ مئی ۱۹۶۱ء ناک کھٹانہ خاندان مانھ پیدا ہویا۔ بی اے تیں بعد محکمہ تعلیم مانھ استاد کے طور ۱۹۸۰ء تیں لیکر ۱۹۸۳ء توڑی ذمے داری نبھائی تے اسے دوران اوردو مانھ ایم اے کی ڈگری وی حاصل کر لئی۔ ۱۹۸۳ء توں ۱۹۸۸ء تک کا پنج سالہ عرصہ مانھ ریاستی کلچرل اکیڈمی مانھ ریسرچ اسٹنٹ کی حیثیت نال ملازم رہیا۔ پر سیمباہی طبیعت نے زیادہ دیر ات نکلن نہ دتا تے ۱۹۸۸ء تیں لے کے آج ۲۰۰۷ء توڑی برابر ڈوردرشن کا محکمہ مانھ پروڈیوسر کی حیثیت نال ذمے داری نبھاوین لگاوا۔ اس دوران جالندھرتے کانپور مانھ رہن تیں بعد وہیہ اچکل سرینگر مانھ ہی تعینات ہیں۔

بچپن تیں گلاب دین طاہر کودھیان ڈراماں آلے پاسے تھوتے انھاں نے فردوس ڈرامہ کلب آورہ بنا کے ۱۹۸۰ء مانھ پہلو گوجری ڈراموں اندھرا مانھ لو جموں کانفرنس مانھ پیش کیو۔ اس توں بعد چوہدری قیصر دین قیصر، غلام رسول آزاد تے اقبال عظیم ہوراں کا کچھ ڈراماں تیں علاوہ اپنا دس باراں ڈراماں لکھیاتے گوجری کانفرنساں مانھ پیش کر کے داد حاصل کی۔ ڈرامہ کافن بارے جانکاری رکھن آلاں مانھ وی انھاں کو اچو مقام ہے۔ انھاں کا کئی گوجری ڈراما گوجری شیرازاں مانھ شائع وی ہویا ہیں۔ تے انھاں نے ریاستی کلچرل اکیڈمی تیں بہترین ڈرامہ نگار کو ایوارڈ وی حاصل کیو ہے۔

کلچرل اکیڈمی کی ملازمت کے دوران گلاب دین طاہر نے اقبال عظیم کی سربراہی

مانھ لکھی جان آلی گوجری ڈسٹنری کی ترتیب تے تیاری مانھ بیادی تے اہم کم کیو ہے۔ انھاں نے گوجری زبان تیں متعلق کئی تحقیقی مقالہ وی لکھیا جہڑا اکیڈمی کی مطبوعات مانھ شائع ہوتا رہیا ہیں۔ نظم، غزل تے گیت کی صورت مانھ کجھ عرصہ شاعری وی کی ہے۔ گوجری کی ترقی واسطے بن آلی غیر سرکاری تنظیم ”ادبی سنگت کشمیر“ قائم کرن تے اس مانھ کامیاب بنان مانھ وی گلاب دین طاہر کی خدمات یاد رکھن جوگی ہیں۔ پراڈب مانھ ان کی اصل پہچان ڈراما کا حوالہ سنگ ہے۔

گوجری تیں علاوہ انگریزی، پنجابی، ہندی، اردو، کشمیری تے پہاڑی کی چنگی جانکاری ہون کی وجہ نال دور درشن مانھ پروڈیوسر کی حیثیت نال ملازمت کے دوران انھاں نے ان زبانان مانھ کئی ٹیلی فلم تے دستاویزی پروگرام بنایا تے پیش کیا ہیں۔ انھاں نے گوجری ماحول کی عکاسی واسطے وی کجھ بنیادی نوعیت کا کم کیا ہیں تے یوہ سلسلوا جھاں جاری وی ہے پر گوجری زبان بارے ان کا جوش تے جذبہ مانھ پہلاں آلی گل اللہ جانے کیوں نہیں رہی۔
نمونہ کلام کے طور پیش ہے انکی اپنی پسند کی اک غزل:

کر دتا ویہہ خواب پورا سوچ نوں شان بن کے
جین کی یاہ جاچ دی، زندگی نے جان بن کے
جگ ہسائی توں بچاتاں سر کے بولیں کے نہیں کیو
دے کے مچ کجھ لے بھی لیو، شوق نے ارمان بن کے
نور چنگی پر بھلاوے ناز نخر کر زمانو
کھوٹ سارا دے گیو یوہ عیش کو سامان بن کے
کے سلکھنی جھنگ تھلی یاہ عنایت ہے اسے کی
مچ سہانا خیال دتا خواب مانھ مزمان بن کے
کس بھلکھے خوش ہے طاہر، سچ نے توں ٹٹ لیو ہے
زندگی دے کے کسے نے اج تیری پہچان بن کے

D:\Writers
org\parwaz
hasan.jpg
not found.

چودھری حسن پرواز

پیدائش: 7 جون 1961ء درابہ کھیت پونچھ

حسن دین پرواز ناڈنیا، ریڈیو کشمیر جموں توں نشر ہون آلی صاف ستھری تے ٹھیٹھ گوجری زبان کا حوالہ سنگ جانے۔ جت ویہ پچھلا بیہہ سالان تیں گوجری شعبہ مانھ اناؤ نسر کی حیثیت نال قوم تے زبان کی خدمت کریں لگاوا۔ پونچھ کی ادب خیز دھرتی کا اس سپوت کو جنم ۱۹۶۱ء مانھ سرکلوٹ کا علاقہ درابہ مانھ حاجی جمال دین ہوراں کے گھر ہو یو جہڑا بعد مانھ ہجرت کر کے راجوری کا علاقہ گراتی مانھ آباد ہو گیا واہیں۔

پونچھ کالج تیں بی اے کرن تیں بعد کچھ عرصہ واسطے محکمہ تعلیم مانھ اُستاد کو فرض وی نبھایو پر جلدی ہی ریڈیو کشمیر کا گوجری شعبہ مانھ آ گیا۔ تے اتے ملازمت کے دوران اُردو مانھ ایم اے کی ڈگری لئی۔ سائیکھ دھرتی سمیت ریڈیو کشمیر جموں تیں تیار تے نشر ہون آلا کئی معیاری پروگراماں ماں اُن کی محنت تے خلوص کو اعتراف گوجری سُنن آلا اکثر کریں۔

گوجری مانھ لکھا پڑھی آلے پاسے تھوڑا چرکیر آیا ہوں پر ویہ اُن گنیا وا خوش قسمت لکھاڑیاں وچوں ہیں جن کے بارے دیر آید، دُرست آید آلی گل سچ تے صحیح ثابت ہوئے۔ بیہ سالان تے گوجری کا ادب تے ادبیاں سنگ پپار نال اُن کی لکھتاں مانھ فنی مہارت بڑی جلدی آ گئی ہے۔ گوجری مانھ اُنھاں نے تھوڑی سچ شاعری وی کی ہے پر اُن کی اصل پچھان اک سنجیدہ محقق کے طور پر ہے۔ اُنھاں نے پچھلا سالان مانھ کئی تحقیقی مضمون گوجری ادب کے حوالے کیا ہیں۔ پونچھ کا جم پل، راجوری کی جوانی تے جموں کا ادبی ماحول کو اثر اُن کی زبان تے تحریر مانھ باندے باچھ نظر آوے۔ گوجری ڈراماں، لکھن تیں علاوہ اُنھاں نے اجکل ترجمہ کو میدان ملیو و ہے۔ اُنھاں نے مولانا شبلی نعمانی کی مشہور کتاب 'الفاروق' تے مولانا عبدالمالک چوہان کی کتاب 'شاہان گوجر' کو گوجری ترجمہ سے سال کیو ہے، جنکی اشاعت کلچرل اکیڈمی نے کی ہے۔ گوجری تحقیق مانھ بے خلوص تے محنت کو سلسلو جاری رکھیوتاں حسن پرواز ہور مستقبل کا گوجری لکھن پڑھن تے تحقیق کرن آلاں واسطے کسے بڑا احسان کی صلاحیت رکھیں۔

چودھری محمد اشرف ایڈووکیٹ

پیدائش: ۱۴ جولائی ۱۹۶۱ء سرگودھا، پاکستان

چودھری محمد اشرف پاکستانی گوجر برادری کا اک کامیاب وکیل تے سیاسی سماجی کارکن ہون کے علاوہ گوجری زبان تے قوم کا سچا ہمدرد تے باصلاحیت لکھاڑی وی ہیں۔ ویہ ۱۹۶۰ء مانھ سرگودھا، پاکستان مانھ پیدا ہویا۔

محمد اشرف ہوراں نے بی اے تیں بعد ایل ایل بی کی قانونی ڈگری حاصل کی، کچھ عرصہ انکم ٹیکس انسپیکٹر تے ایڈمنسٹریٹو افسر کے طور سرکاری ملازمت وی کی پر سیمبا طبیعت نے یہ پابندی زیادہ دیر نہیں قبولن دتیں۔ تے اس طرح سیاسی تے سماجی خدمت تیں علاوہ اظہار خیال کی ازادی واسطے وی وکالت کو پیشو شروع کیو جس کے نال نال ویہ انسانی حقوق تے بین الاقوامی قانون کی تعلیم تے تدریس مانھ وی دلچسپی رکھیں۔

۱۹۸۵ء کے قریب انھاں نے اک نوجواناں کی تنظیم گوجر یوتھ فورم بنا کے لاہور تیں اک ماہانہ رسالو ”نوائے گوجر“ کی اشاعت شروع کروائی جس مانھ قوم تے زبان تیں متعلق مضمون شامل ہوئیں۔ اسکی ادارت کچھ عرصہ واسطے اعجاز چودھری ہوراں نے کی تے اجکل مختار احمد کھٹانا اسکا مدیر ہیں۔

اشرف صاحب ان تمام مصروفیات کے باوجود پڑھن تے لکھن واسطے

فرصت تے جذبہ بوریہیں۔ انہاں نے ۱۹۹۷ء ماہ ماہ اک کتاب ”مصور پاکستان“ کا ناں نال لکھی تھی جس ماہہ چوہدری رحمت علی گوری کی سیاسی خدمات کو تفصیلی ذکر ہے۔ تے فراگلے ہی سال یعنی ۱۹۹۸ء ماہہ انہاں کا مطالعہ تے اپنی قوم تے زبان کے سنگ محبت کو اظہار مشہور کتاب ”اردو کی خالق۔ گوجری زبان“ کی صورت ماہہ باندے آيو۔ جس ماہہ قدیم گوجری ادب تے اردو کی سنجھیالی بارے تحقیق سمیت کچھ قدیم تے جدید شاعراں کو ذکر وی ہے تے گوجری کا ترقی بادھا واسطے کوشش کرن آلاں اداراں کو ذکر وی۔ بھوایں یاہ کتاب اردو زبان ماہہ لکھی وی ہے پر موضوع کا اعتبار نال گوجری لکھاڑیاں واسطے اک ضروری دستاویز ہون سمیت گوجری ادب کی تاریخ ماہہ اک سنگ میل وی ہے۔

محمد اشرف ایڈوکیٹ کو زبان واسطے جذبہ مثالی ہے تے ان لوکاں واسطے سبق وی چہدا تھوڑی تھوڑی ذمہ داریاں کو بہانو کر کے اپنی مادری زبان پر توجہ دین تیں کھسری بھسری کریں۔ اللہ انکا جذبہ نا قائم رکھے تے قوم تے زبان کی مذید خدمت کرن کی توفیق دے۔

D:\Writers
org\anjum
1.jpg not
found.

☆ ڈاکٹر رفیق انجم

پیدائش: جنوری 1962ء کلانی پونچھ

ڈاکٹر انجم ناریاست کو بچو بچو جانے، شاندا سواطے وی جے ویہ بچاں کا ماہر نباض تے معالج ہیں۔ پر ان کی اصل پچھان گوجری ادب ہے۔ ڈاکٹر رفیق انجم گوجری کا نامور شاعر، ادیب، کہانی کار، محقق، نقاد تے تاریخ دان ہیں۔ ویہ جنوری ۱۹۶۲ء مانھ پونچھ کا کلانی گراں مانھ میاں عبدالکریم آوان کے گھر پیدا ہویا تے دسی توڑی کی تعلیم اتے حاصل کی۔ لوہی عمر مانھ ہی ماں کی ٹھنڈی چھاں تے باپ کی شفقت میں محروم ہو گیا تھا۔ بڑا دوئے بھائی ملازمت کا سلسلہ مانھ پہلاں توں ہی کئی کئی تھا۔ اس طرح کچی عمر مانھ ہی وقت نے گھر تے پڑھائی کو جھڑو دو گڑ بھار انکا منڈھاں پر آن سٹیو تھو وہ انھاں نے بڑی ٹوبی نال بھایو۔

میڈیکل کالج جموں میں ۱۹۸۵ء مانھ ایم بی بی ایس کی ڈگری حاصل کی تے ۱۹۸۸ء مانھ ریاستی محکمہ صحت مانھ میڈیکل آفیسر کے طور ملازمت شروع کی۔ پونچھ مانھ چار پنج سال کی خدمت میں بعد ڈاکٹریٹ واسطے چنے گیا تے کشمیر یونیورسٹی (میڈیکل کالج سرینگر) میں شعبہ اطفال مانھ ایم ڈی کرن میں بعد ۱۹۹۷ء توں ۲۰۰۳ء تک راجوری مانھ نکا جا نکاں کا ماہر معالج کے طور کم کیو۔ تے اجکل فرمیڈیکل کالج کے تحت چلڈرن ہسپتال سرینگر مانھ رجسٹرار کی حیثیت نال ذمہ داری بھادیں لگاوا۔

ڈاکٹر انجم ہوراں نے ذہین تے حساس ہون کی وجہ میں تعلیمی دور مانھ ہی اردو ادب کو چنگو خاصو مطالعو کر لیو تھو تے اردو مانھ غزل وی لکھنی شروع کر لی تھیں جنوری ۱۹۹۳ء مانھ ”خواب جزیرے“ کا ناں نال چھاپی جس نا دیکھ کے اردو ادب آلاں نے انھاں نال کافی

امید رکھ لئی تھیں پر انہاں ناریاست کا نامورا دیب تے کلچرل اکیڈمی کا سیکریٹری خواجہ محمد یوسف ٹینگ ہوراں کو گوجری لکھن کو مشور و مہندی ہاروں لگو تے یاہ ساعت گوجری زبان تے ادب واسطے بڑی مبارک ثابت ہوئی۔

گوجری مانھ ڈرامہ فنکار کے طور ۱۹۸۰ء مانھ داخل ہویا۔ ادبی سفر کے دوران ۱۹۸۳ء مانھ نسیم پونچھی نے کہانی دار حوصلہ افزائی کی، فیض کسانہ نے ریڈیو واسطے انشائیہ لکھایا، اے کے سہراب نے گیت لکھن کی جاچ دی پر ڈاکٹر انجم بلیں جے کھسک کے اقبال عظیم آلی لین مانھ جا کھلیا تے نوں غزل لکھنی شروع کیں جے گوجری غزل مانھ انہاں نے اک اپنو اسلوب تے ناں پیدا کر لیو ہے۔ ٹکی بحر مانھ ویہ خوب صورت غزل لکھیں تے اج کئی نواں لکھاڑی اُن کی پیروی کرتا سئی لگیں۔ بھادویں ویہ پونچھی کی جم پل ہیں پر تحریر کا حوالہ نال ان کو تعلق پوری ریاست نال سئی لگے۔

۱۹۹۳ء مانھ ڈاکٹر انجم ہوراں نے گوجری غزلاں کی پہلی کتاب ”دل دریا“ چھاپی جس ناریاستی کلچرل اکیڈمی نے بڑا مان نال ۱۹۹۵ء کو بہترین کتاب کو ایوارڈ دتو تھو۔ اُن کی کہانیاں کی کتاب ”کورا کاغذ“ ۱۹۹۶ء مانھ شائع ہوئی جہڑی گوجری مانھ کہانیاں کی پہلی کتاب ہے۔ اُن کی جدید گوجری شاعری ”سوچ سمندر“ تے چنام گوجری غزلاں کی تالیف ”غزل سلونی“ گوجری ریسرچ انسٹیٹیوٹ جموں نے ۱۹۹۵ء تے ۱۹۹۶ء مانھ چھاپی تھیں۔ ان کو کلام اکیڈمی کی کتاباں مانھ شائع ہون تیں علاوہ ریڈیو کشمیر تیں وی گیتاں تے غزلاں کی صورت اکثر نشر ہو تو رہے۔

ڈاکٹر انجم تحقیق پر وی گُوڑھی نظر رکھیں تے نسیم پونچھی کا کہن موجب ویہ پورا ملبہ بچوں لگی بڑی اٹھکل نال کڈھ لیاویں۔ ویہہ گوجری تحقیق مانھ سائنسی نظر پو داخل کرن آلا پہلا لکھاڑی ہیں۔ اس کو ثبوت انہاں نے ۱۹۹۶ء مانھ ”گوجری ادب کی سنہری تاریخ“ لکھ کے دتو تھو۔ ست چلداں مانھ شائع ہون آلی یاہ اس موضوع پر پہلی گوجری کتاب ہے۔

شاعری کی دو کتاباں ”سوغات (گوجری)“ تے کاش! (اُردو) تیں علاوہ ڈاکٹر انجم نے پہلی ”گوجری انگلش ڈکشنری“، ”گوجری گرائمر“ تے ”گوجری کہاوت کوش“ اسے سال شائع کروائی ہیں۔ اجکل انھاں کی گوجری شاعراں تے ادبیاں کا تذکرہ آلی کتاب ”لحلاں کا بنجارا“ اشاعت کا مرحلہ ماہہ ہے۔ یہ ساریں کتاب گوجری ادب ماہہ اپنا اپنا موضوع پر پہل ہیں۔

گوجری زبان تے ادب کی ترقی واسطے انھاں نے ۲۰۰۰ء ماہہ غیر سرکاری تنظیم ”انجمن ترقی گوجری ادب“ قائم کی جسکا ویہ پہلا سکرٹری جنرل وی ہیں تے اسے تنظیم کے تحت انھاں نے تقریباً دس، بارہ کتاب شائع کی ہیں۔ ڈاکٹر انجم کو تحقیق تے تصنیف کو یوہ سلسلو جاری ہے تے اجکل مختصر گوجری ڈکشنری، گوجری کشمیری تے گوجری ہندی ڈکشنری ترتیب دین تیں علاوہ دیسی طریقہ علاج پراک کتاب تے بچاں کی عام بیماریاں بارے کتاب کی تیاری ماہہ رُجھیاواہیں۔ ☆ (تحریر: امین قمر۔ کے ڈی مینی)

- تخلیقات: ۱۔ خواب جزیرے (اُردو شاعری) ۲۔ دل دریا (گوجری شاعری)
 ۳۔ غزل سلونی (منتخب گوجری غزلیں) ۴۔ سوچ سمندر (جدید گوجری شاعری)
 ۵۔ کورا کاغذ (گوجری افسانے) ۶۔ گوجری ادب کی سنہری تاریخ
 ۷۔ گوجری انگریزی ڈکشنری ۸۔ سوغات (گوجری)
 ۹۔ گوجری کہاوت کوش ۱۰۔ گوجری گرائمر
 ۱۱۔ کاش! (اُردو) ۱۲۔ قدیم گوجری ادب ۱۳۔ جدید گوجری ادب
 ۱۴۔ جدید گوجری شاعری ۱۵۔ جدید گوجری غزل ۱۶۔ گوجری گیت
 ۱۷۔ گوجری افسانہ نگاری ۱۸۔ لحلاں کا بنجارا ۱۹۔ جدید تاریخ گوجری ادب
 ۲۰۔ انجم شناسی۔ ۲۱۔ سندیشے (پنجابی ہندی شاعری) ۲۲۔ مختصر گوجری ڈکشنری
 ۲۳۔ گوجری کشمیری اردو ڈکشنری ۲۴۔ گوجری ہندی ڈکشنری ۲۵۔ دیسی طریقہ علاج

کلام کا نمونہ:

غزل ۱:

دو اُتھروں اک خواب کا ہوتا دو اُتھروں ارمان کے ناں
دو اُتھروں اُس بُت کا ہوتا دو اپنا ایمان کے ناں

وہ تے اوس وی دے نہ سکیو مچ تسائی دھرتی نا
اُڈتا پنچھی لیتو جائیے دو اُتھروں اسمان کے ناں

ہوں دوہاں نا دیکھ دیکھ کے اندرو اندری سڑتو رہیو
دو گھر کی ویرانی جوگا دو اُتھروں مزمان کے ناں

خواباں کی تعبیر وی جانے، یاداں کی جاگیر وی تون
گیت غزل تے شعر میرا سب تیرا اک احسان کے ناں

نیز اکپ کے تینسا جھل کے جس نے توڑ نبھائی ریت
ہوٹھیں سکتا حرف وفا کا، انجم اُس انسان کے ناں

غزل ۲:

آنوں باز نہ آیا اُتھروں	کس کس نے سمجھایا اُتھروں
خالی دیکھ حویلی دل کی	اُس نے آن بسایا اُتھروں
ایسوں لا کے فصل وفا کی	ہم نے خوب کمایا اُتھروں
خورے کون میں روٹو ڈٹھو	اج تک فیر نہ آیا اُتھروں
یار کی دعوت کر کے انجم	بس ہم نے برتایا اُتھروں

غزل ۳:

تیں دلاں کاروگ لایا ہوں دوا لکھتو رہیو
تیری بے دردی نا وی اپنی خطا لکھتو رہیو

میں بھجایا بالیا کئی وار یاداں کا دیا
تیرا خواہاں نا دلاں کا آسرا لکھتو رہیو

تیری مجبوری بجا پر اپنی محرومی تے دیکھ
کیسو دیوانو تھو پتھر نا خدا لکھتو رہیو

میں تے کی قربان اس تیں اپنیاں راتاں کی نیند
وہ وی میرے واسطے چر تک سزا لکھتو رہیو

اس زمانہ نے میرا اک درد کی کاری نہ کی
ہوں تے لکھاں واسطے کے کے دوا لکھتو رہیو

غزل ۴:

میری مرضی ہے جو رضا اُسکی	میں قبولی ہے ہر سزا اُسکی
حرف ہوٹھاں کو ساتھ کے دیتا	دل تے میرو تھو پر دعا اُسکی
موم کا پرتے دینہ کے سنگ یاری	خواب میرا تھا کے خطا اُسکی
اُس نے بھل جان کی دعا کی ہے،	لاج رکھینے توں یا خدا اُسکی
دل نے انجم ضرور کہنو ہے	اج تے کائے غزل سنا اُسکی

غزل ۵:

سو درداں کی کاری لے جا
اُت یہ بچ پپار نی چلسیں
اجاں نی دُنیا نکلی دل تیں
جانے تھو وہ جت نی سکسیں
میری قسمت کولوں اجم
لے جا عشق پیاری لے جا
بھاویں دُنیا ساری لے جا
اُچی ہور اڈاری لے جا
میں ہی بازی ہاری لے جا
لے جا نیند اُدھاری لے جا

غزل ۶:

کسے رنگ کی لوڑ نہ رتکیاں نا
اک وار پردیسا دیس آکے
تیری آس کی مرگ ہیں سرب نیلی
اکو حرف وفا کو یاد رکھینے
قمر جنتی کہہ گیا خوب اجم
نہ ہی ہار سگار کی چٹکیاں نا
آپے لاه جائیے سولی تکیاں نا
ڈالی دتی نہ چرن میں تکیاں نا
کدے تھینے نہ مونہوں منکیاں نا
’گلتا نہیں انار ہٹکیاں نا‘

غزل ۷:

دردی میرا درد بند اویے تاں منوں
یہ شیشاں کا شہر بسانا سوکھا ہیں
تیری خاطر چن کی دھوڑ بھلی میں
ہوٹھاں کو اعتبار مکایو لوکاں نے
منصوری کا دعویدار بہتیرا ہیں
جاتاں نا کوئے موڑ لیاوے تاں منوں
دل کی جھگی آن بساوے تاں منوں
کہ تھی تارا توڑ لیاوے تاں منوں
دل نا دل کی گل سناوے تاں منوں
اج کوئے پٹھی کھل لوہاوے تاں منوں

گیت ا:

نہ رے نہ دلا اُنکے ہوتیں نہ رویئے
 قسم ہے وفا کی بھلاوا نہ دھویئے
 نہ رے نہ دلا.....

جس کئی بستیاں بہاراں تیں اوہلے
 دُنیا کا رنگیں نظاراں تیں اوہلے
 توں غم لے کے جہاں کے باندے نہ ہوئے
 نہ رے نہ دلا.....

اُنہاں کی جہا نہ حساباں مانہ رکھئے
 توں سکا واپھل وی کتاباں مانہ رکھئے
 ویہ آویں گا چرکا توں راتیں نہ سوئے
 نہ رے نہ دلا.....

کاغذ قلم نا توں بولی بنا کے
 لفظاں مانہ درواں کا معنا چھپا کے
 غزلاں تے گیتاں مانہ اتھروں پروئے
 نہ رے نہ دلا.....

نہ رے نہ دلا اُنکے ہوتیں نہ رویئے
 قسم ہے وفا کی بھلاوا نہ دھویئے

گیت ۲:

خوشیاں نا یاد کر غماں نا بساریئے
 نکلی نکلی خوشیاں کو صدقو اتاریئے

خوشیاں نا یاد کر غماں نا بساریئے

گلاں کی بے گل کروں رات منگ جائیں گی
 ملن کی رت خورے فرکد آئیں گی

لوکاں کیاں بولیاں تیں کالجونہ ساڑیئے
 خوشیاں نا یاد کر غماں نا بساریئے

غماں کو نہ غم کر، خوشیاں کی رائیئے
 مندو کچھ بولیو وو، دل مانھ نہ آئیئے

دل کیاں لکیاں نا دلوں نہ بساریئے
 خوشیاں نا یاد کر غماں نا بساریئے

کسے کے نصیب ہووے دنیاں مانھ پیاروی
 چت کولوں چنگی لگیں کدے کدے ہاروی

پیارکیاں بازیاں ناجت کے وی ہاریئے
 خوشیاں نا یاد کر غماں نا بساریئے

خوشیاں نا یاد کر غماں نا بساریئے
 نکلی نکلی خوشیاں کو صدقو اتاریئے

سی حرفی

الف: اڈ کاگا نیزو پار ٹپ جا میرا یار نا میرو سلام کہینے
تیرا بچر اندر دن رات روؤں تیرے باجھ ہیں نیند حرام کہینے
چٹھی پتر آوے نہ کوئے اُس پاسوں، بھججو کوئے سلام کلام کہینے
جلدی ملاں گا فیر انشا اللہ، انجم بچناں نا یوہ پیغام کہینے
ب: بہت ارمان اُبڑھاس دل مانھ بچن ملیں تے کروں بیان جاگے
کوئے خبر عطر نہ کوئے پتو نیووں، خورے بسیا کہڑے جہان جاگے
ہوئی آس اُمیدا ڈیک بڈ ہیں، مُونو کدے تے تھو میری جان جاگے
اکوار آویں مُوگے دیس انجم، کروں چند تے جان فُربان جاگے
ج: جگ جانے تیرا ظلم بھانے، میرو دل ہے راضی رضا تاں وی
چنگی لُج پالی ساری عمر گالی، میلے اگلے جہان خُدا تاں وی
میرا آلنا سدو اُجاڑیا تیں، جھولی اڈ گے کروں دُعا تاں وی
در گدر اُس گی بے وفائی ربا، میرا یار گو شہر بسا تاں وی
د: درد ہزار فگار سینے، میرا غماں گو انت تھمار کوئے نہیں
بچن شاد بسیں پھل کھیلیاں مانھ، میرا لیکھ مانھ باغ بہار کوئے نہیں
پل پل ہر گل تھی لباب اُپر، کیوں یاد ہُن قول قرار کوئے نہیں
اک عیب وفا کو سدا سینے، انجم تیرے جیہو گنہگار کوئے نہیں
س: سوہنیا ساوئی رُت چلی ڈیکوں اجھاں وی اکھ تِسائی لیکے
تیری یاد نیت شرد سیال دل مانھ آوے بہار ملوں اے ساہی لیکے
ٹٹی بانھ وی اپنی گل لگے، تریو کون ہے آس پرانی لیکے
انجم جگ نا کے نصیحت کرنی، گیو کون ہے صاف صفائی لے کے

گوجراشعر:

میرو کم ہے دُعا کرنی دلوں لیکے زباں توڑی
نکل کے میرا ہوٹھاں تیں دُعا جانے خُدا جانے

اس زمانہ نے میرا اک درد کی کاری نہ کی
ہوں تے لکھاں واسطے کے کے دوا لکھتورہیو

جا جا بسر نیووں نہ رکیو، دُنیا کا احسان نہ لیا
اس درویش نے عُمر گذاری داتا کے دربار ہمیشاں

خواباں کی تعبیر نہ دتی ہور نووں کوئے خواب سہی
جاتاں جاتاں جاتا سنکیا نیند میری تے دیتو جا

اپنے نیویں آتا جاتا، ملتا گلتا سینے لاتا
ایسوں عید محرم بن گئی، سجن دل تیں دور اتیراں

اپنی جا پتھر وہیں بھارا سچی کہ گیا لوک سیانا
جا جا سجد کر کے انجم اپنو آپ گھٹائیے نہ

اتھرواں کا موتی زلیا گئی رات شریکاں مانھ
نین سمندروں یاد تیری نے کڈھیں نہر گذشتہ رات

اج تک فضل خدا کو انجم دشمن اکھ اٹھا نہیں سکتا
اسمراں نا چھلتا رہیا ہیں اپنا بجن یار ہمیشاں

اتھرواں کو پانی لاکے ارماناں کی لُوٹی نا
سرگی نال کدے تے کرینے دل کو سیک دعا کے حوالے

ایک دل کس کس کا جانیں درد کی کاری کرے
اس قیامت مانھ وی تیرا پیار کی اپنی جگہ

تُوں دور ہے شاند تیرا فرشتاں نا نہیں پتو
انسان گو لہو پئے اج انسان آکے دیکھ

تیرا در توڑی میری یاداں کا سلکا
چل چل کے دینہہ رات راہ ہو گیا ہیں

آبھلا چھوڑاں وفا تیں کس نے کیو سر کھلا
تیری توں جانے میری دیوانگی اپنی جگہ

خورے کون میں روتو ڈٹھو
اج تک فیر نہ آیا اتھروں

جگہ جگہ انسانیت کی قبروں کا گُجھ ایئر دسیں
کسے زمانے یاہ وی شائد بستی تھی انسانوں کی

جیتان جی کوئے ناں نہیں لیتو اسمتراں دیوانا کو
جاتی واری نیکی ساری آویں یاد زمانا نانھ

بے تیری کائے نشانی لیکے اج وی عزرائیل آوے
یاہ جان تیری امانت ہے ہوں دے چھوڑوں اشارا پر

چن کی گوگی سینے لاکے تاراں نال بھروں گو گوجھا
دل پاگل نا روز، اولیں پات یہ لاوے خورے کون

دُنیا مانھ کوئے اک نہ لہو جس نا اپنو کہ لیتا
جاتاں مانھ ہُن چھیکا لاویں کتنا تند و رشتاں کا

درداں کا میوا دُنیا توں، اک عُمر اُدھارا کھاہدا تھا
اللہ رکھے غم کا ہم نے، ہُن اپنا یوٹا پال لیا

سرگی نال بھیاں غماں کا دل مانھ کدے نہ آیا
پچھلے پھر تریل بڑی وہے اس بستی کا رستاں مانھ

کائے کھیمی نہ راس آئی یوہ درد تیر ونہ جان لے لے
میں صد نہیں رکھی ہیں کالجہ نال روز گھٹیں تپا تپا کے

کس کس حال زلیخا کولوں دامن آپ بچا کے رکھیو
کوئے معصوم تے شہادت دیگو سچا کی سرکار کے باندے

کل بے کوئے کمادوی لاوے فر نہ روئے دھوپے
آپ بسالی ہے تیں دل کی پا جا آلی ڈوگی

کم پیارو چم نہیں اس نا یاہ دنیا دورگی
اس نے تا بھاء نہیں چکھنو اوڑک اک دھیڑے

کے ہوؤ بے ناں نہیں لیتو قلم دوات سیاہی تیری
غزلاں مانھ تیرا پر چھاواں، گیت مانھ تیرو پیار ہمیشاں

گھڑی بھاویں نزع کی وہے لفظ میرو بدلسین نہیں
توں اج دی آکے جانیں زندگی میری لکھا لے جا

خوشی مل نہ جائے کائے گذر گیا زمانہ
زمانہ تیں اتھروں چھپاتاں چھپاتاں

صدی گذاریں سکھنے ہتھیں اس راہ کد تک آوے گو
روز کا چناں میرا چن نا، اکدن نال لیاے توں

میرے نال وفانہ کی جے ہور کسے نال کرنی کے
یارا جان سلامت تیری میرو پیار خدا کے حوالے

میں تے دُنیا جہان نانھ دسیں تیراناں کی یار غزل
کاش کدے توں اپنو کہو منا وی دوچار کے باندے

میں تیری ہر سورۃ آیت رکھی ہے تعویذ بنا کے
فرکیوں میرو حرف تیں غیراں مانھ برتاو چن

میری اکھاں کی تس نانھ تیرو ساون نہ پرکھ سکیو
نہ منا جاچ منگن کی نہ تینا دین کی آئی

وہ ساون کا جھولا مانھ وی تنگیں پھریں آوے تھو
خورے کن اکھاں نے کھاہدو اجنگ فیر نہ آو چن

یہ درد محبت کا لیکے دوچار قدم وی خاصا وہیں
منزل نہ لہھی عمراں تک جس نے یہ سگی نال لیا

یہ دُنیا کا دھندا سبنا کدے نہ مُکا، کد مکیں گا
ہوسکیو تاں فر اکواری مل جائیے قربان اتیراں

آبھلا چھوڑاں وفا تیں کس نے کیو سر کھلا تیری
توں جانے میری تیریں توں جانے میری دیوانگی اپنی جگہ

ٹھنڈی تے بیشار وہے محبتاں کی چھاں
اس روگلا چنار ناھ کوئے پالتو نہیں

یاہ مٹی کی ڈھیری کے بڈیار کرے
نیں ہوا مانھ اڈے گی مُڑ آوے گی

مجبوری انھاں ساراں کو واحد جواب تھو
پچھے تھی چتتا میرے توں سوال زندگی

نیلے نملوں اوس کی بارش تیرو آنو ایسوں برہیا
پہلا تھا تیں ہور وی کیا کیوں اتنا احسان اتیراں

میری وفا کو اج تم حساب کے کریں
پتھر دی پوجیا تے خدا کر کے چھوڑیا

تیرو غم نہ بھلو زمانہ کی تلخیں
میں چھوڑی ہیں ساریں بھلا بلیں بلیں

دُشمن لکھ ہزار وہیں بھاویں
میریں اکھ بچناں کا گھر دار
یار کی دعوت کر کے انجم
دل درویش نہ راضی ہو یو
کسے اگے اڈیے نہ جھولی بندیا
کُوڑ کا پکا بنگلا تکیا
تیری گلہبیں جے نہ زلتا
جس کے ہوتیں قول کیا تھا
خالی دیکھ حویلی دل کی
خواب مانہ آکے جے مل جاتو
دل دریا نے آس کا ٹاٹو
دل درویش نہیں خالی دامن

بجن بس دوچار بہتیرا
اُن کی ڈنی دھار اتیراں
بس ہم نے برتایا اتھروں
اُٹھیں خیر بہتیریں اکھ
منگئیے تے رب کی ضا منگئیے
سچ کو ڈھارو چوتو ڈٹھو
کتنا شہر بسایا ہوتا
اسے نال شکایت میری
اُس نے آن بسایا اتھروں
لگتی نہ دوانی تیری
کیتتی وار ڈبویا وہیں گا
اُجڑی دیکھ نہ حالت میری

جے تیرے تیں چنگی کی قربان نہ کی
یاریاتی کہوے مجرے آوے گی

☆☆☆

D:\Writers
org\rasheed
1.jpg not
found.

عبدالرشید شبینم

پیدائش: ۴ مارچ ۱۹۶۳ء کلائی پونچھ

عبدالرشید شبینم ہوراں کو تعلق وی ادبی پاچا آلی دھرتی پونچھ نال ہے جت ویہہ کلائی گراں
مانہ قاضی رحمت اللہ آوان ہوراں کے گھر مارچ ۱۹۶۳ء مانہ پیدا ہويا۔ دسویں تک کی تعلیم ہائی سکول
کلائی تیں ہی حاصل کی تے جھب ہی محکمہ پولیس کا شعبہ پیغام رسانی مانہ بھرتی ہو گیا۔ تعلیم کو سلسلو
جاری رکھ کے بی اے کی ڈگری وی حاصل کی تے اچکل ترقی کر کے سب انسپکٹر بن گیا ہیں۔

انہاں نے بچپن کا سال ڈاکٹر رفیق انجم کی سنگت مانہ گزاریا جہا ہانی سنگی تے
گمانڈھی بھی تھا۔ ۱۹۷۵ء کے قریب گوجری شاعری شروع کی پر شوق توڑ نہ چڑھی۔ فرچنگا
ڈرامہ فنکار کے طور پر کلچرل اکیڈمی نال متعارف ہويا۔ کچھ عرصہ گوجری مانہ کہانی وی لکھتا رہیا پر
آخر کار سکون غزل کا چھاملہ مانہ ہی محسوس کیو۔ پچھلا دس سالان تیں پونچھ کا ریڈیو سٹیشن تیں
ویہہ جموں کا حسن پرواز تے تراؤ کھل کار رفیق شاہد کی طرز پر رشید آوان کا نال گوجری پروگرام پیش
کریں تیں تے اس طرح ریاست پونچھ کا سب گوجری سنن تے بولن آلا انہاں نا چنگی طرح جانیں۔
انہاں کی گوجری کہانیں تے غزل شیرازہ گوجری مانہ اکثر شائع ہوتی رہیں۔ ویہہ چھوٹی بحر مانہ چنگی
غزل کہن کی صلاحیت رکھیں۔

غزل:

او صدقے یاہ ساری لے جا	لے جا اکو واری لے جا
میرے کولے بچپو کے ہے	چند غماں کی ماری لے جا
رہن دے مئاں ساد پونا ماں	توں اپنی ہوشیاری لے جا
میری سب عمر کی گوچھی	آیو تھوک پاری لے جا
وس لگو تے موڑ کے دیئے	اپنی یاد ادھاری لے جا
سنگت اکلاپا کی دے کے	رہتی دُنیا ساری لے جا
تاج تخت کے بدلے شبینم	میری اک لاچاری لے جا

ران البرٹ

پیدائش: ۱۰ ستمبر ۱۹۶۳ء کیلیفورنیا (امریکہ)

ران البرٹ امریکی محقق لسانیات تے سماجی کارکن ہیں جنہاں نے اپنی ساری زندگی گوجراں کی تعلیمی تے سماجی بہتری واسطے وقف رکھی وی ہے۔ انہاں کی پیدائش امریکہ کی کیلیفورنیا ریاست مانہ ۱۹۶۳ء مانہ ہوئی۔ بنیادی تعلیم اتے حاصل کی تے تے فر دینیات تے اہل کتاب کا تقابلی مطالعہ کو موضوع اپنی تحقیق واسطے پسند کیو۔ اسے تعلیم کے دوران انہاں نالسانیات کی شوق پئی تے انہاں نے کنیڈا تیں اپنی ایم اے کی تعلیم واسطے گوجری گرائمر کو موضوع چن کے اس پر کم شروع کیو۔

گوجری لسانیات کا موضوع پر کم کرن واسطے انہاں نا جموں کشمیر مانہ آنو پیو۔ یاہ تحقیق انہاں نے کئی سالوں کی محنت تیں بعد ۱۹۹۶ء مانہ مکمل کی جس پر انہاں نا ۱۹۹۸ء مانہ سند ملی۔ پر اس عرصہ مانہ جموں کشمیر مانہ سفر کے دوران انہاں نا گجراں کی زندگی نا مچ نیڑے تیں دیکھن کو موقع ملو تے انہاں نے محسوس کیو جے ات لسانیات تے زیادہ وی کجھ اس خانہ بدوش طبقہ واسطے کیو جاسکے۔

اسے جذبہ کے تحت انہاں نے سماجی مسائل جانن تے ان کا حل کی کوشش شروع کر لئیں۔ اس سلسلہ مانہ انہاں نا کئی بار اپنا ملک تیں ات و نو جانو پیو، کئی قسم کی مشکلات وی دیکھیں تے آخر کار غیر سرکاری تنظیموں کی مدد نا ل گجراں کی تعلیمی، معاشی تے سماجی بہتری کا کماں مانہ لگاوا ہیں۔

انہاں کو کیو و گوجری لسانیات کو کم ۱۹۹۸ء مانہ شائع ہو یو تھو جہڑوان لوکاں واسطے بڑو مددگار ثابت ہوئے جہڑا گوجری یا گجراں کا بارا مانہ کھوج کرن کی چاہ رکھیں۔ اس تیں علاوہ انہاں کی لکھی وی یاہ گوجری گرائمر گوجری تحقیق کرن آلا لکھاڑیاں واسطے وی بڑی اہمیت رکھے۔ بہر حال گوجری تیں زیادہ انہاں کی دلچسپی تے محنت گجراں واسطے ہیں تے ویہہ لسانیات تیں زیادہ سماجیات کی سند کا مستحق سئی لگیں۔

D:\Writers
org\zahoor
s.jpg not
found.

شیخ ظہور احمد

پیدائش: ۱۵ ستمبر ۱۹۶۳ء سموت پونچھ

گوجری کانوجوان تے خوبصورت شاعر شیخ ظہور احمد ہوراں کو تعلق ادبی طور زرخیز دھرتی پونچھ کا علاقہ سرکوٹ نال ہے۔ جت ویہہ ۱۹۶۳ء ماٹھا کشمیری خاندان مانھ پیدا ہويا۔ ہائی سکول سرکوٹ تیں ۱۹۸۰ء مانھ میٹرک کو امتحان پاس کیوتے فر ۱۹۸۵ء مانھ پالی ٹیکنیک جموں تیں سول انجینئرنگ کی سند لے کے ۱۹۸۸ء مانھ سرکاری ملازمت شروع کر لئی۔ اجکل ویہہ میونسپل کارپوریشن جموں مانھ تعینات ہیں۔

سُہن کوٹ مانھ ادبی روایت بڑی پرانی ہے تے ات کانوجواناں نے یاہ لاگ کدے نہیں مٹن دتی۔ شیخ ظہور اسے ادبی ماحول مانھ جمیا پلایا تے لہذا آپ وی ۱۹۹۰ء کے قریب اردو، گوجری، کشمیری تے پہاڑی مانھ شاعری شروع کی۔ بھادویں انھاں کی مادری زبان کشمیری ہے تے ویہہ اردو تے پہاڑی مانھ وی چنگی شاعری کریں پران کا شعری اظہار مانھ جھڑوا لہانہ پن تے ٹھٹھ برتیبو گوجری شعراں مانھ ہے اسکی مثال ہور ٹھٹھ نہیں بھتی۔ ویہہ خلوص نال اس میدان مانھ بردم رہیا تاں ہمیشاں زندہ رہن آلی شاعری تخلیق کرن کی صلاحیت رکھیں۔

کلام کا نمونہ:

غزل ☆:

کد بے سہے واہ تیری صورت یارِ مِناں	وہ چہرہ ویہہ متھا کا لشکارِ مِناں
سہی لگے تھو چاندی کو پیکر ہر یو	ڈنگھو ٹو پو ٹھوڈی کے بشکارِ مِناں
آن ویلا کی مستی تیری نہیں بھلتی	نہیں بھلتو وہ چکھو جاتی وارِ مِناں
کھینڈن مانھ تیرے سنگ میر ورس جانو	فونٹھکی سنگ دینی دوہری بارِ مِناں
تیری یاری تیری فرمانبرداری	تیرا خون کی رکھے تابعدارِ مِناں
اپنے جوگی دو گز جاگ سنبھالی تیں	دے کے ٹرگیو، موٹر کٹھی کارِ مِناں
گرداباں کے اندر کشتی آن پھسی	کرے خداوند چچو اتوں پارِ مِناں

☆ (نکا بھائی کی وفات پر لکھی وی)

غزل:۲

سچو بھو سسکھو نہیں سچائی بول کے تک لے
ہزاراں جھوٹھ تیں بھارو ہوئے سچ تول کے تک لے

گھٹی ہے نہ گھٹے گی میرے اندر کی یاہ بیباکی
ہزاراں پھیر لے پھانڈا تے جھکھڑ جھول کے تک لے

سچا کے سامنے شکر تے پتھر جھوٹھ کے اگے
لے! پانی تے انگلی نال مناں گھول کے تک لے

نچھو سکتو نہیں جو موتیاں بچوں ہوں وہ کچھ ہاں
پگڑ شیشہ کو چھج بھاویں، دھیایڑی رول کے تک لے

سختاوت واسطے وی لوڑ ہوئے کردار حاتم کو
پنا کردار رستہ مانھ توں دولت ڈوہل کے تک لے

یوہ اک جھولو تے گجھ منکا، یہ گل مانھ لیر پائی ویں
سویر اس تیں میرو اعمال نامو کھول کے تک لے

D:\Writers
rg\pardaisi.jp
not found.

چودھری محمد اشرف پردیسی

پیدائش: ۶ جون ۱۹۶۴ء گوجرنگر جموں

محمد اشرف پردیسی ہورکنیاں آلی بارہمولہ کا رہن آلا گوجری کا نوجوان شاعر ہیں جہاں مدت میں گوجری تحریک کے نال جڑیاوا ہیں۔ انکا والد چوہدری لعل الدین پھامڑہ عرف لعل خان پولیس مانہ ملازم تھاتے نوکری کا سلسلہ مانہ اکثر گھرتیں دور وی رہیا ہیں۔ ایسا ہی دور مانہ محمد اشرف پردیسی ہوراں کی پیدائش جون ۱۹۶۴ء مانہ ہوئی جدل لعل خان ہور گوجرنگر جموں مانہ مقیم تھا۔ اس توں بعد جھب ہی ویہہ اپنے گھر بارہمولہ واپس آ گیا تے اشرف پردیسی ہوراں کی دسویں توڑی کی تعلیم تے بنیادی تربیت اتے ہوئی۔ اجکل ویہہ ریاستی محکمہ واٹر سپلائی (پی ایچ ای) مانہ ملازم ہیں تے اپنا ہی علاقہ مانہ لوکاں کی تس بدھان تے بھان مانہ مصروف ہیں۔

تعلیم کے دوران ہی چوہدری گلاب دین طاہر ہوراں کی سنگت مانہ ادبی رستاں کی بھوم ہوئی۔ ویہہ ریڈیو کشمیر تے کلچرل اکیڈمی مانہ آن جان لگاتے آپ وی گوجری شاعری کی شوق جاگی۔ تدتیں ویہہ بادستور گوجری مجلساں تے مشاعرے مانہ اکثر شامل رہیں۔ انکے اندر چنگی شاعری کی صلاحیت موجود ہیں۔

کلام کا نمونہ:

نعت شریف:

واہ دھرتی پاک مدینہ کی!

جت رونق سب بزاراں کی
 جت بھیڑ لگیں دلداراں کی
 فریاد ہوئے مسکیناں کی واہ دھرتی پاک مدینہ کی
 ہیں مالک سب جہاناں کا
 ہیں وارث اُچیاں شانان کا
 جت کلمو دھڑکن سینہ کی واہ دھرتی پاک مدینہ کی
 گل عالم جس نا یاد کرے
 اُس در پر جا فریاد کرے
 اُت خلقت سب زمیناں کی واہ دھرتی پاک مدینہ کی

غزل ۱

دیکھ کدے اعتبار نہ کرے بھادیں کتو بھادیں لوک
 جھوٹی شان تے عشرت دس کے اینویں یہ لچاویں لوک

کر کر میں بھی تلخ تجربہ زندگی کا یہ دور لنگھایا
 چڑھتے پاسے ہر کوئے دوڑے سچ ناناں چھپاویں لوک

کنیاں کی میں مجلس دیکھیں کنیاں کو اعتبار کیا
 کنیاں کے کچھ دھکا ماریں کنیاں نا ترساویں لوک

گوڑی دنیا جھوٹھا وعدا گوڑ بکے ہر شہر بازار
سچ کوات کوئے راہ نہیں دستو سچ کہتاں شرماویں لوک

پردیسی اک عاجز تیرے شہر تیرو مشتاق مہرے
ہر کوئے جانے منزل میری، جان کے جھلیا لایں لوک

غزل ۲:

جے اثمان کی بدلی ہو تو ہر ساون ہوں برہتو
تیرا نین سمندراں اندر ڈبکی کھا کھا مرتو

جے توں بند تلا اک ہو تو لاتو بنڈھ چو فیری
پھل کنول تے نرگس بن کے کنڈے تیرے تر تو

جے مزمان حقیقی بن کے قدم روا فرماتو
نیناں کی ہوں سچ سجا کے رستے تیرے دھرتو

جے پٹوار حکومت ہوتی مثل اندراج کراتو
قلم بن کے خالی خانے ناں تیرو لکھواتو

وطن میرا کی ماہلیاں اپر چن بن کے جے چڑھتو
تیری لو پردیسی رب کی رات عبادت کرتو

مولانا فیض الوحید

پیدائش: جون 1965ء دداسن بالارا جوری

فیض الوحید جون 1965ء مانہ راجوری کا گراں دداسن بالا مانہ پیدا ہوا۔ بچپن مانہ ہی اسلامی تعلیم کی شوق پئی تے دارالعلوم دیوبند مانہ داخل ہو گیا۔ پہلاں حفظ قرآن پاک کو شرف حاصل کیو، فر دارالعلوم توں فاضل کی سند لئی تے مفتی کو کورس وی مکمل کیو۔ اس طرح وہ حافظ، فاضل تے مفتی کی ترے سند لین آلا کجھ اک خوش قسمت لوکاں وچوں ہیں۔

دارالعلوم توں واپسی پر انھاں نے 1990ء کے قریب جموں شہر کا علاقہ بٹھنڈی مانہ اسلامی درس کو سلسلو شروع کیو جہڑ واسو پلے ترقی کر کے اک جامعہ کی صورت مانہ دنیا کے سامنے ہے۔ اسے دور مانہ ریاست مانہ افراتفری کے دوران انھاں نا قریب ست سال تک جیل مانہ وی گزارنا پیا۔ اس عرصہ مانہ انھاں نے قرآن پاک کا ترجمہ تے تفسیر کو کم سمہالن کو فیصلو کیو۔ اس تیں پہلاں گوجری زبان مانہ ترجمہ کو کم مولانا عابد حسین صاحب نے کیو تھو جہڑو شائع نہیں ہو سکیو تھو۔ اس طرح مولانا فیض الوحید ہوراں نے اسے ترجمہ ناظر ثانی کر کے اس پر تفسیر کو کم ست سال مانہ مکمل کیو۔ گوجری مانہ قرآن پاک کی پہلی تفسیر ہون کے نال نال انھاں نے جیسی صاف ستھری نے سلیمس گوجری زبان استعمال کی ہے اُس کے نال قوم تے زبان کی وی بڑی خدمت ہوئی ہے۔

مفتی فاضل مولانا فیض الوحید صاحب کو کیو ویوہ مبارک کم ہن شائع ہو کے پڑھن آلاں تک پونج گیو ہے۔ دُعا ہے کہ اللہ انھاں نا دین کا حوالہ سنگ قوم تے زبان کی مزید خدمت کرن کی توفیق دے۔

D:\Writers
org\majruh
nm.jpg not
found.

چودھری نور محمد مجروح

پیدائش: جون 1965ء گول

نور محمد مجروح گوجری کا نوجوان تے با حوصلہ شاعر ہیں جہڑا گول کی خوبصورت وادی مانھ جون ۱۹۶۵ء مانھ پیدا ہو یا۔ گوجرا ماحول کا قضا بختاں وچوں بچپن مانھ ہی اپنوصو نکھیر ليو۔ دسویں توڑی کی تعلیم حاصل کرن تیں بعد محکمہ پولیس مانھ ملازم ہو گیا۔ سرکاری ملازمت زیادہ دیر انھاں کو دل نہ بھلا سکی تے انھاں نے کلچرل اکیڈمی تے ریڈیو سٹیشن کے ذریعے گوجری لکھاڑیاں نال آن جان شروع کر ليو۔ گوجری ادب کا مطالعہ نے اُنکے اندر کودردوی جگا پوتے تخلیق کاروی۔ تے یوں انھاں نے گوجری مانھ غزل تے گیت لکھنا شروع کر لیا جہڑا شیرازہ مانھ شائع ہون تیں علاوہ ریڈیو تیں وی اکثر نشر ہوئیں۔ اُن کو گوجری کلام ”لہو کا اتھروں“ تے ”سجری یاد“ کا ناں نال شائع ہو یو ہے۔ کچھ پچھاواں کے باوجود اس سوئی کتاب مانھ اُن کا کئی خوب صورت شعر شامل ہیں جہڑا پڑھن آلاں نامتاثر کرنو نہیں رہتا۔ اُن کی شاعری تیں گوجری ادب کا وسیع مطالعہ کی گواہی لھے تے گوجری غزل کا تخلیقی سفر مانھ پہلا راہیاں نال ویہ اُسے اعتماد نال پیش آیا ہیں جس طرح اکثر پولسیا اسمتراں نال سلوک کریں۔

بھاویں مجروح کا کلام مانھ تخیل کی وسعت تے فنی یکپیت کی گنجائش موجود ہے پر اُن کا دل مانھ درد تے اکھاں مانھ چمک نا دیکھ کے یاہ گل کہی جا سکے جے کدے انھاں نے پڑھن تے لکھن کو سلسلو جاری رکھیوتاں اک دن ضرور ویہ گوجری غزل مانھ اپنومیکلو اسلوب وی پیدا کر لیں گاتے مقام وی۔ کلام تیں ان کا ہاڑا تے حیلہ سارا سماج کا محسوس ہوئیں تے

نوں گوجری زبان تے زرد نال محبت کرن آلاں نے کافی آس تے امید لائی ہیں۔ تے ہُن
یاہ گل یقین نال کہی جاسکے جے انور حسین، نور محمد مجروح، جاوید راہی، جان محمد حکیم یونس ربائی
ادریس شاد تے ریاض صابر کی موجودگی نویں صدی کی گوجری غزل واسطے مبارک ثابت
ہوئے گی۔

کلام:

غزل ۱:

آوے یاد ستاویں اتھروں	سُتا درد جگاویں اتھروں
خالی دیکھ حویلی دل کی	غم کو شہر بساویں اتھروں
سوئی لے کے ڈکوں بھاویں	آنو باز نہ آویں اتھروں
لاکے تیر ہجر کو دل تیں	خون کی نہر بگاویں اتھروں

غزل ۲:

چناں کائے نشانی دے جا	تس ہے بکس پانی دے جا
مٹھا مٹھا پیارا پیارا	بولوں کی قربانی دے جا
پیار پریت کا پھلاں نافر	نووں روپ جوانی دے جا
خوشیں کل مبارک تتاں	وے کچھ درد نشانی دے جا
جاتاں جاتاں تحفو مجروح	واہ اک یاد پرانی دے جا

غزل ۳:

آ جا یار یرانو بنڈاں	وہ دکھ درد پرانو بنڈاں
آپس مانہ سنجھیالی کر کے	دھیلو دھیلو آنو بنڈاں
پیار کے چرنے پونی کتاں	تندو تندو تانو بنڈاں
پریت کی فصل کما کے مجروح	ریت کو دانو دانو بنڈاں

غزل ۴:

غم ڈٹھا غم خواری ڈٹھی حب ڈٹھی لاچاری ڈٹھی
 کر کے پیار کو سودو آخر پل پل بے قراری ڈٹھی
 مگر فریب تے دھوکھاں آلی ہوتی میں سرداری ڈٹھی
 یاد کے بوہے ڈیرو لاکے خالی آس کی ڈھاری ڈٹھی
 ظالم درد وچھوڑا جھیںسی نہ کائے ہور بیماری ڈٹھی

غزل ۵:

بدلیں رت نظارا کتنا موسم پیارا پیارا کتنا
 زندگی مانھ کے کچھ نہیں ڈٹھو گھسن گھیر کنا کتنا
 رو رو کتنی رات بتائیں لگا زخم کرارا کتنا
 درداں کا اس عالم کے بچ راتیں گنیا تارا کتنا
 کتنا پھیرا مار گیا ہیں ان گلہبیں بنجارا کتنا
 کتنا لوک زما نا بدلیا چھٹا سنگ سہارا کتنا
 کتنی بستیں اجڑیں مجروح خالی ہو یا ڈھارا کتنا

ق:

ہجر کا موتی چن چن کے میں پو پو ہے اک ہار غزل گو
 میری دنیا اجڑ گئی تے بسو اک سنسار غزل گو
 ان گنیا یہ منکا چن چن کئی کئی لڑیں پروئیں میں
 اس جگت مانھ سب توں بدھ کے کیو میں سنگار غزل گو

ق:

بے وقتا بے ملا اتھروں آس کے باغیں پھلا اتھروں
ویلا نا جد لوڑ تھی انگی اس ویلے نہیں ڈلا اتھروں

ق:

دل مانھ توں اک یار بے رے بس اک تیرو پیار بے رے
ہڈیاں کی اک مُٹھی مانھ یوہ میرو دل پیار بے رے

ق:

تھارے باجھوں میریں اکھ اجکل خوب ہسیریں اکھ
اپنی وی کائے دسو نا بے تم نے کیوں ہن پھیریں اکھ

گیت ا:

مُڑی رُت بہاراں کی باغاں ماں پھل پھلیا، ٹھنڈی وا ہے چناراں کی
پانی بکیو ہے ندیاں کو اک میرو دل ڈکھیا، نالے درد ہے لکیاں کو
رتو لال، جو گھوڑو ہے سبناں مار گیو مناں تیرو وچھوڑو ہے
بہوے سریاں پھل گئی ہے چن کی اڈیکاں ماں، میری سُدھ ہدھ پھل گئی ہے
اڈ چوایاں کو ڈار گیو بے پرواہ چن رے، مناں کیوں توں بسار گیو
چناں تیر نہیں آسیں ہوں تک تک راہ تیرا، روؤں بلیئیں باسیں ہوں
پھل پھلیا دُنیاں کا زندگی نے مک جانو، کم مکننا نہیں دُنیا کا۔

گیت ۳:

او پر دیسی ڈھول سپاہیا، او پر دیسی ڈھول
آجا میرے کول سپاہیا، آجا میرے کول

ہن نہ منا رول سپاہیا، ہن نہ منا رول
آجا میرے کول سپاہیا، آجا میرے کول

غم کوزہ نہ گھول سپاہیا، غم کوزہ نہ گھول
آجا میرے کول سپاہیا، آجا میرے کول

ہجراں کی گٹھ کھول سپاہیا، ہجراں کی گٹھ کھول
آجا میرے کول سپاہیا، آجا میرے کول

میر و پیار نہ تول سپاہیا، میر و پیار نہ تول
آجا میرے کول سپاہیا، آجا میرے کول

سنگن منا بولیں ماریں
کے کے میرے بر گزاریں
آس نمائی پل پل ہاریں

نگر نگر ماں ڈھونڈوں لوڑوں
آس کا تندو توڑوں جوڑوں
نیناں بچوں نیر نچوڑوں

شگر تلا ماہلی سوئی
ساون کی رت مچ سلونی
مٹھلاں ماں ہے خوشبو ڈونی

او گلناں کیا یارا چناں
تاراں تیں وی پیاریا چناں
دہنہہ کی لو پر بھاریا چناں

D:\Writers
org\idrees.jpg
not found.

چودھری محمد ادریس شاد

پیدائش: 8 اگست 1965ء کنگن

محمد ادریس شاد ہور ۸ اگست ۱۹۶۵ء نا تحصیل کنگن کا گراں گوجر پتی ٹھیون ماں پیدا ہويا۔ بنیادی تعلیم مائٹر کا پرائمری سکول میں حاصل کی تے فردسویں انھاں نے ۶۷ء ماں ہائی سکول ہاڑی گنیون میں پاس کی تے اپنا زندگی کا کاروبار ماں لگ گیا۔ گھر ماں گھج ادبی ماحول تھو پر باقاعدہ شعر و شاعری کسے نے نہیں کی۔

محمد ادریس شاد اک عرصہ توڑی گوجری لوک کہانی تے لوک گیت اکٹھا کر کے کلچرل اکیڈمی کی کتاباں ماں شائع کروا تا رہیا ہے۔ اس گلوں شاد ہوراں کوناں گوجری لوک ادب پڑھن آلاں واسطے ذرا اوپر نہیں۔ انھاں نے گوجری لوک گیتاں تے لوک کہانیاں کی جمع بندی ماں قابل تعریف کم کیو ہے۔ تخلیقی میدان ماں ویہہ تھوڑا پڑ کا آیا ہیں پر چھوٹی بحر ماں خوبصورت غزل لکھ کے انھاں نے اپنا فنی پکیت کو ثبوت پیش کیو ہے جس نال گوجری ادب کا قدر دانان نے انھاں نال بجا طور پر امید لائی ہیں۔ اللہ کرے ویہہ اپنا ارادہ پر قائم رہیں تے گوجری اکھاں کی تس بجاتا رہیں۔ کلام کا نمونا:

غزل:

لئے گیو پیار کے ہتھیں	سکھنا ہار سنگار کے ہتھیں
رات پیر کی پاس بدلتا	ڈور وصل دلدار کے ہتھیں
اوہلے اوہلے جاگ تیں اوہلے	دل دتو دلدار کے ہتھیں
سادن کی زت ڈیک تیری ماں	جام وصل کا یار کے ہتھیں
کس نا شاد ہن حال سناؤں	ہوں ویران اعتبار کے ہتھیں

غزل ۲:

نہ وہ چن نہ تارا دِسیں نہ وہ روپ نظارا دِسیں
 خالی نگری آس میری کی سکھنا محل چو بارا دِسیں
 رات دھیڑی دل پرچاتا تیز ہجر کا آرا دِسیں
 دل کی گٹھیں چھپیا لگیا کہیں ارمان کوارا دِسیں
 اج بھی اُنھیں راہیں رُلتا میرا نین آوارہ دِسیں
 بسے شاد یاہ اُجڑی بستی جے وہ رُوپ دوبارہ دِسیں

غزل ۳:

تیناں خط ہر وار لکھوں گو تیری انتظار لکھوں گو
 عیش آرام ماں دُنیا ساری ہوں مچ بے قرار لکھوں گو
 بھکھے سینو گوہٹا ہاروں یاداں کا انگار لکھوں گو
 تیرا ہاسا رات دھیڑی اپنا اتھروں چار لکھوں گو
 تینا جت کی ہوئے مبارک اپنے نانویں ہار لکھوں گو۔

غزل ۴:

اس نگری اک واری تکیے میری گریہ زاری تکیے
 پل پل ساعت سال برابر ہر پل انتظاری تکیے
 اندرو اندری کھا گئی سینو کیسی عجب بیماری تکیے
 مدتوں تیں اس سینے میرے دکھتی اک چنگاری تکیے
 شاد کسے کی تاہنگ یاہ میری لے گئی خوشی ادھاری تکیے

D:\Writers
org\taj.jpg
not found.

چودھری تاج دین تاج

پیدائش: 4 جون 1966ء نامبلہ اوڑی بارہمولہ

تاج دین تاج کو حولیو اکھاں اگے آتان ہی گوجری پڑھن سنن آلاں کی بکھیاں
مانھ کنگتی نکلن لگ پونیں۔ ویہ گوجری کا نیا پڑنیا مزاحیہ شاعر ہیں جنہاں نے نذیر احمد نذیر تے
نور محمد نور تیں بعد گوجری مزاح نگاری مانھ سب تیں زیادہ کم کیو ہے۔ ویہ ۱۹۶۶ء مانھ تاجا کی
سوئی دھرتی اوڑی (بارہمولہ) مانھ پیدا ہو یا تے غالباً اسے نسبت نال ناں وی تاج دین
رکھا یو۔ بنیادی تعلیم تیں بعد محکمہ تعلیم مانھ ملازم ہو گیا تے اجکل گوجر ہوسٹل سرینگر مانھ قوم کو
مستقبل سدھارن مانھ مصروف ہیں۔

ویہ گوجری ادب مانھ کد داغل ہو یا ادب کد اُنکے اندر کد داغل ہو یا اسکی تے مناں
سمہال نہیں پر اندازو ہے جے کلچرل اکیڈمی مانھ گوجری شعبہ کھلن سات ہی آیا ہوئیں گا۔
مناں اج تک کشمیر مانھ کائے گوجری مجلس یاد نہیں آتی جس مانھ تاج دین تاج دیکھو یا سنیو نہ
ہوئے۔ انھاں نے شروع توں ہی طنز و مزاح کو میدان اسول کے رکھو ہے جے اکثر گوجری
لکھاڑیاں ہاروں اُراں پراں ڈالو نہیں دینا پیا۔ تاج دین تاج کی مزاحیہ نظم ریڈیو کشمیر تے ٹی
وی توں علاوہ تقریباً ہر شیرازہ مانھ وی نظر آویں۔ قوم تے سماج کے اندر کی عکاسی توں علاوہ
انھاں نے اصلاح کو چہرہ و لہجو اختیار کیو ہے اسکی وی داد دینی پوئے گی۔ موقع پر بھاری سنن آلا
انکا کلام پر ہس کے چلیا جائیں پر تیجے دن جدان کو پیغام سمجھ مانھ آوے تاں کنیاں نارونو وی
پوئے۔ تے شائدیا ہی کامیاب مزاح نگاری کی پچھان وی ہوئے۔

گوجری ادب مانھ نذیر احمد نذیر تے نور محمد نور کے نال ویہ لوکی عمر تیں ہی بڑا حوصلہ

تے وقار نال کھلار ہیا ہیں۔ پرنذیر کالاکوٹی کی وفات (۲۰۰۳ء) تے باؤ نور ہوراں کا بڑھیاں تیں بعد گوجری مزاح نگاری کو یوہ آخری سہار سئی ہوئے۔ کیونجے باقی مزاح نگاراں مانھ صرف مرزا خان وقار کوناں آوے جہو ا اجھاں کہانیاں کی ججھل مانھ پھسیا وا ہیں۔ تے اس طرح تاج واسطے مزاح نگاری کو میدان اجاں لگو مگو ہے۔ اُمید کراں جے ویہ جلدی ہی اپنی مزاحیہ شاعری کی کتاب گوجری پڑھن سنن آلاں کے حوالے کریں گا۔

کلام کا نمونا:

غزل

تیر نظر کو پار نہ کریئے
دل کو ایڈ شکار نہ کریئے

دل لیکے دل دینو سکھ
او بے دردا بھار نہ کریئے

جے لڑنو تاں باندے لڑیئے
کنڈ پر مڑداوار نہ کریئے

اُس جگ کی ہوں ککھ نہیں کہو
اِس دھرتی پر خوار نہ کریئے

پل کی گمیں صدی بھگتیں
ایسو کوئے اقرار نہ کریئے

نظم:

روزگار

چل جانا وار اک دسوں کر سکے تاں کار اک دسوں
تکڑو جو روزگار اک دسوں پیساں گو لگکار اک دسوں

میری گل نا کنے دھریئے

نہیں دھرتوتے فاقے مریئے

اینویں کہنویں شوٹکن لگ جا پھر گجھ پڑھ کے پھوکن لگ جا
اللہ ہو جی کوکن لگ جا ڈنڈاں اگے ہوکن لگ جا

اس مشکل مانھ تھوڑو جریئے

نہیں جرتوتے فاقے مریئے

چٹا کاغذ رنگن لگ جا ڈھوپتے دھاگوڈنگن لگ جا
کھاگڑ لائیری متنکن لگ جا تکڑا ککوڈ بکن لگ جا

جو دسوں وہ سارو کریئے

نہیں کرتوتے فاقے مریئے

یوہ روزگار منظور نہیں کرتو ہوں تا مجبور نہیں کرتو
تا نظروں دور نہیں کرتو ایڈ بڑو قصور نہیں کرتو

میری جانج نا سینے دھریئے

نہیں دھرتوتے فاقے مریئے

تا یاہ گل بھاتی نہیں تاں نوکری تا تھاتی نہیں تاں
مہری لکھو کھاتی نہیں تاں اس راہ غربت جاتی نہیں تاں

بس توں تھوڑی ہمت کریئے

نہیں کرتوتے فاقے مریئے

نظم: گرتو (بھرن، پیرہن)

ٹھنڈ مانھ جان بچاوے گرتو
 ککھ نہیں کہتا اس نا پلسی
 کتوں جئے یوہ تھاوے گرتو
 چور کی پنڈ چھپاوے گرتو
 تمبو نہ طلباوے گرتو
 حیا کے باندے ہستو ہستو
 جد کوئے اُفراں چاوے گرتو
 بنگلوں نکلے راز کی گتھی
 تاج نا ساڑا لاوے گرتو
 گلن مانھ چمکے لا کے طلو

نظم: کانگری

بڑی اُچی سوچ نے بنائی کانگری
 دل نے دل نال لائی کانگری
 سوئی سوئی لگے منا تائی کانگری
 سوئی کی قدراں ناکدے نہ بسا ریو
 شرد کا جانکاں کی دائی کانگری
 سُور پر میں جد دلی جانو تھو
 سوئی سوئی لگے منا تائی کانگری
 پُڑ مانھ بڑھی نا بدھائی کانگری
 میرے نال گھل گئی گدرا کی ماں
 سوئی سوئی لگے منا تائی کانگری
 مار کے میں بسر مانھ روائی کانگری
 رکھ لئی تاج نے پُتاو مانھ نشان
 سوئی سوئی لگے منا تائی کانگری
 کس نے ارج تک ہرائی کانگری

وائن ای لیوسی

پیدائش: 22 فروری 1967ء کولورڈو امریکہ

وائن لیوسی امریکی ماہر لسانیات ہیں جنہاں نے پاکستانی کشمیر مانہ گوجری املاء تے رسم الخط کا بارا مانہ مچ سوئی تحقیق کی ہے۔ جس پر انہاں نائیونیوسٹی آف نارٹھ ڈکوٹہ تیں ایم اے کی سند ملی ہے۔ دیہہ فروری ۱۹۶۷ء مانہ امریکہ کی کولورڈو ریاست مانہ پیدا ہو یا تے بنیادی تعلیم تیں بعد لسانیات کو میدان ملیو جس مانہ انہاں نے بی اے تے ایم اے کی سند لین تیں بعد اچکل ویہہ عملی طور پر تعلیمی میدان مانہ تقابلی لسانیات کا ماہر کے طور کم کریں۔

انہاں نے گوجری لسانیات مانہ گوجری رسم الخط تے املاء کا مسائل پر علمی بحث تے تحقیق کی ہے جس کی ضرورت مدت تیں محسوس ہوئے تھی پر اس سلسلہ مانہ اچھاں تک کائے خاطر خواہ کوشش نہیں ہوئی تھی۔ جگدیش چندر شرما ہوراں کی صوتیات تے قواعد تیں متعلق کتاباں مانہ اس موضوع پر زیادہ تحقیق تے بحث نہیں ہو سکی تھی۔ کلچرل اکیڈمی کا گوجری شعبہ نے وی جہڑو رسم الخط تے املاء بنا یوتھو اس مانہ وی کجھ اک خامی موجود تھیں۔ دوجی اہم گل یاہ تھی جے اس ویلے توڑی گوجری تیں متعلق ساری تحقیق جھوں کشمیر تے خاص کر پونچھ راجوری کا علاقہ مانہ ہوئی تھی۔ وائن لیوسی ہوراں کی یاہ تحقیق پہلی جہڑی انہاں نے پاکستانی کشمیر مانہ گوجری ماہر لسانیات ڈاکٹر صابر آفاقی ہوراں کی سنگت مانہ مکمل کی ہے تے جس مانہ گوجری کا مقبول لہجہ تیں علاوہ بکروال طبقہ تے الایہوال طبقہ مانہ بولی جان آلی گوجری پروی تحقیق ہوئی ہے۔ انہاں کی لکھی وی کتاب ۲۰۰۲ء مانہ شائع ہوئی ہے۔ بھاریں یاہ اجاں ات دستیاب نہیں پرائنٹریٹ پر اس تیں استفادو کیو جا سکے۔ گوجری تحقیق کرن آلاں واسطے یاہ تحقیقی کتاب بڑی کارآمد ثابت ہوئے گی۔

چودھری محمد طارق مہیم

پیدائش: 15 ستمبر 1967ء لمبیدی راجوری

محمد طارق مہیم گوجری کا نوجوان لکھاڑی ہیں تے نیا پڑنیا بزرگ گوجری
شاعر محمد اسرائیل اثر ہوراں کاسپوت ہیں۔ ویہ ستمبر ۱۹۶۷ء مانہ لمبیدی مانہ پیدا
ہویا۔ تے بنیادی تعلیم تیں بعد ریاستی محکمہ صحت مانہ میڈیکل اسٹنٹ کے طور
پر ملازم ہو گیا۔

طارق مہیم نالوہکی عمر تیں ہی گوجرا ماحول مانہ اسرائیل اثر جیہی شخصیت کی
شفقت تے رہنمائی حاصل رہی ہے۔ اسے تاثیر نال گوجری مانہ لکھن پڑھنوی
شروع کیو۔ گوجری مانہ چنگی شاعری کریں جہوی اکثر شیرازہ گوجری مانہ شائع
ہوتی رہے۔ اس تیں علاوہ انھاں نے گوجری نثر تے خاص کر کے گوجری
ڈرامہ مانہ وی کچھ کم کیو ہے۔ انھاں نا اس سلسلہ مانہ ریاستی کلچرل اکیڈمی کی
طرفوں اک سال کو بہترین ڈرامہ نگار کو ایوارڈ وی ملیو ہے۔ طارق مہیم مقامی
ادبی تنظیم انجمن ترقی گوجری زبان و ادب دھر مسال کالاکوٹ کا اہم رکن ہیں
تے اس تنظیم کی طرفوں شائع ہون آلا رسالہ سحر ابول کی ادارت مانہ وی خالد
وقانال شامل رہیں۔ ادب مانہ کسے اک میدان کو انتخاب کر کے لکھتا رہیا
تاں ویہ گوجری مانہ ناں پیدا کرن کی صلاحیت رکھیں۔

غزل: ۱

تیرے کول ہوں بیسوں تے کہانی سناؤں
کدے نین ڈوہلوں تے تینا رواؤں

کک دل کی ڈنگھی کنارو نہیں لہسو
محبت کا درداں نا کنگا لے جاؤں

چکوری دیوانی وی کچھے تھی چن نا
میرا یار کس نا ہوں سنگی بناؤں

پیپھا نے وی سوز میرو چھپایو
لکیاں کی سانجھاں نا سرکس کے لاؤں

تیرا سر تیں سدھراں کی دولت گھمائی
نذرانو تحفو ہوں کے لے کے آؤں

غزل: ۲

بدل چڑھو روز برہے گو	بجن بوہے آن بڑے گو
اپنا اک بڈیار کی خاطر	تیرے سنگ وہ روزاڑے گو
جس دن اسکی نیت بدلی	آپ کھننے تے آپ جھڑے گو
سادن گو احساس ہووے گو	شکوہ تیرے سر مڑھے گو
اس بازی نا جتن خاطر	طارق تیرو لہو سڑے گو

گیت:

ہوں گیتاں کی رانی اڑیا
توں چھمراں کو پانی اڑیا

جنگل بوٹا نکا تیرا
ہر جا مانھ ہیں ڈیرا میرا

درد بھری ہے کہانی اڑیا
توں چھمراں کو پانی اڑیا

پیار کی بستی جگ تیں اوہلے
دل کا کوئے بھیت نہ کھولے

کون ہے کس کو ہانی اڑیا
توں چھمراں کو پانی اڑیا

پرلے نکے بیٹھی دیکھوں
نالے اگ بجر کی سیکوں

آوے مُزکد جانی اڑیا
توں چھمراں کو پانی اڑیا

D:\Writers
org\sajad.jpg
not found.

چودھری خاقان سجاد

پیدائش: 1967ء بھلیسہ ڈوڈہ

خاقان سجاد گوجری کا نوجوان تے باصلاحیت لکھاڑی ہیں۔ ویہ بھلیس ڈوڈہ مانھ ۱۹۶۷ء مانھ پیدا ہويا۔ بنیادی تعلیم ڈوڈہ مانھ ہی حاصل کی تے محکمہ تعلیم مانھ استاد کے طور ملازمت شروع کی۔ اپنی تعلیم وی جاری رکھی تے پرائیویٹ طور پر بی اے کی ڈگری لئی۔ گوجری ادب مانھ ویہ تعلیمی دور مانھ ہی جان محمد حکیم سمیت داخل ہويا تھا۔ کلچرل اکیڈمی کی گوجری مجلساں تے مشاعرے مانھ باقاعدگی نال شامل ہوتا رہیا ہیں۔ تے گوجری پڑھن سنن آلاں نے وی ان کی صلاحیت کی ہمیشاں داد دتی ہے۔

خاقان سجاد بنیادی طور گوجری غزل کا شاعر ہیں تے طبیعت ہاروں ان کی شاعری مانھ وی سنجیدگی باندے باچھ نظر آوے۔ انھاں نے مختصر عرصہ مانھ کچھ چنگی سوئی غزل گوجری ادب کے حوالے کی ہیں جہڑی شیرازہ گوجری مانھ شائع ہوتی رہی ہیں۔ تخلیق کو سلسلو جاری رہیوتاں ویہ گوجری ادب مانھ ناں پیدا کرن کی صلاحیت رکھیں۔ کلام: سی حرفی:

الف: اکھ پھر کے بہڑے کاگ بولے ڈیکوں بیس کے سچنا بیلیاں نا
تھاری یاد مانھ بیس کے رات کٹوں چوکوئے نہیں سنگناں سہیلیاں نا
یوہا تھارا مانھ طے جے جا ہمننا لوڑاں کدے نہ محل حویلیاں نا
تھاری گلی کی خاک سجاد مٹھوں تجوں مٹھل گلاب چنپیلیاں نا
ب: بسم اللہ آجا جانیاں جی کتنا بیتیا دور انتظار اندر
رکھیو جگ نے نت لتاڑ ہمننا دکھاں درداں کا اس بزار اندر
ساڑے اگ جدائی کی کالج نا روگی اک ہوں لکھ ہزار اندر
داماں باجھ غلام سجاد تھارو رکھیو اپنا خاص شمار اندر

غزل

تندو تندو کر کے لوئی بیٹھو ہتھ مروڑ نہ یار
بے قیمت ہن سمجھ کے اس نارستا کے بچ چھوڑ نہ یار

کے ہو و جے کسے دھیازیراج کرے تھو مو جاں مانھ
قسمت کا یہ لیکھ سمجھ کے اپنو رستو روہڑ نہ یار

عاجز تاجدوی دیکھوں پیڑ جیہی اک جاگے دل مانھ
پنے ہو کے سردب چلتاں سینے برچھی پوہڑ نا یار

اکھ جاں میچے بے بو جھی مانھ منڈی گوتوں مال گنوائے
کھول اکھاں نا دیکھ چو فیرے میچیں میچیں دوڑ نہ یار

سفر لمیرا ڈاڈا اوکھا جیکر رہیو اڈیک کسے مانھ
وقت دوپہر سجاد آیو ہے، میں کی ہن لوڑ نہ یار

ق:

روئیں اکھ ہجر مانھ میریں لکھیا لیکھ مٹاوے کون
رگ رگ اک عشق نے لائی محرم باجھ بھاوے کون
اکھر اکھر جوڑ بنایا گیت پیارا بیتاں گا
ٹھنڈا ٹھار کورا کا پر بت گالے تے گرماوے کون

D:\Writers
org\sabir
2.jpg not
found.

چودھری ریاض احمد صابر

پیدائش: پہلی مئی 1970ء مڑھوٹ پونچھ

گوجری ادب مانھ خدا بخش زار کو مقام ہمالیہ توں گھٹ نہیں۔ اُن کا بیت چکھلا پنجاہ
سٹھ سالوں تیں لوکاں کا دل تے دماغ پر نقش ہیں۔ ریاض احمد صابر اُنکا پوتا ہیں جہدا مئی ۱۹۷۰ء
مانھ حاجی ممتاز دیدڑھ ہوراں کے گھر پیدا ہويا۔ ریاض احمد ناں بچپن تیں ہی پڑھائی کے نال
نال زار صاحب مرحوم کی صحبت نصیب رہی تے اکثر زار صاحب اپنا کلام ریاض احمد تیں ہی
کاپیاں پر لکھاتا رہیا کیوں جے ویہ آپ زیادہ لکھا پڑھی نہیں کر سکیں تھا۔ اس مجلس کی تاثیر ہو کے
رہی تے دسویں توڑی پچھتاں ریاض احمد آپ وی صابر تخلص کر کے شعر کہن لگ گیا تھا۔ ریاض
احمد صابر کا چاچا حاجی غلام احمد غلام تے نکا بھائی ایاز احمد سیف وی شاعری کی بھوم رکھیں تے
اس طرح زار صاحب جیہا شیر کی یاہ جھر گلڑی اج وی شعر تے ادب کا حوالہ سنگ اباد ہے۔

ریاض احمد صابر میٹرک کی تعلیم تیں بعد ریاستی محکمہ سماجی بہبود مانھ ملازم ہو گیا تے
اجھاں تک اتے سرکاری تے سماجی خدمت کریں لگاوا۔ ریاست کی موجودہ افراتفری مانھ کئی
ذاتی نقصان وی برداشت کرنا پیا تے گھروں بے گھروی ہونو پوے۔ خدا بخش زار مرحوم کا اسلوب
مانھ ان سب دکھاں دردوں تے تجرباں کو اظہار ریاض احمد صابر کی شاعری مانھ دیکھو جاسکے۔
ریاض احمد صابر نے شاعری واسطے غزل کو میدان پسند کیو ہے تے لوہکی عمر تیں ہی
جس قسم کا سیانف آلامضمون اُنھاں نے اپنا شعراں مانھ برتیا ہیں اُنھاں نا دیکھ کے اُن کے
نال نال گوجری غزل کو مستقبل وی شاندار سٹی لگے۔ تے بلاشبہ جدید غزل بارے صابر تیں چنگی
امید رکھی جاسکے۔ کلام کا نمونا:

غزل ۱:

رہجھاں کا پھل پھلیں گا پر ہوں نہیں ہوسوں
بھاند کا قصا تھلیں گا پر ہوں نہیں ہوسوں

یہ امید کا ساوا پتر گلیاں مانھ
پیلا ہو کے رُلیں گا پر ہوں نہیں ہوسوں

ہٹ جائے گو پردو اس بربادی گو
راز بہتیرا کھلیں گا پر ہوں نہیں ہوسوں

بے عدلی کو طور زمانو چھوڑے گو
مُل وفا کا ثلیں گا پر ہوں نہیں ہوسوں

تیری اکھ بھی پانی صابر ہوئے گی
پل پل اتھروں ڈلیں گا پر ہوں نہیں ہوسوں

غزل ۲:

تڑفے بھکھی بھانی آس	میری آس نمائی آس
تیری اک نشانی آس	اپنے پلے سام کے رکھی
کرنی کے بیگانی آس	چھوڑ کے بو ہو آس تیری گو
پھلتی رہی پُرانی آس	جد جد شاخ امید کی چنگری
کس نے فیر منائی آس	صدیاں تیں یاہ رُٹھی صابر

غزل ۳:

پرکھی دیکھی یاری تیری	نہ میں یاد بساری تیری
بے دوساں کو حامی کوئے نہ	بجن دنیا ساری تیری
درد کو داروں پلے ہوتاں	کم آئی نہ کاری تیری
توں پھڑپو نہ نیڑے لگو	لگی دور اڈاری تیری
تیرا سچ ازمایا صابر	دیکھ لئی دلداری تیری

غزل ۴:

کالی رات اندھیری آئی	رہا سوچ گھنیری آئی
آس مسافر تھکی ٹٹی	منزل دور لمیری آئی
سپاں ہاروں ڈسن آئی	خلقت چار چو فیری آئی
جد آئی ارمان جگاتی	یاد ہمیشاں تیری آئی
میری دولت لٹن صابر	قسمت چور لئیری آئی

غزل ۵:

اک نشانی یارا لے جا	دل کا پارا پارا لے جا
تڑنے ساس اداس نمائی	دھکھتی آس کا لارا لے جا
دُنیا کولوں دور چھپا کے	راز وفا کا سارا لے جا
چُجب کے لو ماں کرتا موتی	یاد میری کا تارا لے جا
میرا شعر رسیلا صابر	تحفا پیارا پیارا لے جا

ڈاکٹر جاوید راہی

پیدائش: یکم ستمبر 1970ء چنڈک پونچھ

گوجری کا نوجوان شاعر ادیب تے محقق جاوید احمد راہی ستمبر 1970ء مانہ منیا پڑنیا گوجری مذاہیہ شاعر بابو نور محمد نور کھٹانہ کے گھر چنڈک پونچھ مانہ پیدا ہويا۔ اس آزاد طبیعت شخص نے بچپن کی سوکھتاں تے اوکھتاں کو لطف برور لیو۔ مطالعہ کی شوق نکا ہوتاں تیں تھی تے یوں دسی توڑی پوچھن تیں پہلاں ہی اردو ادب کی چنگی بھوم ہو گئی تھی۔ پونچھ کالج مانہ تعلیم کے دوران ہی تخلیقی میدان مانہ قدم رکھیو، مجلساں تے مشاعرے مانہ شامل ہون لگا تے ادبی زندگی مانہ نکھار آ تو گیو۔ جموں یونیورسٹی تیں ایم اے کرن تیں بعد پرائیویٹ طور پر ”قبائلی زبانوں پر اردو کے اثرات“ کا موضوع پر اسے سال ڈاکٹریٹ مکمل کی ہے۔

راہی ہور تعلیم کے دوران ہی 1992ء مانہ ریاستی کلچرل اکیڈمی کا گوجری شعبہ مانہ ریسرچ اسٹنٹ کی حیثیت نال ملازم ہو یا تے اجکل گوجری شعبہ کا سربراہ کی حیثیت نال ذمے داری نبھاویں لگاوا۔ پرائیویٹ نے خبرے کیوں تخلیقی میدان کو رستوں ہی بسا رچھوڑیو ہے حالانکہ انھماں کے اندر بے بہا خداداد تخلیقی صلاحیت موجود تھی۔

پچھلا دس سالوں مانہ جاوید راہی نے چھ ست کتاب گوجری ادب کے ناں کی ہیں جہاں مانہ ”گوجر شناخت کا سفر“، ”لوک ورثو“، ”گوجری لوک گیت“، ”ہندی گوجری ڈکشنری“، ”گوجری لوک وراثتی ڈکشنری“ تے ”گوجرانسائیکلو پیڈیا“ شامل ہیں۔ لوک ادب کا موضوع پر ڈاکٹر غلام حسین اظہر تے راہی ہوراں تیں بغیر اتنا انفرادی کم کسے ہور شخص نے نہیں کیوتے یوں وی گوجری ادب مانہ کسے خاص موضوع پر لکھن آلاں مانہ انھماں تیں اگے صرف

ڈاکٹر صابر آفاقی تے ڈاکٹر رفیق اعجم ہی نظر آویں۔ انہاں نے ڈرامہ تے تحقیق مانہ ریاستی کلچرل اکیڈمی تیں انعام وی حاصل کیا ہیں۔

تحقیق تیں علاوہ جاوید راہتی نے گجھ کامیاب ڈرامہ وی کیا ہیں۔ شاعری گھٹ کی ہے مگر چھوٹی بحر مانہ صاف ستھری تے معیاری غزل لکھی ہیں۔ تخیل مانہ سرور تی کسانہ تے خوشدیوینی کے قریب سئی لگیں۔ گوجری ادب ان کی شعری تخلیق کو مدت تیں اڈیکوان ہے۔ ادبی سفر مانہ راہتی ہور، نور محمد نور، ڈاکٹر اعجم، نسیم پونچھی تے اقبال عظیم کے قریب ضرور رہیا و ہیں گا پر انہاں نے کسے کی تقلید نہیں کی تے اپنے واسطے آپ رستا تلاش کیا ہیں۔

گوجری ادب تے قوم کی خدمت کو جنون انہاں ناک جا لگن نہیں دیتو تے ویہہ نت نواں موقع تلاشتار ہیں۔ اسے جذبہ کے تحت اجکل ٹرائبل ریسرچ تے کلچرل فاؤنڈیشن قائم کر کے قوم کا سماج سدھار واسطے کئی منصوبہ شروع کیا واپہں۔ جے اُن پر سیاست آلاں کو پچھا ووں نہ پیوتاں ویہ گوجری ماں کو حق انشا اللہ کسے نا نہیں گوپن دیسیں۔

کلام کا نمونا:

ق:

خوشبو یاد پرانی بندے گھر گھرات کی رانی بندے
دل درویش نہیں اپنے جوگو لوکاں نا سلطانی بندے

غزل: ۱

وہ بدل جے برہیو ہوتو آس کو بھانڈو بھریو ہوتو
ہوں دکھ مانہ نہ ڈبوتو جیکر اُن اکھاں مانہ تریو ہوتو
ہوتو میرو عشق وی اُچو جے سولی پر چڑھیو ہوتو
جے ایشانوں اگ نہ برہتی آس گو لُوٹو ہریو ہوتو
مرن تیں بعد ہوں سوچن لگو تیرا در پر مریو ہوتو

غزل: ۲

یوہ احسان وی تم کر دیتا
جے جھولی مانھ سل نہ ہوتا
بھار غماں کو بھارو تھو جے
ہم بے گھر نہ پھرتا جیکر
جے ہم ہار مٹھلاں کا ہوتا
آس کا پنچھی نا پر دیتا
ہوں اڈتو تے ویہ بھر دیتا
ہوں چا لیتو تم دھر دیتا
دل کو سوہنو جو گھر دیتا
ویہ وی ہر نیووں کر دیتا

غزل: ۳

کیسی آفت آن پئی ہے
جد توں تم میرے گھر آیا
ہوں تے چپ ہاں فرکیوں پھاہی
اک دنیا مانھ جا نہیں لہستی
کون سیانے لاش وفا کی
گل بستی سنسان پئی ہے
تد جسم مان جان پئی ہے
میرا گل مانھ آن پئی ہے
اک دُنیا ویران پئی ہے
رستا مانھ انجان پئی ہے

غزل: ۴

کالی رات انھیرا منگیا
اسکے ہتھ وی کلھ نہ لگو
دُنیا دیکھی پر جد منگیا
ہم نا کون خرید سکے گو
تیروسنگ تے موت کی منزل
ہم نے درد انھیرا منگیا
جس نے لو سویرا منگیا
اُن گہلاں کا پھیرا منگیا
ہم تے ہاں بس تیرا منگیا
رستا خوب لمیرا منگیا

غزل: ۵

مڑ مڑ اپنے اندر دیکھوں کتنی وار سمندر دیکھوں
 ہوں سودائی اپنا دل نا تیرے ہاروں کر کر دیکھوں
 توں تے بس میرے گھر آپو تیری خوشبو گھر گھر دیکھوں
 ہوں منصور نہیں ہاں فر وی کیوں نہ ہوں سولی چڑھ دیکھوں
 کد تک تیری آس کو رستو زہر پیالا بھر بھر دیکھوں

غزل: ۶

ناصح کانہہ نا کرے نصیحت اک دن ایسو آوے گو
 دیکھ کے توں وی اُس کافر ور آپ ایمان لیاوے گو

حال میرا پر ہس لے بھادیں پر اتنو بھٹل جاییے نہ
 درد مانھ توں وی غزل میری نا اپنے ہوٹھیں لاوے گو

اپنی گل ہے جہڑی کہ لے یاہی وار ہے تنا
 بے قدراں کا شہر مانھ کہڑو دوجو پھیرو لاوے گو

اج بھادیں وہ میرو نہیں پر جن جن راہیں ٹریا تھا
 تک کے منا ان راہاں پر دوروں ہتھ گھماوے گو

ہر کوئے پیار کو دشمن دسے ہر اک یار زمانہ گو
 کون کسے کا درد نا راہی سینہ کے سنگ لاوے گو

چودھری خالد وفا

پیدائش: 2 فروری 1972ء دھرمسال کالاکوٹ

خالد وفا گوجری کا نوجوان باحوصلہ تے باصلاحیت لکھاڑی ہیں۔ ویہ فروری ۱۹۷۰ مانھ کالاکوٹ کا علاقہ دھرمسال مانھ پیدا ہو یا۔ بُیادی تعلیم کالاکوٹ مانھ حاصل کی تے اجکل ریاستی محکمہ تعلیم مانھ اُستاد کے طور ذمے داری نبھاویں لگاوا۔

گوجری ادب مانھ اُنھاں نا گوجرا ماحول کے نال نال گوجری کا نامور شاعر اسرائیل اُترتے طنز و مزاح کا بادشاہ نذیر احمد نذیر ہوراں کی رہنمائی حاصل رہی ہے۔ تے اسے ماحول مانھ اُنھاں نے لکھا پڑھی کو سلسلو شروع کیو۔ ویہ دھرمسال کالاکوٹ مانھ عرصہ توں قائم مقامی تنظیم ”انجمن ترقی گوجری زبان و ادب“ نال وی بُجویا رہیا ہیں تے پچھلا چار سالوں تیں اس تنظیم کی طرفوں جاری ہون آلا ادبی رسالہ ”سجرا بول“ کی ادارت کی ذمے داری وی بڑی خوب صورتی نبھاویں لگاوا۔

خالد وفا گوجری مانھ شاعری وی کریں تے ان کی کچھ گوجری تخلیق سجرا بول تیں علاوہ ”شیرازہ گوجری“ مانھ وی شائع ہوئی ہیں۔ پر ”سجرا بول“ کا اداریاں کی طرز تحریر تیں گوجری نثر پران کی گرفت توں علاوہ انکے اندر تنظیمی صلاحیت کو انداز وی لایو جاسکے، جہوی گوجری ادب واسطے بڑی خوش بختی کی گل ہے۔

گوجری کا معتبر تے بزرگ شاعر اسرائیل اثر کی سرپرستی تے خالد وفا کی ادارت مانھ شائع ہون آلو رسالو ”سجرا بول“ گوجری صحافت کی تاریخ مانھ پہلو غیر سرکاری خالص گوجری ادبی رسالو ہے۔ جس واسطے ویہ مبار باد کا مستحق ہیں۔ اللہ انکا جذبہ نا قائم رکھے۔

D:\Writers
rg\hakeem.jp
not found.

چودھری جان محمد حکیم

پیدائش: 11 فروری 1972ء بھلیس ڈوڈہ

جان محمد حکیم گوجری غزل کا نوجوان، سوہنائے سنجیدہ شاعر ہیں۔ وہ بھلیس ڈوڈہ مانہ فروری ۱۹۷۰ء مانہ پیدا ہويا۔ بنیادی تعلیم اُتے حاصل کی۔ تے محکمہ تعلیم مانہ استاد کے طور ملازم ہو گیا پراپنی تعلیم کو سلسلووی جاری رکھیوتے بی اے تیں بعد سیاسیات مانہ ایم کی ڈگری وی لئی تے اچکل ڈوڈہ کا گوجر ہوٹل مانہ معاون نگران (وارڈن) کے طور پر ذمے داری نبھاویں لگاوا۔ تعلیم کے دوران ہی خاقان سجاد کے سنگ گوجری کانفرنس مانہ شامل ہون لگا۔ تے اقبال عظیم کی پارکھ نظراں نے یہ موتی پچھان لیا۔ دیکھ دیکھتاں انھاں کی تحریر مانہ ایسوکھار آگیو جے ہُن گوجری غزل نے انھاں نال لمی تاہنگ لالی ہیں۔ غزل مانہ رواقتی رنگ کے نال نال انھاں نے خالص گوجرا لفظ تے نواں مضمون وی بغیر جھول تیں بڑی مہارت نال اپنا شعراں مانہ پر دیا ہیں۔ جان محمد حکیم ہوراں نے جے گوجری غزل نال خلوص قائم رکھیوتے اپنے توں پہلے وارڈن بنن آلا لکھاڑیاں کے پیریں پیر نہ دھریا تاں گوجری غزل وی انھاں کو ناں مُد تاں تک نہیں گمن دیسیں۔

کلام:

غزل: ۱

نفس کی خاطر گجھ وی کرنو چنگو نہیں	اپنا آپ تیں مچ ہی ڈرنو چنگو نہیں
کس مانہ جانے سب ہوئے گویٹھو و و	ہراک نہر مانہ ہتھ وی دھرنو چنگو نہیں
راہ بشکاریں سنگت چھوڑ کے ڈبے گو	چین کے نالو نال گزرنو چنگو نہیں
ریس دو جاں کی کرنی ریت زمانہ کی	پیر بیگانے پیر وی دھرنو چنگو نہیں
کنداں کی وی نظر سٹکر لگے جان	ہراک شیشے بن سنورنو چنگو نہیں

غزل: ۲

آؤ درد نھیرا بنڈاں
میرا غم نا کھا کے پرکھو
لوء کو گجھ تے سوچو ہن وی
آپے وقت گواہی دئے گو
وے اک ہو کے چن پر چڑھیا

چان لادواں نھیرا بنڈاں
اس راہ غم بہتیرا بنڈو
کد تک یار اندھیرا بنڈاں
سر بنڈاں کہ سہرا بنڈاں
ہم ات تیرا میرا بنڈاں

غزل: ۳

اُنکا قول قرار ہیں ہو چھا
دل نا تھم کے رات گذاریں
خبرے کتنا ہڑھ چاڑھیں گا
ست سمندر چپ کراویں
چپ چپنا سینو چھلیں

میرا وی اعتبار ہیں ہو چھا
بستی کا زردار ہیں ہو چھا
امبر مانھ بدلا رہیں ہو چھا
دریا کا کڑکار ہیں ہو چھا
اُنکے نین خمار ہیں ہو چھا

غزل: ۴

درد میرا نا کون پچھانے
کس نا کے ہے پیڑ کسے گی
اُس نے درد کو تحفو دتو
پل پل یادنا سانجھ کے رکھوں
نہیں تاں منا کون پچھے تھو

زخم اندر کا کہو جانے
اوہی جانے جھرو چھانے
میں وی رکھو دل کے خانے
میت گیو ہے دلیں بیگانے
لوک گنیں بس تھارے بہانے

D:\Writers
org\Y
Rabbani.jpg
not found.

چودھری محمد یونس ربانی

پیدائش: 1972ء ساچ راجوری

نوجوان صحافی، شاعر تے ادیب یونس ربانی ہور راجوری کا گراں ساچ ماں 1972ء ماں پیدا ہویا۔ بنیادی تعلیم ساچ تیں حاصل کی۔ بعد ماں ڈگری کالج راجوری تیں بی اے تے جموں یونیورسٹی تیں ایم اے کی ڈگری حاصل کی۔ ویہہ بڑا صلاحیت نوجوان ہیں جہڑا کسے وی میدان ماں اپنومقام بنا سکیں تھا۔ پرائنٹاں نے اپنی پسند تے مرضی نال صحافت کا میدان ماں قدم رکھیو ہے جس کی قوم ناسخت ضرورت تھی۔ اللہ انھاں نا چراغ حسن حسرت، شمیم احمد شمیم تے سروری کسانہ کارستہ پر ثابت قدمی تے صحافت کی تقدیس بحال کرن کی توفیق دے۔

یونس ربانی ہور کجھ مقامی اخباراں تے علاوہ انسانی حقوق کا اداراں نال وی وابستہ ہیں تے ریڈیو کشمیر واسطے اخباری نمائندہ کی ذمے داری وی نبھایں لگاوا۔ یونس ربانی ہور ماں نا اپنی قوم، زبان تے کلچر نال گوڑھی دلچسپی ہے تے ویہہ نوجوان نسل واسطے مثالی جذبہ رکھیں۔ گوجری ادب ماں ویہ پچھلا دس سالوں توں باقاعدگی نال لکھیں۔ انکی کہانیاں تے تحقیقی مضمون شیرازہ گوجری ماں شائع ہوتا رہیا ہیں۔ پر صحیح معناں ماں انکا جوہر گوجری غزل ماں کھل کے باندے آیا ہیں۔ ویہہ ٹھیکہ گوجری زبان ماں مچ سوخی غزل لکھیں۔ چھوٹی بحر ماں لکھی وی انکی غزل پڑھن سنن آلاں نے بہت پسند کی ہیں شائد اس واسطے وی کہ انھاں نے خالص گوجری دردوں تے جذباں کو اظہار اس آسان تے خوبصورت انداز نال کیو ہے جے پڑھن آلاں نا انھاں ماں اپنا دکھاں دردوں کو چھاموسٹی ہوئے۔ بہر حال گوجری کا قدر داناں، سخن وراں تے سخن شناساں نے انھاں کی اٹھان دیکھ کے انھاں نال مچ امید لائی ہیں۔ جاوید راہی، جان محمد حکیم، ریاض احمد صابر، ادریس شاد، گلزار تبسم تے یونس ربانی ہور ماں کا ہتھاں ماں گوجری غزل کو مستقبل محفوظ نظر آوے۔ مہارا اکثر باصلاحیت نوجوان تھوڑا اگے چل کے رستہ تیں کھنچ جائیں ہوئیں۔ اللہ انھاں کی حفاظت فرماوے، یا ہی میری دعا ہے۔

کلام کا نمونہ:

غزل: ۱

بھلتی واء وصلوں کی لے کے پھلاں کا ہر کار ماں آئیے
اس برہیا ہوں گیت لکھوں گولوں کا ٹھنڈیاں ماں آئیے

دھندلی رات غماں کی کالی، من کو ساون یاد کرے
اتھرواں کے برہتے بدل سیویں بوند پھوہار ماں آئیے

راہیں پہرے دار بنا کے رکھے گو دل آساں نا
جند سو وار گھاؤں بجاں، سوئی رت بہار ماں آئیے

تاہنگ تیری تڑاؤے ہر پل ساعت صدیوں لمی دے
نین ہسیریں، دل بھکھیا لو، سہکوں انتظار ماں آئیے

بوٹے بوٹے گاویں پکھوں، دکھیا اک اک بول کرے
سبز پنجال پہاڑیں بکتا، چھمراں کا شوکار ماں آئیے

غزل ۲

بجن بھل بھلا کے ٹر گیو	ڈمھ سینہ ماں لا کے ٹر گیو
جس کی خوشیں ہتھ گھمایا	وہ غمگین بنا کے ٹر گیو
لمی اڈیک عمر کی میناں	اسے حال کھلا کے ٹر گیو
وصلاں کا ٹھنڈیاں نا سہکوں	کتو دل تپا کے ٹر گیو
مینا بخت بچھوڑو گھلیو	ہوچھو ہتھ ملا کے ٹر گیو

غزل ۳

جت دل کا محرم یار بسیں
اس دل دکھیا ماں ہر ویلے
اک پریت کو بوٹو دل میرو
اک دل میرا کا ٹاپو ماں
ات سیال ربائی آنو ہے
غزل ۴

بھادیں کھل کھل تھکیے یار
چادر نال مٹھلا کی اس راہ
بن بن شوئی موٹھا اُپر
نہ تندور کی مٹی ہاروں
یاری لا کے توڑ نبھائیے
غزل ۵:

جیتاں قسمیں دل سڑے گو
گھٹ کلاوا لا کے ملے
سارو جگ ہنر نے تجھو
اتنی لمی فرصت لے کے
بکیو وہ اک اتھروں پیارو

موٹی مٹی نا تاپ چڑھے گو
میرے سنگوں جد بچھڑے گو
آزر کتنا بت گھڑے گو
کہو چٹھی روز پڑھے گو
سُسر ماں یوہ لعل جھڑے گو

حافظ محمد امین خان مدنی

پیدائش: 4 مارچ مالگام 1973ء بانہال
مشہور عالم دین، حافظ قرآن تے اسلامی محقق مولانا امین مدنی ہوراں کوناں دینی تے ادبی
حلقاں مانہ جانو پچھانیو ہے۔ قرآن پاک کا گوجری ترجمہ تے مدینہ پاک کی نسبت نال صدیاں تک
انشاء اللہ ان کوناں زندہ رہے گو۔

ویہ مارچ 1973ء مانہ بانہال (ضلع ڈوڈہ) کا گراں مالگام مانہ مولانا محمد میر حسین خان
گھیلا کے گھر پیدا ہویا۔ بنیادی مروجہ تعلیم کے دوران ہی اسلامی تعلیم آ لے پاسے مڑیا تے 1988
مانہ الکلیہ السلفیہ توں عربی کی تیسری جماعت پاس کی تے اگلے ہی سال عربی زبان کی تعلیم واسطے
اسلامک یونیورسٹی مدینہ منورہ مانہ چلے گیا۔ تے 1997ء مانہ اسے یونیورسٹی توں عربی کے نال نال بی
اے کی ڈگری وی امتیازی حیثیت نال حاصل کی۔ واپس آ کے کشمیر یونیورسٹی توں ایم اے عربی کر کے
اجکل سلفیہ عربی کالج سرینگر مانہ عربی کا لیکچرار کے طور ڈے داری نبھادیں لگاوا۔ پر تعلیم کو سلسلو
اجھاں وی جاری ہے۔ ویہ کشمیر یونیورسٹی توں ہی اسیلے ایم فل کریں لگاواتے آئینہ ڈاکٹریٹ کو
ارادور کھیں۔ ان کی تحقیق کو موضوع ہے:

"Contribution of Kashmiri scholars to Quranic Sciences."

گوجری ادب نال ویہ 1988ء توں وابستہ ہیں تے اکثر اکیڈمی کی مجلساں تے کانفرنساں
مانہ شامل ہوتا رہیا ہیں۔ انکا کئی تحقیقی مقالہ وی ریاستی کچرل اکیڈمی کا شیرازہ (گوجری) مانہ شائع
ہوتا رہیا ہیں۔ ان کو اصل کارنامو قرآن پاک کو گوجری ترجمہ ہے جہڑ وانھاں نے 1999ء مانہ مکمل کیو
تے اجکل اشاعت کا مرحلہ مانہ ہے۔ اس ترجمہ مانہ انھاں نے اسلامی تعلیمات پر اپنی صلاحیت
دن کے نال نال جہڑی ٹھیٹھ گوجری زبان استعمال کی ہے اس واسطے ویہ مبارک کا مستحق ہیں۔
اجکل ویہ عربی کا استاد کے طور خدمت تے اپنی اعلیٰ تعلیم کے نال نال محمد فواد عبدالباقی کی
مشہور کتاب 'اللؤلؤ والمرجان' کا گوجری ترجمہ کام مانہ رھیا واپس۔ جہڑی گوجری ادب تے قوم
واسطے اک بڑی خدمت ہوئے گی۔ دعا ہے کہ اللہ ان کی عمر تے قلم مانہ برکت دے تے انھاں ناقوم
تے زبان کی مزید خدمت کی توفیق دے۔

D:\Writers
org\r
shahid.jpg
not found.

چودھری محمد رفیق شاہد

پیدائش: 29 ستمبر 1976ء حویلی پونچھ

رفیق شاہد ہور تحصیل حویلی ضلع باغ کا گراں شی بن ماہ ستمبر ۱۹۷۶ء ماہ اک دیدڑھ گھرانہ ماہ پیدا ہوا، بنیادی تعلیم تربیت اتے حاصل کی تے فرجی اے کی تعلیم میں بعد نثریات کا میدان ماہ قدم رکھیو۔ ا جکل ریڈیو ریڈیو پوز اڑکل کا گجری پروگرام ماہ اناکسر کی حیثیت نال اپنی قوم تے زبان کی خدمت ماہ مصروف ہیں۔ خوبصورت زبان بولن کے نال نال جدا نھاں نے قلم کی مہارادب آلے پاسے موڑی تاں نثر تے نظم ماہ وی کامیاب تجربہ کیا ہیں۔ بھاویں انھاں نے اردو شاعری تے افسانہ نگاری کے نال نال گجری نثر، ترجمہ تے کہانیاں ماہ وی کامیابی حاصل کی پر بنیادی طور پر وہیہ گجری غزل کا شاعری لکھن تے لکی۔ بحر ماہ انکا کامیاب تجرباں نا دیکھ کے گجری غزل کا عاشقان نے انھاں نال مستقبل کی مچ مچ آس لائی ہیں۔ انھاں نے ہن تک جہڑی کتاب تیار کی ہیں انھاں کی تفصیل کجھ اسطرح ہے

گجری شاعری: (۱) گلزار غزل کو (۲) نسر تیں آس

گجری نثر: (۱) سیف الملوک (گجری ترجمہ) (۲) کرکٹیاں کی لوء (گجری افسانا)

اردو ادب: (۱) گم نام محبت (اردو افسانے) (۲) مہک (اردو شاعری)

اللہ انھاں کا ادبی ذوق نا قائم رکھے تے اکی قلم ماہ تا شیر بخشے تا نچے دیہہ دیر تک مادری زبان کی

خدمت کر سکیں۔ پیش ہیں انکا کلام کا نمونا:

غزل:

اینویں کیئویں رو نہیں سکتو تیرے ہاروں ہو نہیں سکتو
 جے نہ تڑو کے دل کو ڈھارو نیناں کو چھت چو نہیں سکتو
 تیرو داغ جدائی آلو ایسو ہے کہ دھو نہیں سکتو
 تیری یاد چھاوے کنڈا رات دھیازی سو نہیں سکتو
 دل گنواو لیکن اپنی چند نمائی کھو نہیں سکتو

غزل:

رات اندھیری مک جائے گی دہہہ تیں ڈرتاں لگ جائے گی
 جے نہ آو، دھو کھو دتو جان میری تے سک جائے گی
 بھو میو لگ گیو تاں ڈالی آپے جھک جائے گی
 باندے آ کے ہس گیو تاں ریل غماں کی رُک جائے گی
 دندیں انگلی دے کے سوچے ڈر لگے تھو ٹک جائے گی

غزل:

میری نگری آتو کوئے نہیں اپنے دار بکاتو کوئے نہیں
 پہلاں تے ات میلو رہ تھو اجکل آتو جاتو کوئے نہیں
 مشکل ویلو رب نہ آنے کم کسے کے آتو کوئے نہیں
 ڈنگھی ڈاب عشق کی ڈاہڑی غوطا اس مانھ لاتو کوئے نہیں
 شاہد چھھی مار گیو تھو اس نا آن بچاتو کوئے نہیں

D:\Writers
rg\mushtaq.jp
not found.

مشاق خالد چودھری

پیدائش: ۱۵ مارچ ۱۹۸۰ء درہ نامبلہ اوڑی

مشاق خالد چودھری، گوجری کونو جوان شاعراں مانھ شمار ہونیں۔ ویہہ ۱۵ مارچ ۱۹۸۰ء نا نامبلہ اوڑی کا اک بھر وال خاندان مانھ پیدا ہویا۔ بچپن نامبلہ مانھ ہی گزر یو بچت انھاں نے بنیادی تعلیم وی حاصل کی۔ بعد مانھ پچھلے ہی سال بارہمولہ ڈگری کالج تیں بی اے کی ڈگری حاصل کی ہے۔ بڑا با صلاحیت نوجوان ہیں۔ کتابت تے مصوری کی شوق ہے۔ گوجری تیں علاوہ اردو پہاڑی انگریزی تے موجودہ حالات کی جانکاری رکھین۔ ۱۹۹۵ء تیں بعد اپنا بڑا بھائی تے گوجری کا مذاحیہ شاعر تاج دین تاج کی سنگت مانھ گوجری ادب کو چسکو وی لگو تے اجکل آپے خوبصورت شاعری شروع کر لئی ہے۔ اللہ انکا علمی تے ادبی ذوق ناقائم رکھے تاں ویہہ گوجری واسطے کجھ کرن کی صلاحیت رکھیں۔ کلام:

ریزہ ریزہ ہو کے ڈھ گیو آساں کو وہ محل ہی میرو
اک نجومی کہہ گیو منا تیرا اسکا لیکھ نہیں رلتا

غزل:

نیند ہے اکھیں سو نہ سکوں	اکھ ڈبلاویں رو نہ سکوں
سچو موتی ہتھ مانھ لے کے	کنڈھی مانھ ہوں پو نہ سکوں
شیشو شیشو دل بنا پو	داغ ہجر کا دھو نہ سکوں
درد بھلیٹ کے کتنا رکھیا	عشق کی مشک لگو نہ سکوں
تیرو ہو اکواری خالد	ہور کسے کو ہو نہ سکوں

چودھری گلزار تبسم

پیدائش: ۱۱ جون ۱۹۸۴ء آہرہ بل ٹنگرگ کشمیر

گلزار تبسم گوجری کا نوجوان، باصلاحیت تے ہونہار شاعر ہیں۔ جہاں نے بڑا اعتماد نال شاعری کی شروعات کی ہے جس نا دیکھ کہ ادب نواز تے سنجیدہ لکھاڑیاں نا انکی مناسب حوصلہ افزائی کے نال نال انہاں سنگ مچ مچ امید لائی ہیں۔ گلزار تبسم ہور بنیادی طور پر آہرہ بل ٹنگرگ کارہن آلا ہیں تے جت ویہہ ۱۱ جون ۱۹۸۴ء نا پیدا ہو یا۔ بچپن وی اتے گزریو تے بنیادی تعلیم اتے حاصل کی۔ بعد مانہ بی ایس سی تک کی تعلیم حاصل کر کے اجک ریاستی محکمہ تعلیم مانہ مدرس کے طور کم کریں لگاوا۔ جے ظالم زمانہ کی نظر نہ لگی تے انہاں نے مطالعہ کے سنگ تخلیقی سلسلو جاری رکھیوتاں ویہہ گوجری غزل مانہ نویں بلندیوں تک لے جان کی صلاحیت رکھیں۔ میری سوچ کی وضاحت پڑھن آلاں نا انہاں کا کلام توں ہو جائے گی۔

غزل:

نمونہ کلام:

دکھتا ہانھل سیج سجا کے ڈیکوں تھو	اتھرواں کو ستھرو ڈاہ کے ڈیکوں تھو
تیری قسمیں دینہہ کی رسمیں ، نگی لو	اتھرواں کے نال نہا کے ڈیکوں تھو
ہوں چناں اشمان کھلو نہ کر سکیو	ککھاں کی گھلی بنا کے ڈیکوں تھو
ہوں کوہ طور گے کول نہ بھاویں مچ سکیو	دل ساگر کے کندھے جا کے ڈیکوں تھو
دس ہوں کس را آتو تیری محفل مانہ	رستہ مانہ جے نین بچھا کے ڈیکوں تھو
تیری خاطر دل کو باغ سجا یو میں	کلی کلی پر شبنم لاکے ڈیکوں تھو
سولی چڑھ کے پچھوں تھو جے وہ کت ہے	پریت کی سجناں ریت نہا کے ڈیکوں تھو

غزل ۲:

باجھ تیرے ہوں نت ہسیروں روپ تیرا نا جا جا ہیروں
 بہڑے بہڑے بیچ سجاؤں رستے رستے موتی کیروں
 ریزہ ریزہ دل ہے میرو اتھروں ہو گیا کھیروں کھیروں
 آس تیری مانھ پل پل جیوں پونی کتوں سوت اٹیروں
 فال کڈھاؤں منت منوں حیلہ کر کر تسبیح پھیروں
 تاراں مانھ لوڑوں تھو چانن لاٹ لگی پر گھنمن گھیروں
 ہوں تبسم ہجر نا روؤں روئیں کیوں یہ پنکھ پھیروں

غزل ۳:

راہ لموں تے بھاریو دُور دراڈے ماہی کو ڈیرو
 میری جھگی پریم ندی ماں اُچی نکئی تیرو ڈیرو
 توں ڈٹھو تے چانن لگو تیرے باجھوں گھپ انھیرو
 خاباں کے بیچ درشن دے جا مار کدے اکواری پھیرو
 ہوں تبسم دم دم ڈیکوں میل ہوئے کد تیرو میرو

ق:

غم کا سوز سیلاب مانھ نہاتو آتھرواں کی ڈاب مانھ نہاتو
 دینہہ دوپہریں رو نہیں سکتو رات اندھیری خاب مانھ نہاتو

☆☆☆

☆ حرف آخر

ہمارے ہاں بیشتر ادیبوں اور شاعروں کے کئی چہرے ہیں جن کی پہچان بہت مشکل ہے۔ لیکن ڈاکٹر انجم صاحب کا شمار ان مخصوص ادیبوں اور شاعروں میں کیا جاسکتا ہے جن کا چہرہ ایک ہے اور شخصیتیں کئی۔ میں نے ایسا انکے ادبی کام کے پیش نظر کہا ہے۔ یہ بات حقیقت پر بھی مبنی ہے۔ ڈاکٹر انجم صاحب نے گوجری ادب کے لئے جتنا کام کیا ہوا ہے۔ اسکی تفصیل کا بیان سورج کی کرنیں گننے والی بات ہوگی۔

قارئین اس بات کا بخوبی اندازہ لگا سکتے ہیں کہ زیر نظر مجموعہ میں شامل شعراء کے بارے میں انکے ذاتی حالات اور کلام حاصل کرنے میں محقق کو کون کون سے مراحل سے گزرنا پڑا ہوگا۔ اس سلسلہ میں انکی محنت کسی تعریف سے مبرا ہے۔ تحریر اور اسکے انداز بیان سے اس بات کا اعتراف کرنا پڑتا ہے کہ ڈاکٹر انجم صاحب کو گوجری زبان پر دسترس حاصل ہے۔ تحقیق و تالیف کا کام بڑا محنت طلب اور صبر آزما ہوتا ہے اسکے باوجود محقق نے بڑی ایمانداری سے اس کام کو سرانجام دیا ہے۔ انہوں نے تحقیق کے کام کی تقدیس کو برقرار رکھا ہے۔ میں ڈاکٹر انجم صاحب کے علاوہ ان شاعروں کی خدمت میں بھی مبارک باد پیش کرتا ہوں جنہوں نے ایسا خوبصورت مجموعہ منظر عام پر لانے میں تعاون دیا۔

عرش صہبائی

☆ اعتراف:

دنیا کا کم کدے دی مکمل نہیں ہو سکتا! تے گوجری لکھاڑیاں بارے اس کتاب ناوی مکمل کہو زیادتی ہوئے گی۔ میں دل جان تے ایمانداری نال گوجری لکھاڑیاں تک پوچھن کی کوشش کی تانے نچے انکا کوائف، تصویر تے کلام حاصل کیا جاسکیں۔ اس کم ماہہ یاراں سال کی طویل مدت میں علاوہ جتنی ڈینی تے مالی تکلیف برداشت کرنی پئیں انھاں کی تفصیل لکھ کے احسان جتان کی میری نیت ہرگز نہیں۔ کتاب چھاپے پڑھن کا موقع توڑی جتنا لکھاڑیاں کی تفصیل لکھ سکے واہ شامل کی گئی ہے۔ اس کو یوہ مطلب ہرگز نہیں ہے جن شاعر اں کا ناں اس ماہہ نہیں آیا ویہ غیر اہم ہیں پر اس گل کو بسوس ضرور ہے جے اڈی چا کے دی گجھ لکھاڑیاں تک رسائی نہ ہو سکی تے گجھ مہربان منا حاتمند سمجھ کے ہو ر اچا ہو بیٹھا۔ بہر حال اک بار فر پورا خلوص نال کوشش کی جائے گی کہ ان لکھاڑیاں ناوی دو جاڈیشن ماہہ شامل کیو جائے جہر اس پور تیں رہ گیا ہیں۔

ڈاکٹر رفیق انجم